

國政書局

清代傳記叢書



國政書局印行

清代傳記叢刊·綜錄類⑦  
周駿富輯

國朝耆獻類徵初編(十四)

卷三六至  
卷四五

(清)李桓輯



明文書局印行



國朝書獻類徵初編卷三十六目錄

宰輔三十六

孫玉庭

戴均元

長齡

松筠

四十一  
月  
三  
日  
三  
十  
二  
日

國朝耆獻類徵初編卷三十六

通奉大夫前署江西巡撫江西布政使司布政使湘陰李桓輯  
宰輔三十六

孫玉庭

孫玉庭山東濟甯州人乾隆四十年進士改翰林院庶吉士四十二年散館授檢討四十五年丁母憂四十七年服闋四十八年充廣西鄉試副考官五十年大考二等五十一年京察一等授山西河東道旋丁父憂五十五年服闋選廣西鹽法道嘉慶元年升按察使二年黔省狃苗不靖地接粵之西隆州玉庭隨疆臣赴勦兼治兵餉事平敘功 賞戴花翎四年三月遷湖南布政使尋調安

徽布政使五月調湖北布政使 命密察安襄鄖荆道胡齊嵩剋  
扣軍需前藩司祖之望扶同徇隱玉庭以竇入告得 旨嘉獎六  
年以軍犯書德發遣廣西求書屬安置善地案覺事涉玉庭部議  
奪職 上念其平日官聲尙好改革職畱任尋以楚省撤兵善後  
事宜辦理妥協 加恩賞四品頂戴時湖北常平社義諸倉節年  
屨支八十餘萬石遠赴鄰省糴補玉庭以經費旣難議加緩急尤  
恐失恃請循舊章於本地富戶分年採買 從之七年擢廣西巡  
撫復二品頂戴會安南阮光纘爲農耐阮福映所逼敏關求內避  
命玉庭馳赴廣西會議比抵桂林福映已滅光纘遣使納款玉  
庭以夷情恭順代爲奏請得 旨允准八年正月福映以其祖居

越裳地本號南越請卽以名國 上不許三月福映復請玉庭奏  
言福映先有越裳古地繼有安南若號以越南則百越之外皆夷  
地旣與兩廣地名有別而於肇錫嘉名之中仍存其舊旣於 國  
家體制得宜而又不致稍開邊釁 允之八月 諭直省倉庫各  
陳短絀實數玉庭覆言粵西庫帑無虧倉穀已補完實貯有 旨  
嘉獎十月調廣東巡撫粵中海盜土匪積年爲商民害玉庭抵任  
後獲巨匪楊亞鹽鄭亞訂等九十餘人會匪關念宗等八十人置  
之法先是雷州盜首鄭一烏石二等劫掠洋面戕害弁兵 命與  
總督倭什布籌議堵剿九年八月奏言洋匪來往無常兵船分則  
勢單合則顧此失彼且外洋捕盜全憑風信非如陸路用兵步伐



止齊可以決勝故從古治海疆者有海防而無海戰應以添駐兵  
丁嚴守口岸爲第一要務 諭曰注意防守爲保護之計不爲無  
見但所謂海防者非竟置舟師於不用仍應責成營員於海面梭  
織緝捕與防兵互相接應十一月仍調廣西巡撫時廣東潮陽鄭  
馬二族爭地仇殺玉庭督獲兇徒四百八十餘人問擬如律又故  
金鄉令孫映輝生員林哲庇族械鬪奏請褫職科罪有差十年四  
月以巨盜李崇玉逸自請嚴議 上以遲疑乞遷咎在鎮臣 特  
旨寬之六月復調廣東巡撫以失察南海番禺令逮繫無辜鐫三  
級時總督那彥成招撫洋盜給投首之袁阿明林亞發等頂帶銀  
兩玉庭疏言海盜投首多係購線招致並非真心悔罪今置盜罪

不問而加以頂帶重賞兵丁備嘗辛苦欲拔一外委未可得盜則  
驟得千把總頂帶候補恐失兵民之心 命解那彥成職按治之  
復以那彥成演劇宴飲玉庭與同城未劾鐫三級畱任十一年正  
月以路臣夷船來粵求通市玉庭未察情僞率令回國又奸民林  
五通盜濟匪未與督臣會鞠輒先決囚均下部議鐫級二月奏潮  
高雷廉四郡秋審請由巡道勘轉 允之十一月 上以吳川遂  
溪爲洋盜泊舟之所東海土饒地僻尤易藏奸 命疆吏籌法肅  
清十二年二月玉庭奏吳川遂溪入港處有獅子球激沙二門應  
堵塞再建礮臺防守得 旨勸勉十月御史鄒士越以粵東吏治  
廢弛列款條奏 上命嚴覈懲治並以玉庭不加整頓傳旨申飭

之十三年九月英吉利兵船駛入澳門玉庭與總督吳熊光商令  
夷船退出乃許貿易 上以邊疆重地外夷輒敢心存覬覦不此  
之慮而惟鯁鯁於數十萬稅銀往復籌計懦弱不知大體 嚴飭  
之十月調貴州巡撫十一月以英吉利夷船前入澳門時吳熊光  
不親往驅逐玉庭未經劾奏鑄四級十四年四月請裁貴州普安  
縣土把總安順府屬土千總把總外委等六員五月請裁貴州興  
義縣千總均 從之尋以兩廣總督百齡劾吳熊光於英吉利入  
澳門事逾月始奏諸形畏憚玉庭不以實入告罷歸九月 上五  
旬萬壽玉庭來京祝 嘏 諭曰孫玉庭前辦英吉利一事近詢  
之韓對據稱玉庭曾力勸吳熊光迅速入奏熊光不聽其言伊不

行參劾失之輒弱尙非重咎著賞給編修在文穎館行走十五年  
賞三品頂帶授雲南巡撫十一月偕雲貴總督伯麟雲南學政  
汪潤之奏請於昭通府學加額取進文生二名武生二名增設廩  
增各四名蒙自縣學加額取進文生三名武生一名白鹽井學添  
設廩增各四名下部議行十六年三月奏改雲南大理府同知爲  
東川府巧家同知賓川州赤石崖巡檢爲普洱府他郎廳知事四  
月以玉庭視事一年小心無過 命復二品頂帶旋以前在湖北  
布政使任內失察書吏陳文俊等夥用假印給照部議降二級調  
用上加恩改爲革職畱任十八年兼署雲貴總督二十年調浙  
江巡撫二十一年五月升湖廣總督十一月調兩江總督二十二

年五月給事中陸泌奏汀蘇運漕旗丁於兌費外復有借索 上命玉庭酌定章程九月奏言江南漕糧大要在卹丁除弊欲禁州縣之浮收先杜旗丁之苛索欲減幫船之浮費先卹丁力之積疲應卹丁者一在無屯田之賠墊一在無漕委之滋累而弁丁刁難州縣者一在無故停兌開行一在勒指通關米結請籌款生息津貼無屯之丁減省漕委以杜擾累並令州縣於兌竣時以兌單先呈糧道飭令卽出米結不得過五日限 命如所議行十一月劾歷任江都令虧帑 上嘉其破除情面實力整頓二十三年四月山東巡撫陳預以修造戰船木料產自江浙請由南省成造運送來東玉庭奏言江蘇戰船木料遠赴閩浙採購廠員賠累已鉅若

將山東營船改歸江蘇分造無論各員賠累難支且物料並非產  
在江南工匠於山東海船亦非所諳請令東省照例自造以專責  
成 上是之六月奏准南河稽料江柴湖蘆澗溪石價俱酌減一  
成又奏定江西緝私章程贛縣磨角駐緝之通判移駐攸鎮安仁  
縣藍橋原派武員改駐長塘藍橋一卡改委安仁縣縣丞駐巡新  
城之杉關金谿之許灣等處委員向止駐劄一處私梟得乘閒抵  
隙令輪流帶兵四處遊巡南康府屬之青山爲淮鹽入江門戶由  
省按季派委丞倅督率該處巡檢稽驗並防糧船夾帶私鹽於湖  
口縣之梅家洲北姑塘分別設卡派委員弁查放九月奏湖北宣  
昌府鹽捕通判分銷淮鹽向止有缺銷罰扣薪水章程請定情銷

處分俾有專責並令宜昌鎮派弁督兵會同緝私又奏江蘇東臺  
漕糧米少船多請改歸興化通州鹽城三所分裝以節糜費並  
從之二十四年正月奏編查保甲章程 諭曰言易行難言果符  
合何患叢脞勉之閏四月以沿途驛站勞費請將歲解櫻毛改由  
水路運京十一月請撥太湖營千總一員移駐徐州豐汛增置豐  
汛額外外委一員豐汛原設經制外委移駐趙莊集原設把總移  
駐蟠龍集夏鎮外委移駐雙溝集增馬良集經制外委一員楊家  
集經制外委一員裁提標五營暨太湖福山等六營兵七十名添  
趙莊集兵三十九名蟠龍集雙溝集馬良集楊家集各三十名均  
如所請行二十五年六月以違例將在籍守制道員嚴烜奏補徐

州道革職畱任八月 命加太子少保銜九月請增培黃河隄岸  
以工代賑十月奏狼山統轄外洋內河爲東南重鎮出巡弁兵資  
糧營中無閒款津貼查通州之小西洲新漲沙地四千三百畝有  
奇懇撥歸鎮營俾資墾牧皆 允之又奏緝獲海州匪徒胡大成  
等首夥多名得 旨褒嘉時奉 諭清查各省陋規並 諭令督  
撫等明定章程立以限制以期久遠可行玉庭奏言自古有治人  
無治法如果一省之中督撫兩司官得其人則大法小廉斷無虞  
所屬苛取病民儻不得其人則習爲逢迎朘削雖立限制仍同虛  
設弊且滋甚各省陋規本干例禁語云作法於涼其弊猶貪禁入  
之取猶不能不取若准人以取則益無顧忌勢必竭民脂膏而後



已迫發覺治罪而民已大受其累府廳州縣祿入無多自昔以來  
卽不能不藉陋規以充辦公之需然未聞准其加取於民垂爲令  
甲者誠以自古無此制祿之經且不可於常祿外別開取利之門  
是清查徒滋紛擾尤失政體乞停止查辦則天下臣民幸甚疏入  
奉 諭查閱所言剴切詳明此事不但無益於民生抑且有傷於  
國體著卽明白宣示各督撫停止查辦惟在各大吏正己率屬獎  
廉斥貪如有苛取病民之事立加參革釐正則吏治澄清民生日  
臻饒裕矣先是涇縣民徐飛隴被創死於他人門口有司以假傷  
圖詐成讞屍屬徐玉麟詣京訟冤自戕刑部門外 特命玉庭親  
鞠之玉庭廉得正兇審擬如律 上嘉其不辭勞瘁不避嫌怨使

數年不白之冤一旦昭雪卒成信讞交部優敘道光元年二月請  
停淮南北口岸鹽斤加價略言鹽務疲敝之端有四一積引過多  
一庫儲過絀一成本過重一商力過乏其故總由私鹽充斥惟減  
價乃可敵私銷引方能裕課章人 上命通盤籌議復言正本清  
源必自輕減成本始前因南河工費加價三釐今工竣已久應將  
三釐減除 從之尋授協辦大學士畱兩江總督任三月入 覲  
上語及淮鹽引壅課絀 命籌議疏銷玉庭請變通楚岸輪轉  
之法略言楚省漢口爲淮南售鹽總岸向來鹽船到岸聽商店行  
販隨時交易是以年年暢銷自乾隆年間鹽道保定立封輪之法  
凡鹽船運到卽由鹽道加封按到岸先後挨次輪售商情不便私

盛得乘閒侵越因臆陳六害請改復舊章得 旨委曲詳盡深合  
機宜六月奏准淮安徐州二府改題缺玉庭之議漕務也以幫費  
不能盡裁陋規不能盡革浮收不能盡去奏請酌定限制八折收  
漕尋御史王家相奏言事類加賦 上命玉庭悉心體察不可迴  
護前議會戶部侍郎姚文田湯金釗皆陳其弊得 旨著有漕各  
督撫通飭所屬杜絕浮收以清其源裁革陋規以遏其流務須官  
民旗丁均免擾累以肅漕政十月奏准江西南贛各屬秋審及軍  
流人犯歸巡道覈轉竊兼署江南河道總督十二月玉庭七十生  
辰 御書平格延釐額撫循南國宣猷遠協贊黃扉受福多聯句  
并服物 賜之以擒私梟李克標首夥并仗頭嚴興魯等數十人

獲兵器私鹽無算得 旨嘉勉二年正月京察 上以玉庭整理  
地方察吏安民克副封疆重任下部優敘二月奏民間私造烏槍  
立限收繳申明例禁酌免處分又奏泰興營汛官少兵單請循舊  
章置把總二員增置外委一員兵丁四十五名以資巡防三月請  
疏濬銅山境內荆山橋河道四月奏三省交界營汛酌定會哨章  
程六月奏淮北收買餘鹽改運章程均如所請行又奏酌立減黃  
河埝修守章程得 旨准於峯山河埝緊要處所添設千總一員  
協防二員效用二員河兵一百名其天然閘河埝著設把總一員  
協防二員效用二員河兵一百名并籌備歲修經費銀四千兩存  
儲府庫酌發千把總承領責令隨時督率協防兵夫周歷防護七

月河南新蔡教匪朱鳳閣與安徽阜陽教匪邢名章自新蔡起事突入安徽潁州境玉庭飭屬剿捕不及旬日蕞事上深嘉之九月以秋汛安瀾下部議敘十月酌議變通堵緝鄰私章程一原設巡卡請分別裁併增設一文武員弁請覈實考定功過一員弁巡費請按獲私多寡分別扣發一嚴禁私梟請先指拏窩囤一兵役緝拏大夥私梟請准酌帶烏槍下部議行又奏山陽鹽城等縣應疏河道懇借款挑修允之十一月奏獲洋面逸盜張扣二并販私各犯八十餘人暨船隻兵器得旨嘉獎十二月奏江都縣瓜洲河道淤塞請撥款疏濬諭曰果於水利民生有益何吝多金總在認真經理也勉之三年正月以衰老辭職上鑒其公誠慰

留之三月請築宿北廳夏家馬路并築土壩攔截相機啟放又奏  
徐州屬減黃河堰請分別讓地挑築又請修培碭山護城隄工均  
如所請尋以巨臬穆鳳林劉忠信楊三岡宋五張建禮等先後擒  
治上並嘉之是月又奏狼山鎮屬掘港營所轄林家墩濱海要  
隘距營百數十里僅設防兵三十名不足彈壓請增置千總一員  
外委二員戰兵五十名下部議行五月請將江南葦蕩石營草地  
仍改歸旗丁墾種又奏准徐海三府州屬秋審及軍流徒犯請歸  
巡道勘轉又奏駱馬湖官民灘地分別蓄草收租章程六月奏頴  
州府屬阜陽亳州鳳陽府屬宿州與河南接壤時有紅鬍等匪竄  
入請將鳳頴捕盜同知移駐阜陽之艾亭集作爲撫民總捕同知

宿州時村集增置巡檢一員並於艾亭集方家集暨亳州之減種  
店張村鋪宿州之時村集夾溝驛各增置外委一員并請添潁州  
營存城兵五十名艾亭集四十名銅陽城方家集各二十五名減  
種店張村鋪各十名夾溝驛十名以重巡防七月奏雲騎尉恩騎  
尉世職三年甄別距總督駐劄處遠者請由本省巡撫或提督就  
近考驗其附近總督鎮協各營有隸提標者徑送總督考驗以省  
勞費得 旨允行八月 萬壽聖節 幸萬壽山玉瀾堂 賜十  
五老臣宴玉庭與焉繪圖紀事 御製詩有封疆重寄廉兼幹平  
成奏績慶河黃之句九月奏獲鄰省逃匪端金隴審擬如律十月  
奏獲海州鹽梟張從雲等三十餘人又獲玉富林等四船私鹽萬

餘斤 諭曰卿督率認真盡心公務文武員弁莫不用命可嘉之  
至又奏河道今昔不同請將原設儀徵攔潮閘稅口移駐新城鎮  
得 旨允行尋報秋汛安瀾 上以伏秋雨水過多疊見盛漲玉  
庭督率員弁搶護不遺餘力 嘉之并下部議敘十一月奏清河  
縣水陸衝途請裁淮安府檢校局於清河澗橋置巡檢一員就近  
稽察十二月奏龍江淮關章程六條一商販到關驗放宜速一扞  
量貨物宜平一保家錢戶宜革一繞越偷放宜懲一胥吏措單查  
察宜肅一看關家丁選派宜慎均如所請行四年正月復署江南  
河道總督二月奏河勢漸變請挑直引 從之三月給事中朱爲  
弼奏海口下流壅塞 上命玉庭往勘擇要疏濬五月上言古之



稱三江者曰東江曰吳淞江曰婁江迨後東江失其故道遂以江震下流澱泖一帶歸於黃浦之水當之此東南入海之路也吳淞江西承江震運道東合黃浦尾閘此居中入海之路也婁江卽今之劉河在太倉州境此東北入海之路也婁江之北又有白茆河在常熟昭文縣境分承蘇屬之長洲元和吳縣常屬之江陰無錫諸水下注揚子江尾入海此三江之外別爲一大支也以上皆太湖歸海之要道未可偏廢惟一時工鉅費繁請就太湖下注黃浦一路先行疏濬餘俟次第興修上可其奏是月奏皖省鳳潁泗三府州屬秋審及尋常流徒請歸巡道勘轉六月奏吳淞營濱臨大海爲頂衝扼要之區請於坐落之寶山縣增置把總一員所屬

羅店鎮增外委一員加派兵十名南翔汛所管黃渡鎮增外委一員加派兵五名封家濱加派兵五名以資巡緝皆從之閏七月授體仁閣大學士仍督兩江八月議上江西鹽務緝私章程如所請行十一月以漕船回空遲延下部察議尋以河督張文浩治河乖謬玉庭不早參劾鑄三級畱任會高堰十三堡及息浪庵兩處遇風決口石工掣塌一萬一千餘丈上命尙書文孚汪廷珍往勘解玉庭職十二月文孚等以堰盱潰決情形入奏文浩遭戍伊犁玉庭有心迴護下部嚴議部臣議罷斥諭曰孫玉庭自嘉慶年間總督兩江公事妥協朕親政以來授爲大學士仍管總督事務數年來整頓地方不遺餘力卽如查拏盜梟匪犯節次緝獲數

百名商民均資利益且其操守素好正已飭屬不愧封疆之寄本年因張文浩將禦黃壩堵遲致有高堰漫口之事孫玉庭不早參奏致誤要工咎無可辭本應革職姑念總督事繁河工究係兼轄著改爲革職留任並革去太子少保銜五年正月 命偕漕督顏檢會辦重運五月玉庭奏裏河淤塞酌議盤壩接運需銀一百二十萬兩請就近撥發 上從所請尋又奏在後幫船因河道淺滯不能挽抵原議之高坂頭等處就近盤壩 諭曰上年高堰漫口清水洩枯致本年重運未能暢行是以勉從所請爲借黃濟運之策屢飭詳慎妥辦乃經歷三月之久僅過船二千八百八十隻此外未渡黃者尙有四十幫轉以盤壩剝運請帑至一百二十萬兩

本日復據奏在後各幫不能挽抵原議之處是孫玉庭等全無把握所入奏者無非塞責空談尙得謂之實力實心爲國宣勞之大臣乎孫玉庭既不熟籌於前又復遲誤於後東手無策糜帑病民著交部嚴議尋議視職 上以玉庭宣力有年 賞編修休致六月玉庭等奏察看幫船盤運情形恐致遲誤請援照成案截畱存貯得 旨以前後議辦情形層層貽誤坐失機宜實屬溺職孫玉庭著卽革職以示懲儆方漕船未渡黃時廷臣有海運之請下各督撫會議以窒礙議格戶部劾玉庭等不行海運並請帑不已借黃而黃轉病濟運而運更阻請將滯漕剝價責令玉庭賠繳七成嗣新任督臣琦善奏幫船淤淺狀得 旨孫玉庭身受 三朝厚

恩辦事至於如此自問當得何罪著不准回籍交琦善督令將運  
 河淤墊處挑挖深通所需挑費與魏元煜顏檢分賠九月琦善奏  
 運河請停挑辦 諭曰孫玉庭既免此項挑工賠款其前此淮城  
 以上挑河切灘銀四萬三千餘兩著與魏元煜顏檢分賠完繳十  
 月以賠繳一萬兩運河亦刷滌深通 諭令回籍十四年九月玉  
 庭以乾隆甲午舉人至是鄉榜重逢疆臣以 聞 諭曰前任大  
 學士孫玉庭因公鑄職在籍年逾八旬再遇鄉科洵屬藝林盛事  
 著賞四品頂戴准重赴鹿鳴筵宴用示朕嘉惠耆儒至意十月卒  
 子善寶江蘇巡撫瑞珍戶部尚書孫毓澹浙江按察使

右 國史館本傳

公諱玉庭號寄圃世爲濟甯州人少讀書軒屢有鶴集占者曰鶴  
一品之服主貴鶴長生之鳥主壽因名軒曰來鶴軒又芝草生於  
亭占者曰賢者之祥公旣由進士起家官翰林以風節自持遇當  
道用事者重公欲羅而致之門下公逆其意多方陷公不可得嘉  
慶四年當道者敗時公已由廣西蒼梧道升廣西按察使獨得不  
染 仁宗由是重公公陳臬粵西黔苗亂粵西震動制軍駐潞城  
左右江鎮皆失守惟提督駐西隆舊州距潞城百餘里制軍欲赴  
西林公急止之曰兩鎮雖失利提督全軍尙在賊必不敢越舊州  
制軍止賊果退時有以制軍爲孤注謗公者後公平苗班師制軍  
乃覲升湖南布政使旋調安徽又調湖北時川楚軍興前司以軍

糧不給被大經略所劾制軍預爲地劾公短糧而經略告勝由糧  
草充裕之摺先入 仁宗廷寄獨下公擢公爲廣西巡撫制府大  
慚調廣東呂宋欲占大西洋澳門貿易地違 天朝法公請制軍  
以兵逐之不聽請帥本標以逐之不聽不得已嚴設守備遠巡兩  
月夷人始遁去 仁宗以畏意遣制軍成改公撫貴州甫抵任追  
議不參奏制軍之過革職及 仁宗聞公之請制軍出兵也乃起  
公雲南巡撫公免冠頓首謝曰督臣某爲 國家慎重邊釁非敢  
示弱 仁宗釋還制軍制軍卽在兩湖劾公兵糧不足者公洞悉  
夷情安南王阮光纘爲農耐阮福映所滅 仁宗遇邊疆有事  
命公馳驛往未至鎮南關福映已遣使納款公奏中國之與外夷

不以其國之順逆爲順逆而以其順逆於我 朝爲順逆察福映  
情詞恭順故據情懇 恩俯准得 旨俞允繼福映復表稱其祖  
居越裳請以南越名國公因其稱名與趙佗無異駁回福映猶懇  
代奏乃密陳奉 旨阮福映先有越裳績得安南卽以越南錫封  
福映得 旨益畏服緬僧張輔國聚眾數萬據南興蠶食耿馬孟  
連猛拍三土司地掠及猛緬公與制軍親往督勦三勝破其巢輔  
國就戮捷 聞在事文武議敘有差公入 覲 仁宗諭曰汝在  
雲南與伯麟和衷汝二人何以能如此公奏臣與督臣相與以誠  
仁宗喜曰汝等如此朕無南顧憂矣擢兩湖總督旋督兩江  
今上卽位授協辦大學士晉體仁閣大學士逾二年罷歸公總督



兩江最久江南之大務曰漕曰鹽曰河東南困於徵漕公奏州縣  
浮收不如明與八折便民御史參以 國朝不加賦事遂阻然州  
縣困於旗丁轉運之費不能不浮收而輕重懸殊則書吏得上下  
其手而懦民受累後安化陶文毅公每欲均之而太息於公議之  
不行也鹽法之敝極矣十一年 皇上命戶部尚書侍郎整理鹽  
務陶文毅公奏自八年冬淮商改孫某散輪之法爲整輪國課大  
紬公之褫職以借黃濟運之故洪湖高堰決 上遣河帥戍新疆  
命公畱清江催運軍船已渡過半河淤運阻 上革公職當時  
有謂公職催漕河淤乃河帥之咎宜疏辨者公以爲受 三朝厚  
恩大學士職無所不統誤國病民咎所應得終不辨先是道光元

年公七十生辰 上賜福壽字 御賜扁額對聯並文綺藏佛等  
寶時公子善竄官刑部郎 命自京齋送來南爲公壽四年 上  
幸萬壽山宴七十以上老臣繪像玉瀾堂公得與時朝臣有欲均  
天下州縣陋規者公執不可 上贊以爲公忠體國公歷任封圻  
者五十年處田閒八年天下識與不識推嘉慶年間督撫必曰公  
享年八十二卒

論曰 國朝吾鄉得至大學士者數人最著李文襄公劉文正公  
動績載 國史二公之後配之者惟公然二公之壽皆不如公乃  
知公家白鶴芝草非獨爲我 國家得賢之符亦公福祿壽考之  
徵也

國朝詩林卷之三十一

石家傳劉鴻翔撰

戴均元

公諱均元字修原號可亭姓戴氏江西大庾縣人也戴氏祖南唐  
柱國忠恭公世居安徽休甯縣之隆阜紫竹園二十五傳至公曾  
祖諱洪度自隆阜遷江蘇甘泉縣之西浮橋戴家村祖諱時懋攜  
二子旅食大庾考諱珮始著籍爲貢生自考以上三世俱 贈光  
祿大夫曾祖妣湯祖妣傅周梁嫡妣温母江俱一品夫人 國家  
求舊多世德常熟蔣氏桐城張氏漳浦蔡氏陽湖諸城兩劉氏無  
錫嵇氏大庾戴氏皆繼世入相常熟桐城漳浦諸城無錫以父子  
陽湖大庾則叔姪然自 憲廟設立軍機處爲政府內閣唯受已  
成事是故班首百寮而不入軍機與直軍機而官在尙書以下者

猶皆不得爲真相常熟兩相在未設軍機處以前桐城後再世閣  
臣直軍機者唯大庾而已 睿廟時輔政之久莫如文端公而公  
爲其季父文端之父第元官太僕寺少卿者實公伯兄文端之兄  
心亨與公同以乾隆乙未成進士散館皆授編修戊戌文端繼之  
以首選除修撰父子兄弟並在詞垣而主試督學之差星軺交馳  
絡驛道路故其時階雖未崇天下翕然稱西江四戴已無與比隆  
盛者公年十二少僕官翰林矣朱幾主江南試事而公力學勤苦  
如寒素赴課應試率徒步篝鐙山寺誦讀常徹夜泊通籍以迄當  
軸起居服食唯具性坦白無蹊町履封圻居政府一切導人使盡  
言擇其善必推功焉舛誤則以身任勞欲遮蔽人過失使得竭力

比壽登臺臺以相國 予告天下達尊一身俱備地方大吏又率  
門下士及再傳弟子而公恂恂怡怡與故鄉父老話桑麻尋釣弋  
舊蹟誘掖後進若不及接禮賓客雖甚卑幼皆敵體羣從百數居  
鄉黨無子弟之過莫知爲相國孫曾者漢之石氏唐之柳氏不能  
過也嘉慶丁巳文端公超授軍機大臣戊午冬公以學差還都故  
事內外大臣親屬任科道者對品迴避公官掌京畿道例改六部  
員外郎 純廟命以科道應升之鴻臚少卿候補時當 訓政燕  
冀謀至深遠見公才器堪大受將試以事不欲使更滯郎署也次  
年 睿廟親政善繼善述既補實旋改光祿寺少卿庚辰春擢大  
理寺少卿不半年累擢詹事府詹事內閣學士兼禮部侍郎嗣是

四五年間文端柄政公亦洵歷卿貳及總理內務府工程處監修  
督堵馳驅無虛日乙丑冬南河事亟黃溜奪運達瓜洲江口西風  
掣高堰石工瞬息數百丈有藕粉運河碎資高堰之謠公馳往籌  
度空重糧艘以俱達丙寅秋初將北轅忽授南河正督公偕副督  
徐端畫走風沙夜覈文簿堵合黃河之周家堡郭家坊王營減壩  
陳家浦運河之二堡壯原墩高堰之義字壩拆修惠濟正越閘大  
工次第舉矣拜太子少保及花翎之賞而工當修治者尙多積  
勞邁疾不可支戊辰正月得假歸里門四月兩江總督鐵保請帑  
六百萬幫培汰黃隄分別銷攤歸款 睿廟以斯事體大 命文  
端偕覺羅長文敏公赴工審度並 諭文端曰清江距江西才二

千里使事畢卿可一歸省卿叔父故文端紀 恩詩有此去竹林  
勤問訊親傳 天語到柴門之句以須臾不可離之重臣 恩子  
往返四千里以省視公則自漢以來史冊紀載所未聞見蓋 睿  
廟寄重之意已於是乎定矣是年冬公起病左遷都察院左副都  
御史己巳春視順天學不數月以花戶積蠹案須覈辦擢倉場侍  
郎辛未文端薨逝給公假一月爲治喪癸酉秋杪南漕旣歸倉而  
東河睢漫口改東河總督時逆匪竄聚不常曹充濟當運道處伏  
莽尤多又微山湖蓄水短絀不敷浮送公飛飭各糧道以軍法部  
勒柁丁水手戒嚴儻行督河員徧導陂水集湖以濟運空艘得盡  
數南下甲戌春以吏部左侍郎 召途次擢都察院左都御史抵



都督禮部尚書丙子調吏部丁丑以原官協辦大學士戊寅春入直軍機處是冬授上書房總師傅庚辰春拜文淵閣大學士晉太子太保管理刑部七月公偕滿相托文定公扈灤陽圍甫駐蹕

聖躬驟有疾不豫變出倉猝從官多皇遽失措公與文恪督內臣檢御篋十數事最後近侍於身閒出小金盒鎖固無鑰文恪搗金鎖發盒得寶書公即偕文定奉今上即大位率文武隨

瑞邸成禮乃發喪中外晏然公數歷數十年凡有興作率依據成式去已甚不事搔爬為激矯驚眾之行故事辦而無赫赫之名至是乃大服及梓宮還都都下有謂遺詔中措語微誤者事

聞文定及公並退出軍機處上以公先帝老臣派充實錄

館正總裁旋奉 命相度 萬年吉地偕故相國英和督興工作  
甲申公年七十有九諄乞骸骨 上賜詩寵行准馳內河水驛所  
在官護送在籍食全俸乙酉公八十 頒聯扁珍異有加丁亥就  
加太子太師戊子重赴鹿鳴既奉 賜三朝耆舊之額適 寶華  
峪地宮滲水被 嚴旨與英相國同逮籍家產合計田房衣飾才  
值萬餘緡 上意漸解除名放還又十三年庚子九月初七日薨  
逝年九十有五哲嗣詩亨卜以是年十二月十八日葬某所之原  
與夫人合祔禮也夫人崔氏同邑人長於公二歲前公卒十三年  
長子卽詩亨由縣學生蔭戶部員外郎晉郎中侍養在籍以公故  
褫職旋 賞給七品頂帶齒綬曰耄依依膝下如嬰兒人呼爲小

萊子次誠亨晉亨孚亨俱前卒公以晉亨爲叔父馳 贈光祿大夫  
天璠之後孫某某曾孫某某四世孫某某公衡文差任主試者五庚子  
江南戊申湖北俱以編修甲寅浙江以侍御甲子江南以侍郎辛  
巳順天以相國任學政者四己酉四川以編修乙卯安徽以侍御  
庚申山東接任以理少己巳順天以副憲任會試總裁者三壬戌  
以聞學丁丑以參知己卯以軍機大臣一讀乙丑殿試卷一讀甲  
戌拔貢朝考卷教習庶吉士者二水利差督辦河東衡家樓大工  
查南河工程查勘直隸永定河應否改道查看山東張秋運道通  
阻及河南馬工堵築機宜者各一查勘漳河馮宿口及紅花隄應  
否堵築者二馬工之役時當互塞其行也 上手賜酒一卮侑以

黑狐馬褂爲自來遣使所未有內官則充日講起居注官直文淵閣事經筵講官管理戶部三庫歷翰林御史鴻臚光祿大理詹事吏戶刑工四部左右侍郎兼理戶工兩部錢法堂都察院正副堂官禮吏兩部尙書上書房總師傅軍機大臣大學士管理刑部太子少保太子太保太子太師外官則南河倉場東河各總督五十年經手事宜鉅細畢舉唯膺 睿廟特簡欲以公之清慎誠懇變內務府積習使爲總理而三督工程皆以獲咎嘉慶中監修 吉地失察工弊奪一官褫宮銜花翎不旋踵而俱復者 聖明曲體其不逆不億也 裕陵隆恩殿傅金四柱俱丈二圍大木而十五年之頃遽致蠹朽 寶華峪泉涌地宮則皆人意料所不能及

然後知舊例內務府事務不使漢大臣參預良有深意矣公門牆  
至盛登黃閣柄樞廷有與公相後先者躋卿寺持節鉞陟內外臺  
省至百數多有可稱述而陽湖李兆洛荆溪周濟秀水王良士雖  
不達並以博學雄文知名當代唯世臣應童試時公於本署觀風  
集生童至千四百而榜高第止世臣一人世臣故荒落無足道謬  
以名氏爲宇內通儒所齒然風檐中眞賞僅一遇公世臣初隸弟  
子籍卽承召追陪杖履袁浦節署尤爲朝夕馬蘭鎮行館侍談達  
旦習公最久公之葬也世臣與在執紼謹次公行治以詩於麗牲  
之石其辭曰

有福百世忠慕之慶自徽徂揚爲光庾嶺隋端揆席實行相事導

公先路公有猶子公齒初壯已賦鞅掌八十懸車永世耆長日耄  
日期頤神邱壑稱道不倦允矣 舊學公之經德持寶貴讓言各  
有蔽埋憂泉壤

右墓碑包世臣撰

嘉慶二十五年大庾戴公以吏部尚書直軍機拜文淵閣大學士  
國家設軍機大臣凡宰相非兼是官兼是官而位尚書以下皆  
不爲真相惟公與兄子文端公相繼皆以是入相天下以爲榮公  
諱均元字可亭先世自休甯遷甘泉再遷大庾考諱珊爲大庾貢  
生娶溫氏生第元策元銓元娶側室江氏生淑元及公自考以上  
曾祖諱洪度祖諱時懋皆 贈光祿大夫自江太夫人以上曾祖

妣湯氏祖妣傅氏周氏皆 贈一品夫人公以乾隆四十年成進士歷編修御史九卿以刑部侍郎出視河南衡工官吏畏其清斂手歲事工以速成 仁宗以爲賢遷戶部吏部侍郎嘉慶十年黃河奪運河入江西風敗高家堰數百丈 命馳往視工卽授南河河道總督凡三年改定木石工價及開塞修廢所宜次第畢舉賞太子少保花翎以事左轉副都御史改倉場侍郎再出爲東河河道總督復入爲吏部侍郎左都御史禮部尚書 賜紫禁城騎馬是時公年六十九矣遂以吏部尚書協辦大學士入直軍機處兼充上書房總師傅拜文淵閣大學士太子太保 今上卽位以錄 遺詔語有誤出軍機旋 命相度 萬年吉地工程道光四

年公陳情乞休得 兪旨製詩寵行在籍食全俸先是 仁宗賜  
公七十壽衣服珍器宴會二日至 今上復賜八十壽衣服珍器  
聯扁就加太子太師戊子重赴鹿鳴 上親賜書三朝耆舊蓋  
朝廷恩禮於公先後優異如此適 寶華峪地水滲 嚴旨逮入  
都 上以公引咎陳詞得大臣體除名放還後子詩亨孫嘉德皆  
賞還官及舉人道光二十年九月七日薨於南昌里第年九十  
五公情斂志約聰明外周其形神清和舒平動若有餘吐詞流音  
朗潤暢遠識者皆知爲承平公輔氣象始以待從發身嘗任湖北  
及江南正副考官四川安徽山東學政與伯兄太僕公兄子文端  
公若士編修使車往還結轍於道又視學順天主辛巳順天鄉試



興壬戌丁丑己卯會試總裁及闕卷教習門生幾數千人而仁  
宗知公深不與他文臣比四方有大疑獄災患及萬年吉地工  
程戶部三庫事務非親臣不輕領是事皆一以委公蓋仁宗在  
位久以天地覆燾之德挈持綱維含宏羣生而公以耆年長德不  
急功近名合道於仁厚清靜相孚之德固如是也公配崔夫人先  
公卒子詩亨誠亨晉亨孚亨女適陳適黃適溫四女未嫁卒孫某  
某曾孫某某四世孫某某詩亨以是年十二月某日葬公於某鄉  
某原崔夫人合祔告曾亮曰必以銘曾亮故公辛巳科門下士也  
道光二年正月嘗召至第曰吾定拜疏乞休試草其文時遽巡辭  
謝後語座主顧侍郎曰梅生得縣令無柰何且無令遽出京也今

二十年執筆爲公銘追思昔言可痛也夫其詞曰  
廩山建標四戴鍾祥兩爲真相公兼壽昌三十登朝八十致仕  
庸功事樞歷試有煒謂公崇高約志愈卑收迹於先割榮不虧幾  
人百歲身此元老十年川觀晏處勳表我銘公墓不華其詞非我  
有文公實我知詩此碩德以奠龜螭

右墓碑梅曾亮撰

按公考前篇諱琬  
此篇諱珊待考



長齡

公諱長齡字懋亭姓薩爾圖克氏蒙古正白旗人父納延泰官理藩院尙書公由繙譯生員補筆帖式乾隆四十年軍機章京升主事四十九年甘肅逆回田五叛隨阿文成公進剿升員外郎五十二年林爽文亂臺灣隨福文襄公往剿克復大里杙爽文就擒賞花翎五十六年廓爾喀叛擾後藏復隨福公往討平之補郎中遷內閣侍讀學士嘉慶四年遷副都統授右翼總兵官五年川陝楚三省教匪擾達州青號賊徐天德折竄湖北命公爲領隊大臣率兵馳剿八月白號賊高二馬五竄陝命改赴陝西時公道經湖北房縣會藍黃白三股賊至卽與巡撫倭什布會剿由南

漳進攻尋以高二馬五屯洵陽王家坪公率兵分撲斬俘甚眾調  
宜昌鎮總兵旋由鮑家店抄至賊前分隊衝壓斬獲千餘乘勝由  
陳家莊進擊分兵七路晝夜窮追生擒偽先鋒鄒順等餘匪敗竄  
鄧家河公復繞出賊前斬獲五百餘人得 旨獎賚嗣高逆由楚  
竄陝公追勦於白河敗之又折竄楚境公由竹山房縣抄截殲賊  
百餘擒賊目吳登科等尋以徐天德等由陝竄楚與高逆合公由  
獅子巖分路迎截殲賊五百有奇追殺四十餘里又敗賊於瓦房  
口擒斬千餘得 優賚六年正月追敗高逆於楚陝交界之大花  
園會徐逆仍在楚境肆擾公復回楚協勦敗其眾二月賊敗於黃  
沙河燕子溝等處尋探知白號賊苟文明藍號賊李彬由陝竄楚

公倍道扼其東竄之路戮偽總兵卜興昂等於陣會徐逆圖竄襄陽公設伏截擊俘馘盈千擢湖北提督三月敗賊於穀城擒教首黃正魁等百八十人旋敗賊茅倫山殲擒七百有奇邀賞資苟逆尋遁房縣公由紫竹兜繞出賊後擒斬甚眾命署湖廣總督五月黃號賊張萬林從陝東竄郟縣公督兵進剿斬獲無算時藍號冉學勝亦由陝竄楚復迎勦於秦家坪克之六月敗賊渠湯思蛟劉朝選於劉家灣等處八月青號賊由陝奔楚公督兵由上龕統至鐘鼓山奮力截擊箭斃偽元帥李大年擒偽總兵蔣添受殲賊七百有奇均得旨嘉獎十一月黃號賊曾芝秀自興山折竄房縣公由紫竹迎擊至二層巖擒斬甚夥復追至連湖坪敗之旋

率兵迎頭剿捕殲賊四百人僞軍師鄭三元僞元帥褚貴悉就擒  
七年正月殲賊於摩天嶺餘賊遁紅巖溝公乘夜用火攻剿洗殆  
盡二月首逆樊人傑合曾芝秀各股匪竄興巴一帶公由興山會  
剿敗之於高良坪三月賊竄房縣公帥兵追殺二十餘里芝秀中  
箭遁四月殲賊於瓦房溝復敗賊於火石嶺 賞玉鞞荷囊諸品  
五月藍號賊蒲天寶東竄羅溪河公冒雨進攻墜馬落水侍衛富  
翰等救出得 旨獎慰尋知樊人傑曾芝秀竄漁沱偕將軍賽冲  
阿等奮力偏剿樊曾二逆投河死 賞雲騎尉世職七月追剿蒲  
天寶於巴東蒲逆墜崖死公自房縣搜捕餘匪殆盡九月以疾聞  
命回京調治八年以提督銜補右翼總兵尋授古北口提督九

年授安徽巡撫十年調山東巡撫未之任以蒙城教匪余連糾眾倡亂遂帶兵馳剿殲匪黨四百余逆就俘並獲教首李朝上等磔於市 上嘉其迅速十二年五月授陝甘總督六月入 覲時西甯賊番滋事 命馳往查辦八月討平之獲賊目班珠爾貢格等上嘉其迅速再下部優敘尋上善後章程四則 從之十三年冬以前在山東巡撫任內餽欵差大臣廣興銀兩鑄級畱任復以廣興過境時藩司邱庭澂稟明動帑辦差公置不究坐褫職發伊犁效力九月 賞藍翎侍衛克科布多參贊大臣十五年遷三等侍衛調烏里雅蘇臺參贊大臣十六年授河南巡撫尋以前在科布多收受伊犁將軍餽送馬匹濫與供支干部議十八年九月復



授陝甘總督十二月岐山匪徒萬五等因木廠停工乏食糾眾滋事 命帶兵剿捕十九年正月擒萬五磔之乘勝進擊斃賊六百有奇生擒陳四等三百餘名得 旨優敘 賞玉韞荷囊尋殲賊渠吳抓抓於黃官嶺龔貴於階州漢江南北均肅清 賞騎都尉世職並賞還花翎條上善後事宜五則尋 命爲伊犁參贊大臣二十一年授伊犁將軍二十二年復授陝甘總督二十三年劾陝安總兵劉管城任性乖謬甯夏總兵游棟雲違制坐轎私役兵丁請褫職嚴議有差二十四年冬入 覲明年春回任 命兼署西甯辦事大臣道光元年以陝甘山嶺崎嶇請裁減馬兵額以步兵改補 從之加太子少保協辦大學士甯總督任公請入 覲會

山西巡撫成格劾學政陳官俊毆差納妾等款 詔均解任 命公於來京陛見之便暫署山西巡撫按其事尋疏言參款不能指實請分別嚴議奏入成格降主事官俊降編修二年正月署直隸總督適河北九族野番滋擾 命回陝甘總督任相機辦理三月檄總兵穆蘭泰馬騰龍等擊賊於克克烏蘇等處戰屢捷復敗之於烏蘭哈達及幫隴山中斃賊二百賊大潰追剿至駱駝山盡殲之奏入 賞換雙眼花翎時 上御養心殿對雨捷報適至因親書御製詩扇賜之六月條上善後八事如議行旋授閱兵大臣文華殿大學士管理藩院事八月 命還朝十月以青海野番於奏凱兩月後復過河搶掠奪雙眼花翎仍帶花翎十一月回京

賜紫禁城騎馬三月 命充軍機大臣經筵講官管理戶部三庫  
 事充繙譯會試正考官歷充殿試讀卷官四年稽察欽奉 上諭  
 事件處十二月以大學士授雲貴總督五年調陝甘總督未幾授  
 伊犁將軍六年六月逆回張格爾入卡滋擾陷喀什噶爾英吉沙  
 爾葉爾羌和闐四城 詔以公為揚威將軍陝甘總督楊遇春山  
 東巡撫武隆阿為參贊率諸軍討之十月師抵阿克蘇時提督達  
 凌阿已敗賊於托什罕河張逆復糾黨三千據柯兒坪阻大兵進  
 剿之路公率將弁分路進悉殲其眾得 旨獎賚十一月 上念  
 邊外互寒 賜裘服七年二月師次大河拐賊屯洋阿巴特夜犯  
 大營我師擊卻之越日由中路進剿殲賊萬餘追殺三十餘里擒

賊黨三千餘 上以公忠勇可嘉晉太子太保張逆復糾賊十餘萬抗拒於沙布都爾莊我師奮勇抄擊偏至渾水河痛殲之進剿阿瓦巴特大兵三路掩殺俘斬二萬有奇復追至洋達瑪河搜殺淨盡捷 聞 賞用紫韁三月移師渾河沿克復喀城四月復英吉沙爾葉爾羌二城惟張逆竄遁有 旨嚴飭奪紫韁五月賊屯毘拉璜迎拒大軍奮勇夾擊殺賊五千復和闐八月疏言張逆逃往卡外達爾瓦斯之藏堪地方經參贊楊遇春楊芳分途出卡窮追至塔爾克地方斬賊千餘協領都凌阿侍衛色克精阿力戰陣亡 詔切責公奪職畱任九月 命回京十二月偵知張逆奔喀爾鐵蓋山密遣楊芳星夜追之我軍抄入賊後斃賊三百張逆僅

以三十餘騎登山都司段永福等擁至張逆窮蹙將自刎馬甲舒  
興阿兵丁田大武奮力生擒盡殲餘匪八年正月紅旗報捷上  
嘉悅錫封二等威勇公世襲罔替並賞戴寶石頂兩團龍補服  
授御前大臣賞還紫韁換戴雙眼花翎三月授都統時回疆  
平定遵旨回京賜御製詩扇五月張格爾檻送京師上御  
午門受俘禮成晉公太保賞換三眼花翎繪像紫光閣上親  
製贊尋命鄭親王烏爾恭阿禮部尙書松筠等往良鄉迎勞六  
月入覲行抱見禮於勤政殿並賜御用珊瑚朝珠四團龍補  
服諭不必進內侍班用示體恤復授閱兵大臣充總諳達管理  
藩院及戶部三庫事充崇文門監督八月正大光明殿凱宴恩

賞銀幣旋充繕譯鄉試正考官授領侍衛內大臣十一月公生辰  
御書功臣像贊及平格功成扁額黃扉贊化皇辰近紫閣圖勳  
劍佩高聯句 賜之九年充經筵講官署吏兵二部尙書管健銳  
營事務十年署步軍統領九月回疆逸犯博巴克糾結浩罕入卡  
滋擾喀什噶爾英吉沙爾二城 制詔公爲欽差大臣往督軍  
務十月仍授揚威將軍十一月提督哈豐阿胡超等先後統兵進  
拔二城圍解公以從逆者應誅波累者應宥因籌議善後事宜  
上嘉其詳備先是喀什噶爾參贊大臣扎隆阿誣劾伊薩克助逆  
命公及伊犁將軍玉麟會鞫之疏白其誣 手敕報曰若非卿  
二人公忠體國何能平反此獄使內外衷回懾服可嘉之至十一

年八月加太傅九月請以回疆西四城閒地招民開墾以供兵糈

從之十二月 命管理兵部事十二年九月回京 命管理戶

部三庫事十一月補總理行營大臣復充總諳達十三年管理戶

部事十四年 命紫禁城內乘輿十五年以收受浩罕夷使土物

降四級畱任罷 御前大臣及管理部務尋 命兼管理藩院充

崇文門監督是歲 上謁 西陵明年謁 東陵均 命司畱鑰

十六年復 命管理戶部三庫事十七年正月 賞穿四開襖袍

自道光二年至是五次京察皆奉 優詔議敘七月因病乞休

上未允九月復瀝陳入告 慰畱之十月 上親視疾 賞尙方

珍品 温諭有加十一月公八十生辰 詔晉一等威勇公 賜

御書綸閣勳音額及嘉乃壯猷資勳相錫茲蕃祉念戎功聯句他  
珍物稱是十八年薨年八十一遺疏上 天子震悼 詔入祀賢  
良祠 賞銀二千五百兩治喪其一等公曾侯桂輪百日孝滿後  
承襲孫麟慶 賞員外郎俟及歲時當差尋 親臨賜奠 賜祭  
葬如禮 予諡文襄 詔入祀伊犁名宦祠十九年得 旨嗣後  
每次謁 陵禮成後將原任大學士公長齡一併開列具奏派員  
賜奠子桂輪襲一等威勇公官杭州將軍孫麟慶官至漕運總督  
右事略李元度撰



匡章者屏或省元條

卷三十一

寺

松筠

松筠瑪拉特氏蒙古正藍旗人乾隆三十七年由繙譯生員考補理藩院筆帖式四十一年充軍機章京四十二年升主事四十二年升員外郎四十四年充三座塔理事司員四十五年調戶部銀庫員外郎舊例蒙古司員不與銀庫之選松筠經軍機大臣保奏蒙古司員之掌銀庫自松筠始也四十八年京察一等超擢內閣學士兼禮部侍郎銜授鑲黃旗蒙古副都統 賞戴花翎四十九年調正紅旗滿洲副都統 賞穿黃馬褂 命赴吉林查辦邊務五十年 命往庫倫查辦鄂羅斯事務五十一年三月庫倫有官馬逸入鄂羅斯卡座鄂羅斯人獲而獻還松筠傳示各卡嗣後有

鄂羅斯馬誤入官卡者亦如之事 聞有 旨嘉獎閏七月授戶部右侍郎仍留庫倫辦事五十五年有術勒干卡倫巡兵爲鄂羅斯打牲人所害松筠檄緝各犯先行治罪然後具奏 上切責之革退侍郎副都統拔去花翎以四品頂帶仍留庫倫效力贖罪五十六年授工部左侍郎正白旗滿洲副都統五十七年四月調戶部右侍郎復 賞戴花翎七月充蒙古繙譯考試官十月轉左侍郎五十八年二月充崇文門副監督尋授 御前侍衛內務府大臣軍機大臣七月充國史館副總裁時英吉利入貢請於天津甯波海口貿易並求給附近珠山小海島附近廣東省城地方各一處居商存貨 上既嚴諭指駁復慮其沿途生事 特命松筠護

行凡所要求嚴詞拒絕途中安謐有旨嘉其得體九月松筠奏  
遵旨令該夷在船順道觀覽俾知民物康阜景象恬熙惟有隨  
時隨事加意斟酌體會務令知感知畏勉期妥辦得中奉諭命  
汝去可謂得人勉之望汝回來面奏耳五十九年正月署吉林將  
軍六月命查辦湖北荊州稅務道出河南衛輝值霖雨衛河水  
驟長數丈淹浸民居松筠躬率牧令開倉賑恤疏入上以松筠  
奉差經過並不置身事外實心可嘉賞給大小荷包下部優敘  
七月升工部尚書授鑲白旗漢軍都統尋充駐藏辦事大臣嘉慶  
四年正月召還京調戶部尚書二月授陝甘總督加太子少保  
銜初松筠駐藏時達賴喇嘛濟隴呼圖克圖等報稱西南邊界有

廓爾喀之兵松筠訪知廓爾喀係向定結邊外等部帶兵索欠並無他故恐唐古忒番民疑懼特於喀達定結帕克哩等處親往捐循並借川省藩庫銀五千兩籌議撫恤窮番修建鄂博寨卡各事宜至是請扣陝甘總督廉俸解歸四川時川陝楚三省教匪滋事黃號逆匪張漢潮與藍白兩號之黨由楚入陝又竄甘肅五月松筠抵陝後疏陳賊匪情形因言前奉 恩旨招諭脅從雖已騰黃曉諭恐賊隊中尙未盡知見遣安人潛入賊隊諭令被脅良民能捕獻首逆則當宥罪施恩卽臨陣投降亦令給資回籍又復徧諭村鎮與其避賊而焚掠一空莫若團集而勢操全勝抵禦殺賊者定加獎賞擒獲渠魁者奏于職官疏入 諭曰松筠甫入陝境所

辦已得要領留心軍務忠悃可嘉時有千總向明山帶同鄉勇五十二人巡緝被秦州鄉勇蕭復有等疑其爲賊盡遮殺之松筠奏言此案若問以擬抵恐各路鄉勇心懷畏怯遇有真賊不敢堵截但向明山無辜被戕情殊可矜請照陣亡例議卹蕭復有等照過失律擬絞收贖 從之陝西自嘉慶元年軍興以來其撥餉銀一千一百萬兩至是續撥銀一百五十萬兩 上命松筠駐紮漢中督辦糧餉松筠請移西安軍需局於漢中清查舊款另立新規查明各路官兵數目酌定每日支用銀數由糧員按旬開摺呈局每月彙奏咨部庶案牘易清飭查不難得實得 旨所辦甚是松筠平日廉潔自持故能正己率屬總理糧運必能勝任矣又奏高河

梁金家山陣亡義首張奎樊雄秀請以把總外委議卹其陣亡鄉勇一併造冊咨部 上是之並 諭嗣後各路鄉勇打仗陣亡俱著照松筠所奏一體議卹先是有 旨命訪查領兵各員優劣據實密陳九月松筠密疏副都統明亮久歷戎行素稱知兵所言似合機宜其實罔有成效西安將軍恆瑞前在湖北戰功爲最後勦藍白兩號賊匪亦著勞績惟年近六旬精力大減固原提督慶成身先士卒然中無主見領隊則可出謀發慮非其所長署陝西巡撫永保無謀無勇惟知利己過則歸人惟額勒登保英勇出羣其次則德楞泰亦稱奮勇 上嘉其評論得當初明亮奏參永保駐紮大山岔擁兵不進商州之役永保慶成遷延不進以致張逆脫

逃 上命松筠查訪尋奏永保慶成遷延避賊屬寶 命禠永保  
慶成職 飭交審訊嗣永保偕荊州將軍興肇奏言駐紮大山岔  
係聽明亮指揮並訐明亮數月來從未接仗屢次誑報軍功 上  
並禠明亮興肇職交松筠歸案審辦時明亮已剿斃張漢潮松筠  
請將明亮暫緩究訊又請畱撒拉爾回兵派慶成帶領協同剿賊  
諭曰此等回兵從前爲保護桑梓是以急公趨事若離家較遠  
強以從戎儻稍違約束別生事端轉致礙難辦理見在各路之兵  
已極壯盛張漢潮已就殄滅零星餘匪豈必藉回兵剿辦耶況松  
筠派令慶成帶領以獲罪聽審之人派令領隊豈不爲其所輕至  
另片奏明亮已將張漢潮殲斃審辦自當暫緩尤不成話前旨以



明亮如已將張逆擒獲尙可寬其一綫原指定案後朕覈其功罪量爲寬貸並非令松筠不加審訊也如明亮並未札令永保在大山岔久駐其龍駒寨收關隄莊皆曾打仗殺賊則有功無過朕卽全復其官亦無不可若有心傾陷永保勝仗全屬子虛則其罪甚重卽念其有殲斃張逆微勞量從末減亦應恩出自上非臣子所可妄干松筠意在置之不問是與令慶成帶兵均爲擅權矣著嚴行申飭仍遵旨秉公查訊十一月審結明亮等擬罪如律時工部尙書那彥成奏參恆瑞前棄藍號垂盡之賊折回陝省係接松筠知會 上以松筠種種錯謬革去太子少保銜御前待衛拔去花翎十二月疏言漢中北通褒鳳保障秦中西達略陽控扼甘肅西

南甯羌爲蜀棧咽喉東面洋縣爲駱谷要口從前川陝總督會駐此地其後總兵駐興安漢中設協又有漢興道駐紫城中控馭極爲周密今總兵與漢興道均移設西鄉郡城重地僅一都司不足以資控馭宜移興漢鎮於漢中移漢中協於西鄉甯羌再增一協東西兩協爲漢中鎮之翼商州增立一鎮興安改鎮爲協與潼關協爲東西兩協爲商州鎮之翼五郎本屬西安亦應移置一協仍屬西安將軍管轄再四川提督應移駐達州距西鄉漁渡畱壩不過四五百里其勢可以相接商州設鎮不獨固陝省之藩籬兼可壯鄖陽之聲勢川陝楚相爲犄角碁布星羅絲聯繩貫誠久安長治之策也疏下四川總督魁倫議奏五年正月授伊犁將軍尋

命署理湖廣總督馳往湖北勦賊閏四月入 覲請弛私鹽私鑄  
之禁 諭曰松筠在陝甘總督任內曾奏私鹽私鑄弛禁所見迂  
謬本應嚴議特以平日尙能持正爲有用之材是以不加深責特  
令軍機大臣親書諭旨密爲訓飭而松筠屢稱患病於防堵事宜  
不能妥爲布置猶念其聲名尙好授爲伊犁將軍命赴湖北暫署  
督篆勦賊松筠懇請陛見稱有恩出自上之事必須面奏因准令  
來京乃所面奏者仍係私鹽私鑄請寬例禁經朕反覆譬曉松筠  
固執己見懷摺瀆奏試思私鹽私鑄律有明禁 祖宗定制豈得  
輕易更張且見在私鹽有禁尙有私梟拒捕若設立稅口販私之  
徒悍不交稅又將如何辦理至國家泉幣之權操之自下隳紀綱

而弛法度莫此爲甚松筠以爲所鑄係嘉慶通寶卽非私鑄是何  
言耶若交大學士九卿覈議必議以變亂成法之罪朕念其所言  
究爲國家公事是以命軍機大臣明白傳知松筠自知糊塗冒昧  
懇仍赴軍營效力但伊前往軍營實屬無益著賞給副都統銜前  
赴伊犁作爲領隊大臣並賞戴花翎松筠當力改前非以期稍贖  
罪愆無負朕格外矜全至意七月復授伊犁將軍初乾隆二十九  
年有旨以伊犁田土肥潤飭將軍明瑞等查明地畝分給滿  
洲官兵以資養贍嗣明瑞查明可耕之地甚多請俟滿兵到齊辦  
理迨五十年及五十五年復歷奉諭旨飭令籌畫耕種歷任將  
軍均以灌溉乏水爲詞八年正月松筠疏言臣自上年接任後探

明近水可耕之田由惠遠惠甯兩城酌派閒散試種通計所獲十分有餘本年秋麥又布種一千餘石急當廣行汲引因於惠遠城東伊犁河北岸新開大渠迤邐數十里又於城西北草湖中覓得泉源設法開渠修築隄岸疏引支流其地卽分給惠遠城八旗耕種至惠甯城八旗所耕本係裁撤綠營屯地原有渠泉足資灌溉惟種地必資牛力請於官廠內賞借惠遠城每旗牛八十隻惠甯城每旗牛四十隻庶令邊地駐防兵農並習得旨嘉允二月請設伊犁學額上以不曉事體斥之九年六月有伊犁民人郝鏡致死貴勒赫自行投首松筠審明後卽寘之法上責其辦理過當諭嗣後新疆遇有謀故自首之案不必從重立決伊犁塔爾

奇地方向設水磨派兵碾運麥麪以給兵食時官兵皆願領麥易  
麪松筠請撤此項兵丁分屯耕種從之十二月松筠以伊犁屯  
種有效惠遠城得地八萬畝惠甯城得地四萬畝請照伊犁錫伯  
營八旗屯種之例按名給地各令自耕自食永爲世業經軍機大  
臣議覆以此項田畝祇可令閒散餘丁代爲耕種官兵不當親身  
力作有妨操練上命松筠妥協經理務使兵農不致偏廢十一  
年奏准伊犁南北山場官地木植禁止兵民私採設立商頭官給  
驗票並定抽收數目卽藉以管束民人稽查逃犯十二年賞還  
太子少保銜並頒賜御製明慎用刑說十三年正月奏報惠  
甯城東時出水泉蕩漾房屋多圯請展築城垣移建教場並於城

東挑一大渠引灌田畝六月奏塔爾巴哈臺東北一帶夏閒應設  
卡倫查濟默爾色克卡倫地處山陰不生柴草請移設於博洛呼  
濟爾又請於板廠溝安設塔布圖小卡於稽查哈薩克出入最爲  
有益九月奏請塔爾巴哈臺地方撥兵加屯撥提督所屬中左右  
王營兵二百名前往農隙操演派守備千總外委各一員管轄又  
奏查禁達木達爾圖金廠請於通山路徑安設卡倫派兵防守令  
塔爾巴哈臺庫爾喀喇烏蘇兩處領隊大臣每年按季巡查均  
從之十四年正月塔爾巴哈臺有遣戍蒲大芳等三十餘人聚謀  
不軌松筠偵知其事密遣領隊大臣色爾滾帶兵前往以巡查金  
廠爲名悉數擒戮 上嘉其妥速松筠又以戍兵馬友元王文隴

等一百六十九名皆與逆謀盡邀殺之 上責其辦理苛刻下部  
嚴議 諭曰松筠辦理此案並非濫及無辜惟前奏既屬含糊而  
此一百餘人必應調至伊犁研鞫確實明正典刑原非過當忽於  
半途截殺成何政體在松筠恐事機不密釀成他患然措置未免  
失當姑念其平日操守尙好熟悉新疆情形著賞給頭等侍衛作  
爲喀什噶爾參贊大臣六月以二品頂帶復授陝甘總督詩 賞  
一品頂帶九月奏准秦州營改歸固原提督統轄鞏昌營改歸河  
州鎮統轄十二月調兩江總督江南河道自上年馬港口墊陷黃  
水倒漾河口淤墊爲患十五年二月松筠偕江南河道總督吳璥  
查勘舊海口請修復舊河使全黃仍歸故道得 旨允行時南河



有醫生王勳詣松筠獻疏沙器具圖以堅木爲架每架用鐵百餘斤釘鑲鐵齒以巨繩繫於船尾而行能刷淤沙使河流通暢松筠倣其式製造四十架親自乘舟隨處疏濬果效事 聞 諭曰河口一帶連年黃水倒灌動輒淤墊松筠配製器具督率疏濬前水深一尺餘寸者見已三四尺有餘中泓寬有七八尺實爲可嘉著倣照製造愈多愈妙以期積淤疏濬河道深通俾軍船往來無誤松筠又以比年河口淤淺糧運遲遲請造剝船一千隻停泊禦黃壩外以備撥運並以江廣漕船笨重請照江西漕船一律改小以利遄行均如所請七月奏報重運全數渡黃日期下部議敘十一月以回空漕船渡黃迅速復下部議敘是役也 上聞松筠親赴

河口懸立賞格督催重空每幫數百兩及一二千兩不等 諭曰  
松筠自係爲力趨漕運起見但此項賞銀出於何處計其爲數不  
少非養廉所能敷用松筠操守清廉朕所深信斷不疑其取自官  
民自係向人借貸但借貸銀兩必須完欠勢不得不藉資商力又  
與取之於民何異況賞之一事非可濫施得當則人皆感奮過濫  
則視爲泛常軍船淺阻本所時有惟在認真催趨隨時相機其得  
賞可以挽渡者不賞亦未必停閣若專以賞項爲事年復一年何  
所底止嗣後務當相機經理期臻經久可行不得專以懸賞爲事  
松筠之赴兩江也疏請引沁入衛以濟漕運復疏陳黃河受病之  
由緣吳璥等於黃泥嘴俞家灘二處逢灣取直以致停淤此時亟

應挑復嗣河督陳鳳翔等議覆引沁助衛勢不可行吳璣等奏言  
河水曲則行遲直則流急挑復斷不可行 上責松筠謬執己見  
輕率陳奏傳 旨申飭旣松筠遵 旨密疏吳璣徐端議論河務  
不實辦理工程有虛捏開報情弊另片自求調任總河以便查覈  
又保薦蔣攸銛孫玉庭堪勝此任 諭曰所奏各款必應澈底詳  
查秉公參奏河工敝壞已極人人視爲畏途松筠不但不藉詞推  
諉轉冒銳意自任全是一片公忠實心爲國甚爲可嘉但松筠於  
河務素非所長已降旨將蔣攸銛補授松筠惟當與之實心講求  
相助爲理十二月兼署江南河道總督十六年正月奏報馬港口  
堵閉合龍河復故道並請於南北新隄兩岸各設同知守備把總

協辦把總各一員專駐巡防增設淮海道駐紮中河專管桃北中  
河山安海防及新設兩廳河務下部議行旋調兩廣總督先是粵  
洋患盜籌議鹽船海陸兼運至是松筠以洋面肅清請照舊全由  
海運又疏稱立法之嚴尤貴行法之速粵東懲辦土匪因部覆稽  
遲有瘼斃獄中倖逃顯戮者未能觸目警心請嗣後有夥眾四十  
人以上或不及四十人而有奪犯毆官各情俱先行正法梟示均  
從之六月授協辦大學士兼內大臣仍畱兩廣總督任八月疏  
請改雷瓊鎮陸路總兵爲水師總兵粵東西下路海口龍門海安  
崖州各協營均歸管轄九月奏請增設佛岡廳直隸同知及照磨  
司獄各一並移設千總一把總二外委四裁惠州嘉應二府通判

各一復嘉應府爲直隸州復南雄州爲府均下部議行是月授吏部尚書 命來京供職 賜紫禁城騎馬十七年正月充國史館正總裁五月管理武英殿 御書處事務六月 賞給 御製南苑大閱詩墨刻 上以京城入旗生齒日繁不敷養贍疊 諭吉林將軍等於吉林等處籌度間散地畝酌量移居至是 命松筠前往盛京敬謹會勘 永陵工程並籌辦移駐宗室房地各事宜 八月松筠奏查明西廠自大凌河東岸至禿婆婆店西首有可耕之地三千頃可移駐旗人二千餘戶東廠周圍數百里地多積水其積水皆自北山柳條邊而來若自邊牆相地開河使入川歸海則可涸出沃壤又東柳河溝一帶亦多積水若自北山東由巨流

河至鶴鷹河橫開大渠東水入川歸海亦可得沃壤數千頃又奏  
續勘彰武寧邊門外養什河迤西一帶牧廠開地東西寬三四十  
里南北長六七十里足可移駐並請於大凌河西廠東界一帶酌  
墾田數十頃先行試種 上以東廠柳河溝等處相地開渠經費  
不敷無庸辦理 命盛京將軍於西廠地方卽行試墾九月奏盛  
京小東門外東北里許共建房屋七十所除見給宗室五十五戶  
尙餘住房十五所請將見在閒散宗室添派十五戶每戶給田三  
十六畝 允所請行是月 命仍在軍機大臣上行走管理理藩  
院事務十月管理雍和宮咸安宮蒙古學唐古忒學事務兩江總  
督百齡奏參江南河道總督陳鳳翔數月不赴工次陳鳳翔陳訴

鹽巡道朱爾賡額捏報葦蕩柴束數目不符百齡奏報節省帑銀不實 上褫鳳翔職 命松筠偕戶部左侍郎初彭齡馳往查辦十一月訊明百齡所奏虛誣朱爾賡額委辦蕩柴多雜蒲草名爲增採實則虛糜擬褫百齡職朱爾賡額遣戍並請罷葦蕩左右兩營歷年額外所增柴斤疏入 上以松筠據實辦理毫無瞻徇公正可嘉 賞貂皮馬褂十八年正月授 御前大臣二月京察議敘六月 命以協辦大學士兼任伊犁將軍九月授東閣大學士十一月以平定滑縣逆匪敘功 賞加太子太保銜十九年五月疏言烏魯木齊從前調派綠營兵擇地墾種嗣因積糧漸多撤屯歸伍其屯地六萬餘畝招民領種每戶三十畝徵糧二石八斗八

升九合覈之屯兵每名二十畝交糧十二石者多寡懸殊年復一年倉儲漸少於邊地兵食大有關係請復兵屯舊制 從之八月授武英殿大學士二十年以審辦塔什密里克逆回仔牙墩一案未候 命下將首從均寘重辟 嚴旨切責革去太子太保銜仍革職畱任二十一年正月京察屆期 諭曰松筠近年辦事漸覺任性改常凡所陳奏亦多窒礙難行毋庸給予議敘五月 召還京 命在御前大臣上行走總理諳達處先是伊犁惠遠城旗屯公田與闢里沁回田均藉東山闢里沁泉水灌溉上年阿奇木霍什納扎特等稟請開渠引霍什河水澆灌闢里沁回田以闢里沁泉水專灌惠遠城旗屯公田松筠覈實准行至是以得水豐餘兩



有裨益奏 聞七月管理吏部理藩院事務授鑲藍旗滿洲都統  
復充崇文門正監督八月復 賞穿黃馬褂九月管理健銳營事  
務 賞還太子太保銜十月署兩江總督十一月 上以全唐文  
頒賜廷臣松筠與焉二十二年二月回京四月充殿試讀卷官六  
月奏言三輔亢旱請將來年 恭謁 祖陵典禮暫緩舉行 諭  
曰乾隆四十三年 皇考高宗純皇帝恭謁盛京特降 諭旨垂  
示後嗣當眷懷遼瀋舊疆再三周歷斬於 祖宗遺緒身親目覩  
或有無識臣工以爲不宜當律以悖命之罪誅之無赦朕敬承  
聖訓擬於明秋再舉恭謁 三陵大典時向臣工言及今夏亢旱  
未得甘霖昨據大學士松筠奏致旱之由因朕欲詣盛京 列聖

示象阻止實屬夢囈怪誕極矣成湯遇旱六事自責六事中有謁  
祖陵之一事乎況一年後之事先爲此言搖惑眾心大玷首輔之  
職矣設若明年直隸及盛京遇有歉收朕何難降旨展期上年因  
縣課阻止秋獮曾降諭旨儻有造作浮言阻止者必按軍法今松  
筠竟敢阻止上陵鉅典較秋獮爲尤甚此奏若在明降諭旨之  
後朕必將松筠寘之重典今尙在未降諭旨之前是以交軍機大  
臣會同吏部議處本日奏上諭將松筠革職實屬罪所應得姑從  
寬典薄示降謫著革去大學士並各項差使以二品頂帶補授察  
哈爾八旗都統仍革職畱任八年無過方准開復二十三年十月  
署綏遠城將軍時松筠之子吏部侍郎熙昌歿於湖南差次上

惘松筠年老喪子 召回京調補正白旗漢軍都統 賞還頭品  
頂帶花翎復 賜紫禁城騎馬十二月授禮部尙書兼管樂部太  
常寺鴻臚寺事務二十四年正月兼署理藩院尙書三月 上謁  
東陵 西陵 命松筠偕莊親王蘇祿大學士章煦尙書英和  
爾京辦事四月充繙譯會試正考官六月調兵部尙書授 御前  
大臣領侍衛內大臣總理行營事務九月授盛京將軍十二月奏  
盛京柳河溝一帶地勢低窪請籌辦開濬 允之二十五年二月  
奏原定安置宗室增設官學生五名歸併盛京宗室官學直移居  
營房距宗室官學八里冬寒夏暑幼童徒步維艱請將原設學生  
五名撤回本營再增設學生十五名滿漢教習弓箭教習各一名

在本營就近訓練操練得旨所辦甚好四月以兵部遺失行印查係松筠時任兵部尙書且佩帶印鑰革去盛京將軍降山海關副都統復降本旗公中佐領六月又以前在盛京將軍任內審擬溫程毆斃宗室喜受罪名顛倒再降本旗驍騎校八月宣宗成皇帝御極擢都察院左副都御史十月授左都御史十一月授熱河都統翰林院侍講學士顧純疏稱松筠宜置左右以爲諫臣之倡諭曰朕擢松筠於降調之餘先用爲左都御史又任以熱河都統量能授職自有權衡何分內外乃顧純以爲擢用左都御史羣臣慶於朝萬民忭於野松筠何足以致此若簡放熱河都統乃使之爲國宣力顧純以爲雖與重大之任若有疏遠之心尤爲

信口亂言矣至稱或疑其意氣之愆致拂聖聰或疑其攻擊之嚴致遭眾忌無論朕虛懷納諫從不以直言爲忤且松筠近來亦實無犯顏極諫之事其於內外臣工更無私毀私譽若以此致疑豈舉朝大臣除松筠而外均爲讒諂容悅之人乎願純著嚴議十二月松筠進呈自纂新疆識略十二卷 上賜序刊行道光元年五月授兵部尚書七月調吏部尚書充會典館副總裁授正黃旗漢軍都統八月復充崇文門正監督調鑲黃旗蒙古都統復 賞戴花翎 賜紫禁城騎馬在軍機大臣上行走充 實錄館正總裁九月偕禮部左侍郎康紹鏞赴浙江查辦事件二年正月授閱兵大臣管總理行營大臣事務署直隸總督二月奏請整頓直隸各

屬藩院 上是之閏三月回京充繙譯會試正考官六月理藩院  
有議覆烏里雅蘇臺將軍奏烏梁海驅逐潛住之哈薩克及科布  
多商人私向杜爾伯特交易一摺松筠索燾剛改理藩院尙書禧  
恩劾奏 諭曰六卿分職各有專司若將別衙門所辦之事妄加  
剛改實屬罕見罕聞卽和珅當日之專權橫恣亦未敢公然出此  
竇屬膽大妄爲著大學士軍機大臣會同九卿議罪尋議革職遣  
戍得 旨加恩以六部員外郎候補在上書房繙譯諳達上行走  
十一月授光祿寺卿十二月以二品頂帶授左都御史三年六月  
命借戶部右侍郎穆彰阿赴熱河鞠獄八月 賞還頭品頂帶  
九月授吉林將軍四年正月條奏濫務疲累情形請復舊規辦理

並請在小綏芬等處屯田以供創夫糧食疏下軍機大臣會同戶部議奏請議上得 旨吉林濩務節經立定章程所議尙形苦累自應量爲調劑所有綏芬烏蘇里產濩山場住山過冬創夫著准其仍復舊規辦理並令各攬頭舉熟習創夫在蘇城蘇子海訥思屯泥滿口等處尋採按額交上等好濩挑贖餘濩方准售賣如有蒙混情弊卽著落賠換重責示懲其每年畱山創夫不得過每票人數之半儻潛居偷漏從重究治並著守卡弁兵查驗勿任黑人夾帶私濩以昭嚴密至松筠奏請在小綏芬雙城子達塌河一帶屯田墾種以供創夫糧食耕種採濩本難兼顧辦給農具殊形繁費且道里遼遠稽察難周尤恐別滋事端轉啟奸民窩藏寄頓等

弊著毋庸議朕因松筠熟悉吉林情形簡畀將軍重任乃遇事紛  
更種種錯謬不勝將軍之任吉林將軍著富俊補授二月奉 諭  
松筠著補授左都御史此係朕眷念舊臣格外施恩賞給差使松  
筠務慎守職任毋得妄行紛更致干咎戾四月充考試繙譯正考  
官七月授正黃旗漢軍都統因目昏陳請開缺 溫諭慰留 派  
考試鄂羅斯學十一月復 賜紫禁城騎馬十二月充八旗值年  
大臣五年正月稽查內七倉五月稽查右翼幼官學六月充蒙古  
繙譯考試官八月署兵部尙書九月署烏里雅蘇臺將軍十月伊  
犁將軍慶祥奏鄂羅斯在哈薩克遊牧地方蓋房種地請 敕下  
理藩院檄詢 上詢之松筠松筠奏哈薩克素稱強悍或會侵占



鄂羅斯地令從索還不能不予而以無據之詞懇將軍奏請實未  
可定若理藩院行文查問鄂羅斯直以索還侵占爲言轉難查辦  
從前哈薩克襲封汗爵鄂羅斯卽有哈薩克早經投順彼國之  
語溯查乾隆三十五年土爾扈特明背鄂羅斯前來投順後鄂羅  
斯行文索討經高宗純皇帝諭旨斥駁今以無甚關要之事情  
文令其遵奉儻彼以土爾扈特爲言或以哈薩克投順彼國爲詞  
徒生枝節有傷體制況哈薩克非國家用兵平定者緣乾隆二  
十二年卒定伊犁之後哈薩克貢馬入覲因封汗爵藉以羈  
縻其或向鄂羅斯投順亦應置之不問查哈薩克游牧地方與鄂  
羅斯毗連之處理藩院並無圖志惟有曉諭哈薩克以天朝定

例外藩之地無圖志者例不辦理 上嘉其熟悉邊情飭慶祥詳酌辦理六年二月署兵部尙書五月授禮部尙書兼管太常寺鴻臚寺事六月偕戶部左侍郎王鼎赴山西查辦事件松筠於山西途次聞喀什噶爾軍報疏陳熟悉新疆情形自請前往宣撫 溫旨嘉勉未允行八月 命校勘清文 聖訓九月充武會試監射大臣十二月充經筵講官七年二月充總詣達七月充 玉牒館副總裁八年二月署熱河都統六月充蒙古繙譯考試官七月諭曰松筠前於陝甘總督任內借用養廉尙未完銀八千兩又管理崇文門稅務未完分賠銀一萬三千兩松筠宣力中外操守廉潔所有應交銀兩著加恩全行寬免八月仍署熱河都統授閱兵

大臣疏請挑挖承德府屬旱河工程應歸都統專摺奏報毋庸由直隸藩司報銷以免稽遲又都統衙門請復舊制揀派協領佐領各一員幫辦刑名事務十月奏承德府屬一州五縣前經直隸總督那彥成奏准以漢員對調查漢員與蒙古言語不通艱於聽斷應循舊制專用旗員俱得 旨俞允九年正月署吏部尚書三月署兵部尚書借工部右侍郎白鎔往直隸覆鞫新城縣營弁朋謀陷害白勤一案平反定讞原審官議譴有差四月復署直隸總督六月調兵部尚書 命赴科布多鞫獄十年 命借吏部右侍郎侯昌赴陝西查訊巡撫徐忻被控各款鞫實請將徐忻下部嚴議遂次又聞回疆軍報密陳勦辦事宜 諭曰進勦何難善後不易

若常川檄發調派成何事體必得一長久綏安之道方爲至善卿  
若有所見不妨陳奏候朕採擇十一年二月奏言喀什噶爾換防  
官兵宜裁撤免累回眾葉爾羌玉山宜弛禁聽回眾採販沾潤喀  
什噶爾參贊大臣宜改設於阿克蘇適中之地喀什噶爾宜改設  
正副辦事大臣二員令阿奇木郡王伊薩克爲幫辦與正副大臣  
聯名奏事喀什噶爾一帶卡倫宜添設侍衛領滿兵輪駐無令綠  
營官兵駐守易致逃避回疆駐紮大臣均不得攜眷免傳回婦應  
役英吉沙爾無庸專駐大臣可設三品阿奇木伯克每事就近呈  
報喀什噶爾至安集延回眾貿易爲生所販氈毯染色無不用茶  
配製宜因其所利而利之永弛茶禁又安集延貿易之商回遠在

浩罕西南來至喀什噶爾迢遙辛苦宜免其納稅以示招徠疏下  
揚威將軍長麟查辦是月松筠八十生辰 賜耆齡錫祜扁額  
御書福壽字各一並文綺服物有差七月署理藩院尙書管理三  
庫事務八月奏請開缺旋即銷假 諭曰松筠並無患病情形乃  
數日之間忽稱衰病難支忽稱精力如前既請開缺旋即請賞差  
使進退自由輕率陳奏君臣相與之際總當以誠爲主朕於各大  
臣推心置腹既以誠相感各大臣身受重恩尤當以誠相應似此  
任性自便殊失朕優禮大臣之意松筠自問於心能安與否嗣後  
各大臣務當仰體朕心恭矢靖共恪守事上以誠之義用副恩眷  
九月充蒙古繙譯正考官授鑲白旗漢軍都統十月授內大臣十

一月因前赴科布多噶直隸道員徐寅第代購備賞什物及奉  
旨回奏又未將噶買在先發價在後據實聲明 命革去內大臣  
以三品頂帶休致十二年六月浩罕伯克邁瑪底里遣使進表松  
筠前曾奏及浩罕通商邊境即可綏靖 上思其言 賞還頭品  
頂帶署正黃旗漢軍副都統七月達爾漢茂明安土默特三旗爭  
地 命往歸化城查辦八月松筠督同副都統惠顯副盟長公喇  
特那巴拉等逐處履勘查明自克籌堆記東北一帶直至哈達瑪  
勒河山後係達爾漢所屬山前係土默特遊牧有乾隆二十年圖  
記茂明安爭土默特之沙拉哈達地方屬實自克鄂博東至哈達  
瑪勒河山前係土默特遊牧山後係達爾漢遊牧有乾隆二十八

年圖記達爾漢爭土默特山前地方屬實松筠按照原字原圖堆  
記履勘曉諭茂明安扎薩克及達爾漢貝勒皆折服松筠又奏言  
自哈達瑪勒河東至託蘇圖山係四子部落郡王伊什登遊牧南  
接土默特遊牧北係達爾漢遊牧三旗地界應一律查勘又南係  
延壽寺喇嘛遊牧亦宜添設堆記鄂博各清界址永杜爭端 從  
之十二月授理藩院左侍郎十三年四月調工部左侍郎五月授  
正藍旗蒙古都統六月授閱兵大臣八月 派考試滿蒙中書九  
月署戶部右侍郎兼管錢法堂事務十月充左翼監督十四年  
命以都統銜休致十五年卒年八十有二遺疏入 諭曰松筠歷  
練老成清勤正直 先朝耆舊由侍郎尚書都統簡授大學士出

任將軍總督數歷中外宣力有年歷事三朝恪恭匪懈上年因老病命林方冀家居調攝獲享期頤茲聞溘逝深爲悼惜著加恩晉贈太子太保銜照尙書例賜卹所有任內一切處分悉予開復應得卹典該衙門察例具奏尋賜祭葬子諡文清入祀伊犁名宦祠二十三年庫丁侵虧帑銀事發經查庫王大臣載銓等議奏歷任管庫查庫大臣分成攤賠已故者子孫減半代賠得旨松筠之子原任二等侍衛熙慶見已病故並無子嗣免其罰賠子熙昌吏部侍郎熙慶原任二等侍衛

右 國史館本傳

自和相秉權後政以賄成人無遠志以疲輒爲仁慈以玩愒爲風



雅徒博寬大之名以行徇庇之實故時風爲之一變其中行不阿者惟松相公筠一人而已公性忠愛幼讀宋儒之書視國事爲己務肝膽淋漓政事皆深憂後慮不慕近功鎮伊犁時撫馭外夷視如赤子凡哈薩克布魯特鄂羅斯諸國貢使至日公皆呼至坐前詢問其國之治亂親賜以食教以忠孝之道並曰我大清國所以立萬年基者惟賴此二字也辭行時厚加賞賚其豐貂錦幣之物滿載而返故屬國愛若父母涕泣而別又以國家經費有常不可以邊鄙故致有絀國用乃議開屯田數百萬頃皆命滿洲士卒耕之並與以牛糧籽種厚其賞卹故人樂爲之用歲省邊費鉅萬又重交誼傾蓋之士告匱者卽解囊與之無吝色故任封疆數

十年而家無僭石 上深知其忠正擢爲參政 御前大臣公於  
召見時凡民間隱情街談巷諺無不率口而出毫無隱忌故人  
多尼之癸酉秋復出爲伊犁將軍新疆聞其復來慶若更生老穉  
荷擔以迎公笑撫之曰餽生此行頗不寂寞也其冬擢爲首輔仍  
兼伊犁事朝中之士君子皆翹首以望其歸也

松相國筠雖不以科目進然品行廉能立朝不苟和珅當國時嘗  
與之抗 純皇篤任之居家好理學程朱之書終日未嘗離手性  
孝友其叔某虎而冠者也侵占其田日相詬詈雖公官至六卿而  
其叔驅使之無異奴隸嘗命手執炊公笑受之而已人有代不平  
者公曰倫常在焉何可非也其孝友也如此

松相公自癸酉秋出鎮伊犁又復三載丙子秋始歸 朝任 御  
前大臣以直鯁稱丁丑夏畿輔亢旱 上下詔求言公上疏諫阻  
東巡 上以其故違 祖制應置重典念其平日廉直以二品  
銜謫爲察哈爾都統其疏云臣某跪奏爲恭讀 硃筆諭旨惶恐  
焦急敬瀝微忱事竊臣昨日仰蒙 召見命閱 御製望雨省愆  
說畢臣隨赴軍機處眾官公同捧讀之下萬分慚悚踟躕不安茲  
因順天府所屬缺雨以致我 皇上引咎自責宵旰憂勤深戒臣  
工因循疲玩復 諭及癸酉九月之變誠如 聖諭旱象甚可畏  
也如臣忝列首揆僅知趨走爲勤實有應得之愆若徒以虛言塞  
責不惟辜 恩負職亦恐天理難容因念 皇上於來年詣盛京

恭請 列祖陵寢以告成平典禮攸關固不宜緩又以連年河流  
順軌漕運迅速各直省普慶豐收原可舉行鉅典惟今夏亢旱尤  
甚上天昭示獨在三輔之區臣以爲 皇上展敬之誠已荷 列  
祖 列宗在天昭格伏思十七年臣奉差奉天查勘 陵寢工程  
沿途會見旗民頗形艱窘是以於十九年春閒由新疆曾經恭摺  
奏請 皇上緩詣盛京荷蒙 俞允自去年八月臣入都之後日  
侍 天顏屢蒙 諭及二十三年恭謁 祖 宗陵寢彼時臣以  
連年雨暘時若收成豐稔固應舉行斯典今乃三輔旱象已成或  
係 祖 宗眷佑昭示景象暫停舉行以爲蘇息岐嶽父老之意  
未可知也臣不揣冒昧恭摺密陳是否有當伏乞 睿鑒臣無任

惶恐慚悚之至謹奏

右錄宗室昭榘撰

嘉慶二十五年八月 睿廟梓宮自熱河回京初 奉安於 乾  
清宮繼乃擇日 奉移於 觀德殿是日出東華門進景山東門  
上哭泣步送京中自王公大臣官員以下皆得俯伏甬道之左  
哭送白袍列跪者不下千萬人余亦在班中遙見 上步行甬半  
忽趨至甬道邊扶一跪伏者之手大哭失聲跪伏者亦搶地大哭  
眾遠察之則松公也時公僅賞一驍騎校不過兵丁拔補之階而  
至尊當哀痛迫切之際竟能於千萬人中物色見之非平日魚水  
之契有異尋常何克臻此翌日卽有副都御史之 命而公仍得

左右贊襄矣公出爲伊犁將軍時未嘗挈眷一日遣役至京付銀五十兩以爲迎取夫人路費適役夫未行而銀已他用因卽不寄路費公家故儉長公子少宰熙昌竭力摒擋始得送母夫人就道夫人至公不擇日卽命入署僚佐皆不知將軍夫人之已至也署舊有別院乃置夫人其中而日扃其門供饌之外每月與錢十千婢媼傭值俱取給焉院內正屋三楹中爲堂夫人居堂東西爲佛堂公每日五更入佛堂頂禮畢坐堂中與夫人啜茗閒語半時而出仍扃其門而夫人每日當四更必起櫛沐以待之公之禮佛不間寒暑夫人之夜起亦不問寒暑公由伊犁將軍除吏部尙書入京行抵涿州八喇嘛遣人迎之公乘一馬喇嘛之使人乘一騾易

騎而行自涿州連宵至圓明園其家人戚友迎於長新店者俱不知也到園已四更叩軍機章京直廬之門司關者呼葉老爺起公屬爲具摺葉老爺者戶部郎中葉雲素繼雲也是日葉公非入直期重公之爲人不敢辭而公亦不問其名字卽以葉老爺稱之而已次日入見卽呈講大學首章以爲治國平天下當自正心誠意始出借勒相國肩輿候客家人始聞公之已到都也晚仍宿園中又次日入城先赴吏部之任日晡方歸家其妾迎於中門公顧問曰此誰家戚誼也長公子曰此某姨娘耳公乃恍然曰汝今亦老矣公身材僅中人而體氣壯實有莊敬日強之功惟自邊臣內擢後頭每溶溶動鎮日不已卽入對亦然余時以軍機章京詣

公宅畫橐值酷暑公以燒酒及西瓜餉余時余方編輯軍機題名並從公詢樞垣故實語頗叨絮公令解衣縱談因乘閒問公頭動之故公慨然曰此非病也我在西域時手刃叛回至數百人未免殺戮過重至今耿耿於中不覺震動於外耳然不如此恐回疆未必安戢至今也公面如羅漢心極慈祥節鉞所莅無人不被其澤而飲其和叛回之戮辟以止辟正公鎮邊作用不知者或以殺降爲公咎豈知公者哉公奉差往江南查辦事件得旨引對後卽欲挈值宿行李出城不回私宅因隨帶之司員部署不及顧公稍緩公許以脯時出城時方已刻乃枉途至韓桂舫先生對家小坐先生尙在刑部署未退公自索酒肴獨酌並令韓家人等磨墨供



寫大字偶聞宅門外，誼囑聲詢之，則賣雞擔與閩人爭價也。公立  
取擔入如其價全買之，向內宅借京錢四千交付訖，而以雞囑閩  
人曰：爲我交韓太太加意餵養，肥美俟我差旋時再來大嚼也。語  
畢遂出城住長新店，再踰日而隨帶之司員始趕到同行焉。

右記梁章鉅撰

國朝耆獻類徵初編卷三十七目錄

宰輔三十七

戴衢亨

吳璥

托津

宗室祿康



國朝耆獻類徵初編卷三十七

通奉大夫前署江西巡撫江西布政使司布政使湘陰李桓輯  
宰輔三十七

戴衢亨

戴衢亨江西大庾人父第元由編修官太僕寺少卿乾隆四十一年上巡幸天津衢亨以舉人應召試欽取一等授內閣中書四十二年在軍機章京上行走四十三年以一甲一名進士授修撰四十四年充湖北鄉試正考官四十六年六月承辦熱河志告竣交部議敘十月仍命在軍機章京上行走四十七年秋獮扈蹕於阿濟格糾圍場獲麇以獻上賜詩曰圍合山原飛走

充儒臣扈蹕詠車攻拈毫倚馬本多秀入帳執禽乃獨雄獵騎訝  
看非等類文班喜語共和融狀元端是讓前輩大鹿小麋獲則同  
並 命和韻四十八年充江南鄉試副考官四十九年提督山西  
學政五十年奏山西朔平府屬右玉縣文風平常學額向係取進  
十五名爲數過寬未免人思僥倖代州所屬五臺縣文風素優屢  
蒙 翠華臨莅多士踊躍觀光較前更甚而舊額止有十二名請  
將右玉縣學額裁汰三名撥入五臺縣學其武童額數照文章一  
體裁撥下部議行旋受代回京五十二年以山西學政任內失察  
武生裴秦祥戕斃多命部議降二級調用 上從寬改爲革職畱  
任五十三年二月勦辦臺灣逆匪軍功告蒧大學士阿桂等奏修

撰戴衢亨在軍機處行走有年素爲勤慎此次勅辦臺灣逆匪查  
檢檔案交發文報俱能奮勉出力請將革職畱任之案開復得  
旨允行五月 命督學湖北衢亨以親老患病無次子侍奉請畱  
京供職 上允之十二月丁母憂五十六年服闋五十七年充湖  
南鄉試正考官尋提督廣東學政五十八年擢右中允五十九年  
遷翰林院侍讀六十年擢右庶子回京供職充日講起居注官遷  
侍講學士嘉慶元年轉侍讀學士二年閏六月 恩賞三品卿銜  
隨同軍機大臣學習行走九月遷少詹事三年正月擢內閣學士  
兼禮部侍郎二月 命閱考試翰詹各員卷尋授禮部右侍郎七  
月調戶部右侍郎管理錢法堂事務八月因官軍掃蕩川省安樂

坪賊巢生擒賊首王三槐 上加恩軍機大臣戴衢亨交部從優  
議敘四年三月 賜紫禁城騎馬四月 命閱庶吉士散館卷五  
年正月轉戶部左侍郎仍管理錢法堂事務尋充武英殿總裁官  
二月充經筵講官六年京察屆期 諭曰侍郎戴衢亨在軍機處  
行走勤慎稱職著交部議敘尋以官軍生擒賊首王廷詔 上以  
衢亨盡心贊畫夙夜不怠加軍功一級五月 命教習庶吉士九  
月奏寶泉局鑪頭李照將上年六月駁回另鑄錢文私行收存夾  
入新鑄卯錢運局朦混交收未能早爲查出自請議處 諭曰戴  
衢亨在軍機處行走不克時常到局其過尙輕著加恩改爲交部  
察議十月以川省軍務指日告成奉 旨戴衢亨數年以來承旨

書諭尙能周到勤勉著加恩交部從優議敘十一月 賞黑狐端  
罩七年六月因軍營奏報勦斃賊首樊人傑曾芝秀奉 旨交部  
從優議敘七月擢兵部尙書兼管順天府尹九月管理戶部三  
庫事務十二月川陝楚勦捕逆匪大功戡定 上以衛亨克盡忠  
悃知無不言言無不盡自用兵以來承旨書諭勤慎小心恩加太  
子少保仍賞給雲騎尉世職八年三月 命閱考試翰詹各員卷  
四月續行繕辦四庫全書 命衛亨會同禮部尙書紀昀經理六  
月調工部尙書充會典館副總裁官七月充文淵閣直閣事尋以  
官兵勦捕餘匪全竣三省肅清 諭曰軍機大臣承旨書諭獲與  
觀成尙書戴衢亨之子年尙幼穉伊姪候選縣丞戴嘉穀著加恩



賞加知縣升銜仍令在 實錄館效力行走九年二月 聖駕臨幸翰林院用唐張說詩東璧圖書府四十字 命王大臣翰林分韻賦詩衛亨分得講字是月京察屆期 上以衛亨在軍機處行走小心勤慎著交部議敘六月因順天府治中趙日濂告病衛亨偕府尹閻泰和具題報部吏部以未奉科鈔不與開缺將趙日濂銓升廣東運同衛亨等參奏吏部開缺不照成例且係虛選病員有心壓缺 上命大學士保甯等會同刑部秉公查訊尋訊得治中告病應照京官五品以下據本衙門咨到之日開缺不候科鈔吏部銓升病員雖訊非官吏串弊壓缺辦理已屬謬妄又失察文選司貼寫姚承裕等句通順天府書吏豫先盜印順天府咨部揭

帖撞騙候補運同王訥銀兩未成府尹問泰和因王訥之子王宗田心疑吏部壓缺向其告知卽先行標畫文書咨催吏部將趙日濂開缺究屬任意徇情兼管府尹尙書戴衢亨雖係因聞吏部舞弊壓缺起見但未查明本管衙門弊竇率行入奏又復失察書吏盜用印信應請嚴加議處 諭曰戴衢亨心爲除弊激於公忿毫無不是惟失察書吏用印實不能爲之諱著不必兼管順天府府尹交都察院議處尋議降一級調用以加級抵銷七月 上御門辦事衢亨入班遲延交部議處尋議罰俸六箇月又以戶部寶泉局監督收運銅斤有得贓短銅情事衢亨管理錢法堂侍郎任內曾收銅二運 命降二級從寬畱任十年正月調戶部尙書二月

以會典館呈進事例於世宗憲皇帝廟號擡寫錯誤借總裁大學士保甯等自請褫職恩改革職畱任三月充會試正總裁官六月入直南書房十二年正月以戶部尙書協辦大學士兼翰林院掌院學士命充日講起居注官其原充文淵閣直閣事不必開缺二月京察屆期諭曰協辦大學士戶部尙書戴衢亨經理度支兼軍機處行走勤慎出力著加恩交部議敘八月充順天鄉試正考官十二月充文穎館正總裁官十三年三月兩江總督鐵保籌辦河湖要工請修復毛城鋪石壩王營減壩普培黃河兩岸大隄接築雲梯關外兩岸長隄培築高堰山旰隄後土坡加高智禮兩壩壩底奏入諭曰南河頻年漫工疊見河湖受病頗深關

係運道民生自當妥籌經久之計著派協辦大學士長麟戴衢亨馳驛前赴南河悉心查勘鐵保等所奏各工究竟應辦與否及興築次第如何酌分緩急先後之處通盤籌畫據實奏聞查勘事竣具摺覆奏後長麟著先行回京復命戴衢亨在京供職多年著加恩賞假一月回南安原籍祭掃並看視伊叔戴均元患病情形再行回京復命四月河東河道總督吳璥條奏洪湖周圍應酌量補築碎石坦坡 上命衢亨偕長麟一併籌議五月奏毛城鋪原設滾水壩因啟放日久口門寬廣一經開放黃水建瓴而下恐不能循軌前進應毋庸修復查天然閘迤東之戴里屯有小石山一座中峯兩旁各有山罅兩道前河臣靳輔依此建置石閘二座壩基

臣等謹將前次奏請  
三十一  
三  
尙存山石夾峙可無奪溜衝決之患應請興修以減黃利運王營  
減壩係掣銷漲水實屬應修之工惟見在壩基逼近黃河深塘積  
水施工甚難請於舊壩西土質堅厚處如式築滾壩一座並添建  
石壩以爲重門保障沿河大隄尤宜普律加培見在淮揚隄工最  
爲喫緊應將單薄較甚各處於本年伏秋前趕緊加培其餘可以  
稍緩之處應分定段落次第興工雲梯關外舊無隄陰之處應自  
入灘以上南北兩隄略做雁翅形勢酌量接築收束水勢既可杜  
河身散漫停淤之病並可保護兩岸民田高堰山盱隄工舊係內  
石外土因風掣缺石塊遂將土工刷進六七尺設有疏虞淮揚一  
帶關係非輕今石工旣不足深恃自不得不加築後戩土坡以資

抵禦爲暫救目前之計至欲保護石隄詳詢本處居民皆以添砌碎石坦坡爲善策蓋緣坡勢迤邐漸低雖怒濤衝擊可以盪之使平以保護石工可期永遠得力惟工段縣長一時難以猝辦應請先辦土坡其碎石坦坡一項工程暫從緩議俟各工辦有頭緒再由該督酌議章程奏請辦理智禮二壩壩身過單應統較數年之水勢酌中定制將石基加高四尺察看湖面漲滿以時宣洩使有節制得 旨嘉獎時御史史祐奏請清查兩淮鹽務雜項雜費賞借各款銀兩以杜官商侵冒 上命循亨偕長麟於查勘各河事竣後馳赴揚州逐款查究尋奏稱公同查覈官商並無侵冒惟雜項各款向係公捐雖無關正課亦應據實開報自戊辰綱爲始每

年巡費辛工雜項雜費分別造冊報部存案其賞借項內支用之款向無報部覈銷之例應照舊辦理報 聞閏五月遵 旨回籍祭埽於回京途次奉 命就近赴山東將河督吳璈等所奏牛頭河各工細加查驗並查所保在工出力人員尋奏將原估丈尺逐加覈對尙無不合惟第一分第二分閒有淤墊處所一一記出飭令原辦之員再行修治至奏請出力人員儘先補用一節此次工段十四分著落十四員承辦除第一分第二分應須再行修理外其餘各工多屬如式未便祇將王有熙等獨予優敘且此五員內挑工或多或少今一例奏請先補未免無所區別應請 飭交吳璈等另行覈定 從之六月抵京九月 賞給南石槽房屋一所

十四年正月 上以五旬萬壽 加恩中外臣工衢亨晉太子少師四月充殿試讀卷官六月戶部員外郎劉承澍將鹽法志及衙門檔冊借與給事中花杰閱看又將議彙私告花杰花杰以衢亨徇庇蘆商參奏並參殿試閱卷舞弊等款七月 諭曰給事中花杰前經奏請嚴催長蘆商欠一事已交戶部議覆請交新任鹽政覈辦上月復據該給事中奏稱戶部議摺係戴衢亨一人主稟緣戴衢亨與查有圻係兒女姻親查有圻引地最廣積欠最多是以代爲徇庇將蘆商積欠官帑未交窩價均未詳悉根究並稱戴衢亨平日於言官冒瀆聖躬者則以爲直言於干涉部臣者則以爲多事等語朕當卽召見花杰面加詢問以所奏關係甚大辦理必



國朝通志卷之二十一  
須實據如所奏不實亦有反坐之罪花杰除叩頭之外默無一言  
昨日復據該給事中具摺覆參戴衢亨與查有圻結姻之後查有  
圻餽送往來鑽營甚巧蘆商惟查有圻是望查有圻惟戴衢亨是  
倚以致鹽務廢弛言之鑿鑿而另摺又言戴衢亨於本年殿試閱  
卷顛倒舞弊將洪瑩援引爲一甲一名進士該給事中曾令一同  
鄉庶吉士周際釗向戴衢亨私宅查閱門簿探問管門之人得其  
交通情狀又黃中模策寫俱佳不列入十卷之內黃旭行楷相閒  
竟置二甲之中指爲舞弊實據等語朕因特派大學士慶桂董誥  
祿康尙書蘇楞額傳旨向戴衢亨詢問令其明白登荅戴衢亨回  
奏之摺陳辨甚明所有長蘆商欠一事係交該鹽政統覈通綱情

形併限辦理窩價亦並令該商上緊湊繳皆屬嚴催辦理與花杰所奏不符至戴衢亨因司官辦橐未妥並恐書吏等有招搖情事是以與眾堂官商定主見之後卽令司官等在圓明園改辦奏橐期於密速亦並非戴衢亨一人定議花杰所奏均屬不實惟戴衢亨欲辦理慎密亦儘可令司官等在署內封閉辦理何必令其在圓明園此一節究屬不合致招物議見據戴衢亨自認疏率懇請處分自有應得之咎戴衢亨著交部議處至於戴衢亨與查有圻聯姻之處查有圻本係宦家與戴衢亨向有世誼並非門戶卑微不可爲婚之人安得謂之有心援繫至於媼戚往來歲時餽送本屬情事之常人孰能免如果因有公事囑託納賄行私確有證據

則亦無論其爲姍戚與否皆當繩之以法今戴衢亨於議覆長蘆積欠毫無護庇且先議駁加價以二文入官一文入商一節於查有圻無大利益公事公辦又何能禁其姍戚之不往來至於此外如戴衢亨因葢造房屋查有圻幫助木料借用几案以及在南城外置買房屋數處尤爲瑣細不足置問花杰逞其筆端輒稱查有圻鑽營結納戴衢亨納賄徇私指查有圻爲倚勢把持之奸商坐戴衢亨以負恩誤國之重罪連篇累牘極力詆謗甚至謂戴衢亨於言官冒瀆聖躬者以爲直言此尤關係重大今確加根究訊據花杰指稱嘉慶十一年在御史吳榮光家與戴衢亨之姪嘉穀同席談及吳榮光有請暫緩巡幸天津之摺係奉旨申飭者戴嘉穀

曾云伊叔甚爲欽佩此語並非出於戴衢亨之口入於花杰之耳而見傳訊戴嘉穀堅稱伊因眾人稱讚亦祇隨口應酬實無有伊叔戴衢亨欽佩之語復經慶桂等傳到是日同席之朱涂切加訊問亦稱不記此言其所稱戴衢亨於言官干涉部務者以爲多事一節則云卽係伊嚴催積欠之奏戴衢亨不以爲然若果以爲多事見今據摺催欠並未駁斥原奏如此肆意摭拾茫無指證是竟欲以莫須有之事妄興大獄矣至於殿試爲掄才大典科場舞弊律有明條若果如花杰所言戴衢亨與洪瑩交結情密援引爲一甲一名進士於黃中模黃旭顛倒列置此是何等弊端何項罪名其誣告者應如何坐罪該給事中摺內且云請將洪瑩復加考試

或默寫策對若實係平常請嚴究弊端而於考試舞弊則全不反  
而自思應否治罪殊屬荒誕無理見因該給事中稱覆考時尙恐  
南書房有人設法照應請旨嚴密防範因卽如其所言先向內閣  
查取洪瑩等殿試各原卷加封進呈一面派滿洲軍機章京將洪  
瑩由福園門帶至上書房命二阿哥監看令其默寫試策朕親加  
披閱設字策不符顯有弊竇非但戴衢亨與洪瑩獲罪甚重凡此  
次派出讀卷官之大學士董誥等皆當一併懲治朕豈肯稍爲寬  
假今洪瑩所默策對與原卷悉符間有數字誤寫用硃筆點出者  
不過文義小有異同語句先後微有參差試思尋常擬作詩文數  
日尙不能悉行記憶今距殿試已逾兩月之久而洪瑩竟能記憶

默寫非積學有素安能如此尙有何弊且殿試前十卷進呈時洪瑩本係朕拔置第一並非讀卷官所擬花杰何得指稱戴衢亨一人援引之力至於黃中模黃旭各原卷文理皆可列二甲惟黃旭末四行字畫不能工整如前亦並無一筆行書今黃中模列置二甲黃旭置二甲之中尙皆公允此二卷亦非由戴衢亨首先校閱花杰何得指戴衢亨徇情顛倒如此妄行參奏伊自問可以脫然無事乎又花杰摺內稱本年考取南書房四人除王以銜外周系英係英和同年席煜係英和門生姚元之則係戴衢亨英和二人門生文字雖優鑽營尤甚英和平日賞識戴衢亨戴衢亨畏忌英和陰與爲附實屬結黨行奸等語本年考試南書房英和會同戴

衛亨瑚圖理保舉十二員朕圈出與考八員選取四員內周系英  
王以銜本係講官於隨圍時朕會屢次召對加以遴選席煜姚元  
之試卷本佳並非戴衢亨英和力薦若謂周系英係英和同年則  
是科豈祇英和一人可供文學侍從之選其餘竟無一人可用若  
謂席煜係其門生豈戴衢亨英和二人所取之士皆不可選用內  
廷乎尤爲謬妄至名節所係卽尋常一介齊民朕尙不忍令其受  
人污衊况戴衢亨任用已久經用至協辦大學士今花杰任意詆  
訐無所不至朕又豈官任其甘受虛誣花杰著交部嚴加議處並  
著將洪瑩等殿試原卷及昨日默寫之卷均發交花杰閱看令其  
心服又 諭曰花杰參奏戴衢亨各款業經逐一詳查毫無影響

該給事中亦自認冒昧本日復據祿康奏查訊德泰錢鋪中朱姓據稱伊鋪與戴衢亨家交易數十餘年見在尙欠伊鋪內銀六百五十兩又查明源興等五處當舖查對賬簿各鋪皆係查有圻所開查有圻用銀之時均由當舖送與查有圻使用該當舖從無出過銀票之事是戴衢亨家自與錢鋪易錢與查有圻何涉查有圻自問伊家當舖取銀又與戴衢亨何涉全係捕風捉影空談豈能科以交結行賄實罪且戴衢亨家見在尙欠錢鋪銀兩可見花杰所奏全係虛誣不辨自明見在將此摺給花杰閱看伊更無可置喙至於戴衢亨議覆鹽務加價伊昌阿被長蘆商人懇憑會奏懇每引加價三文以二文歸官一文歸商如果戴衢亨有曲庇查有



因見者用矣有不審 卷二十一  
圻之心照議准行查有圻每年獲利甚厚而部臣先後兩次俱經  
詳悉議駁毫不任其含混是以朕不但依議辦理並將伊昌阿降  
調示懲此實其見其聞尙有何弊至議覆花杰追完商欠繳納窩  
價一摺亦係議令併限嚴追詳查歸繳並無寬緩是戴衢亨於辦  
理部務委無絲毫錯誤惟戴衢亨前於伊叔戴均元補放倉場侍  
郎時卽據陳明戶部有交涉事件朕特令不必迴避今花杰平空  
指劾以事關嫻戚率意誣讎經朕洞悉情偽降旨通諭然此亦幸  
戴衢亨與議二事均屬從嚴無可指摘設遇有應行從寬辦理之  
事若戴衢亨有意從嚴豈不有妨公事若準情酌辦又難不卹人  
言一切轉多窒礙且倉場與戶部旣多交涉自應迴避以符體制

戴衢亨著以協辦大學士調補工部尙書並 諭將劉承澍交部  
嚴加議處尋吏部奏花杰降三級調用劉承澍革職戴衢亨於議  
駁長蘆加價飭催商欠一事令司員在園寓辦稟致招物議應降  
二級調用 諭曰朕每日召見軍機大臣伊等皆兼管部務自卽  
以該部應辦事件向其咨詢此外部院各大臣亦更番召見無不  
問以各該管衙門事務伊等遇有公事自應彼此熟商卽或意見  
不符亦儘可兩議並上乃部院諸臣每先向軍機大臣探問方行  
定稟以致司員等得以從中播弄及議妥後輒稱係軍機大臣主  
見實屬近來惡習卽如戴衢亨議駁長蘆鹽價不許加至三文該  
商等積欠飭令併限完交均係從嚴定議與蘆商毫無利益而花

杰轉謂戴衢亨庇護伊戚查有圻甚至摭拾瑣屑細故逞其筆端  
有心污蔑並以科場大弊壞人名節試思所參屬實不獨戴衢亨  
獲罪甚重凡閱卷大臣皆當得何罪卽朕亦不忍出諸口乃花杰  
率行列入彈章此何等事可云得自風聞乎此而不加懲治轉非  
朕開通言路諸事覈實之本意矣至劉承澍身爲部員以鹽法志  
及衙門檔案交與花杰閱看後又將部中議彙故爲漏洩致花杰  
得以極力排擠其居心尤不可問本日吏部議處奏上花杰著照  
議降三級調用劉承澍著照議革職至戴衢亨與各堂官公商定  
議後催令在園辦彙不將司員封閉在署辦理致招物議部議降  
二級調用尙覺過重著改爲降一級畱任九月 上以萬壽慶典

加恩臣工 命開復衢亭會典擡寫錯誤革職畱任處分十月  
衢亭呈獻詩冊 上嘉其詞意尤雅 特加優賚賞大卷八絲緞  
二端及荷包筆墨硯紙十二月以失察書吏王書常偽造印文冒  
領三庫銀兩物料交部議處尋議降一級調用奉 旨從寬改爲  
降二級畱任十五年正月授體仁閣大學士 上賜詩曰知遇  
先皇早欣看器晚成于申三錫命汝矢一心誠鳳閣隨雙彥鼇頭  
冠眾英荷 天作霖雨江右操臺衡 命管理工部事務仍掌翰  
林院充會典館正總裁六月以粵東海洋肅清加軍功一級十二  
月以纂輯平定三省方略告成開復失察冒領三庫銀物降級畱  
任處分 賞加一級十六年三月扈從 巡幸五臺閏三月因病

命先回京給假調治旋命懋勤殿首領太監帶御醫診視四月卒 諭曰大學士戴衢亨持躬正直學識淹通體用兼優忠勤懋著初由翰林院學士仰蒙 皇考高宗純皇帝鑒其器能 特賞三品卿銜擢任軍機大臣用為卿貳朕親政後見其心地坦白辦事認真日加委任由侍郎擢授尚書優給世職復令兼直南書房簡用至大學士屢經晉錫宮銜親信之篤不啻股肱戴衢亨感被厚恩竭誠圖報一切用人行政知無不言言無不盡朕每加採納克副贊襄伊雖仰邀隆眷而益加謹飭清慎自持從無因事譴謫實為國家得力大臣此次扈從五臺於途閒染患病證猶復勉強入直朕察看其精神疲憊派御醫診視賞假先行回京方期調

理就痊詎意數日之內遽聞溘逝深爲悼惜著加恩晉贈太子太師入祀賢良祠賞給陀羅經被先派榮郡王綿億帶領侍衛十員前往奠醊朕於初七日親臨園寓賜奠仍准入城治喪並著賞給廣儲司庫銀一千五百兩經理喪事其應得卹典著該部察例具奏所有任內一切處分悉予開復 賜諡文端 上親臨賜奠

右 國史館本傳

嘉慶十有六年四月戊申朔太子少師體仁閣大學士戴公薨事聞 皇上軫悼己酉榮郡王奉 命奠甲寅 皇上親臨喪次奠爵三戊午 贈太子太師諡文端祀賢良祠壬申禮部遵行 諭祭禮是年十二月甲子公之喪至南昌越一年十一月甲申公之

子嘉端遵行 諭葬禮葬公於南昌岡前嶺之兆立祭葬碑如令  
式而神道之左禮宜銘先是公以省墓歸南昌敬見於丙舍公慨  
然久之仰視日舉酒曰吾身後文屬子矣子無辭時敬起立負牆  
曰願吾師爲富鄭公文潞公會幾何時公遽捐館舍言之爲慙然  
然敬與弟子籍最先在京師視公含殮今復襄窀穸之事其敢自  
外謹次公之事於左公諱衢字荷之一字蓮士會祖時懋由江  
都遷大庾 誥贈通奉大夫累 贈光祿大夫會祖妣傅氏周氏  
梁氏 誥贈夫人累 贈一品夫人祖佩 贈官如會祖妣温  
氏 贈封如會祖妣父第元太僕寺少卿 誥授通奉大夫累  
贈光祿大夫妣彭氏 誥封夫人累 贈一品夫人公年十七本

省鄉試中式二十二名應天津 召試 欽賜內閣中書直軍機  
處乾隆四十三年公年二十四會試中式 賜一甲一名進士及  
第授翰林院修撰旋充湖北正考官復 命後奉 旨仍直軍機  
處充江南副考官督山西學政繼丁內外艱服闋充湖南正考官  
督廣東學政升右中允累擢侍講左庶子侍講侍讀學士嘉慶元  
年 皇上登極凡大典禮諸巨製悉出公一人公之受 深知膺  
殊眷內贊 緝熙之業外宣 康定之猷蓋於是乎始二年  
賜三品卿銜隨軍機大臣學習轉少詹事升內閣學士補禮部右  
侍郎轉戶部四年 高宗純皇帝賓天 朝廷黜陟誅賞之事甚  
殷公夙夜攀慕且趨事遂疾乞假假滿兼吏部左侍郎五年轉戶



部左侍郎六年教習庶吉士升兵部尙書十二月教匪平加太子少保世襲雲騎尉八年調工部十年調戶部充會試總裁直南書房十二年協辦大學士充經筵日講起居注官翰林院掌院學士尋充順天鄉試正考官十三年奉 命視南河 子假省墓十四年 皇上五旬萬壽加太子少師十五年授體仁閣大學士管理工部事務十六年三月 皇上以綏懷西北屬國幸五臺公扈從臨發送敬於正寢之門復理前丙舍語敬愕然不敢對辭去閏月 回蹕公途次得疾至正定疾甚奉 命歸京師治疾馳至 圓明園邸第敬往問公不語二日矣是日遂不起年五十有七敬允惟唐宋以來羣輔肩臂相望然或賢矣而不得其時則節耀而功

不暨得其時矣而不得其主則業豐而禮不終若夫功暨禮終朝  
野動色而世有先賢之狀家藏舊事之錄褒揚過溢漸至攘誣斯  
亦古者大臣之心所必不敢承者也惟我 聖清一家作述 太  
祖 太宗肇造丕基 世祖 聖祖並包寰海 世宗 高宗以  
勤以養訖於無外歷溯 國家勦業守成諸大臣皆躬劬粥粥如  
不勝衣其麻懿之謨鴻譙之論敷陳密微者 朝廷時布之遠邇  
以爲天下光益有道之世進退之權毀譽之柄皆自上操之道固  
如此前教匪戡定 皇上以公知無不言言無不盡 詔天下公  
薨復申繹之而公所面取進止雖同直勳舊大寮及公之親屬無  
有能知其說者於是而知公之爲 國家非淺近所能測識不可

沒也公性清通無聲色之好朝退四座皆士大夫言人人殊公不  
置可否而 朝廷設施有見之數月數歲之後者其燕閒之論則  
以爲先代黨禍皆驟加摧落有激而成若以事漸去之必無他變  
論度支主減費守常賦論治河主謹隄防不改道而論三省教匪  
則以爲小醜跳梁無遠略當以忠勇將帥驅殄之勿使文臣支格  
其間此卽公立 朝大旨也公娶陶夫人子一嘉端徐宜人出年  
始十一 欽賜舉人世襲騎都尉銘曰

王澤之和萬物承之芄芄益益在於所施河收其洶山斂其嶸篤  
生哲輔如磨如錯始對大策遂冠仙瀛出馳 使車入奉 樞廷  
皇上龍飛試之心膺操圓循規引方合矩蕩乎而升芒乎而作

景星在天青狼自落雲駛月運舟行岸移扁之當楣爲萬事儀如  
何徂謝會不崇朝丹旄南來霜冽風蕭兼金之純大玉之粹巧鏤  
萬變其真則貴九州四隩視此刻辭後世之公敢告不欺

右神道碑銘懌敬撰

自雍正中設立軍機後皆尙書侍郎攝其職惟乾隆乙卯軍機大  
臣乏人時戴文端循亨吳制府熊光以久任軍機章京熟習政事  
純皇帝特擢爲軍機大臣以資格故 賜三品卿銜時人榮之

右錄宗室昭槿撰

國朝者用美符示知  
卷三十一

七

吳璫

吳璫浙江錢塘人父嗣爵吏部右侍郎自有傳璫乾隆四十三年進士改翰林院庶吉士四十四年丁父憂四十六年服闋四十九年散館授編修五十年大考一等擢侍講學士充日講起居注官五十三年充陝西鄉試正考官五十四年提督安徽學政 召對後 諭曰本日召見吳璫因伊係原任總河吳嗣爵之子詢及河務情形奏對甚爲諳悉人亦明白曉事以之補放河道可期得力吳璫著補授河南開歸陳許道五十六年遷按察使五十七年遷布政使五十九年八月巡撫穆和蘭赴懷慶查辦賑務璫充鄉試監臨適黃錦灘河水暴漲出閘馳往防護 上以其能知緩急

獎賚之先是安徽太和縣逆匪劉之協緝拏未獲十一月河南竊案發訊有太和劉知協一犯關提赴豫行抵扶溝縣逸去璫請稭知縣劉清節職責令協緝並自請議處 諭曰邪教一案通緝已將數月該縣豈未聞知卽云劉知協係因竊案關審但知字與之字音本相同有何分別此等劣員豈得止以革職協緝參奏完事吳璫著交部嚴加議處並罰養廉三年以爲玩誤地方者戒尋議革職 上加恩改爲畱任不予頂帶六十年署巡撫嘉慶元年八月官兵剿捕湖北教匪以璫轉餉妥速復頂帶十月復以照料官兵經理得宜下部議敘十一月以漕運遄行無滯復下部議敘二年三月逆匪齊王氏竄入河南境由汝甯舞陽焚掠而西偪省垣

璫率官兵沿河防堵賊不得渡遂走內鄉入陝事 聞 賞大小荷包七月以協濟楚陝軍需及勦辦息縣匪徒籌備車馬均屬妥速 賞戴花翎旋丁母憂以軍興畱任守制四年三月署河東河道總督六月請增河工料價歸入地糧攤徵 諭曰河工需用物料價值例有正項開銷豈容輕議加增該督率以籌備幫價爲詞於地糧內按年攤徵銀十四五萬兩使豫省羣黎均受其害爲民上者豈忍出此且議加之後不能復減竟永遠累及閭閻矣吳璫爲病官起見而不知病民實甚著交部嚴加議處尋議降調 上加恩改爲畱任十一月服闋實授旋請回籍葬親 允之五年正月回任二月調江南河道總督十一月偕兩江總督費淳奏邵家



壩工合龍疏入 上深加獎許 賞太子少保銜六年京察 諭  
日吳璫熟悉河工上年調任南河卽能將邵家壩漫口堵合著交  
部議敘七年二月奏改蕭碭南岸同知邵睢北岸通判爲要缺在  
外題補 從之九月唐家灣民堰潰決興工堵築尙未合龍而璫  
以奏報安瀾下部議敘嗣稱霜降後河水復漲唐家灣急難堵合  
上以其遽報安瀾嚴飭之停其議敘十一月唐家灣工竣得

旨嘉獎八年九月東河銜家樓漫口 上念下游江南境內水勢  
消落來年重運北上必致阻滯 命豫籌之十一月請挑通邳州  
宿遷汎內各閘再於宿遷桃源交界築束水草壩並挑挖淤淺使  
水有儲蓄 上嘉其深合機宜如所請行又言徐州一帶河水寬

深並未消落係海口壅塞所致 諭曰海口壅塞實屬全河大病若不疏通尾閭則河身淤壅水勢日見其高年復一年伊于胡底且海口不能暢行卽豫省剋日合龍河流暫復故道祇爲目前補苴之計而水無歸宿日久仍不免壅潰之患所關匪細著吳璥通盤相度設法妥籌十二月疏稱雲梯關兩灘之間下有暗灘橫阻灘內水深七八九尺而灘脊過水仍四五六尺尙非全被阻遏請將黃泥嘴兩灘相對之處挑挖引河導流迅注又吉家浦于家港倪家灘宋家尖等處挺出灘嘴一併挑挖得 旨允行九年七月奏伏汛各工保護平穩並言察看洪湖異漲並未消落而仁智兩壩所過之水歸入高寶邵伯諸湖尙堪容納其下游之金灣六閘

鳳凰壁虎等橋分洩歸江去路亦暢仁智兩壩暫緩堵築俾得分洩湖漲以保堰圩隄工一俟洪湖水落卽當酌看堵閉 上是之時東河衡工初合龍九月清江浦河口淤淺回空糧船不能挽渡 上以清水力弱由啟放仁智等壩所致要在蓄清濟運 命刑部左侍郎姜晟協同籌辦十月偕晟奏請堵閉二壩及惠濟閘之鉗口壩使湖水全力東注刷通河口並啟放李工口門減掣黃水 從之十二月 諭曰朕聞吳璣近日多病本年清江浦河口淤淺漕船阻滯究因該河督辦理不善所致本有應得之咎今業據設法疏通幫船均已趲渡完竣是以加恩寬宥但河南一切宣防關係緊要恐其精神不能周到吳璣著來京另候簡用十年授兵

部右侍郎尋調倉場侍郎十一年四月復授河東河道總督五月  
疏言北岸險工以秦家廠衡家樓爲最秦家廠地居上游對岸爲  
廣武山所遏溜勢北趨秦家廠適當其衝又爲沁水入黃之處力  
猛異常大汛時全賴一線長隄爲防守根本但沙土易於汕刷須  
用淤土包築堅實又秦家廠後自沁隄尾至縷隄二堡皆北岸屏  
障應一律加培至衡家樓大壩全河至此一束形勢極爲險要見  
將喫緊各埽工培築堅厚大壩後龍門深塘舊埽幾至刷盡壩頂  
亦多塌卸又北首二壩埽工殘缺南首迤東八十丈向無埽工俱  
應修補 上以所言皆得要領如所請行九月以料物例價不敷  
請照南河按時價報銷 允之十二月復請將河工歲料幫價歸

入地糧攤徵河南歲以三十萬兩爲額通省攤徵山東歲以三萬五千兩爲額於充沂曹濟四府州屬攤徵 諭曰豫省睢工幫價銀兩本年甫經徵完衡工幫價銀七百餘萬兩於明年始行啟徵今再加以歲料幫價每年加徵銀三十萬兩山東充沂等屬亦歲加徵銀三萬餘兩是小民於常賦之外歲有攤徵永定爲額與加賦何異此非病民而何吳璫率行奏請實屬謬誤著交部嚴加議處尋議降調 上加恩改爲畱任旋將未經奏明榮澤等十四汛隄堰工需併入衡工善後各工題銷 上切責之十二年以微山湖蓄水短絀請疏挑上游牛頭河 從之十三年六月 召回京擢刑部尙書十月充順天武鄉試正考官 賜紫禁城騎馬十一

月江蘇金山寺僧赴京呈控民人王兆良等因爭壅沙洲糾眾戕斃僧人多命 命偕戶部左侍郎托津往鞫之問擬如律先是南河雲梯關外陳家浦河水漫溢由射陽湖旁趨海口兩江總督鐵保江南河道總督戴均元以挑河費鉅徑由射陽湖入海較正河轉近議改河道至是 命偕托津查勘旋勘明改道不便仍請修復故道接築雲梯關外大隄收束水勢得 旨允行十二月復授江南河道總督十四年正月以籌議經費請酌增鹽價 允之二月疏陳海口固須挑濬而大隄不能堅鞏則一經旁洩挑亦仍淤蓄清固屬至要而隄壩不能修復則一遇盛漲蓄亦必潰今閘壩無減黃之路五壩無節宣之方均須亟爲救治 上嘉其切中事

機諭令盡心經理六月以前在倉場侍郎任內失察黑檔重領米石降三品頂帶革太子少保銜褫花翎仍革職畱任七月賞二品頂帶九月因山陽縣境內狀元墩隄潰部議革任上宥之十一月以海口挑復正河費用浩繁兼恐次年桃汛前趕辦不及請仍就北潮河去路疏濬寬深權宜辦理允之旋以回空糧船阻凍降旨切責十二月請築碎石坦坡以衛高堰大隄詔如所請十五年二月偕兩江總督松筠復請修復正河諭曰海口修復正河誠爲正辦但經理大事必須中有定見豈漫無把握動輒游移前吳璈差往南河時曾力主挑復正河迨上年冬間忽以工重費繁時日緊迫不能趕辦請先將北潮河入海之路權宜辦

理伊既籌度情形力主此說因亦降旨允行今松筠到彼後一經查勘會議仍請改挑正河並稱前估各工尙可刪繁就簡吳璫於上年十一月奏到時已稱趕辦不及今又遲兩三月何以又可趕辦前後所奏自相矛盾似此工用不繁又可迅速集事自應卽照所奏辦理惟是全河大局出海最關緊要吳璫久練河工非松筠初到可比此次既親勘會商奏聞辦理自係吳璫斟酌再四確有把握將來總不得以此事係松筠主見爲推諉地步惟當認真督辦用收一勞永逸之效旋以山陽縣平橋汛東岸隄工漫溢下部嚴議尋議革任 上復宥之五月請修復惠濟正閘王營減壩並於大汛期內趨辦堵禦黃壩 允之七月以全漕度黃復 子太



子少保銜 賞還花翎八月因病乞假 諭曰吳璫曉練河工年  
 來經理修防不辭勞瘁但見在病體委頓卽勉強視事亦於要工  
 無裨著加恩開缺調理並令伊自行酌量或就近回籍或來京養  
 痾病痊之後以六部尚書補用十六年二月 命戶部尚書托津  
 順天府府尹初彭齡查覈南河工程以璫任內失察屬員草率誤  
 工又挑挖淮北鹽河未經奏明且所辦工段已多淤墊疏劾之  
 命分賠鹽河工銀復下部嚴議尋議降調 諭曰吳璫在任年分  
 故久因循貽誤又有挑挖鹽河應奏不奏一案伊見已衰病豈復  
 能勝尚書之任著照部議降四級調用仍於補官日降三級畱任  
 七月 命赴南河襄辦王督減壩暨李家樓漫工十七年三月減

壩暨李家樓工合龍四月回京十一月補光祿寺卿十八年四月  
擢內閣學士兼禮部侍郎銜九月遷吏部右侍郎時河南睢州二  
堡河溢十二月 命赴南河查勘湖河情形十九年正月奏江南  
邳宿運河賴微山湖爲水櫃近年上游泉渠積沙淤塞山水無路  
歸湖宜亟行疏濬 允之尋授河東河道總督二月請於清口一  
帶估挑引河拆展各壩並於迎水壩外王營減壩毛家嘴等處擇  
要抽挑及加挑仁義兩壩引河各工皆 允之五月 命赴河南  
防汛並督辦睢工二十年正月擢兵部尚書仍畱睢工二月合龍  
下部議敘 命籌辦善後事宜十月回京復 賜紫禁城騎馬十  
一月因病 賞假遣御醫診視十二月病痊二十一年正月京察

屆期下部議敘二月墩七十生辰 命內閣學士福勒洪阿齋珍  
幣卽其第 賜之七月 命赴東河勘工協防秋汛九月回京二  
十二年三月調刑部尙書六月 命赴東河查勘睢工新鑲埽壩  
及山東運河尋署河南巡撫八月回京十一月江南河道總督黎  
世序請將蕭南廳民堰改爲官隄 命往勘視並查清江浦禦黃  
東清壩工十二月奏民堰無庸議改東清壩外宜添築二壩以資  
收蓄均 從之二十三年正月回京二月充經筵講官六月河南  
武陟縣沁河溢 命署河南巡撫堵築漫口八月合龍下部議敘  
十月回京二十四年閏四月以病乞解任 允之六月病痊署吏  
部尙書八月河南蘭陽儀封汛內河溢武陟馬營壩繼決 命會

同巡撫琦善堵築十月以購料遲延褫花翎尋請開投效事例  
允之十一月以籌備料物充足復花翎二十五年正月請酌增土  
方稽料例價攤徵歸款 從之二月補吏部尚書協辦大學士三  
月馬營壩大工合龍得 旨嘉獎復加太子少保銜尋南岸儀封  
三堡漫口革太子少保銜 命署河東河道總督復以漫水下注  
洪湖 命赴江南查勘五月請拆展束清禦黃各壩並啟放吳城  
七堡及桃源高家灣洩水溝得 旨允行六月回京八月 命赴  
河南堵築儀封漫口九月罷吏部尚書任以協辦大學士督工十  
月合龍下部優敘道光元年正月回京二月以病乞休 諭曰協  
辦大學士長璫供職多年從前兩河興舉大工疊蒙 皇考仁宗

容皇帝派往督辦上年冬月堵築儀封漫口剋期蒞事因感受風寒回京後喘嗽增劇懇請解職節經賞假調攝茲復奏血氣兩虧精神委頓不敢遷延曠職伊已年逾七旬著加恩准其開缺安心調理八月回籍二年正月京察 諭曰國家考績鉅典所以黜陟賢否朕釐工熙績一秉大公昨因吏部侍郎那彥寶屢辦河工聲名平常業經特旨降黜因思吳璥當時同往工次列名在前其不知潔已報效聲名亦與那彥寶相等事屬已往姑勿深究若竟以其致仕家居置之不議伊轉得濫邀章服之榮是與那彥寶同罪異罰不足以昭示廷臣協符輿論吳璥著卽革去翎頂以示朕甄覈持平至意十月卒子元凱二品廕生原任光祿寺署正捐升員

外郎公亮捐納道員公謹一品廕生引見命以通判用見官  
山東平度州知州公彌陝西候補知縣孫若準道光二十一年進  
士見官掌江南道監察御史

右 國史館本傳



托津

托津富察氏滿洲鑲黃旗人父博清額理藩院尙書自有傳乾隆四十三年托津由都察院筆帖式充軍機章京四十七年升工部主事四十九年遷員外郎五十六年調戶部銀庫員外郎五十八年授福建道監察御史嘉慶元年兼公中佐領四年四月升兵科給事中六月 賞副都統銜署鑲黃旗蒙古副都統八月署四川總督魁倫以川省教匪不靖奏請撥解部庫銀兩以濟軍需 上命托津解往達州軍營五年正月補正紅旗滿洲副都統尋 命接辦四川軍需閏四月審擬廣西平樂協副將七格捏報重傷私離軍營並於所帶官兵毫無統束奏請奪職遣戍伊犁 允之五



月奏言川省距京遙遠解運需時請豫撥餉銀早爲籌備 諭曰  
川省餉捕見當喫緊之際軍餉自所急需托津酌量情形原可隨  
時奏請乃於一月以前豫懇接濟豈不徒添朕憂甚屬冒昧糊塗  
於軍餉事務漫無籌畫著卽來京供職伊才具平常旣不能籌辦  
軍餉而帶兵打仗更非所長斷不准續奏畱川卽過陝西時亦毋  
庸向經略懇請隨營效力此卽朕保全之恩不可不知也六月奏  
報回京 諭曰托津係特派管理軍餉之員自應將所管營內見  
存銀錢萬兩約數幾月之用卽目下所餘無幾尙需調撥幾萬兩  
備用亦應奏明軍營距達州甚近緊要情形亦應遇便奏聞托津  
並無一言奏及實屬糊塗之至似此無用之人卽使來京又令辦

理何事托津著革去副都統加恩賞給頭等侍衛前往葉爾羌更換奇豐額回京尋抵葉爾羌辦事大臣任六年二月奏准葉爾羌搭放官兵鹽菜銀兩請以每兩折給普爾錢二百官兵口食羊隻每隻折價銀五錢向係合錢發給請改爲銀款三月以前任辦事大臣奇豐額擅給伯克頂帶托津接任後未經更正部議降二級調用上加恩改爲降三級留任七年九月 賞給副都統銜作爲喀什噶爾參贊大臣十二月授鑲黃旗蒙古副都統八年九月奏喀什噶爾英吉沙爾兩城歲收錢文支放官兵鹽菜等項按照銀錢各半搭放尙有盈餘請自九年爲始按銀四成錢六成支放於經費既可節省而錢文亦無積壓 允之尋調鑲黃旗漢軍副

都統十月投倉場侍郎九年八月奏浙江台州後幫旗丁虧短米石私買餘米抵漕並以徽變米石充數請交刑部嚴訊失察之浙江糧道達琳押運通判德克金布領運千總張超羣等下部議處又議覆御史五誠額奏請各倉監督在倉住宿章程疏言倉廩啟閉有時監督率役住內恐家丁蠹役得與外閒匪徒勾引夥竊且嚴冬風高物燥火燭可虞應嚴飭監督等在附近官房輪班直宿仍周密巡查以昭慎重 上是之十一月丁母憂十年閏六月調吏部左侍郎 命在軍機大臣上學習行走八月 賞戴花翎尋充左翼監督九月湖廣總督百齡奏劾武昌鹽法道海昌失察岸商擡價病民劣矜賄和釀命並寶武局鼓鑄偷減 上命偕直隸

總督吳熊光往按罷海昌職岸商程啟大鑪匠黃銘仁革生王揆  
英悉按律懲辦又廣東已革南海縣知縣王軾番禺縣知縣趙興  
武訐告前任巡撫百齡委令屬員代辦供應家人藉端需索並違  
例製造非刑 命托津會同湖廣總督瑚圖禮往治其獄按訊得  
實請褫百齡職論如律王軾等問擬有差十一年正月調戶部左  
侍郎四月以河南巡撫馬慧裕劾河東河道總督李亨特勒派廳  
員銀兩各款 命托津偕署刑部左侍郎廣興往按獄定李亨特  
奪職逮問成伊犁十月 賜紫禁城騎馬十二月往讞天津已革  
貢生賀有年索詐賄和捏控慶雲縣知縣柯映伊私侵關稅盈餘  
一案奏言天津海稅向無定額致歷任知縣以多報少通融侵那

應按照本年那用之二萬二千兩爲率自乾隆四十三年起查明徵收各員按在任之久暫經徵之多寡勒限著追照例問擬並將歷任通同那移各上司查明提用銀數按六成分年賠繳仍下部議處革生賀有年坐受賄索詐稅吏章德程等坐盤踞囑和均置之法天津道胡鈺慶雲縣知縣柯映伊以聽民求和下部議處又疏陳酌定徵收稅額請飭直隸總督就近遴委道府大員監收以杜侵那均如所請行十二年二月京察屆期 諭曰托津在軍機處行走勤慎著加恩交部議敘七月充崇文門監督時熱河副都統福長安劾前任副都統慶傑收受屬員公分等款疏上奪慶傑職 命偕工部侍郎英和往鞫讞定慶傑依官吏求索所屬財物

律戍烏魯木齊十二月署經筵講官十三年九月 賜燕郊房屋一所先是南河雲梯關外陳家浦漫口由射陽湖旁趨海口兩江總督鐵保江南河道總督戴均元請改河道徑由射陽湖入海十月 命偕刑部尚書吳璈馳赴南河會勘十一月覆奏查明馬港口張家莊漫水俱西漾數十里始折歸北湖河如果該處地勢建甌何以轉向西流且北湖河已匯流數月水未消涸顯見去路不暢改道斷不可行請仍修復故道接築雲梯關外大隄收束水勢使之東注較爲得力又奏勘河口高堰各工因運河西岸堵築漫缺頭二壩口門較寬以致不能擎托暢注請趕緊補築均得 旨允行十二月以前偕廣興審辦案件於廣興需索騷擾得受苞苴

情弊未經陳奏部議降二級調用上加恩改爲降三級畱任旋充經筵講官十四年正月往諫江蘇金山寺僧人志學呈控民人王兆良爭墾沙地糾眾戕斃多命一案僧人志學等均治如律二月署刑部左侍郎六月前任倉場侍郎福慶許兆椿奏通州中西二倉所存白米虧短已革倉書高添鳳盤踞舞弊命偕福慶往勘倉書高添鳳甲斗趙長安花戶陳四等坐奸吏愆法治如律旋經刑部究出高添鳳私出黑糯米石一案奏入上以倉場侍郎及監督等官歷任相沿因循廢弛以致百弊叢生將辦理不善各員分別革懲托津在任較久下部嚴議尋議奪職諭曰國家經久之計首重倉儲該侍郎自當督率所屬慎重鈎稽方爲無

忝厥職乃怠玩因循毫無整頓以致已革倉書在彼盤踞似此積  
蠹橫行官吏愆法不知該倉場侍郎所司何事此而不嚴加懲辦  
何以肅紀綱而釐職守托津在任一年未能查出弊竇但黑檔舞  
弊非伊任內之事著從寬革職畱任仍著落分賠八月御史陸言  
劾浙江學政劉鳳誥代辦監臨印用聯號 命偕刑部侍郎周兆  
基按治得實劉鳳誥革職逮問戊伊犁十二月失察工部書吏王  
書常私雕假印冒領庫銀降一級畱任十五年正月署山西藩司  
河東道劉大觀參奏前任山西巡撫初彭齡任性乖張署潞安府  
知府試用直隸州知州朱錫庚婪索贓私 命偕刑部左侍郎穆  
克登額往按鞫實初彭齡劉大觀均下部嚴議朱錫庚奪職論罪



如律二月擢工部尙書授正黃旗漢軍都統四月以上年承辦  
萬壽慶典經理妥協 賞加一級五月調戶部尙書旋因給事中  
胡大成劾奏勒保任四川總督時有匿名揭帖指訐總督藩司款  
蹟寢息未辦 命托津偕光祿寺少卿盧蔭溥往察得實奏 聞  
勒保坐應奏不奏罷大學士六月以粵洋巨匪烏石二等殄除淨  
盡海面肅清 諭曰軍機大臣承旨書諭自勦辦洋匪以來頗屬  
勤慎宜加優獎托津著賞加軍功加一級十一月兩淮鹽政阿克  
當阿劾前任揚州通判繆元瀆承辦揚河隄岸草率偷減 命偕  
順天府尹初彭齡前往查辦十六年正月署兩江總督二月奏通  
判繆元瀆並無偷減情弊惟於淮揚運河水漲未能先事籌防以

致廟灣場河隄漫口搶護不及糜帑誤工請褫職遣戍四月調鑲  
百旗滿洲都統 賞加太子少保銜兼內大臣九月署吏部尙書  
十七年充會典館副總裁官十八年二月京察下部議敘六月扈  
蹕熱河九月直隸敘匪林清謀逆遣其黨闌入禁城 命托津  
同京查辦尋獲林逆於黃村西之宋家莊 上以軍機大臣托津  
等晝夜宣勤辦理妥協 賞加二級旋授協辦大學士時股匪李  
文成犯豫陷滑城 欽差大臣那彥成遷延旬日尙未進兵 上  
命托津往代嗣因那彥成帥師進剿連著戰績復 命托津赴開  
州軍營督同提督馬瑜剿辦餘匪十一月駐兵開州得 旨托津  
見在開州督同馬瑜搜剿直隸邊境賊匪該處不過零星竄匪不

難辦理如托津一路兵力有餘無大股可剿之賊或於蘇爾慎閣  
俊烈等酌分一二人帶兵馳往滑縣會剿卽或兵力不敷分派則  
吉林黑龍江馬隊過開州時不許截留一名速令全抵那彥成大  
營聽候差撥托津前奏恐滑縣賊匪被剿竄向東北欲厚集兵力  
堵禦不知滑縣賊匪殲除則北面自無虞竄逸朕盼望捷音宵旰  
焦勞見當功屆垂成之際伊與那彥成當統計全局先其急者以  
期速蒞大功軍務至重功則同賞過則同罰想托津公正廉明自  
能仰體朕心協助那彥成成功托津一律受恩朕無歧視只盼捷  
音尋由湯二莊進發連克楊店子王家道口等村焚燬賊巢殲除  
賊目邢全忠執賊目郭明山餘匪俘馘無算捷入下部議敘復

論曰托津奏官兵剿捕開州邊界賊匪淨盡所辦甚好一切機宜  
當詳細斟酌不可畏憚遲疑亦不可輕率孟浪也嗣聞逆匪馮克  
善竄德州奏請帶兵偵拏 論曰托津所奏紕繆已極查拏要犯  
不過派員緝拏若各處皆須發兵前往有是理乎托津之意計行  
至德州時滑城已破德州無事可辦彼時派馬瑜等將兵帶回開  
州伊自行奏請回京卽就近由德州起程竟係思家念切以致舉  
動冒昧糊塗著嚴行申飭卽刻帶兵兼程轉回開州防堵會賊匪  
李文成等竄往輝縣焚掠高莊直趨林縣 上以托津不顧北面  
率往德州 嚴旨申飭 論曰首逆李文成劉愾明已至林縣欲  
趨磁州汝速領官兵星夜馳回自北而南奮力截剿生擒一逆立

受隆恩若再遲延親望退縮不前朕必按 皇考處治訥親之例  
辦理禍福任汝自取慎之懍之又 諭曰汝逕往德州之舉糊塗  
之極不治汝罪已屬格外施恩此次再不奮勉不能輕恕矣十二  
月山大名退駐開州連獲零匪得 旨開州一帶零匪托津督率  
官兵擒縛九百餘人辦理認真著照軍功例議敘時滑城克復偕  
直隸總督那彥成奏陳善後事宜七條一酌改直隸營制一添設  
河南山東官兵一於直隸開州長垣河南濬縣滑縣等處移駐弁  
兵一調撥吉林黑龍江官兵一千名駐京操防一各直省編查保  
甲以詰姦宄一散鄉勇以收器械一請以陝甘將備與直隸分別  
對調疏入如議行十九年閏二月授正白旗領侍衛內大臣其三

月以前在開州時失察家人攜帶幼孩下部議處尋署兵部尙書  
五月充國史館總裁官七月倉場侍郎榮麟劾通永道張五緯玩  
誤漕運張五緯復以榮麟迴護已見互相揭奏 命托津往讞之  
獄定榮麟張五緯下部議處有差八月授東閣大學士管理戶部  
事務九月晉太子太保銜充會典館總裁官十一月倉場侍郎初  
彭齡劾兩江總督百齡江蘇巡撫張師誠收受餽送並劾江蘇藩  
司陳桂生冊報溧水縣虧缺銀數先後多寡不符有心朦混 命  
偕戶部尙書景安往按二十年正月查明百齡張師誠俱無收受  
餽送之事惟百齡於提取關稅銀兩發縣生息作爲兵丁差費未  
經奏明辦理張師誠於未到任之先標弁迎至其家卽畱供應差

遣均有未合百齡張師誠均下部議處察議有差陳桂生亦無含  
混隱匿情弊初彭齡坐奏事不實下部覈議八月充崇文門正監  
督二十一年二月京察下部議敘四月署 御前大臣閏六月以  
直隸總督那彥成前在陝甘總督任內與藩司陳祁高那賑銀津  
貼腳價等費事覺 命托津往按視那彥成職逮問解京 命托  
津暫署直隸總督旋回京二十二年六月管理理藩院事務九月  
御史伊綿泰蕭鎮於封禁米石婪索錢文問擬如律以御史等係  
由戶部保送托津未能詳慎揀選下部議處二十三年二月充文  
淵閣領閣事五月以纂輯明鑑體例不合罷原纂各官 特改派  
總裁官另行編輯托津與焉八月 上恭謁 祖陵禮成 賞加

二級二十四年京察下部議敘尋 諭曰朕本年六旬正壽左右  
近臣宜再加恩澤托津襄贊內廷樞務多年辦事老成承旨書諭  
總理部旗事務從無錯誤著加恩賞戴雙眼花翎並賞用紫纒二  
十五年四月充殿試讀卷官六月扈 蹕熱河七月 仁宗睿皇  
帝升遐 命總理喪儀九月充 實錄館監修總裁 諭曰七月  
二十五日慟遭 皇考大行皇帝大故彼時軍機大臣敬擬 遺  
詔朕在諒陰之中哀慟迫切未經看出錯誤之處朕亦不能辭咎  
但思軍機大臣多年承旨所擬自不至有誤昨內閣繕呈 遺詔  
副本以備宮中時閱恭讀之下未有 皇祖降生避暑山莊之語  
因請 皇祖實錄跪讀始知 皇祖於康熙辛卯八月十三日子



時誕降於雍和宮復徧閱 皇祖御製詩集凡言降生於雍和宮者三見集中因令軍機大臣明白回奏據稱恭查 大行皇帝御製詩初集第十四卷 萬萬壽節率王公大臣行慶賀禮恭紀詩註恭載 高宗純皇帝以辛卯歲誕生於山莊都福之庭又十六卷 萬萬壽節率王公大臣等行慶賀禮恭紀詩註相同至 實錄未經恭閱不能深悉等語朕敬釋 皇考詩內語意係泛言山莊爲都福之庭並無誕降山莊之句當日擬註臣工誤會詩意茲據軍機大臣等稱 實錄未經恭閱尙屬有辭至 皇祖御製詩集久經頒行天下不得諉爲未讀實屬巧辯托津戴均元俱已年老毋庸在軍機處行走並不必恭理喪儀一併交部嚴加議處

遺詔布告天下爲萬世徵信豈容稍有舛錯故不得不將原委明白宣示中外著將此旨通諭知之尋部議奪職 諭曰托津等敬繕 皇考大行皇帝遺詔內有錯誤之處非尋常錯誤可比吏部議以革職實屬咎所應得第念 皇考梓宮在殯兩大學士同時罷斥朕心實有不忍托津戴均元著降四級畱任六年無過方准開復道光元年三月 仁宗睿皇帝奉安禮成托津恭題 神主命晉太子太傅銜 賞加隨帶三級七月調正黃旗蒙古都統八月調正白旗滿洲都統二年三月署戶部尙書四月授內大臣五月以議奏倉場盤查章程措置失宜部議降二級畱任 上加恩改爲降一級畱任尋授閱兵大臣八月充崇文門正監督十月

署吏部尚書兼管戶部三庫事務尋署理藩院尚書三年正月托  
津子恆齡之妻乘轎由 神武門中門行走有乖體制 上以托  
津平日不能管束革去紫纒並襖雙眼花翎仍戴單眼花翎以示  
懲儆八月 上幸萬壽山玉瀾堂 賜宴十五老臣 恩命入宴  
繪像 御製詩有昔贊綸扉承 考澤立朝正色端巖廊之句  
褒托津也四年七月以官犯候際清呈請贖罪賄囑官吏並職員  
董椿指官撞騙等情 命托津按治候際清董椿問如律刑部堂  
司各官降革遣戍有差五年正月京察下部議敘二月署戶部尚  
書八月署刑部尚書復充崇文門正監督六年四月充殿試讀卷  
官七月署左都御史七年五月管理刑部事務七月通州民人王

支弼呈遞封章控告協辦大學士英和家人張天成增租擾累  
命托津等治其獄讞定坐英和失察褫協辦大學士仍下部嚴議  
王文弼等論罪如律八年正月回疆底定 恩逮廷臣 賞還紫  
纒七月以審擬侍衛恩緒毆斃家人一案瞻顧遲延含混聲敘  
命將刑部堂官議處托津降二級畱任九年八月 上詣盛京祇  
謁 祖陵托津畱京辦事十月 賞還雙眼花翎旋 諭曰托津  
年逾七旬著於該管旗分衙門帶領引見之旨免其帶領以示體  
恤耆臣至意十年八月得 旨御門辦事托津著加恩免其進班  
十月以前在戶部尙書任內失察捐納房書吏蔡繩祖等私造假  
照降四級畱任十一年因病陳請開缺 諭曰大學士托津自嘉

慶年開仰蒙 皇考仁宗睿皇帝簡任綸扉贊襄樞禁朕御極以來命管理部院旗務宣力多年悉臻妥協今歲秋閒屢以病乞休降旨令其安心調理茲復以氣體衰憊奏請開缺朕實不忍遽允所請但察其病勢未痊若令勉強趨公轉非所以示體恤托津著加恩以太子太傅大學士致仕支食全俸俾資頤養用示眷懷着碩恩禮優加至意十二年托津孫庚長以二品廕生分部學習期滿引 見 上加恩准其畱部卽補十五年十月卒年八十一諭曰致仕大學士托津宣力五十餘年資深望重歷仕 三朝渥承恩眷辦事實心老成公正十一年冬間以老病乞休不忍遽令解退因伊年躋八旬恐其繫心職守特加恩恤准予致仕並賞全

俸歲賞葭枝時加存問俾安心頤養獲享遐齡茲聞溘逝深爲悼惜著賞給陀羅經被派慶郡王綿懋卽日帶同侍衛十員前往奠醴朕於十一月初七日親臨賜奠並加恩晉贈太子太師入祀賢良祠賞給廣儲司庫銀一千五百兩經理喪事所有原任內一切處分悉予開復應得卹典著該衙門查例具奏十一月 上親臨賜奠復 諭曰朕親臨原任大學士托津宅賜奠眷念耆臣伊孫太僕寺員外郎慶端俟服闋後加恩以郎中升用尋 賜祭葬予謚文定孫慶端福建布政使庚長浙江鹽運使

右 國史館本傳



宗室祿康

宗室祿康正藍旗人由宗人府筆帖式洊升理事官乾隆四十六年擢山東道御史五十一年轉吏科給事中超擢內閣學士五十二年遷盛京禮部侍郎轉盛京兵部戶部侍郎嘉慶四年三月調刑部右侍郎兼正紅旗漢軍副都統五月轉左侍郎調鑲黃旗滿洲副都統七月兼公中佐領十二月調吏部右侍郎五年四月轉左侍郎八月擢左都御史十一月授正黃旗漢軍都統六年正月擢兵部尙書 賞紫禁城騎馬二月調刑部尙書七月充經筵講官八月充崇文門副監督七年正月授步軍統領 賞戴花翎祿康以步軍統領衙門與刑部有交涉事件不便兼攝具摺懇辭



上嘉之 命專辦步軍統領事務兼正黃旗漢軍都統 賜南海  
澆寓屋一所三月調戶部尚書 諭曰戶部堂官多有在內廷行  
走者不能每日進署祿康係步軍統領在圓明園直宿今既補授  
戶部尚書著不必在園輪直俾得時常進署辦理部務八年奏新  
例番役子弟不准應試入仕查番役額缺例應招募良民充當今  
良民咸知賤役不肖踊躍應募可否仍准其子弟居官俾招募易  
於得人而番役知所鼓勵御史王麟書劾之 諭曰隸卒人等所  
以不准入仕考試者賤其役非賤其人尋常岷庶原係良民一經  
充當差捕則執役微賤自不得濫邀登進若謂係由良民而來則  
各衙門卑役獨不自良民來乎况上年甫經降旨定例道行番役

等從前得過頂帶不准以實缺補用其子孫應試中式者祇准畱  
其舉貢生員不准選用官職其見任出仕者概令撤回今未及一  
年復請准令入仕子奪靡常成何政體且據祿康面奏此項番役  
卽不便令其濫廁文員或請加恩准令備官武職俾知鼓勵更屬  
非是國家文武分途名器則一有何高下若准令補授武職日後  
必致漸廁文階又將何以限制如謂良民咸知賤役不肖踊躍充  
當則各衙門皂役設亦挾制官長以此爲詞豈將隸卒子孫亦概  
准其居官考試有是理乎看來祿康等未免爲番役所挾制或竟  
受其慫恿意存市恩故爲此奏殊屬冒昧著交部議處部議革任  
上念其爲鼓勵緝捕起見且事未施行改爲革職畱任九年二

月京察屆期 諭曰祿康職任度支兼管步軍統領辦事勤妥交  
部議敘五月 三陵總管文昌保呈請借給俸銀祿康等不按例  
批駁率行具奏 上敕其邀譽市恩交部察議六月調鑲白旗滿  
洲都統七月授協辦大學士加太子少保銜尋因前管錢法堂事  
務失察寶泉局虧短銅斤部議革職 上寬之 命查歷任正署  
滿漢侍郎之失察銅斤者分別久暫覈議攤賠祿康不覈計收銅  
次數多寡僅以在任月日分別人奏 上飭之仍交部察議九月  
所轄汛地被盜部議革職 諭曰祿康平日未能督率營員認真  
緝捕已屬失察及經召對猶以盜案在疑似之間袒護營員本應  
照議姑念一時簡用乏人加恩免其革任仍註冊十年五月西洋

堂人德天賜等刊書傳教 上以歷任該管大臣不能實心經理

命祿康偕尙書長麟侍郎英和管理西洋堂事務並公同妥議  
章程奏入得 旨允行護軍校阜保先以糾集抓金會欠錢起釁  
革職復慮眾人索欠欲圖禁止抓金會捏飾不法情跡匿名具控  
祿康督飭司員和舜武密訪得實 上嘉之寬免處分六月 命  
稽察欽奉上諭事件處閏六月 諭曰祿康之父炳文於乾隆年  
間御史任內條奏失當革職發往伊犁年滿回京復 諭令在家  
閒住不准四品頂帶每月支食三兩錢糧實屬罪所應得今祿康  
疊加擢用協贊綸雇管理部旗及步軍統領事務均能小心謹慎  
克勤厥職伊父炳文著加恩賞給四品頂帶在家食郎中俸用示

推恩錫類至意十一月授內大臣十一年五月充國史館正總裁  
十月 命爲閱兵大臣十一月解步軍統領授東閣大學士管理  
戶部事務十二年京察屆期交部議敘十四年正月 上以祿康  
之父年屆八旬於二月初三日稱祝 命覃恩應得封軸先於開  
印時用寶給發以昭恩眷是月仍授步軍統領五月管理戶部三  
庫事務十二月以書吏王書常等僞造工部印文捏款咨領三庫  
銀兩祿康任內失察六次 命革去太子少保銜降補協辦大學  
士戶部尙書十五年仍授東閣大學士加太子少保銜管理吏部  
事務十六年正月充崇文門正監督四月因鑲白旗滿洲馬甲慶  
幅緹城入倉盜米事覺部議降調 命革退鑲白旗滿洲都統改

爲革職畱任御史景德奏都城私拆房屋衢巷多隙地柵門啟閉  
虛設 上以步軍統領管轄廢弛 飭之六月御史韓鼎晉參奏  
內城諸大臣家轎房聚賭 上命祿康查拏而祿康家轎夫亦串  
通家人開局聚賭 命交都察院嚴加議處尋議革職 諭曰祿  
康係大學士兼任步軍統領凡京城內有不法滋事匪徒皆當督  
飭所屬嚴拏淨盡使姦宄斂跡輦轂肅清方不負委任乃未能先  
事查獲伊家內轎夫及合家眾人串通開局更毫無覺察形同木  
偶其咎較他人爲重本日復據奏續獲開局聚賭人犯通計有十  
六起之多祿康前在步軍統領任內因其賦性軟弱特令文甯管  
理嗣因文甯降調簡用乏人仍令祿康兼管乃前後在任數載於

地方應辦事務一味廢弛本應照議罷黜姑念祿康供職有年時常患病著革去太子少保內大臣東閣大學士管理吏部事務步軍統領稽察欽奉上諭事件處經筵講官閱兵大臣管理戶部三庫事務崇文門正監督國史館總裁管理右翼宗學管理西洋堂紫禁城騎馬並拔去花翎加恩降爲正黃旗漢軍副都統是月命管理圓明園包衣三旗官兵事務十七年丁父憂尋授鑲白旗蒙古都統十八年四月調熱河都統未到任 命雷京署理正黃旗漢軍都統十月失察所屬兵丁曹幅昌聽從逆匪林清入教部議革職 諭曰祿康棄瑕錄用授爲都統自應認真整飭旗務以贖前愆乃所屬兵丁曹幅昌從習邪教並與知逆謀該犯居住都

城非屯居漢軍可比祿康在任毫無覺察兵部議以革職實屬罪  
所應得著革去都統加恩賞給四品頂帶以宗人府副理事官用  
尋訊出曹幅昌之父獨石口都司曹綸聽從林清入教豫知逆謀  
諭曰曹綸身爲都司以四品職官從逆罪大惡極該管都統漫  
無覺察其咎尤重祿康著革去四品頂帶副理事官發往盛京派  
令管束移居宗室各戶卽在小東門外新建公所居住永不敘用  
十九年 諭曰祿康在盛京居住頗知做畏約束眾宗室亦甚妥  
協著加恩賞給主事戴用四品宗室頂帶一同辦事二十年四月  
因宗室營居住宗室喀勒明阿獲罪 上以祿康漫無約束降爲  
筆帖式十二月卒子耆英見官學士孫發錫見官馬蘭鎮總兵



右 國史館本傳

國朝耆獻類徵初編卷三十八目錄

宰輔三十八

曹振鏞

蔣攸銛

汪廷珍

國朝耆獻類徵初編卷三十八目錄



國朝耆獻類徵初編卷三十八

通奉大夫前署江西巡撫江西布政使司布政使湘陰李桓輯

宰輔三十八

曹振鏞

曹振鏞安徽歙縣人父文埴官戶部尙書自有傳振鏞乾隆四十六年進士改翰林院庶吉士五十二年散館授編修五十六年二月大考翰詹列三等 諭曰曹振鏞雖列三等然觀其才具尙堪造就且係曹文埴之子著加恩授侍講十月充日講起居注官五十七年六月充浙江鄉試副考官九月任河南學政嘉慶元年二月轉侍讀四月升右春坊右庶子十一月升侍講學士十二月

轉侍讀學士三年二月 大考翰詹振鏞列二等遷詹事府少詹  
事六月充湖北鄉試正考官八月任廣東學政九月升詹事十二  
月丁父憂五年 特予曹文植卹典 賜諡文敏振鏞入謝 上  
以文植之母年九十有四 賜人綾緞匹 命振鏞齋回以資贖  
養六年服闋七年五月補通政使司通政使八年九月充 實錄  
館副總裁官 命專司勘辦彙本十二月遷內閣學士兼禮部侍  
郎銜尋充經筵講官文淵閣直閣事九年二月 上幸翰林院分  
韻賦詩振鏞與焉 賜絹箋筆墨有差時值京察 上以振鏞恭  
纂 實錄彙本尙爲詳慎下部議敘尋以恭進 實錄內擡寫之  
處譌繕一字部議降一級調用 上從寬改爲降三級畱任六月

署吏部右侍郎七月遷工部右侍郎八月任江西學政十年二月  
偕巡撫秦承恩疏言萬載縣土棚兩籍考試請於原額十二名外  
加額四名不分土棚籍合考取進 從之十一年六月調吏部右  
侍郎十月遷工部尚書十二年三月充 實錄館正總裁官四月  
聖訓寶錄告成 予議敘振鏞解免 恩加太子少保銜九月  
命恭送 高宗純皇帝寶錄前往盛京尊藏禮成加二級十二  
月充文穎館正總裁官十三年三月署吏部尚書尋署戶部尚書  
四月充殿試讀卷官六月署刑部尚書八月充順天鄉試正考官  
十四年四月充殿試讀卷官五月管理戶部三庫事務七月調戶  
部尚書十二月以失察工部書吏舞弊冒領三庫銀兩部議降二

級調用 上加恩改爲降三級留任十五年五月充會典館副總裁官十月充順天武鄉試正考官十六年三月充會試正考官四月授翰林院掌院學士充經筵日講起居注官十八年八月復署吏部尚書九月調吏部尚書協辦大學士尋擢體仁閣大學士管理工部事務十二月 賜紫禁城騎馬 賞平定滑城功以振鏞職任綸扉晉太子太保銜充文淵閣領閣事十九年正月 命稽察欽奉上諭事件處閏二月 命續纂河工方略一書振鏞總司其事是月纂輯全唐文完竣 賞加二級五月充國史館正總裁官七月 上謁 東陵 命留京辦事九月充會典館正總裁官十月振鏞六十生辰 御書綸閣延暉額并服物賜之二十年三

月上謁 東陵 命留京辦事先是工部司員福海保送一等  
尋任雁平道緣事革職將歷次濫保各堂官均交部議處尋議降  
二級調用 上改爲留任七月 上秋獮木蘭 命留京辦事二  
十一年正月京察 上以振鏞總理工部兼管三庫事務均屬妥  
協交報議敘二月 上謁 東陵 命留京辦事七月 上秋獮  
木蘭復 命留京辦事二十二年三月充會試正考官七月 上  
秋獮木蘭 命留京辦事二十三年三月 上謁 西陵 命留  
京辦事五月以纂輯明鑑體制背謬振鏞等不知豫行請 旨部  
議降調 上加恩改爲降三級留任七月 上詣盛京恭謁 祖  
陵 命留京辦事是月工部續估東嶽廟工程浮開銀兩 上以

大清高宗純皇帝實錄卷三十一 辛輔三十八

三



工部各堂官既於書吏舞弊毫無覺察又失察司員得贓平昔互相推諉怠玩因循將振鏞等交部議處尋議降調 上改爲降三級畱任二十四年七月 上秋獮木蘭 命畱京辦事九月復管理三庫事務十一月 命振鏞偕尙書穆克登額查估正陽門應修工程振鏞疏稱大樓等處尙屬穩固時屆寒凍難以施工明歲南北向亦屬不宜請暫緩興修 上以所奏甚是 從之二十五年三月 上謁 東陵 命畱京辦事是月兵部遺失行印 命振鏞等鞫訊以日久未能審出實據降二品頂帶尋會審得實復其頂帶七月 上秋獮木蘭 命畱京辦事九月 命在軍機大臣上行走充 實錄館監修總裁官道光元年三月 仁宗睿皇

帝奉安禮成振鏞恭題 神主晉太子太傅銜加隨帶二級五月  
漫爲武英殿大學士 賜第於內城三轉橋二年正月京察 上  
以振鏞辦理部務本屬妥協又自簡任軍機大臣以來敬其所事  
實力匡襄交部議敘二月承辦 壇 廟工程司員得受官匠銀  
兩復囑託看冊司員朦混銷算 上以該堂官漫不經心將振鏞  
等交部嚴議尋議褫職 上加恩改爲降四級畱任 年無過方  
准開復四月充殿試讀卷官十二月振鏞等奏見察各處工程較  
多請嗣後分別輕重情形酌辦不得同時並舉以重工料而節糜  
費 從之三年正月 諭曰朕於本年元旦御殿受賀闈惠覃敷  
左右近臣允宜特加恩澤大學士曹振鏞失察承修工程司員降

四級畱任著加恩寬免二月 上臨雍視學振鏞充直講三月充  
會試正考官八月 上幸萬壽山玉瀾堂 錫宴十五老臣時振  
鏞年齒居末 恩命入宴畫像 御製詩有絲綸佐朕彌恭謹抒  
忠獻替資匡襄之句 袁振鏞也四年四月 仁宗睿皇帝寶錄  
告成 賞戴花翎子恩沐候選員外郎遇缺卽補子恩漢 特賜  
舉人一體會試七月充上書房總師傅十月振鏞七十生辰 御  
書調元篤祐額兼鈞日贊資良弼杖國時康引大年聯句并服物  
賜之五年正月京察 上以振鏞管理部務均屬妥善承書諭旨  
獻替匡襄尤爲出力交部議敘六年四月充殿試讀卷官十二月  
入直南書房七年回疆克復四城 諭曰見已諭撤大兵籌辦善

後計逆裔犯順一年有餘凡一切軍報承書諭旨軍機大臣等夙夜殫心勤勞懋著允宜特沛恩施大學士曹振鏞著晉加太子太師八年正月回疆奏報生擒首逆張格爾 諭曰自道光六年喀什噶爾用兵以來軍機大臣曹振鏞等佐朕運籌軍務夙夜勤勞承書諭旨鉅細無遺去歲因四城雖復首逆未獲曾經稍示恩榮朕意未愜茲元兇生獲紅旗報捷軍機大臣尤當再沛恩施用昭獎勵大學士曹振鏞著晉加太傅銜賞用紫韁仍著照軍功例交部議敘四月 賜圖像紫光閣 御製軍機大臣像贊並序曰朕寅承大寶日理萬幾孜孜焉惴惴焉嘗恐用人行政或致闕失每遇事必虛懷延納不敢自作聰明而軍機大臣曹振鏞等皆能感

戴 皇考之遺澤暨朕之信用是以知無不言一心一德卽如前  
歲西陲用兵諸臣夙夜在公襄贊機謀承書諭旨無不盡心竭力  
與朕同一憂勤而大學士曹振鏞自簡授軍機大臣以來公正慎  
勤班聯領袖尤能殫心據實鉅細無遺茲大功告蒞特欲循照舊  
章繪入功臣像而朕之不自大其事不自尙其功亦可昭示來許  
柰曹振鏞等善則稱君真誠遜讓朕亦難於勉強在朕心終未愜  
也試思漢高祖之大度唐太宗之英明運籌決勝亦必須蕭曹房  
杜輔助而成也矧戎爲國之大事朕臨御以來興戎首舉嘉子內  
外文武諸臣各殫心力迅奏膚功不然則成功未能如此其速籌  
畫未能如此其善也朕思之再三允宜別繪一圖親爲製贊以遂

諸臣不敢列入功臣之心而又能彰明帷幄之輔弼得人亦善乎 御製振鏞贊曰親政之初先進正人密勿之地心腹之臣問學淵博獻替精醇克勤克慎首掌絲綸九年元旦 上親書 御製振鏞像贊賜之三月充會試正考官八月隨 駕詣盛京恭謁 祖陵大禮慶成 賞加二級十月 諭曰大學士曹振鏞年逾七旬著於該衙門應行帶領引見之日免其帶領引見以示體恤 耆臣至意十年十二月 御書同德資良弼單心贊治樞聯對賜之十一年正月京察 上以振鏞久任軍機大臣贊襄勤慎承旨詳明交部議敘五月振鏞子戶部郎中恩汴病歿 上傳諭慰之並以恩汴原得一品廕生 予其次子恩澣承廕示體恤焉八

月 上五旬萬壽慶辰 加恩廷臣振鏞得 賞戴雙眼花翎十

二年充殿試讀卷官十三年充會試正考官十四年正月 賜紫

禁城內乘轎時屆京察 諭曰大學士曹振鏞久任軍機克勤克

敬年登八表精力如常著加恩交部議敘三月 上謁 西陵

命留京辦事十月振鏞八生辰 諭曰大學士曹振鏞由乾隆

年間供職詞垣嘉慶年間洊擢至大學士朕親政之初簡授軍機

大臣久贊綸扉倍加勤慎見在年登八表精神強固朕心實深嘉

悅允宜特沛殊恩以昭懋眷伊孫曹紹楨著加恩賞給舉人准其

一體會試用示朕篤祐耆臣有加無已之至意 頌賞御製詩曰

八表洪開甲午年嘉予元老粥仔肩 三朝雨露霑深澤一德謀

猷濟巨用梁棟有徵資啟沃絲綸必慎冠珥聯長茲壽萬君臣慶  
政在親賢幸得賢又 御書領袖香英額紫閣圖勳嘉輔弼玉瀾  
錫慶介期頤繼對并服物賜之十二月因感目請假 諭令安心  
調理十五年正月卒 諭曰大學士曹振鏞學問淵博獻替精醇  
公正慎勤老成持重自其父曹文植供職內廷渥承 皇祖高宗  
純皇帝知遇擢至戶部尚書副曹振鏞仰荷 皇祖特達之知由  
翰林洊升詹事 皇考仁宗睿皇帝親政以來洊加升擢簡任綸  
扉朕御極之初特授軍機大臣十四年餘一德一心深資啟沃絲  
綸首掌鉅綱畢周夙夜在公始終如一實朕股肱心膂之臣服官  
五十餘年歷事 三朝身躋崇要從未稍蹈愆尤動循矩法克副



賞念其年躋八秩特命行輿入直俾節勞動上年因微疾請假派員存問俾安心在寓調養優加慰勞方冀速痊照常入直詎意數日之間遽成長往頓失腹心之臣不覺聲淚俱下悼惜難堪著加恩入祀賢良祠賞給陀羅經被並手串煙壺煖手各件派穆彰阿帶領侍衛十員卽日前往奠醊朕於本月二十九日親臨賜奠並著賞給廣儲司庫銀二千兩經理喪事其任內一切處分悉予開復應得卹典著該部察例具奏伊子曹恩淡著賞給四品卿俟服闋後遇有四品京堂缺出著該部開列請補用示朕軫懷耆舊恩賚有加至意尋 賜祭葬 諭曰朕親政之初見大學士曹振鏞人品端方學問優長特授爲軍機大臣用資啟沃十四年餘靖

恭正直歷久不渝雖身躋崇要動循矩法從未稍蹈愆尤凡所陳  
奏均得大體老成持重懋著忠勤實朕股肱心膺之臣從前乾隆  
年間大學士劉統勳嘉慶年間大學士朱珪仰蒙 皇祖高宗純  
皇帝 皇考仁宗睿皇帝鑒其品節 賜諡文正易名之典備極  
優隆曹振鏞實心任事體用兼優外貌訥然而獻替不避嫌怨朕  
深倚賴而人不知揆諸諡法實足以當正字而無愧茲據該衙門  
奏請予諡著加恩賜諡文正用示朕眷懷良輔寵錫嘉名至意復  
諭曰大學士曹振鏞 先朝耆舊久直內廷端謹老成靖恭正  
直十四年餘嘉謨嘉猷深資倚賴前因溘逝特崇懋典用獎前勳  
加恩賜諡文正並准其入祀賢良祠伊子曹恩溟服闋後以四

品京堂補用朕追維良輔疊沛隆施茲復派令惠郡王前往賜奠  
伊孫曹紹桐著賞給舉人准其一體會試將來靈柩回籍時著沿  
途地方官照料妥爲護送用示朕篤念耆臣有加無已至意七月  
諭曰大學士曹振鏞靈柩於月內起程由水路回籍著加恩於  
二十七日派御前侍衛道慶前往賜奠到籍後加恩賜祭一壇著  
鄧廷楨派委道員一人前往奠醊子恩渙候補四品卿

右 國史館本傳

文皇踐祚之初改文館爲內三院曰國史曰祕書曰弘文皆置大學  
士學士等官蓋倣宋昭文集賢之制入關後仍沿其制至順治戊  
戌始復從明制改設中和殿保和殿武英殿文華殿文淵閣東閣

諸大學士名乾隆戊辰特旨罷中和殿大學士改爲體仁閣以配三殿三閣之名焉保和殿大學士不常置惟張文和公傅文忠公拜焉體仁閣大學士初以楊節相廷璋楊節相應琚先後大拜皆不終位故戴服堂藤陰雜記內謂其名不祥然劉文清公今曹相國振鏞遞相任之卒無他咎可知在人不在名也

右錄宗室昭榑撰

國朝詩集卷之三十一

夕

蔣攸銛

蔣攸銛漢軍鑲藍旗人先世由浙江遷遼東 國初入關居寶坻  
乾隆四十九年進士改翰林院庶吉士五十二年散館授編修五  
十三年充福建鄉試副考官五十四年丁父憂五十六年服闋補  
原官五十七年充貴州鄉試正考官五十九年充陝西鄉試正考  
官六十年充河南鄉試正考官提督廣西學政於嘉慶三年改江  
南道御史五年授江西吉南贛甯道六年八月 上密諭巡撫張  
誠基曰察吏所以安民蔣攸銛江右之良才也汝其任用九月署  
按察使八年廣昌縣齋匪廖幹用等作亂眾五六千人攸銛奉檄  
督兵剿賊於甯都石城大敗之賊平巡撫秦承恩上其功時攸銛

己丁母憂 諭服闋後施恩十年三月 特旨起復發往廣東差  
委六月署惠潮嘉道十一年三月遷江西按察使十二月升雲南  
布政使滇省銅廠錢局虧欠久歷任巡撫兩司咨追獲攸銛奏  
請攤賠又於路南州開新廠得銅五百餘萬斤以裕京運十四年  
三月調江蘇布政使旋擢巡撫八月調浙江巡撫海洋自蔡牽亂  
後餘匪尙多攸銛檄定海黃巖二鎮率舟師捕之匪船遠竄洋面  
肅清十五年授江南河道總督以不諳河務辭 諭曰朕以蔣攸  
銛辦事認真河務雖未諳習必能盡心講求力圖成效所奏不准  
旣之任復奏見雖接印恐貿然從事貽誤國計民生 諭曰學而  
後入政非可以政學也將攸銛竟不必強之任事伊在巡撫任內

整理地方官聲本好著仍回浙江原任十六年三月 命與兩江  
總督勒保籌海運攸銛以爲必不可行者十二事一海運自元至  
元十九年訖明永樂十三年當時仍有河運今河運亦不能廢則  
禦黃壩仍不能閉運弁仍不能減徒增海運之費一江南至天津  
海道如吳淞口之陰沙黃河口之大沙五條沙山東之貓兒島沙  
門島皆沙礁叢雜天庾正供非可嘗試於不測之地一前代欲避  
外洋之險議由膠西開陸地逕通直沽海口勞費不貲雍正初朱  
軾亦奏開膠萊運道卒以工力難施而止一旗丁不習海洋必責  
成船戶又非如旗丁有冊可稽且不能設官出洋巡視必至偷賣  
缺額捏報沈失甚或有通盜濟匪諸弊一海行風信靡常遲速平



險皆非人力可施一海運須籌經費至元閒每石給中統鈔八兩五錢迨至大延祐閒相距纔數十年已十三兩以古準今其費更大一海船載二三千石計造一船工價不下萬兩全漕需船一千七八百號卽需銀一千七八百萬兩一造船旣不能行必雇商船照民價給之則費不貲若祇給官價則在官支數已多而船戶猶以賠累爲辭必多規避况吳淞頭號沙船始諳海道數亦不敷粵省相距遠其船向不能北行浙省相距近無船可雇一元明海運米多漂失到倉欠交者每石自數合至一斗數升不等今生齒日繁人之所食浮於地之所產豈堪再有漂失一海運須設水師若令見有水師分段護送則兵船少而漕船多必至有名無實若每

船配兵一二千名卽須增兵三四萬糧餉又復不貲一京師百貨之集悉來自糧艘若由海運斷不能多攜貨物將來京地物價驟騰亦礙生計一運丁所用兵工短絳等項總計八九萬人窮民資以爲生若由海運則須月募熟悉海道者而此常年運漕之眾一旦失業難保不流而爲匪奏入事遂寢是月署浙江鹽政海甯之南沙與紹興之山陰會稽蕭山等縣向爲斥鹵之區無業貧民往往刮淋私煎嗣設官廠收鹽招商配運因該處燒鹽用柔草鹵耗重商人虧本者多攸銛以發帑收買不令商自辦官爲督率且民人與竈戶雜居村落散漫因令各竈戶聚處成團每戶一鍋一盤合竈煎鹽可以按團稽覈並酌裁私設渡船絕其販私之路 命

如所請行九月擢兩廣總督十一月入覲 賞戴花翎十七年  
二月奏言粵東劫案多與其懲於事發之後不若防於未發之先  
又必得其地以截伏竄之途得其人以收督捕之效臣查廣肇韶  
連各府州內河則汊港多歧陸路則岡嶺環互水嚴卽由陸竄陸  
嚴卽由水逃如順德花縣從化增城三水清遠英德高要鶴山等  
縣大者八九百里小者六七百里其中何處險要何處通達爲縣  
令者苟非於地徑則不能勝緝捕之任夫匪徒聚散無常必有  
窩藏之地當於適中要隘選派勤幹文武大員給以隨員居中調  
度益以兵役四路偵探一有賊蹤卽分投圍截而又以時飭州縣  
官親赴民間與紳衿耆老講明勸導使境內不得藏奸如此則刑

教兼施文武用命拔本塞源莫急於此因劾三水知縣章家麟海陽知縣姜樹鶴山知縣馮克鞏靈山知縣彭應徵樂昌知縣勵世馨等不職舉三江協都司張仁南韶連鎮總兵何君佐可用 諭曰能如此察吏方不愧督撫之職時三合會匪嚴貴邱等已獲被脅者多自首攸銛請予以自新之路嚴立再犯之條奏定懲創章程下部議行十八年三月 諭曰粵東自洋面肅清以後惟內河及陸路土匪未靖經蔣攸銛督飭文武員弁緝捕疊獲七百餘名戢暴安良著有成效著交部議敘九月豫東教匪倂擾並有賊潛入 紫禁城持械逞兇攸銛疏言我朝 聖 聖相承田賦不加戶丁兵役不用民力誠史冊所未有 皇上臨御以來戡定四省

教匪登斯民於衽席不意 光天化日之下竟有此昏不知 恩  
愍不畏死之亂民以臣思之亦非盡地方官倉卒激變所致誠如  
聖諭變起一時禍積有日始而萌孽方滋漫無覺察繼而燎原  
將熾尙冀消彌苟且目前規避處分以致水懦民玩釀成亂逆此  
因循怠玩之弊咎在州縣而表率無方勸懲不力則督撫藩臬道  
府之責尤重咎尤深欲防亂於未然首在甄別道府州縣近日州  
縣貪酷者尙少而委靡者甚多該道府耳目切近非不知某員關  
穴某員勤幹每以關穴者爲安詳勤幹者爲多事黑白莫分是非  
倒置督撫藩臬稍不加意卽受其欺蒙夫關穴之釀患與貪酷等  
臣竊以爲目前急務莫先於察吏而欲振相沿之弊曠當用破格

之勸懲凡貪酷者固應嚴參平庸者亦隨時勒休改用不必俟計  
典之年始行覈辦其有守有爲勤能愛民者卽密奏請 旨優獎  
以爲之勸道府得人則州縣治州縣得人則閭閻安將禍亂之萌  
自消太平之福可致矣疏入 諭曰此係非常大變總由因循而  
成朕力除此弊必期振作知人安民洵至言也十九年閏二月疏  
言天下道府由牧令起家者十之二三由部院外擢者十之七八  
誠以司員持進退准駁之衡俾之練習日深通今不至於泥古然  
後敷施有本坐言卽可以起行聞近來司員少卓然眾著者非今  
之人必不昔若也一由滿洲之廕生太易一由漢員之捐班太多  
請 飭部臣隨時考覈於部務不甚相宜者奏明以同知通判分

發各省使之勉於猷爲以供器使而部曹亦漸疏通數月以來迭  
奉諭旨諄諄嚴甄別以汰衰庸減處分以全幹吏但恐汰之而  
復來者猶是等倫全之而進用者不無冒濫究無以仰副勤求  
治理之盛心今之才守克兼沈於下位者眾矣請飭公正大臣  
薦達皇上擇其名實相副者擢而用之使之連茹彙征相觀而  
善抑臣更有陳者任事之與專擅有義利之分若一人任事卽以  
專擅陷之則眾口可以鑠金官常樂推諉以苟全矣協恭之與黨  
援有公私之別若兩人協恭卽以黨援目之則立異可以遠嫌書  
吏得乘機而舞弊矣此近今之積習爲大臣者當力除之至於翰  
林固屬詞臣然務在崇正學抑浮華養成明體達用之才似不必

專以文章課殿最科道爲 朝廷耳目之官如果真知灼見則地方大吏之優劣得自輿論者爲最詳也然同一敷陳能否得體均之糾劾是否爲公詢事考言難逃 洞鑒其有識見卓越才品清正者似當由京堂而擢卿貳與翰詹衙門參用總之有治人無治法而用人之道因才因地因時臣下無可市之恩 君上有特操之鑑人無求備懲貪者不宥其瑕政在集思職要者弗撓於眾疏入 諭曰愼簡乃僚勤修厥職俾賢傑奮興庶明勵翼朕實有厚望焉粵東瀕海例准夷船貿易時英吉利國護貨兵船不遵定制停泊外洋竟抵虎門攸銛示以兵威復召大班益花臣詰責之夷人屈服遂揚帆去因請嚴禁民人私爲夷人服役及洋行不得建



夷式房屋鋪戶不得用夷字店號清查商欠不准身家淺薄之人  
濫充洋商並不准內地民人私往夷館均如所議行二十年四月  
南澳鎮總兵羅鳳山巡洋疏失攸銛奏請革職 上以事係革兵  
林勇鄭高挾恨搶船若罪鳳山則二人轉得快其私忿 命傳旨  
申飭七月起羅國王籲請中華商民代駕貢船攸銛不許先是商  
民陳金負該國王貨本銀三千餘兩攸銛於司庫閒款內墊給至  
是貢使來粵繳還墊項攸銛以既經奉 旨頒給卽係 天朝恩  
賚若又准繳還轉非俯卹外夷之道應卻之 上嘉其得體二十  
一年英吉利國遣使入貢由海道赴天津攸銛請 敕諭該國王  
嗣後入貢當照琉球等國定例就近由廣東北上不可冒風濤之

險遠赴他處收口若不恪守章程船到天津不許登岸並不接收  
貢物此次貢使似當由陸路派員伴送來粵其餘仍由海道原船  
回國均不許逗畱 諭曰蔣攸銛於數千里外所論事理與朕前  
後飭辦情形無一不相脗合實能深知朕心遇事能見其大可嘉  
之至二十二年正月署粵海關監督閩皖茶商向由江西內河入  
粵時洋面肅清諸商利於海運攸銛恐其與黠夷通且私帶違禁  
貨物奏請禁之粵東屯田自改設衛所招民佃種可以照額徵輸  
者不過十之五六其衝陷應豁除者以新墾沙灘抵補土瘠不能  
足額丁多逃亡攸銛奏請覈實沃壤照上則徵收新灘則減之九  
月調四川總督 諭曰西南保障疆宇寥廓五方雜處訟獄滋繁

以清慎居心勤明任事察吏宜嚴治民以正切忌疲玩因循常思  
威克厥愛二十三年三月奏省標爲各營表率臣與將軍提督隨  
時操演復每日抽閱二三十名其戰守糧缺向由本營驗充者臣  
亦親閱期一兵有一兵之用 上嘉之川民帶刀防身動釀命案  
攸銛飭各州縣查明境內鐵匠若干家鎮市以十家爲一牌鄉場  
以五家爲一牌如保甲法取其連環結一家有犯一牌連坐若孤  
村腰店有設鑪者必造刀窩匪之人卽逐之民以違禁物呈官者  
免罪川北囂俗尤甚請於廣元巴州各添遊擊營縣州添都司營  
設弁駐兵卽於營制中抽移抵補以節經費 從之十一月署成  
那將軍時御史程伯鑿奏四川州縣有弮杆鈞杆跼籠等刑 諭

攸鈞查禁因奏川省前辦咽喉匪及教匪初平餘氛未靖之時不得不齊以嚴刑今承平日久聽斷自有常刑臣已嚴飭各屬銷毀非刑器具惟匪徒仍須按法懲治不得博寬厚之名畱閭閻之害蓋匪徒之斂肆視州縣之寬嚴稍存姑息則水懦之患甚於火烈上深然之灌縣江都堰爲秦李冰所築析江流爲三分溉成都十四州縣民田惟歲修經費不足攸鈞以官捐則恐藉口累民民捐又恐派收滋弊請動撥義倉租息幫貼堰工以民間自出之財爲民間至要之用 上以事屬兩益如所請行二十四年 諭曰川省地廣民稠從前教匪滋事閭閻被其蹂躪軍興之際小民不無勞費自蕩平之後十餘年來休養涵濡元氣已復本年朕六旬慶

辰普免天下積欠蔣攸銛奏該省錢糧年清年款並無積欠可免  
蜀民踊躍奉公輸將恐後亦由該地方官撫綏化導督率有方甚  
屬可嘉本年京察蔣攸銛著賞加一級二十五年七月 仁宗睿  
皇帝龍馭上賓 上命攸銛來京叩謁 梓宮 特加太子少保  
銜 諭曰汝爲守兼優自茲以往當加倍黽勉永矢公忠爲國之  
心上酬 皇考倚畀深恩以副朕得賢之望道光元年二月雲南  
永北廳有芴芴夷人讎殺漢民所至焚搶地與四川之會理鹽源  
接壤攸銛選練材武治戰守具撤金沙江打衝河渡船諭沿邊民  
夷築寨禦之撫難民一萬三千九百餘人事 聞 上嘉之曰貴  
力急公不存彼疆此界之念所謂大臣者不應若是耶十二月

賜御書福字攸銛具摺謝 諭曰我君臣當交做圖治事務從實  
心毋縱逸以期永荷 天禧茂膺繁祉也二年二月京察 上以  
攸銛整飭地方克副封疆重任下部議敘松潘廳黃勝關外有果  
洛克野番素剽悍因搶劫玉樹番族羸馬及西藏巴雅爾堪布貢  
物頻年用兵是年八月提督桂涵深入夷巢擒郎結等四十六人  
悉誅之並破其唐凹唐玉達凹三寨番眾股栗誓受約束 上以  
攸銛調度得宜下部議敘九月 召爲刑部尙書十月管理戶部  
三庫事務十二月 賜紫禁城騎馬三年四月授直隸總督 諭  
曰蔣攸銛受 兩朝知遇惟當力圖報效國爾忘家不准以身係  
旗人世居寶坻爲辭況伊歷任督撫皆能公幹廉明政聲彰著設

令再四懇求亦不能俯從所請也爲國宣力其遵諭行時直隸久旱攸銛旣抵任奏官民彫敝整飭與調劑兩難 諭曰我君臣惟有以誠籲 天以勤理政庶可迓祥和而安吾赤子也至於任內諸事面諭已詳卿之材力朕所深信凡察吏安民修武備平獄訟諸大端當注意焉六月以直隸頻年災賑見值久旱繼潦田禾受傷恐糧價日昂農民艱於口食請截南漕四十萬石存天津北倉以備緩急 從之時永定河因大雨連縣水勢異漲北三工南二工及北中汛先後出槽漫灘所在危險攸銛赴工督辦 諭曰卿此行正當溽暑炎蒸辦公固不可稍懈身體亦當自重尋奏臣奉職無能致屢經漫口請交部議處時方興畿輔水利以服閩江南

河道總督署工部侍郎張文浩董其事攸銛固請 飭文浩赴工  
查勘以免貽誤奉 諭所奏不爲無見但永定情形與南河異卿  
仍應畱心不可以張文浩熟悉河務遂全然諉卸也又奏北運河  
亦有漫口請照歷辦成案由各廳汛賠修尋各險工平穩 諭攸  
銛查辦災務旣而通省百餘州縣先後報災攸銛請 飭部速撥  
賑餉銀一百二十萬兩經費銀六十萬兩 諭曰朕不德不能上  
感 天和致我無辜赤子薦受災荒惟有返身修己盡力拯濟庶  
救顛沛之危但國家經費有常雖重帑用之於百姓原不稍惜若  
令奸胥猾吏趁機吞取則大不可卿受國家任用厚恩且才能素  
著任事實心俾災黎均沾實惠奸猾不得侵漁斯乃不負委任八



月奏省城兵房坍塌請於見撥經費項下借銀修葺分年扣還  
諭曰見撥銀一百八十萬兩之多自以工賑爲要若月案先撥必  
形支絀且此次修理兵房僅銀九千九百餘兩何至無款可支可  
見直隸藩庫空虛似乘此辦理工賑之時多請帑項豫爲彌補虧  
缺地步則今歲請工請賑恐有不實也以蔣攸銛之居心任事不  
應若是攸銛奏臣前請撥經費銀六十萬兩於借修兵房之數卽  
在其中並非月案工程見又詳查庫款並無虧缺分別劃除提解  
籌補追賠以歸覈實得 旨所定章程尙屬明晰務要奉行無懈  
不可日久又有所牽混也十一月奏永定河自康熙三十七年始  
建隄工嗣因下游受淤至乾隆三十七年河已六徙此後沙積淤

停去路不通屢有旁溢之患近見河流北趨方冬水涸尙不免潰隄蟄埽若不籌備來年汛漲可憂因勘估減水閘壩越隄等工請於浙江江西湖南江蘇廣東封存款內提銀五十萬兩解交藩庫以備支發下部議行十二月奏災歉州縣來春青黃不接之時須商販流通以資接濟請將奉天米船暫免納稅至災重之區春耕未齊必須展賑者三十八州縣不可使災黎失所又不可多糜帑項臣極意撙節尙須撥銀二十萬兩俱從之四年二月請修永定河閘壩以工代賑時流民出關扶攜塞路 上切責攸銛令飭所在有司毋玩視民瘼攸銛奏近海東南一帶積水之區至今未涸災民得賑後仍赴奉天等處營生禁之適以擾民得 旨已飢

已溺之懷不可忽諸時張文浩補江南河道總督 上以工部左侍郎程含章代之攸銛與含章奏言治水之大綱有九一東淀一西淀一大清河一永定河一子牙河一南運河一北運河一天津海口一千里長隄此九者均不可緩之要工請 飭部先撥銀一百二十萬兩 從之閏七月 命協辦大學士仍畱直隸總督之任五年正月 諭曰協辦大學士蔣攸銛自調任直隸以來通省軍務日見起色著交部議敘三月攸銛六十生辰 賜御書宣勤篤祐扁額及福壽字並壽佛如意各物五月議上長隄善後事宜六條一千里長隄應責成各汛官率漢夫於支渠汊港疏其淤淺一隄工應歸民修每年大汛近隄邨莊民戶出夫巡防一瀦大川

之水以淀爲蓄淀中葦已滋蔓漁戶斂樁下斷更壅泥沙今令挑淤拔蘄嗣後嚴禁侵占違者治罪一東西兩淀舊有汙夫堡船裁於乾隆二十九年今應復設堡船百隻汙夫三百名一天津知縣舊管長隄三十五里事繁恐難兼顧應撥外委一員兵八名別爲一汛專管隄工移長垣縣丞駐任邱移唐縣主簿駐文安大城之間各添水手四名一隄工大半瀕河汛期風浪撞擊更恐上游盜決兵夫晝夜巡防無所棲止應於任邱文安境內各建堡房十座大城四座天津靜海各五座雄縣保定各五座其新工最險之地如任邱鄭州四鋪以下迤北臨大港淀又天津杜家道口以下石家房各添防風埽以資保衛奏入 諭速行六月授體仁閣大學

士是年禦黃壩以南運道淤甚江廣各幫糧船畱滯者一百九十餘萬石既盤運北來而天津北河至通州又多古淺新淤 上以爲遲至冬令水落難行若北風驟起必連檣凍阻迭 飭攸銛爲計十月奏接運滯漕已全數入直隸境 上嘉之十一月 召回京 命在軍機大臣上行走管理刑部事務六年三月充會試正考官十二月充經筵講官七年三月 上以河湖交敝運道不通命攸銛往勘尋奏清水不能敵黃督臣琦善因開王營減壩挑濬正河而下游關孟兩灘俱膠淤該督泥於逢灣取直成法並力主睢南同知唐文睿兩灘並挑之說致黃水倒漾糜帑殃民五月罷琦善兩江總督 命攸銛以大學士代之攸銛具疏辭謝 諭

曰卿精力未衰才能夙著毋庸過遜遂奏言督臣兼河務自高晉  
薩載始以其由總河調任諳練有素也嘉慶十五年松筠任江督  
時奏准修工撥餉專責河臣督臣不與聯銜乃可稽查覈辦請如  
松筠例至常駐清江則始於鐵保徒掣河臣之肘而於地方公事  
轉多曠誤 諭曰兩江總督兼轄河務尋常興工及一切隄防蓄  
洩自係河督專責該督不過總其大綱至辦理要工鳩夫購料籌  
款撥項以及甄覈河員稽察弊竇該督必應會商毋得諉卸惟該  
督統轄三省若常駐清江轉於地方應辦事件不無積壓著蔣攸  
銛酌量情形如無須駐工卽回署清釐庶務是年試行海運有效  
因請來年仍用其法並請將本年江南首進二進回空運船截畱

河北接運浙江安徽江西湖北湖南盤壩之米惟盤壩需費多如  
來春竟能開壩通漕則河北空船可以備而不用七月以西陲用  
兵四城克復 加恩軍機大臣攸銛晉太子太保八月奏見距霜  
降甚近而黃水未降湖水雖有一丈五尺餘寸仍恐不能敵黃與  
其臨時束手莫若思患豫防請撥江蘇藩關各庫銀六十萬兩爲  
盤壩經費 諭曰新漕抵壩正可乘黃水未漲之前照常北渡儻  
江廣重船到時汎水已發亦可仍用倒塘灌運之法省無數周折  
若沾沾目前不爲國是經久計則兩江重任盡人皆可爲之何必  
特加簡畀耶所請不准行又 諭曰海運原非良策該督以河漕  
不能兼辦騰出河身疏淤導滯復以清刷黃之舊清水既能刷黃

焉有不能濟運之理蓋意在一行海運清水卽毋庸多蓄高堰可保無虞明春清不敵黃又恃截留運船爲盤壩之用爲國乎爲身乎攸銛奏臣時以未能報國爲懼何敢自爲身圖惟限於才識觀此不可測度之勢更不敢存僥倖萬一之想卽如本年黃水驟高禦黃壩遂不能啟而清水尙足倒塘灌運其在後軍船漸有黃淤已屬勉強而行至來春則黃水本高於清汛期必又加漲湖水本不敵黃經冬況又消滅若强行灌運勢必高流倒漾淤墊運河同一倒塘之法難易迥殊故今日鯁鯁過慮萬不得已而請盤壩若空船悉數南回儻重運經臨倒塘竟不能行又無船接運臣一身不足惜柰國事何至海運之議詢之船戶皆稱一次可以運竣



較上屆費省而速 諭曰海運姑從所請盤壩毋庸再瀆未幾海  
運亦罷八年正月西師報捷生擒逆裔張格爾 諭曰軍興時蔣  
攸銛尙在軍機大臣上行走贊襄軍務頗著勤勞著晉太子太傅  
銜五月以全漕渡黃下部議敘十月河督張井等奏中河廳補南  
岸緯道山盱廳添滾水壩揚糧廳移建昭關壩高堰山盱兩廳幫  
寬大隄共需銀一百二十九萬餘兩 諭曰此項工程巨萬若辦  
理稍不如式仍於河務無裨蔣攸銛當嚴飭工員妥辦有偷減草  
率等弊卽應據實嚴參如不行糾參將來別經覺察惟該督是問  
尋奏臣服官中外有公是非而無私好惡在己從不迴護於人何  
有瞻徇 諭曰卿之公正朕所素知不然亦不畀茲重任矣九年

四月署漕運總督十二月署河道總督十年二月御史王贈芳奏  
陳課歸場竈之法事下攸銛等會議攸銛言臣與兩淮鹽政福森  
再四籌之有不可行者六兩淮竈埭客地多極貧之戶嗜利之心  
十倍於畏法若買鹽之銀先入其手非以多報少卽有售無徵及  
欠課不完雖日日追比百不償一其不可行者一淮鹽引地最大  
如河南之光州汝甯湖北之襄陽宜昌荆門安陸湖南之衡州永  
州寶慶江西之贛州吉安建昌道遠則運艱商人必裹足不前鄰  
私益售官引益滯竈鹽積而不銷焉能使窮竈照額納課其不可  
行者二場竈透漏私鹽久矣今若不憑引目聽其轉販則透漏更  
多而販私無課人皆私而趨之場員官卑役少防範難周不但

能化私爲官轉恐驅官爲私而匪徒壟斷馬頭益無所忌其不可行者三向來鹽課歸商竈丁只納折色蠲緩之年在折色而不在鹽課若課歸竈戶則一遇偏災刁頑卽有所藉口額課幾歸無著其不可行者四鹽場數十皆瀕海斥鹵之區居民寥落場官旣難於徵更難於守若築城建庫不特無此經費亦且無此政體若隨徵隨解則日日僉差程程護課煩擾甚矣其不可行者五淮商之有根窩者每次給單十綱以單質銀得千數百萬爲辦運費本若根窩廢則質單卽成廢紙恆業頓失生計立窮其世業鹽務之捆工箕秤鉤槓杓帚等又不下數十萬人遽令星散必至流離亦非仰體 聖主子惠元元之至意其不可行者六奏人報 聞閩四

月 諭曰有人密陳兩淮巨梟黃玉林以儀徵老虎頸水次爲匪聚籌運之所以湖北之陽邏江西之藍涇爲屯私發賣之處大者沙船由海入江小者貓船由場河入瓜口器械林立輓轆轉運長江千里呼吸相通甚則劫掠官鹽每次以數百引計贖本旣多黨羽益眾立約束以要結人心且於大小衙門俱有耳目上官爲屬員蒙蔽下僚以畏憚偷安所獲者不過肩挑負販零夥小梟張大其詞藉此爲官弁升遷之地等語巨梟肆行地方官豈竟毫無聞見若恐查拏激變相率容隱是不但爲害鹽務必致釀成他變蔣攸銛接奉此旨務當不動聲色先將黃玉林一犯拏獲嚴究黨羽盡絕根株旣不可輕率僨事亦不可任令潛逃尋奏臣前以儀徵

縣有梟賊潛蹤請將流陽知縣王用賓調署以其緝捕勤能也頃聞黃玉林聲勢已重非一縣令所能制而老虎頭濱臨大江若用兵力必走漏風聲非畏罪遠逃卽聚眾拒捕因密委常州營遊擊金萬全潛往誘擒 諭曰該督恐走漏風聲然亦須酌量情形是杏應派兵堵截蔣攸銛自能隨宜調度朕亦不爲遙制五月奏黃玉林率夥犯八名船十二隻私鹽三萬七千斤赴官自首願立功贖罪兩淮私販甚多正須以次剪除若令黃玉林作線偵捕未始非靖私疏引之機揚州總散各商俱願聯名結保懇 恩寬其旣在予以自新如該犯不能立功仍重治其罪奉 諭此係權宜辦理朕因緝私緊要姑允所請該督當籌計萬全不得遷就一時轉

滋流弊六月因病乞假兩月 許之八月假滿視事 召來京供  
職時黃玉林復圖販私潛與其黨伍步雲書爲江甯協副將惠普  
恩所獲攸銛與新任總督陶澍聯銜奏請將黃玉林改發新疆復  
恐其到配潛回致貽後患遂單銜密奏請卽行處絞 諭曰黃玉  
林反覆無常自外生成著卽行正法蔣攸銛辦理此案事前旣無  
主張事後又復苟且以大學士膺封疆重寄者固應如是耶下部  
嚴加議處部議革職 上加恩以侍郎降補九月補兵部左侍郎  
十月卒 諭曰原任兵部左侍郎蔣攸銛前以大學士簡任兩江  
總督數載以來尙無貽誤本年因黃玉林一案辦理錯謬降補兵  
部左侍郎來京供職茲行抵山東平原縣途次遽爾溘逝殊堪軫

國朝正統朝卷之二十八  
三十一  
惜念其歷任封疆宣力有年平日辦事尙屬認真著加恩照尙書  
例賜卹所有任內一切處分悉予開復應得卹典該衙門察例具  
奏尋 賜祭葬子霖遠戶部員外郎霽遠貴州巡撫

右 國史館本傳

公鄉試出翁覃谿學士之門是科詩題仙露明珠劉文清公閱公  
卷詩云月靜珠騰海天高露洗秋擊節稱賞謂當作太平宰相  
公性彊記幾於過目不忘尤熟左傳卿大夫氏族源流分合條舉  
無譌至於見人一面與人一言隔數年記憶不爽其居官也明而  
不苛清而不刻所薦舉者多任封圻躋顯秩云

右聽松廬文鈔張維屏撰

汪廷珍

汪廷珍江蘇山陽人乾隆五十四年一甲二名進士授翰林院編修五十六年二月大考二等升侍讀五月擢國子監祭酒六十年

上以祭酒有表率士子辦事之責廷珍人甚粗率不能勝任降補翰林院侍講嘉慶元年入直上書房三年三月大考二等擢侍講學士七月丁母憂五年服闋六年七月補原官十月充日講起居注官七年提督安徽學政九月任滿回京十年轉侍讀學士十二年十月提督江西學政十二月遷太僕寺卿仍畱學政任十二年按試袁州府時萬載縣土棚兩籍童生尙未赴縣投考巡撫金光悌以聞上命會同學政籌議考試章程十三年二月廷珍



偕光梯奏稱雍正九年舊例棚籍童生五十名取進一名最多以四名爲止不致侵占土籍迨乾隆二十八年學政周煌以各縣棚民應考無多奏請併入土籍考試惟萬載縣棚董本多以各縣棚額旣裁未便獨畱亦遂同裁自此訐訟不休萬載土籍童生一千數百學額止十二名加以裁去棚額棚民應試者日眾每次取進五六名復占土額土額愈覺減少雖經嘉慶八年加額四名而合額如故土民不能實受其益欲杜訟端須仍復分額舊例棚童二百七十餘名照例應取進四名請卽以加額四名作爲棚童額缺與土額各分則爭端自息部議如所請四月升內閣學士兼禮部侍郎銜仍畱學政任十五年任滿回京十六年四月充殿試讀卷

官五月充教習庶吉士十一月擢禮部右侍郎十七年五月命充武英殿總裁官十一月復入直上書房侍 宣宗成皇帝學十八年正月充經筵講官六月充浙江鄉試正考官八月旋授浙江學政九月轉左侍郎二十一年任滿回京復入直上書房二十二年三月署翰林院掌院學士旋擢都察院左都御史四月充上書房總師傅尋充 玉牒館副總裁官殿試讀卷官八月以奸商運米出城經畱京王大臣等訊明巡城御史伊縣奏蕭鎮貪婪得贓問擬如律廷珍未經嚴參下部議處尋議降三級調用上加恩改爲畱任二十三年三月升禮部尚書七月署吏部尚書八月充順天鄉試正考官十一月廷珍以原任內閣學士兼禮部侍郎銜

錢樾應否入祀鄉賢祠請旨上飭其不覈定准駁取巧推諉下部議處尋議降二級留任二十四年四月充殿試讀卷官八月署吏部尚書先是十四年十月上五旬萬壽九月二十七日孝慈高皇后忌辰常服不挂珠是年上六旬萬壽九月二十七日廷珍未援十四年故事聲請上責其粗率怠玩降補禮部左侍郎二十五年三月復授都察院左都御史四月充殿試讀卷官九月充實錄館總裁官尋命廷珍專司勘辦實錄底本復授禮部尚書十二月以奏請停止清查各省陋規下部議敘尋賜紫禁城騎馬道光元年九月奏翰林院侍讀學士秦承業在上書房言語不謹上詰問廷珍不肖指實以陳奏含糊罰俸半年

十二月復署吏部尙書二年正月京察屆期廷珍以品學兼優承辦實錄底本勤慎通達盡心纂輯下部議敘三月充會試正考官四月充教習庶吉士十月上謁陵命留京辦事署戶部尙書兼署翰林院掌院學士十二月命兼管國子監事務署都察院左都御史三年二月上釋奠文廟禮成臨幸辟雍諭曰禮部尙書汪廷珍於嘉慶十七年蒙皇考簡用上書房師傅與朕朝夕講論非法不道學問淵博迨至二十三年授任總師傅以來倍加勤慎考古證今談皆中道使朕通經義辨邪正受益良多又自朕親政後畀以左都御史尙書之任辦理均能妥協是汪廷珍於師道臣道之義可謂兼備矣本日臨雍講學因思曩者

討論之功眷懷舊學用沛恩施汪廷珍著加太子太保銜伊子汪  
報原見回籍守制服闋來京時該衙門遇有員外郎缺出卽行奏  
補用示朕崇儒重道之意茲將此旨鈔錄一道交上書房存貯三  
月充會試正考官四年二月廷珍疏言在京各衙門郎中員外主  
事皆有題缺舊例由堂官揀選題補所以鼓勵人材今郎中員外  
之題缺仍舊揀選而主事之題缺挨次補授辦理參差應請 飭  
下該部妥議章程以昭畫一疏入下軍機大臣會同吏部覈議尋  
經覆奏以主事候補人多越次揀選恐開奔競之門仍循舊章尙  
無流弊該尙書所奏應無庸議四月 仁宗睿皇帝實錄聖訓告  
成 上加恩在館臣工賞廷珍子報閏主事孫承佑舉人復 命

將監修總裁正副總裁交部議敘廷珍籲請停免 許之六月  
命偕大學士托津等會同軍機大臣審訊侯際清捏報母老贖罪  
賄屬刑部官吏舞弊一案鞫實問擬如律十一月南河堰圩要工  
潰決漉河督張文浩職解大學士兩江總督孫玉庭任 命偕吏  
部尚書文孚馳往查辦十二月奏稱逐加履勘詳訊工員僉稱張  
文浩一味固執於禦黃壩應閉不開五壩應開不開措置乖方以  
致失事孫玉庭兼轄河務於張文浩辦理不善之處不能先事防  
救事後又不據實參奏有心徇隱迴護請將文浩發往伊犁效力  
贖罪玉庭下部嚴議 上嘉其察奏甚屬明晰會侍郎朱士彥條  
陳南河事宜 上命文孚廷珍詳細議奏尋奏言就原奏各條分

析妥議一見在修補石工請於石隄外用碎石拋成坦坡藉資保護則堰盱石隄永無塌卸之虞一高堰之內向有二隄較大隄矮至二丈必須增培與大隄平始足以資保障計需費二百數十萬而大隄歲修仍不能免若但酌量培補仍屬無益此次工程應請緩辦一江南黃河兩岸俱有宣洩之地南岸所洩之水遠近不一皆匯入洪湖北岸惟王營減壩距清黃交匯處不足二十里減漲較爲得力請將壩以內鹽河隄埽勘估加築以備大汛啟放俾不致偏注南岸一山盱五壩原以備減洩湖水見在仁義禮三壩自嘉慶年間移建於蔣家壩以南地勢高元引河淺窄智信二壩又經擡高壩底以致洩水不能暢速請於仁義禮舊壩地方審擇形

勢添建石滾壩一座以防異漲一海口並無疏濬之法惟有束水  
攻沙使之全力歸海查嘉慶十五年所築新隄下游無隄之處接  
生新灘河流至此收束不住趨海勢難迅速應於新隄之尾相機  
接築俟來年重運渡黃後由河臣勘明奏辦均如所議行五年正  
月京察屆期廷珍以人品端方部務熟悉下部議敘二月 上謁  
陵 命留京辦事署翰林院掌院學士六月 命協辦大學士  
充 玉牒館副總裁十二月以浙江監生徐晉鈔錄舊文中式後  
自行檢舉巡撫程含章奏請註銷舉人仍留監生下禮部議議如  
所請 上以徐晉應斥革該撫並應附參汪廷珍等有意輕縱嚴  
飭之廷珍下部察議尋議罰俸一年 上加恩改爲罰俸六箇月



六年二月 上謁 陵復 命留京辦事尋充教習庶吉士十一月  
廷珍七十生辰 御書耆宿承恩扁額福壽字及壽佛如意諸  
珍物 賜之七年閏五月因病乞假 命醫官診視並 賞賜人  
淺七月卒 諭曰協辦大學士禮部尚書汪廷珍人品端正學問  
淵博嘉慶十七年 皇考仁宗睿皇帝簡用上書房師傅與朕朝  
夕講論非法不道迨二十三年授任總師傅倍加勤謹考古證今  
深資啟沃朕親政後畀以左都御史禮部尚書擢襄綸閣晉錫宮  
銜凡所陳奏均得大體本年閏五月閒遘疾迭經賞假調理遣醫  
診視並賞給人淺派員署理部務猶冀剋期就痊倚任方長遽聞  
溘逝實深悼惜著加恩晉贈太子太師入祀賢良祠賞給陀羅經

被派奉宸苑卿奕紀卽日齋往並派大阿哥於初十日帶領侍衛  
十員前往賜奠由廣儲司賞給銀一千兩經理喪事任內一切處  
分悉予開復所有應得卹典該部察例具奏伊次子候選主事汪  
報閏俟服闋後遇缺卽補以示朕篤念耆臣至意尋 賜祭葬  
子謚文端九年江蘇巡撫陶澍請以廷珍入祀鄉賢祠 諭曰汪  
廷珍學問淹通持躬端謹居官勤慎朕所素知前已加恩入祀賢  
良祠茲據陶澍具題請將汪廷珍崇祀鄉賢汪廷珍著准其入祀  
鄉賢祠毋庸再交部議子報原一品廕生刑部員外郎報閏江西  
南安府知府

右 國史館本傳

協辦大學士禮部尚書山陽汪公廷珍乾隆己酉一甲第二人及第典試文衡者二十餘年學行文章天下仰之無異辭今上在潛邸日公爲上書房總師傅盡忠輔導登極後獻納尤多道光三年二月十七日晉加宮保奉有硃諭汪廷珍於師道臣道可謂兼備天語煌煌可見公所學之正啟沃聖心用成仁孝太平之治可與古大臣爭烈矣公風裁嚴峻正色立朝無所親附出入內廷大小臣工見之無不肅然七年卒謚文端天下無異辭

右識小錄姚瑩撰

國朝書獻類徵初編卷三十九目錄

宰輔三十九

阮元

富俊

英和

補錄

阮元



國朝耆獻類徵初編卷三十九

通奉大夫前署江西巡撫江西布政使司布政使湘陰李桓輯

宰輔三十九

阮元

一代之興必有耆龐魁壘之臣若唐之燕許及崔文貞權文公李衛公以經術文章主持風會而其人又必聰明早達敷歷中外兼享大年其名位著述足以弁冕羣材其力尤足提唱後學若儀徵相國真其人哉相國名元姓阮氏字伯元號雲臺祖玉堂官湖南參將始占籍儀徵嘗從大帥征苗有降苗數千大帥將戮之以死請得免及公貴人以爲陰德所致云乾隆五十一年公年二十三

舉鄉試入都與邵二雲王懷祖任子田三先生友作考工記車制圖解有江戴諸家所未及者五十四年成進士選庶常散館第一授編修逾年大考翰詹高宗親擢第一超授少詹事命直南書房修石渠寶笈召對稱旨上諭樞臣曰不意朕八旬外又得一人晉詹事充石經校勘官五十八年督山東學政撰山左金石志得捐本千三百有奇修鄭司農祠墓明年調浙江學政擢內閣學士嘉慶元年禪授禮成進文冊諭獎其典雅徵刻淮海英靈集二年修經籍纂詁百十有六卷選兩浙輶軒錄得詩三千餘家注曾子十篇彙凡三易三年擢兵部侍郎轉禮部仍直南書房四年調戶部侍郎充經筵講官副朱文正公總裁會試得士

最盛江都史致儼鮑桂星全椒吳肅武進張惠言閩陳壽祺高  
郵王引之蕭山湯金釗德清許宗彥涿州盧坤歙程祖洛興康紹  
鏞元和陳鍾麟歸安姚文田上元朱桂楨嘉應宋湘其尤著也明  
年授浙江巡撫時海盜蔡牽擾閩越疏請捐造大船巨礮並籌捕  
土盜剪艇匪之羽翼 聖書嘉獎勉以顯親揚名爲國宣力成一  
代偉人尋遣總兵岳璽敗賊於太平又奏獲杭紹等屬積盜數十  
先是錢塘江有小舟曰烏鴉船昏暮劫掠公廉得姓名捕寘諸法  
立緝匪章程七則檄沿海州縣力行保甲會艇匪竄浙奏請以總  
兵李公長庚總統三鎮舟師乃親駐台州督勦獲安南僞侯倫貴  
利磔之語在李忠毅公傳是年金處紹三郡災疏請賑卹有差蔡



牽旋寇平陽定海檄水陸鎮將擊走之增設育嬰堂經費銀歲四千兩六年立詒經精舍祀許叔重鄭康成兩先生延王述庵孫淵如主講席選高材生讀書其中課以經史疑義及小學天文地理算法許各搜討書傳條對不用局試糊名法刻其文尤雅者曰詒經精舍集不十年上舍生致身通顯及撰述成一家言者不可殫數東南人才稱極盛焉又以浙東多古帝王名臣先賢陵墓繕冊疏報得 旨勤加防護修葺撰兩浙防護錄七年浙西饑疏請蠲豁平糶立普濟堂於省會每年冬賑粥四十日就食者日數千人八年立海甯安瀾書院建玉環廳學宮奏設學額復奏立杭嘉等郡昭忠祠請以歷年勦海寇傷溺弁兵三百人入祀均 從之六

月入 覲 召對者八 賜宴者三 垂問封公年齒甚悉 賞  
賚有加回任修海塘志九年疏請以李公長庚總統閩浙各鎮專  
勦蔡牽遂敗牽於定海會浙東水災疏請蠲緩平糶并率屬捐賑  
建白文公祠於西湖撰經郛及海運考兩浙金石志積古齋鐘鼎  
款識十年賑杭嘉湖三郡饑檄所屬多設粥廠分男女爲二出入  
進退皆有法病者藥之老疾者別爲廠婦女有廁篷全活數十萬  
人六月父憂歸里居成十三經校勘記二百四十三卷撰 皇清  
碑版錄編瀛舟書記重刻石鼓文置揚州府學十二年入都進四  
庫未收書六十種作提要上之得 旨獎覽補兵部侍郎 命赴  
河南勘獄再撫浙江先是公撫浙五年凡安南鳳尾水澳等幫海

盜勦撫散除幾盡所餘者土盜張阿第等十餘艘耳自蔡牽得志於閩大掠臺灣李公長庚死事至是牽從安南回棹聚至五十艘而張阿第亦有船三十餘艘勢張甚乃親赴甯波督勦申嚴接濟賊糧之禁先後敗賊於沙鑊洋黑水洋落伽洋等處賊勢始漸蹙公復薦邱公良功爲浙江提督又立專注蔡牽分船隔攻之法於是邱公及福建提督王公得祿遂以十四年秋殲牽於温州之外洋矣坐失察學政劉鳳誥代辦監臨舞弊事奪官 命以編修在文穎館行走十五年遷侍講兼國史館總纂扈立儒林傳得百四十六人但述學行而不區分門逕又擬扈文苑傳未就又集 本朝天文律算諸家作疇人傳累晉少詹事內閣學士十七年往山

西河南勘事遷工部侍郎八月授漕運總督立糧艘盤糧尺算法  
頒行各省十九年調撫江西時豫東邪教初平餘黨煽亂餘千匪  
目朱毛俚等假託明裔謀逆公率臬司馳往擒獲胡秉耀等十七  
名實諸法得 旨嘉獎加太子少保 賞戴孔雀翎尋獲崇義縣  
天地會匪鍾體剛進賢縣擔匪曾文彩龍南縣會匪鍾錦龍長甯  
縣會匪郭秀峯瀘溪縣會匪陶省三等各論如律民情乃安公在  
江西改建貢院號舍拓基修省城章江水閘校刻十三經注疏以  
惠士林二十一年調撫河南十一月遷湖廣總督奏建江陵范家  
隄沔陽龍王廟石閘以蘇水患明年調兩廣總督奏建大黃澗大  
虎山肇慶府各礮臺又奏建南海縣屬桑園圍石隄修廣東通志

二十四年秋入京祝嘏召對十一次 賜克食四十七次 恩

賚有加 仁宗皇帝手酌玉杯 賜公同受 賜者惟江督孫公

玉庭川督蔣公攸銛而已二十五年立學海堂以經古學課士如

在浙江時改建貢院號舍如在江西時道光元年奏設郵發局修

廣州城及城北鎮海樓建三水行臺書院刻江蘇詩徵百八十三

卷作者五千四百三十餘人尋刻 皇清經解為書百八十餘種

為卷千四百公在粵十年兼署廣東巡撫者六粵中水陸向多盜

分飭屬嚴拏前後數千計其賀連交界姑婆山素稱盜藪公調兵

擣其巢患乃息兩洋貿易惟英吉利國貨最多性尤狡黠嘉慶二

十一年嘗遣使入貢未許成禮而回逾年公莅粵疏請嚴禁鴉片

首以嚴馭洋商夷商爲務遇事裁抑之夷船在黃浦殺人公嚴飭洋商必得兇犯乃已商不能庇犯乃自刎死有擊死民婦者亦予絞決抵罪道光二年冬英夷護貨兵船殺死民人二公飭洋商及管事大班縛犯以獻大班委其責於兵頭卽飭傳諭兵頭獻犯詭稱夷民互有殺傷冀相抵賴公持之力夷目等聲言將揚帆歸國停貿易公給印諭言願歸卽歸天朝並不重爾等貨稅於是各船皆出海口然非其志也仍潛泊外洋以待日久折閱多其兵船又先遠遁大班等乃稟求回岸貿易俟下次貨船抵粵時縛犯來獻公復給印諭兵船不許復來其見在貨船暫許貿易續到者如不能縛犯仍嚴拒不許入方事之殷商民官吏皆惶惶或言關稅

將自此大絀且慮激變爲 朝廷憂公曰 國體爲大稅數爲輕  
且索兇理長不可爲所欺督力持二三月夷目始有乞回貿易之  
稟自是兵船亦不敢復來公調任兵船卽踵至海疆乃自此多故  
矣六年夏調雲貴滇省鹽政久抗做歲絀課十餘萬公首劾蠹吏  
力杜井竈走私弊七年奏銷溢額萬六千兩明年又數倍之乃疏  
請酌畱溢額銀兩備邊費 從之騰越極邊有野人一種茹毛穴  
處時入內地劫掠爲邊患而保山等處別一種邊夷曰獾獾本土  
司所轄也以墾田射獵爲生精於桑弩毒矢野人畏之公乃籌邊  
費萬金招獾獾三百餘戶駐騰越邊界給地屯種以禦野人會譏  
言總督將帥兵親討於是南甸隴川等土司帶領二十餘寨野人

來乞降並獻木刻設誓八年十二月入 觀 召對十次 賜紫  
禁城騎馬及 御書春帖子尋 召入乾清宮 面賜福壽字賞  
賚無數十二年遷協辦大學士仍留總督任十三年二月 陛見  
時年七十矣 賜御書福壽字亮功錫祜扁額及尙方珍物爲公  
壽壽 命充會試副總裁四月回任公督滇黔十載值車里土司  
刀繩武與其叔刀太康鬪因而脅官求助其時漢夷流言皆謂  
當助姪滅叔公不爲動檄鎮道等擊敗繩武另擇人承襲亦不追  
殺要功其後越南保樂州土官農文雲謀叛其國聚眾戕官經交  
陞兵追捕公飭沿邊嚴防毋令一夷竄入亦不得生事貪功妄殺  
手詔嘉之其鎮靜得大體多類此十五年拜體仁閣大學士管



兵部事充經筵講官教習庶吉士兼署左都御史 宣宗兩次謁

陵均 命畱京辦事十八年以足疾請告疏再上 優詔許致

仕仍食半俸瀕行加太子太保公歸里後築別墅於湖莊曰南萬

柳堂蓋以別於馮文毅之都城別業也二十三年公壽八十復拜

御書扁額楹聯福壽字及尙方珍幣之 賜二十六年丙午以

重赴鹿鳴宴加太傅銜食全俸公疏謝 手敕報曰願卿福壽日

增以待三赴鹿鳴之盛事也考 本朝大臣生前加太傅者自金

文通洪文襄范文肅鄂文端曹文正長文襄外得公而七公以後

惟潘文恭世恩而已餘皆贈自身後者也二十九年十月薨年八

十有六 優旨悼卹 賜祭葬 予諡文達所著書曰擊經室集

先後刊行海內各宿著述如錢辛楣三統術衍地球圖說謝東墅  
食物百詠張皋文虞氏易儀禮圖汪容甫述學錢漑亭述古錄劉  
端臨遺書凌仲子禮經釋例焦里堂雕菰樓集鍾鼗崖考古錄孔  
翼軒儀鄭堂集胡西琴詩集張解元貴吏部詩集僧誦茗蔗查集  
李四香算書凡數十家子常生官清河道前卒福平涼府知府祐  
舉人官知府繼配孔氏工詩著有唐宋舊經樓橐

右事略李元度撰

國史館藏書  
卷三十一

--	--	--	--	--	--	--	--	--	--

富俊

富俊卓特氏蒙古正黃旗人由繙譯進士授禮部主事乾隆四十四年承襲騎都尉五十七年升員外郎五十八年三月遷郎中十月遷內閣蒙古侍讀學士六十年遷內閣學士兼禮部侍郎銜尋授鑲藍旗蒙古副都統嘉慶元年九月調鑲白旗滿洲副都統十二月升兵部右侍郎尋命爲科布多參贊大臣二年授兵部左侍郎四年授烏魯木齊都統賞戴花翎尋調喀什噶爾參贊大臣六年奏喀什噶爾庫貯普爾錢九千串請酌留五千串在庫其餘四千串隨市易銀以備內地經費兼平市價從之七年九月調葉爾羌辦事大臣十一月調烏里雅蘇臺參贊大臣尋奉旨

回京八年四月署鑲紅旗漢軍都統五月署兵部右侍郎尋遷吉  
林將軍八月調盛京將軍十二月奏稱盛京戶部等四部庫使請  
照京城庫使考取之例由該處兩翼應考之官學生內每翼考取  
十餘名咨行吏部注冊遇有缺出按翼挨名補用 從之先是盛  
京清查民典旗地勒限一年准其首報其旗人首報者免罪免追  
典價民人照例治罪並追歷年租息入官民人首報者免罪免追  
租息其出典之旗人照例治罪並追典價入官如旗民公首者均  
免治罪免追典價租銀仍令民人佃種三年後將地入官交原業  
旗人承種輸租十年富俊疏稱自上年九月至今年業據旗民呈  
首者一千六百餘案應追典價租息不下萬人事閱多年輾轉接

典頭緒繁多該旗民均係窮苦之人既各將地畝呈首其應追與價租息俱不免追呼之擾且尙有應得之罪情殊可憫請將應追典價租息併應得罪名加恩寬免得旨允行十二年軍政屆期諭曰盛京將軍富俊自簡任以來潔己奉公辦理地方諸務俱能認真於所屬營伍亦能勤加訓練前年朕恭詣盛京祇謁祖陵又閱三載該地方情形甚爲安貼自由該將軍經理得宜所致著加恩交部議敘十五年盛京採葭創夫攬雜秧葭事發上命富俊查辦富俊取具局員供結以委無情弊覆奏尋協領札布札那訐告侍郎貴慶有需索等情上命戶部侍郎英和候補四品京堂初彭齡往訊貴慶並無需索情形札布札那於葭務案內

有向該處商人派捐銀兩等事一經查拏畏罪自盡並查出私種秧蕩及局員知情得賄各弊諭曰富俊在任多年漫無覺察前於降旨飭查時仍以委無情弊冒昧覆奏該局員等恃有將軍爲之抵辨益復匿不吐實經英和等提證嚴訊始將種種情弊全行究出此案局員札布札那實爲罪魁富英和等查有端倪奏請將該員等解任時富俊自應立將札布札那傳提送案訊明得賊舞弊各情按律定擬明正刑章以懲貪贖乃不卽時飭解致該犯乘間自縊倖免刑誅富俊疏縱之咎尤無可辭前部議降三級調用伊任內無級可降應行革任富俊於此案始終迴護獲咎多端著卽革職發往吉林效力贖罪十六年六月御史韓鼎晉奏關東三

省賭風甚熾 上召見內閣學士榮麟奏稱富俊前在將軍任內  
查拏認真稍覺斂迹 諭曰富俊前在盛京將軍任內辦理濩務  
因受局員蒙蔽致官濩有攙雜等弊其辦理地方事件尙屬妥協  
嚴禁賭博尤屬認真著加恩賞給盛京驍騎校遇缺卽補十二月  
擢盛京工部侍郎兼管奉天府府尹事尋 命管理六邊邊門事  
務十八年三月疏稱奉天錦州屬廣甯縣向爲衝繁疲難要缺近  
年生齒日繁市廛稠密命盜詞訟日多地廣政繁求治非易請於  
新民屯地方添設撫民同知一員以資治理 從之四月墨爾根  
城遣犯韓自有糾眾謀劫黑龍江將軍斌靜奏劾副都統明德辦  
理張皇 上命富俊往訊韓自有謀劫屬實明德一聞首告全行



拏獲惟未能審訊明晰全委之協領巴達爾呼等嚴刑拷問致將  
案犯拖斃請交部議處斌靜前至墨爾根城並不會同明德審辦  
率行指參亦屬不合 上褫斌靜職 命富俊爲黑龍江將軍十  
二月請定內外臣工三年更調並禁止奢靡講求武備列款以  
聞 諭曰國家簡用臣寮量能器使其職事修廢必須隨時甄覈  
若概以三年爲期其稱職之員方資整頓何必亟於更調其不勝  
任者又安能曲爲姑容待其限滿乎所奏殊於吏治無裨至士民  
婚喪宴勞自應稱家有無隨宜成禮無如人情競尚浮華見侈靡  
者羣相歆羨轉以質儉者爲非遂至貧富相耀取非其有靡所不  
爲敝習相沿伊于胡底著八旗及直省大員善爲化導使人人知

禮讓爲先廉恥爲重一切鮮衣美食緝節繁文俱無足貴庶幾崇實黜華風俗人心可冀日臻淳樸其兵丁操演弓刀當以挽強爲尙縱不能悉挽八力以上若六力則頒諸令甲著八旗護軍前鋒健銳等營嗣後挑缺揀選務以六力弓爲合格其不入格者毋許濫充至東三省官兵技藝優嫻實堪嘉予俟凱撤回京之日著御前大臣等會同挑畱二三百名分派京城各處當差以收相觀而善之益並著每屆五年奏請挑送一次卽以此次爲始著爲令十九年調吉林將軍奏稱拉林西北雙城子一帶地土沃衍應行開墾移駐京旗 上命議具試墾章程以進尋奏先於吉林等處閒散旗人內揀選屯丁一千名每丁給銀二十兩籽種穀二石於拉

林東南夾信溝地方設立三屯每名撥給荒地三十晌墾種二十  
晌荒十晌試種三年後自第四年起交糧貯倉十年後移駐京  
旗蘇拉時將熟地分給京旗人十五晌荒五晌所餘熟地五晌荒  
五晌即給原種屯丁免其交糧作爲恆產一切農具耕牛分別採  
買齊備明春一律開墾 上以所議章程尙屬周妥命如所奏辦  
理二十二年復調盛京將軍先是盛京每歲秋間奏派侍郎一員  
帶領官役巡查海口緝拏私獲至是富俊以事成具文奏請停止  
上從之二十三年正月奏大凌河牧場餘地試墾期竣勘丈於  
原墾積聚十一萬餘畝外尙浮多地五千八百餘畝均地近海濱  
其中硤薄沙鹹者多不能按原議照直隸旗租之例升科請照養

息牧放試墾地畝之例每畝徵租銀四分作爲定額見存已徵數  
一千七百八十餘石准其減價十分之三出糶價銀解交盛京戶  
部存庫備用 允之八月奏議雙城堡開墾屯田並伯都訥圍場  
見有堪種荒田請 飭查明備墾 上命吉林將軍松林妥議具  
奏九月 上以盛京將軍事務較繁富俊年老精力恐不能周復  
調吉林將軍十二月奏吉林站丁典賣與民地一萬三千五百六  
十三晌請 賞給額設站丁八百五十名每名十五晌九畝零作  
爲隨缺工食養贍津貼 上命如所請行二十五年五月奏雙城  
堡左右二屯屯丁到齊比屋環居安土樂業又籌議中左右三屯  
應增條款一每屯應添井一眼以裕食用三屯屯丁戶婚錢債及

爭鬪事由各佐領呈報協領訊辦人命盜案報解阿勒楚喀副都  
統驗訊轉咨將軍覈辦一雙城堡協領處添設無品級筆帖式二  
員委官二員三屯佐領處添設無品級筆帖式一員委官一員以  
資差委稽查一總屯達二十四人約束屯丁請給金頂並月給工  
食銀一兩一領催兵丁應得賞銀向由將軍衙門給發未免稽遲  
請准由管理三屯協領處支存就近給領得旨允准並諭曰  
富俊於吉林開墾屯田一事銳意辦理今雙城堡所墾地畝已有  
成效旗丁視爲樂土紛紛呈請願往耕種其續行籌議各款亦俱  
周妥洵屬實心任事著交部議敘尋議紀錄二次上改爲加一  
級道光元年正月 賜紫禁城騎馬復疏陳吉林屯田移駐京旗

閒散章程 諭曰八旗生齒日繁甲餉設有定額屢經籌議增加未能大有裨益惟因地利以裕民食乃萬年之長策富俊籌辦開墾阿勒楚喀雙城堡三屯地畝九萬數千晌見已漸有成效茲據奏旗地可移駐京旗人三千戶酌議自道光四年爲始每年移駐二百戶分爲四起送屯該處豫於道光二年伐木築室按戶給與房閒地畝牛具盤費等項計畫至爲周備均著照所請辦理二月請於吉林之荒山子三道溝等處開採煤窯 從之二年六月疏稱吉林白山書院教讀乏人請將發遣黑龍江廢員馬瑞辰改發吉林專司教讀 上所奏謬妄 嚴飭之七月授理藩院尙書三年八月 萬壽聖節玉瀾堂 賜十五老臣宴 上幸萬壽山

富俊與焉繪圖紀事 御製詩有勤勞三省心益壯不凋松柏歲  
方長之句十月復 賞戴花翎四年二月復授吉林將軍六月奏  
請每旗屯適中之地建設義學並嚴禁該屯丁冬令過江樵採得  
旨允行又奏議雙城堡移駐京旗章程四條一京旗閒散有願  
赴雙城者著各旗於十月報齊戶部具奏十一月初即知照順天  
府尹直隸總督盛京吉林將軍正月初十以前定期啟行地方官  
計程籌備一移駐京旗大都無力覓工請將戶部應發銀兩俟抵  
吉林後由將軍衙門備用銀兩項下發給作爲雇工之用俾得全  
獲地利其荒地五晌亦可隨時開種一彈壓大臣改派年班仍令  
地方官隨同護送給與車輛分段遞送一每年應修住房百所於

本年冬閒備料以省運費 上嘉納之十一月疏稱吉林伯都訥  
開墾屯田曾經奉 旨俟雙城堡獲有成效再行議墾茲雙城堡  
三屯辦理完竣移駐京旗視爲樂土伯都訥圍場計二十餘萬畝  
荒蕪既久地甚肥饒且可敏於成功儉於經費較之雙城堡事半  
功倍自應及時籌備 上命如所議辦理五年二月奏吉林爲我  
朝發祥之地俗厚風醇八旗臣僕皆當以國語騎射爲重騎射  
而外當教以清漢文藝使知義方請 賞發書籍清文條例以擴  
見聞 從之先是部議雙城堡移駐京旗閒散隻身不准算戶將  
房間牛種器具給子半分 上命富俊體察情形據實具奏尋奏  
隻身閒散到屯種地無人炊爨照看門戶並恐舉目無親隨意游



蕩且每戶應得房間等物分作半分不能適用應將隻身閒散不  
必拘有妻室祇有父母子女或伯叔兄弟等情願同來者二三口  
均准算戶照奏定章程給予全分 上命如所議行六年正月  
諭曰吉林將軍富俊籌辦雙城堡移駐屯丁事宜妥協周詳見在  
移駐各戶安居樂業京旗人等聞信願往者益多該將軍經理其  
事不避嫌怨盡心宣力著有成效深堪嘉尚著加恩賞給太子太  
保銜以示優獎盡臣之至意三月奏稱拉林向未設有防禦及筆  
帖式辦公之員請於甯古塔防禦十二員內移撥拉林四員其關  
防辦事無品級筆帖式二員卽於拉林領催甲兵內揀選添設  
從之五月奏請雙城堡移駐京旗每一旗五屯再添總副屯達各

六名以資稽查 從之又奏吉林副都統年班進京例應每年二員如遇將軍年班副都統亦來一員長途往返耽延時日署缺之員未免意存推諉殊於公事無裨請自本年爲始如值將軍年班副都統卽無庸進京如值副都統年班亦祇須輪替一員來京以重職守 上是之如所請行七年七月授協辦大學士 命來京供職尋兼理藩院尙書鑲黃旗漢軍都統充經筵講官閱兵大臣十一月署刑部尙書 西陵讀祝官達桑阿等控告主事喀勒冲阿冒領錢糧私自侵用 上命富俊偕侍郎英琦前往易州查辦鞠訊得實擬結如律八年正月京察屆期 諭曰富俊年已八旬精神強健辦事照常前在吉林將軍任內宣力有年公愼勤勉克

稱厥職著交部議敘是月奏稱近日京師外省風氣競尙浮奢官員兵丁人等一切冠履服飾以及冠婚喪祭等事載在會典具有品級等差因卷帙浩繁民間不能家有其書遂至任意踰制互相誇耀於風俗人心大有關係 諭曰厚生之道首在崇儉惟承平日久生物滋豐以至踵事增華風俗日形奢靡朕御極之初曾經降旨諄諄垂誠期於返樸還淳乃奉行不力日久仍成具文富俊所奏近日京師外省風氣競尙浮夸較前更甚所謂奢不見詰轉相高尚無有窮極誠不可不防其漸著內外各衙門將民間應用服色及冠婚喪祭儀制悉照會典所載刊刻簡明規條徧行曉諭二月署戶部三庫事務八月署工部尙書 上謁 陵 命留京

辦事九月調鑲紅旗滿洲都統兼署鑲藍旗漢軍都統九年二月  
奏請旗營設立官弓揀選時統較弓力覈實挑取先經值年旗議  
駁 上命另行妥議并將管理值年旗王大臣等嚴加申飭尋復  
議准七月奉 旨富俊年逾八旬著於理藩院及該管旗分加班  
奏事引見之日不必來園卽在本衙門辦事以示優眷耆年至意  
是月盛京錦縣武童姜殿魁以該縣知縣傅鍾瑑借差苛派赴京  
呈控 上命富俊借侍郎裕恩往獻之尋訊明錦縣差務向於鋪  
戶借用銀錢墊辦傅鍾瑑按照舊章尙無勒派侵漁情事惟於縣  
署設席邀請鋪戶實屬辦理不善請 旨交部議處十月奉 旨  
協辦大學士理藩院尙書富俊年逾八旬著於該管旗分衙門應

行帶領引見之日俱免其帶領以示體恤十年二月 上以盛京將軍奕顥有演戲宴會之事 命富俊偕侍郎保昌前往詳查得寶將奕顥嚴加議處 命富俊暫署將軍任五月奏擬移駐盛京宗室眷屬回京章程 上是之八月署都察院左都御史充崇文門正監督十一年二月 上調 陵 命畱京辦事七月 命偕內閣侍讀學士賽尙阿往查吉林將軍福克精阿被控各款訊實褫福克精阿職八月調工部尙書十二月授東閣大學士管理理藩院事務 命嗣後御門辦事富俊免其入班十二年二月 上調 陵 命畱京辦事四月充殿試讀卷官五月請將嚴禁僭用服色條款出示曉諭並請飭步軍統領順天府五城嚴拏僭用服

色之人按律治罪將服物入官獎賞捕役又請一二品文武大員賞給家人虛金頂或一或二 諭曰國家尙儉去奢原所以挽澆風而餘上理然亦須化之以漸若一味束縛馳驟尙復成何政體富俊前請申明舊例嚴禁僭用服色業經降旨准行此次復請將條款出示曉諭朕詳加披閱亦屬會典所有至請飭嚴拏違禁服色用者治罪並請剝拔入官以備變賣獎賞捕人則是開棍徒訐告之風而啟吏胥撻累之弊所請一品文武大臣賞給家人虛金頂二箇二品文武大臣賞給家人虛金頂一箇尤屬非是惟名與器不可假人此輩地處寒微不過給使令之役卽大爲防閑猶恐其倚勢作威若准其戴用金頂何所顧忌必至恃符滋事而後已

其所稱窒礙觀瞻之處實屬自相矛盾所奏斷不可行六月奏稱  
年力就衰並因天時亢旱奉職無狀懇請休致 諭曰秦漢以來  
往往有因災異策免三公之事詩書不載唐虞三代固未之聞我  
朝設立大學士卽古之三公居是職者亦未嘗因水旱愆咎陳情  
乞罷大學士贊治綸扉當此恆陽不雨宵旰焦憂尤當實心爲國  
佐朕勤求治理以冀默感 天和何事遽求引退自卽便逸爲耶  
至奏稱年已八旬有四精力衰邁試思滿漢諸臣擢用爲大學士  
者雖不盡論年資亦必數歷旣久宣力有年年齒雖高朕方倚畀  
而臣下轉藉詞乞身亦非以誠事君之道此端斷不可開富俊自  
請休致之處著不准行十月盛京商人有買賣空糧一案經署將

軍奕顛訊明奏結尋兼管奉天府府尹裕泰等參奏奕顛審奏與案情不符 上命富俊偕內閣學士賽尙阿前往訊辦得實擬結如律十一月授內大臣十三年三月奏請各部院衙門條例定擬畫一俾知遵守 上命如所請行七月奏請嚴禁陋習以端仕進

諭曰國家鄉會兩試原係求賢大典其主考同考各官特經簡派於文藝之優劣即可知其品學之高下使得士皆砥行立名方合以人事君之道在獲中者感主司知遇拜認師生原屬例所不禁衡文者總當以品學相規不得徒以恩情相接若如該大學士所奏科甲所認師生凡遇一切事件無不暗爲關照及門生外升道府州縣於師生同年處所必須畱贈銀兩名曰別敬以致不計



利息重輕甘受奸商盤剝是服官之始已負重累尙安望其能清  
白自守克爲廉吏耶至在京部院司員經堂官保薦京察簡放外  
任及外任各員經督撫保舉皆當秉公遴選務在得人其拜認師  
生久經嚴禁儻以保舉爲市恩酬報地步是受爵公朝拜恩私室  
此風斷不可長嗣後內外臣工於考試所取之士及保舉所屬人  
員務當破除情面力挽頹風如有仍前餽送別敬者一經發覺定  
予嚴懲決不寬貸十月 上以富俊年逾八旬 命無庸進內大  
臣班秋審旬到日期亦免其入班十四年正月 上以富俊年逾  
八旬前在將軍任內宣力有年簡畀大學士耿介公勤克稱厥職  
賜紫禁城內乘坐車轎時屆京察 諭曰大學士富俊宣力有

年公勤清慎年已八十有六精神頗健洵爲盛朝人瑞著加恩交  
部議敘二月卒 諭曰大學士富俊性情爽直不尙繁華前在將  
軍任內宣力有年迨入贊綸扉清慎公勤克稱厥職朕因其心地  
樸誠精神矍鑠疊沛恩施深資倚任昨因病請假旋請開缺當經  
賞假一月俾得安心調理特派員前往看視方冀速就痊癒獲享  
期頤遽聞溘逝深爲悼惜著賞給陀羅經被派成郡王載銳帶同  
侍衛十員前往奠醊朕迴鑾後於三月十七日親臨賜奠並加恩  
晉贈太子太傅入祀賢良祠賞給廣儲司庫銀二千五百兩經理  
喪事所有任內處分悉予開復應得卹典著該衙門察例具奏尋  
賜祭葬 子諡文誠三月奉 旨富俊之子一品廕生恩成著

俟服闋後加恩以六部員外郎卽補

右 國史館本傳

英和

英和姓索綽絡氏內務府滿洲正白旗人禮部尚書德保子德保自有傳英和乾隆五十八年進士改翰林院庶吉士六十年散館授編修嘉慶元年升侍講二年轉侍讀三年二月大考二等升侍讀學士十月充順天武鄉試正考官十二月升詹事府少詹事四年正月奏言民惟邦本則庶政尤以民事爲先州縣爲親民之官知府有表率之責誠使府州縣人人稱職天下自無不治然羣吏各修其職在大吏先得其人 皇上於大臣之賄賂公行者法有必加由是慎選乃僚廩卹民隱薄賦稅絕貢獻損上益下臧富於民更以次釐剔各省錢漕積弊 聖治蒸蒸日上矣二月充文淵

閣直閣事稽查左翼覺羅學三月充會試同考官五月升詹事尋授內閣學士兼禮部侍郎銜九月補鑲藍旗漢軍副都統十月充武殿試讀卷官五年七月升禮部右侍郎八月充順天鄉試副考官轉左侍郎十一月署正藍旗漢軍副都統六年正月授總管內務府大臣調正紅旗滿洲副都統充經筵講官二月署工部左侍郎三月署翰林院掌院學士四月儀親王奏參英和授副都統後未到正紅旗衙門有曠職守得旨革副都統五月充教習庶吉士六月署理藩院左侍郎尋充江南鄉試正考官九月署吏部左侍郎旋調戶部左侍郎十月充武殿試讀卷官十一月以圖丘大祀引禮合儀賞帶花翎十二月授正白旗漢軍副都統七年

正月 命在南書房行走二月署護軍統領七月調正藍旗滿洲副都統八月扈 蹕木蘭獲鹿以獻 賞穿黃馬褂十一月授翰林院掌院學士尋署鑲藍旗漢軍副都統八年六月充續纂四庫全書總裁官七月署理藩院左侍郎九年正月 上臨幸翰林院賜一品補服 賞加太子少保銜 御書清華勵品額賜之六月署吏部左侍郎 命在軍機大臣上學習行走七月調鑲黃旗滿洲副都統 賞穿綠皮押縫鞞十月 賜紫禁城內騎馬時有旨檢查巡幸五臺典禮英和奏言古聖垂巡狩之典 列聖奉行維謹且以爲民祈福初非徒事游盤然事有重輕時有先後竊以三省甫定民氣未蘇 警蹕所臨雖事事輕減而長途供億不

能不借資民力敢懇緩降 諭旨俟數歲後年穀順成民樂其業

則 厨車莅止遐邇臚歡 錫福敷祺蒼生幸甚疏入 上嘉納

之十二月 西陵贊禮郎清安泰呈控內務府大臣盛住於禁地

開採山石等款 命偕戶部左侍郎戴均元馳赴查辦廉得其實

盛住褫職遣戍烏魯木齊十年三月充會試副考官六月呈遞密

封懇請 召見面參協辦大學士劉權之瞻徇中書袁煦 諭曰

軍機章京等趨直當差屆應行保奏之時自當覈明行走年月及

當差勤慎與否秉公保奏今劉權之以袁煦為伊師紀昀之壻欲

併列入錯謬固不待言彼時英和即應向慶桂董誥戴衢亨三人

會同參奏乃乘劉權之戴衢亨進城之際輒行奏請面見雖稱請

與慶桂董誥一同召見其實慶桂董誥並未知有此密奏則與自  
請獨對何異伊奏此事見已停止懇求不必詢問劉權之尋事退  
出軍機此言實屬狂妄膽大著革去太子少保拔去花翎退出南  
書房不必在軍機處行走聽候議處越日廷臣議以降三級調用  
得旨英和所參究屬因公著加恩降補太僕寺卿從前所賞一  
品補服黃馬褂紫禁城騎馬綠牙縫鞞俱著革去九月授內閣學  
士兼禮部侍郎銜十二月充經筵講官署理藩院左侍郎十一年  
正月實授尋署吏部右侍郎旋調工部左侍郎兼正紅旗漢軍副  
都統旋調鑲紅旗滿洲副都統二月充實錄館副總裁時甘肅  
已革正甯縣知縣徐振鵬受賄故出人罪經陝甘總督倭什布擬



以遣戍振鵬遣弟振鶴來京翻控 上命英和偕內閣學士初彭齡往治其獄坐振鵬誣論罪如律先是倭什布奏山西大同等府向食蒙古鹽斤嗣因商人馬君選獲罪經理乏人恐誤晉省民食已移咨阿拉善王瑪哈巴拉迅速派人經理 諭曰向來晉省池鹽由商行運蒙古鹽斤入口本有例禁嗣經奏明分定地界行銷迨將河東鹽課改歸地丁聽民間自行販運遂無一定日岸蒙古鹽斤因此侵越內地此時因查拏馬君選之後一年以來並未撈鹽發運是奸商一經拏辦阿拉善遂無經理之人正是極好機會與其令阿拉善侵占何如令淮北越境暢銷必當趁此時熟籌妥辦見派英和初彭齡赴甘省查辦事件路經晉省令與同興會商

妥議奏明候旨施行五月奏體察情形非禁水運不能限制口鹽  
非設官商不能杜絕私販請照舊例阿拉善鹽斤祇准由陸路行  
銷其河東鹽法仍改商運又奏蒙古吉蘭泰鹽池產鹽豐旺蒙古  
人等性拙耽逸不能空運自馬君選獲罪嚴禁內地民人出口鹽  
池漸成廢棄請一併招商運辦得旨爲今之計莫若將蒙古池  
鹽河東池鹽一併招商酌劑行銷此事關係重大頭緒亦復紛繁  
英和初彭齡著會同倭什布方維甸同興將山陝甘三省鹽務通  
盤籌畫妥議具奏旋奏瑪哈巴拉呈懇將吉蘭泰鹽池請歸國  
賦允之七月奏言河東鹽務扼要首在招商而商人所以易致  
賠累者實因從前以賤價定爲長額之故嗣後請照乾隆十年以

前成例准三省運商按每年鹽收豐歉成本輕重聽其自定賣價不復限以定制並准舊商再保新商分認承辦其口岸暢滯不一者於五家互保夥伴中均勻搭配俾得互相調劑至吉蘭泰撈鹽坐商必須熟習地利方知辦理情形應在甘肅就近募充運商祇須家道殷實不虧引課則山西尚可招募三省所屬地方除甘肅向無行銷吉蘭泰鹽斤之處山西之口外五廳大同朔平二府陽曲等四十三州縣陝西之府谷等八州縣應卽定爲吉蘭泰行鹽引地河東鹽政仍令山西巡撫兼管吉蘭泰爲撈鹽之地磴口爲發鹽之所河口鎮係鹽船停泊要區應添設磴口運判一吉蘭泰及磴口鹽大使各一河口鎮批驗大使一並各設武職一員由內

地提鎮標派撥移駐以資彈壓疏入下大學士九卿議行是月授左翼總兵官九月授總管內務府大臣兼管理咸安宮官學十月直隸南皮縣民婦穆曹氏控捕役陳玉受賄誣其子穆六爲竊拷打致死又天津縣民人田會控張發殺死胞嫂趙氏誣賴伊弟田科殺死等情 命英和往按之究出田科與張趙氏之夫張起比鄰居住乘張起外出起意圖姦遣張守亮先往通信趙氏不允入夜科往趙氏持剪相拒反爲所奪亂扎殆斃張守亮從而加功田會架詞妄控均置之法旋訊明陳玉毆斃穆六屬實惟受賄爲誣按坐如例十一月 命充會典館總裁官並 賞還花翎十二年二月署教習庶吉士三月兩江總督鐵保奏請河工料物加價

命偕工部右侍郎蔣子蒲赴南河查訪四月奏查明南河需用稽料等項價值增昂實由大工屢興收成歉薄所致不能悉照舊價應酌擬增添將來年豐工減物價日平仍責成督撫隨時據實奏減以示限制而杜浮冒 從之七月回京 命在南書房行走時熱河副都統福長安劾前任副都統慶傑收受屬員財物等款奪慶傑職 命偕戶部左侍郎托津往鞫讞定慶傑依官吏求索所屬財物律戍烏魯木齊旋扈 蹕熱河奉 命射鵠中二矢 賞還黃馬褂十一月署翰林院掌院學士十二月充文穎館副總裁官十三年正月署理藩院右侍郎三月復署翰林院掌院學士五月因節屆端陽各部院堂官呈遞膳牌並無一處奏事降 旨嚴

飭以內務府實無應奏之件 加恩免議越日廣興奏內務府有  
請派修理慶隆舞器物一摺文甯堅以無事可奏飾詞欺罔 上  
以英和未據實陳奏又未參奏文甯下部議處尋議降調 上加  
恩改爲降四級畱任旋充教習庶吉士又充武英殿總裁官文淵  
閣提舉閣事閏五月署戶部左侍郎得 旨暫在軍機大臣上行  
走六月調戶部右侍郎管理錢法堂事務奉宸苑事務七月署刑  
部右侍郎十二月內務府大臣廣興扣減宮中例用綢緞 上以  
英和不行阻止褫花翎降三品頂帶十二月 賞還二品頂帶尋  
賞還花翎十四年二月署護軍統領三月充會試副總裁官十  
二月因前失察工部書吏王書常私雕假印冒領庫銀褫花翎降

三品頂帶十五年二月轉戶部左侍郎四月以上年承辦 萬壽  
慶典經理妥協 賞還二品頂帶六月以盛京吉林甯古塔所進  
踐枝違禁攬雜秧淺 命偕候補四品京堂初彭齡赴盛京查辦  
尋訊明局員協領扎布扎那等得贓弊混及縱容奸商私種秧淺  
按律懲辦十一月以直隸涿州房山縣放賑遲延 命偕刑部尙  
書勒保鴻臚寺少卿盧蔭溥往按之得實涿州知州趙宜霖房山  
縣知縣沈一仁皆遣戍十六年三月 上巡幸五臺英和隨 扈  
拏獲包攬差務人犯 賞還花翎十月丁母憂十七年五月武英  
殿進呈 高宗純皇帝聖訓謫寫 廟號承校各員降革遣戍有  
差 上以英和不加敬慎厥咎甚重實降三級調用仍畱南書房

行走 命署右翼總兵官六月以拏獲偷竊清漪園陳設賊犯審  
明治罪 賞還總兵頂帶旋授正紅旗漢軍副都統七月授總管  
內務府大臣十一月調鑲藍旗滿洲副都統尋授內閣學士兼禮  
部侍郎銜充經筵講官尋實授右翼總兵官十八年正月署戶部  
左侍郎三月補禮部右侍郎八月扈 蹕熱河九月直隸長垣教  
匪不靖賊渠林清逆黨乘間擅入禁城意圖肆擾 命英和署步  
軍統領回京查辦尋獲林逆於黃村西之宋家莊 止以英和督  
拏要犯剋日就擒厥功甚鉅下部優敘旋授步軍統領正藍旗漢  
軍都統 賜軍功加三級 上還宮授工部尙書署正黃旗漢軍  
都統十二月 賜紫禁城騎馬旋以教匪肅清大功告成 賞加



太子少保銜十九年正月吏部右侍郎吳璫請開捐例廷議不一  
上命英和偕大學士曹振鏞等妥議具奏英和獨疏言開捐之  
弊兼陳裕國之策略曰治國不可言利而聖人不諱理財理財之  
道不外開源節流大捐爲權宜之計 本朝屢經舉行但觀歷次  
所收銀數卽知此次未必大效至於加增常例誠如 聖諭事多  
格礙難行且於經費未見有益竊以開捐不如節用開捐則暫時  
取給節用則歲有所餘 皇上洞悉直隸辦差不無借資民力特  
降 諭旨今歲暫停謁 陵中外臣民同深感戴嗣後謁 陵之  
典或三年或五年始一舉行則民力益舒至木蘭秋獮肆武習勞  
聯絡外藩爲 本朝家法然蒙古情形迥非昔比嗣後秋獮亦請

閒歲一行則蒙古生計所全實大各處工程奉 旨停止每歲可  
省數十萬百餘萬不等但天下無名之費不一而足苟於 國體  
無傷卽不得任其糜費卽如裁撤武官名糧添給養廉一事係乾  
隆四十六年奏准其時建議者原係覈實辦理但裁撤名糧之後  
未必能禁天下武官不役兵丁而驟添養廉百餘萬應請 敕下  
部臣詳查一切正項經費外歷年添出各款可裁則裁可減則減  
積久之自國計日裕矣節流之道旣應講求開源之計不得以  
事涉言利概行駁斥查新疆地方歲支兵餉百數十萬內地頗受  
其累其地向有金礦銀礦久經封閉開之而礦苗旺盛足敷該處  
兵餉則內地經費日見寬舒其他各省礦廠亦應詳查辦理又戶

部入官地畝請嚴催直隸總督作速升科於 國用亦有裨益以上二事一則天地自然之利一則 朝廷自有之利並非取之於民雖爲數不能預定或亦開源之一端越日 諭曰英和單銜具奏極言捐例之弊而所陳裕國之策一請復名糧之舊一請多開礦廠名糧一節前已飭查覈辦開礦則流弊滋多亦未可行本日曹振鏞等仍以暫開捐例爲請見在軍需河工各項動用均出常年經費之外姑照所請暫開豫工事例此朕萬不得已之舉非以捐例爲必可行也諸臣貪君之祿皆當忠君之事除此次曾經交議者毋庸再行瀆奏其餘各大臣果有真知灼見能爲裕國之策者奏上時朕採取施行卽將捐例停止若止言捐例之弊別無良

謀其言皆朕所稔知毋庸虛陳奏牘也二月調吏部尙書正藍旗滿洲都統三月充文淵閣提舉閣事七月充崇文門正監督十月命暫在軍機大臣上行走署戶部尙書二十年七月 派查戶部三庫二十一年正月京察屆期 諭曰三載考績爲激揚大典朕釐工熙績統計三年功過以示甄別英和兼任步軍統領年來所獲僅屬餘犯不能再邀甄敘閏六月署工部尙書旋署戶部尙書二十二年三月署翰林院掌院學士並教習庶吉士七月署鑲紅旗滿洲都統二十三年二月署鑲白旗滿洲都統五月以纂輯明鑑體例不合罷原纂各官另派總裁英和與焉七月署翰林院掌院學士正白旗滿洲都統二十四年正月京察屆期得 旨英

和辦事認真下部議敘三月署正黃旗漢軍都統先是盛京將軍  
賽沖阿黑龍江將軍松甯請於各城添設馬匹時吉林將軍富俊  
請裁撤大凌河馬羣分撥各處 上命英和會同軍機大臣兵部  
妥議尋奏東三省添設官馬惟有添至數萬匹庶可布置周妥而  
經費有常斷難輕議不若仍循舊章以安本俗如所議行五月調  
鑲黃旗滿洲都統八月充崇文門正監督署鑲紅旗滿洲都統時  
永定河漫水下注恐淹及南苑英和未奉 諭旨卽派員馳往察  
看防守先將水勢情形奏入 上是之二十五年四月英和五十  
生辰 御書福壽字扁額及諸珍物並 御製詩章 賜之詩曰  
積善多餘慶家聲定圃畱材能育堂構治足紹箕裘爲政誠無忝

殫心實有猷香山壽星見大衍始添籌時兵部遺失行印英和坐承審懈玩褫花翎旋以研鞫得實得旨賜還七月署鑲白旗滿洲都統仁宗睿皇帝升遐命恭理喪儀旋充實錄館副總裁八月命在軍機大臣上行走授閱兵大臣十月調戶部尚書時左都御史松筠奏請設立八旗義學英和以攤扣錢糧未得政體議駁又議准御史李振庸奏內閣正途出身行走人員請一體給與正俸均從之十二月諭曰朕自熱河回京時召見英和詢以政治據奏各省府州縣養廉不敷辦公莫不取給陋規請逐一查明分別存革示以限制其言似爲近理因令各督撫體察詳議諭旨甫下卽據湯金釗陳官俊汪廷珍先後陳奏以爲事不可

行嗣方受疇蔣攸銛更力陳其不可又據孫玉庭奏清查陋規輿情不協國體有關所言尤爲剴切詳明朕非飾非文過之主今既洞悉其弊則遷善改過猶恐不及著卽宣示各督撫停止查辦英和此奏雖誤究係爲公起見若遽下吏議恐廷臣以言爲戒惟仍畱樞密之地恐不足以服眾心英和著毋庸在軍機大臣上行走舊制各省滿營兵丁按月支領孤孀養贖其有事故者長支銀兩仍行追繳至是英和奏言該孤孀既經病故所有長支之項懇恩豁免 上從其請並 諭永以爲例道光元年三月署正白旗滿洲都統九月 命承辦 萬年吉地工程署吏部尙書十一月喀什噶爾參贊大臣武隆阿幫辦大臣秀堃奏請各省綠營馬兵

分半作爲旗缺並准攜眷分赴各府州縣就近應差其充補綠營之缺以八成調取在京旗人往補以二成補本營駐防閒散英和等以事涉紛擾請毋庸議 上甚是之武隆阿秀堃俱下部嚴加議處二年正月京察屆期 諭曰英和管理部務內務府事務均臻妥善且於步軍統領衙門尤能不避嫌怨管轄嚴明著加恩交部議敘三月充會試正總裁官六月署吏部尙書管理戶部三庫事務尋 命以戶部尙書協辦大學士授翰林院掌院學士三年五月充教習庶吉士時直隸州縣被水 上命順天府五城添設粥廠至是英和聞通州所屬馬駒一帶來者甚多請於適中處所再添一廠俾災黎就食爲便 從之九月署吏部尙書四年四月



仁宗睿皇帝聖訓實錄告成 賞加太子太保銜其孫錫祉俟  
十八歲時交吏部帶領引 見遇缺卽補七月充經筵講官五年  
正月京察屆期 上以英和管理旗務俱能盡職下部議敘四月  
奏籌議八旗疏通勸懲之法一閒散告假與官員兵丁定例有別  
不應一概嚴禁一犯竊刺字旗人宜銷除旗檔一漢軍有考職捐  
職之例滿洲蒙古宜畫一辦理一雙城堡屯田經始維艱宜推廣  
以竟成功疏入報 聞旋奏移雙城堡屯田原議章程隻身不准  
算戶未免向隅宜酌量變通以廣 皇仁 允之先是洪澤湖決  
口運道艱阻英和奏請暫雇海船以分滯運酌折額漕以資治河  
略言近日渡黃之船僅一千七百餘隻黃水又復停淤後幫已多

阻滯則全漕不能抵通勢所必致宜預籌統計策出萬全謹陳管見所及似有裨於河漕者一已渡黃之船宜嚴飭催挽設法卸運速令回空一高寶一帶淺阻之船所載米石宜令迅速起剝儘數運通一江廣等幫及江口一帶未經淺擱之船宜雇用海船運津一明年暫停河運將本年新繳漕糧酌分海運餘悉徵收折色以資治河一酌雇海船裝運督辦高寶剝運催僱東境挽運宜 欽派大臣督理如此籌辦滯漕既可北來河道乃克專治減運費以爲海運之腳價折糧價以爲疏濬之工需似係今日不可緩之計越日復奏前議暫雇商船海運者誠以河漕不能兼顧惟有暫停河運以治河雇募海船以利運而任事諸臣初議未敢及此者一

國朝通志卷之二十一  
則慮商船到津難以交卸竊以雇船海運應令督撫專委幹員先  
期剴切曉諭官糧一石運價若干淨照漕斛兌交抵津時按官給  
執照米數兌收經紀人等不得過問其腳價銀兩由委員具結承  
領親交該商按數實收庶需索之弊可除而商情踴躍一則慮海  
運既行恐漕運員弁旗丁水手難以安插不知商運既行漕運衙  
門費用自節而養廉仍照常支給況河湖通治大工需人酌揀數  
員撥歸河標亦收得人之助其津貼旗丁應照減歇之例辦理安  
插舵工水手應援江浙成案給與盤費歸籍至折漕一節應酌照  
市價由該督撫奏定出示曉諭不許科索其折徵期限應請自本  
年十月起至次年四月止埽數全完則限期既寬民力自裕工需

亦可無誤疏入 上命有漕省分各督撫悉心妥議尋覆奏折漕  
於民未便海運可以暫行 詔如所議六年二月署正白旗蒙古  
都統七月署都察院左都御史八月海運沙船全數抵津 論曰  
本年試行海運係英和首先陳奏詳查定議及沙船受兌開行風  
帆順利見已全數抵津迅速竣事英和著加恩賞用紫韁仍交部  
議敘以爲實心辦事者勸是時逆回張格爾入卡滋事英和奏言  
回疆處天山之西南自乾隆二十四年歸入版圖與腹地編氓無  
異迨日久承平相習而玩又派往之辦事領隊及侍衛章京等或  
意存見小嗜慾紛營役使回人自恣威福往往激成事端見在邊  
衅不清皆不肖官員有以啟之目前之勢自非大加懲創不足以

壯國威而申天討伏查新疆南北相通路除自烏魯木齊至土魯番係安設軍臺大路外其餘山僻小徑僅通馬行者一自伊犁正南踰木素爾嶺可至阿克蘇一自伊犁東南渡空吉斯河踰納喇特嶺可至喀喇沙爾一自伊犁西南渡納林河踰善塔斯嶺可至喀什噶爾近日伊犁調派之兵自由正南前進其東南西南兩路將來攻圍喫緊之時亦應從此堵禦以絕賊人逃竄其地水草是否足資駐牧似宜預爲準備又大兵進剿當於伊犁回子伯克中擇其可任者派往各城諭以殲厥渠魁脅從罔治之意俾其安堵無恐則賊勢益孤自可一鼓就殲所需餉銀除遵旨於甘肅藩庫籌撥外擬於就近省分再撥若干運交備用內地督運糧餉應

歸署陝甘總督鄂山辦理伊犁爲新疆根本大學士長齡久歷戎  
行足資鎮馭武隆阿督師回疆尤當與伊犁將軍聲勢聯絡更可  
迅速奏功十二月奏大興縣民人陸有章等呈請開採銀礦 上  
命直隸總督那彥成等詳勘越日 諭曰各省銀礦向係封禁況  
畿輔重地且近易州一帶詎可輕議開挖著停止委員履勘英和  
率行具奏目昧之至著調補理藩院尙書退出南書房總管內務  
府大臣仍交部嚴加議處尋議降二級調用 上加恩改爲降三  
級畱任七年六月通州民人王文弼呈遞封章控告英和家人張  
天成增租擾累 上命大學士托津等治其獄讞定 命革紫纒  
開協辦大學士之缺仍下部嚴議旋議奪職 上念其平日辦事

認真革理藩院尙書鑲黃旗滿洲都統並太子太保銜花翎加  
恩賞二品頂帶補授熱河都統九月 孝穆皇后奉安禮成 賞  
還一品頂帶並花翎仍下部優敘八年正月南河總督張井奏湖  
河應辦要工各條 命英和馳往查勘尋奏添作埽壩一項不能  
疏通積淤徒糜經費毋庸置議海口接築長隄應俟一二年後察  
看辦理其高堰山盱兩廳加砌湖隄及揚河廳西岸增培緯隄等  
工分別緩急陸續修整疏入 從之是時回疆底定 恩逮近臣  
賞還太子太保銜七月授甯夏將軍因病陳請開缺 許之九  
月 寶華峪地宮浸水 上以英和始終其事其罪尤重先革去  
頂帶褫花翎旋奪職並奪其子兵部侍郎奎照通政使奎耀職越

日諭曰奕紹等奏訊據百壽供稱當開通土工時北面壙幫間有石母在內滴水用土攔當恐日久壙內霉溼原議兩旁安置龍鬚溝出水因英和告以不用安置是以停止並據牛坤供稱伊祇管開發銀兩不管工程亦無剋扣情事等語前於寶華峪開工時曾經詢問英和所閱土性有無泉石顯露龍鬚溝應否安置據奏地甚乾潔可以停辦至牛坤在工曾據英和保奏有伊在彼英和卽不必常往督工此時牛坤則稱不管工程是此二事顯敢在朕前欺飾是誠何心英和著卽拏交刑部嚴訊尋命查抄家產十月讞定得旨英和承辦寶華峪吉地要工自應慎重詳審乃催促工程勒限完竣以致工多草率遂有浸溼奕紹等審訊明



國朝名臣列傳卷二十九  
確比例擬斬監候本屬罪所應得姑念英和曾任尙書協辦大學士此案訊無贓私且吉地工程係朕一人之事不肖因辦理不善誅戮大臣英和著發往黑龍江充當苦差以示法外之仁伊子奎照奎耀著卽隨侍前往伊孫候補員外郎錫祉著卽革職十一年三月 加恩釋回五月得 旨賞奎照翰林院編修奎耀以六部筆帖式補用越日 賞錫祉六部筆帖式二十年卒 賞三品卿銜子奎照甲戌進士前任禮部尙書奎耀辛未進士前任通政使司通政使改官兵部員外郎降捐南河同知孫錫祉乙未進士前官翰林院侍講學士見改官禮部郎中

右 國史館本傳

協辦大學士英和定圃尙書文定公子少有異才和坤欲壻之不可頗銜之乾隆癸丑公登進士殿試恐爲所中乃變易書體得免仁廟親政和坤伏誅以公不附其黨嘉焉恣至大用上卽位首言開捐之弊 上深納之有永停捐例之旨海內翕然吏治一變道光五年高堰河決漕運不前公力請海運江督琦公蘇撫陶公助之時議懼險僅分運蘇松諸幫已而海上舟安抵通倉識者皆偉公策欲久遠行之不果蓋漕運倉場二總督以下食河運之利者不便海運多方尼之也公感 恩遇知無不言爲戶部尙書深以 國用爲憂張格爾事起西域用兵計費千萬有請於易州開礦者公未察奏之幸 上英明不許太僕少卿梁中靖奏酌增

常捐事例以裕軍需西事方亟 廷議皆以為宜行公亦不能持  
 前說然公判度支邊餉莫籌亦其諒公之非得已也公嘗數主試  
 尤風雅愛才六十壽日諸門生故舊頌祝之詞甚眾公獨取桐城  
 諸生劉開詩以張堂中觀者歎劉詩之工而益服公之好士也  
 萬年吉地初營寶華峪 上命莊親王及大學士戴公相度地形  
 而公督工程公薦戶部某郎中為監督先是公為內務府大臣久  
 習知吉地工鉅財力匱耗頗以尙儉為言與 上意合嘗燕暇從  
 容舉漢文帝薄葬事 上稱善至是遂議於舊制小有裁省道光  
 五年余在都中聞某為監督節省工費三十萬曰嘻其敗矣昔嘉  
 慶中吉地年久費鉅工猶未善盛公以此得罪某何能省費若是

其工可知矣英公必爲所累友人劉元恩在工當議敘余戒之曰  
君其辭之劉曰諾七年工竣戴公英公皆晉官銜某擢內閣侍讀  
學士某故癯鄙希 旨節省工不堅而眾惡之八年 上聞地宮  
有水使人視之驗 車駕臨視則 孝穆皇后梓宮下見水迹  
上大悲慟逮問諸人公及二子革職戍黑龍江莊親王以先薨免  
戴公初逮禍且不測 皇太后言不可以吉地事誅大臣乃釋歸  
某亦遣戍方英公之被逮也盡封家財登諸籍戒家人曰 上必  
籍沒悉以獻敢匿一物者吾以 聞遂皆入官無隱然公家數世  
貴顯悉所有不及數萬天下悲公之忠盡而誤於匪人也

右識小錄姚瑩撰

國朝通志卷三十九

三

國朝書獻類徵初編卷三十九補錄

宰輔三十九

阮元

阮侍郎撫浙之明年夏六月禦賊松門有神風蕩寇及禽倫貴利  
事循始聞傳述互異未獲其詳也冬至浙寓居撫院署中閱諸文  
移手札又詢諸從卒海上者乃得其本末艇匪者自安南來者也  
浙賊曰鳳尾閩賊曰蔡牽曰水澳初平陽縣海濱老龍頭石山橫  
亘於海爲烽火門其東大嶽小嶽兵守嚴密乾隆五十一年調任  
臺灣代者不嫻於防閩賊始識徑路而窺浙嘉慶元年閩賊李發  
枝引艇賊深入而浙賊附之時侍郎方督學按試甯台有諸生之

家被掠者贖母力不及婦婦乃慘死生泣愬於侍郎有翦滅之志而非其職也四年冬侍郎承命爲兩浙巡撫艇賊歲至者四稔矣先是吏有探之者賊飲之酒指艇大言曰吾駕大艇齋十月糧礮重數千斤來收稅耳爾大吏宜自計非吾敵也當是時權眾寡強弱之勢實不足以殲賊而土賊聞賊恃艇賊之強益橫巡撫旣莅浙艇賊踞台州大陳山及温州三盤巖三路犄角十二月丁未定海鎮總兵李公長庚帥舟師趨入賊中轉戰自午及酉焚其桅出有陷於陣者反篷飛入脫之賊大駭提督倉公保謀以火攻或漏於賊五年春正月戊午賊夜焚岸芻而遁李鎮軍追之及粵夏五月始歸鎮巡撫以賊情下詢諸官弁及士庶人定海孝廉方

正李巽占言曰前此武備廢弛賊匪始擾訓練既久官軍知奮以各憲之勞心督緝三鎮之悉力追捕曾不克擒一渠魁取一全勝者其故何也其船巨礮巨船外蔽以牛皮網索使我礮彈不能入艇既以閩爲向導閩卽藉艇爲聲援浙洋自南距北二千餘里我南則彼北我北則彼南我當艇則閩肆其劫我當閩則艇爲之障且艇強卽遇亦未能必勝閩狡卽未遇已望而先走此所以虛糜糧餉而不獲實效也今分三鎮各據要地巡緝本洋一遇盜船盡力攻擊此可以禦閩賊而不可以禦艇賊禦艇之計必備大船配精兵利器械擇善將者統之重之以節制各鎮之權扼險於閩浙之交艇至則盡力攻擊南竄南追之與閩師合北竄北追之與三



鎮兵合如此則兵力既強而責有專歸庶有濟矣且盜非皆生而爲盜者也卽艇匪半屬閩廣土著亦非處心爲盜者也其以失業之故而竊發者少以得爲盜之利而聚集者多其所需者口糧皆內地奸民所接濟耳奸民之出非防守不嚴則故縱之弊也採捕小販半雜奸民其偷必多甚或以被劫呈報而實與賊通故難民之中有真有僞不可不辨也今欲澄盜源莫若安民業嚴行保甲預絕其通盜之路漸回其通盜之心無業者皆遂其生貪利者盡科其罪則人亦孰肯冒死而爲之哉內無奸民則外盜糧絕糧絕則潰散且盜亦人耳洪波巨浸之中驚風怒號崩崖撞激去死無幾仰視守法良民安居就業熙熙然有家人婦子之樂亦孰不

思歸命投誠而尙忍爲盜哉故統籌禦盜之策不厚集其勢則未  
易猝除不力杜其源則患終未已而實力奉行不使滋弊則又在  
親民之吏與統領之將耳如是數年而盜猶未靖民猶未安恐無  
是理也定海教諭王鳴珂陳防禦之事六攻擊之事三預籌之事  
四言皆可用且慷慨言曰卑職承乏海邦六載之間由縣會同督  
率鄉勇晝夜防禦近岸村落幸免蹂躪葢礮聲不絕於耳火光時  
屬於目者屢矣珂籍臨安非瀕海教職無殺賊任然見賊匪往來  
縛人妻女繫人父兄以要人貨不如約則剖心斃肉慘不忍言雖  
有官兵莫能痛斲每一思之恨不飛食賊肉爲吾鄉人雪此仇辱  
口陳手畫目皆並裂於是鄞縣知縣郭文誌請合江閩舟師黃巖

縣知縣周鳳鳴請先滅土盜台州府教授沈焯請厲武舉以寓約  
東黃巖縣教官李其瀾湯棫請禁商船漁船定海縣知縣宋如林  
請查偷漏紹興府經歷黃敬修言兵船護商之利外洋追賊之難  
大約俱以造巨船鑄巨礮爲首務先是弁兵剿賊失利多以船礮  
卑小爲辭至是眾論如一巡撫乃奏請於上然以經費重繁又值  
川楚用兵難於籌款未有定議會提督倉公特請於朝時廣東按  
察使吳公俊入覲亦言粵東兵船行有成效上可提督之奏  
然提督未知巡撫先已入告也旣而謝曰僕欲言此久矣苦人掣  
肘故未聞於公然吾思殺賊以報國耳雖謫不恤也浙撫以無大  
木工匠不嫻於造船率官商捐金得十餘萬盡以給李總兵使其

子弟親丁造船於閩謂之曰此事屬君則屬君耳吾發銀平色皆足艇成不覈減工料也又於杭州温州設治局鑄鍛大礮四百餘門令沿海州縣民壯兼習鳥槍不增餉而增兵千百嚴號令警弛廢勵廉隅肅賞罰檄沿海村岸十丁立一甲十甲立一總甲一村立一總保一山一畧立一畧長給以費使之互糾通賊者獲之有賞檄漁戶小船墜以白編其姓名年貌屬之埠頭旗長晨出者暮必返不返者有稽遠赴者鳴於長船之偶者分正腳私駕者毀其船檄汛口凡船出畧稽之人日持米升五合驗以印票私漏者執之執私漏者賞以所漏之物檄海濱治者遷入城私造鐵器出城者有誅檄兵船漏硝磺以濟賊者斬檄商船母獨行賊來則禁出

海不遵令者有罰私充標客以誤商者誅檄營汛察奸民有緣商被劫而為保釋者有以酒米易賊貨為之消贓者吏稽之檄村寨壯丁團練相守望立耆老紳士之賢者為長村有警鳴鑼相召有不應者梏其頸檄府縣營汛實力同心賢能者敬之擢之弛者縱胥吏擾民者疾如仇遴教職佐雜官數十人分巡海口徼服步行率鄉勇線民隨時禦捕雕木印令其事無鉅細直達毋少隱以故千里海濱事皆如目覩而營縣亦互相糾不敢少諱事於是定海教諭王鳴珂率鄉勇守黃巖定海縣知縣宋如林稽空船出口凡空出者給以照使賊無所支飾平陽縣知縣楊榮肅清漁戶團練鄉勇二千七百人鎮海縣知縣魏右曾力行保甲造鐵槍千杆

民踊躍從者六百衣上書勇字黃巖縣知縣孫鳳鳴令士民自派壯丁備木棍竹筴鋤耙石塊識以旗旗上書丁名丁立其下王鳴珂寶統之沿海之旗連續如雲有警鳴鑼相召在田業農者聞聲並集故賊不敢近岸太平縣知縣趙耀彤於海上至石爲外周以塹兵勇內伏甯海縣知縣陳鵬南於健跳螺師山設礮山礮以擊賊船之入口者象山縣知縣徐元梅於石浦泥灣設立礮房而鎮海之小港大磳頭慈谿之後山北定海之西道頭臨海之海門金沙灘太平之狗洞門石板殿巖鼓巖金清港石塘樂清之岐頭蒲頭洛西地畧皆民偷漏之地令既行巡樂清縣之教官王應虞訪有奸民龔大陸大阿買等通於賊誅之鄞縣之姚家浦夙爲

土盜之藪官兵不能制巡撫用計禽其魁姚富衡其保長首出姚阿三十六人既而溫台各巡員獲通盜張周賈陳大海王兆才等數十人又有浙賊潛登岸僞充鄉勇刺聽官兵虛實者皆詰獲立斬以徇樂清張阿三素附鳳尾賊登岸其兄集族人縊殺之沿海村民演戲自約禁偷漏閩浙賊窮蹙斷糧附夷艇五月丙戌窺平陽北關遂泊於黃沙關壬辰巡撫自杭州之鄞縣己亥提督赴台州李總兵之追賊入粵也返至閩值賊蔡牽畱擊之既歸鎮艇賊已踵至是時巨舶未成提標兵分禦各隘口李總兵初歸士卒勞頓未息巡撫以歷年勦賊閩師俱至乃致書於閩請撥閩舟師會勦甲戌巡撫至台州會提督倉公保黃巖總兵岳公壘爲會勦計

是時夷艇三十餘踞三盤水澳鳳尾蔡牽各六七十船水澳南泊  
玉環外洋鳳尾及土盜小船散泊大陳石塘巒殼等巖蔡牽往來  
無定適閩賊浙賊隙巡撫謀因其隙而閒之葉萬根薦漁山鄭天  
選札玉環同知招之與水澳言庚戌艇賊自三盤入深門岳總兵  
飭兵船漁船分泊以俟巡撫具奏請調閩粵舟師略曰粵閩浙皆  
有土匪而艇匪爲尤甚日多一日年復一年若不亟爲剿滅則前  
明倭寇甚可鑒也此時船廠未辦各盜皆萃於浙臣愚以爲分而  
捕之不如合而禽之爲也請 敕兩廣督臣選鎮臣領兵船二  
十號乘南風來浙同閩浙之師合剿使夷匪知內地兵力之厚策  
應之靈於三省皆爲有益得 旨允行夏六月巡撫駐守台州李



總兵猶未至以書速之自丙午至於丙辰書六致辛酉李總兵統師出洋癸亥抵普陀巡韭山巡撫致以書曰立秋已過捕務尙無眉目水澳已竄入南洋夷匪病疫若會合三鎮便可試剿否則七月中閩師始至未免太遲矣丙寅李總兵至銅瓦門丁卯駐師石浦時温州鎮總兵胡公振聲亦移師楚門水澳以閒故兩端退泊玉環與鳳尾鬪互有殺傷夷艇及鳳尾進踞龍王堂松門之下環於松門山計將撲岸且避風潮也太平參將李成隆同知時敏以守兵五百鄉勇二百據松門禦之提督謀火攻巡撫令台協中軍造火箭千五百枝札温州府備水帶給涉水軍兵調撫標兵二百貼防癸酉巡撫及提督會定海鎮李公黃巖鎮岳公於台州校士

館之四照樓謀所以破賊李總兵曰賊鼠耳聞師來有日矣不戰而俟人非勇也卽乘小船與岳總兵同赴海門巡撫卽札胡總兵自楚門出與兩鎮會於金清人定風大起且雨甲戌之子丑風東轉甚遣使探兩鎮所在路阻於水丙子有弁鳧水至言是夕風雨狂烈獨注龍王堂雨中有火熬人賊艇皆破李總兵船在海門爲風水所舉絀於岸木乃止兩鎮兵船損破大半胡總兵師在黃華關風未之及是時賊奔竄海山水師船不可駕參將李成隆婦新產風雨破其屋驚死不顧率陸路兵由松門涉石塘剿賊賊乘破舟猶能以礮拒且掠商船皆就禽有一艇未損賊數百爭乘而沒登岸攘食者輿長督鄉勇獲之參將蔡德耀有五舟託買米他泛

立禡其冠太平武生林羽林率鄉勇及烏槍兵二十人乘烏鳩杉板船出海搜捕值鳳尾遺船相拒甚急李總兵以八船駛於洋賊震而退前後生獲八百餘賊淹斃約四五百人獄不足禁棧郡廳以拘之首從以下各如律釋難民之被擄者李成隆率兵涉水取賊礮得油布包安南敕文總兵銅印各四枚稱善繕隊大統兵進祿侯倫貴利明日王鳴珂獲三人一詭爲瘡者一髮種種者名王貴利訊之卽其人元年秋閩中獲艇賊安南總兵范光喜供辭述安南事言阮光平旣代黎氏光平死傳子光纘其中稱新阮黎之甥阮種奔暹羅暹羅妻以女弟助之克復農耐謂之舊阮歲爲新阮患新阮之總督陳寶玉招集粵艇而肆掠於洋繼而安南總兵

黃文海與賊官伍存七隙以二艇投誠於閩今造船用其式也偷  
貴利者廣東澄海人投附安南與農耐戰有功封侯以巡海私結  
閩盜來閩浙劫掠王弗知也安南艇七十六分前中後支貴利統  
後支者四印其一貴利自佩其三三總兵佩曰耀曰南曰金南金  
俱沒於海耀則前日不知其爲總兵而已斬矣供若此巡撫磔貴  
利以供入奏 天子命軍機大臣字寄兩廣總督照會安南國王  
冬十有二月丙辰安南國王呈覆其略曰小番世荷 天朝恩庇  
曠格逾涯無能酬報思以慎守疆隅永作屏翰祇因本國極南沿  
海農耐地方有賊渠阮種竊據其地嘯集齋梳盜夥數爲海程之  
患本國海防正緊聞亦收撫艙客以離賊黨且助洋面帆柁之役

如倫貴利者前年依附作活本國聽其住泊同商伴隨在巡防詎知該犯暗藏頑狡私瞞小番敢爾潛約匪船越赴內洋肆行搶劫又敢擅造印劄轉相誑誘尤爲情罪重大甘犯天憲爲法律所不容該犯棲居本國海分馴習既久悔不能先燭其奸此實鈐束稍疏所致仰蒙聖慈普鑒洞悉肫誠訓誨有加天日垂照恭譯聖諭直感激於五衷更悚惶而無似謹當遵奉彝訓綏靖封守嗣今本國所委巡海人員一一嚴加警飭密施鈐勒斷不容結同匪夥越境作非務期桂海永清以上副聖天子懷柔之至德是所自勉也是役也李成隆率外委林鳳飛陳際會登山追擊守備陳世熊把總崔榮華鄭殿魁秦得勝於松門龍王堂小茨陣獲賊三

百餘人武生林羽林畧長朱大錢義民徐國恩鄉勇劉向榮等獲賊百餘人巡員鄧必玉杜兆勳易元曜及提標兵武生林兆鼈獲各有差並獲竹盃紅布包夷冠服鄉民於水中得紫銅礮二各重二三千斤鐵礮重四千斤餘鐵礮三十餘門又船桅大者長八丈其夾長丈餘以鐵梨紫榆青栗等木爲之柁木櫓長三丈餘番木碇二丈餘椶纜長三十餘丈教諭王鳴珂旣禽倫貴利感海氣至今病疽風之三日閩賊蔡牽入浙洋平陽副將徐鯤及平陽知縣楊鏞擊之水澳賊附之南遁賊登岸掘番薯鄉勇林深入賊隊斬其紅衣一人秋九月温黃二鎮舟師大擊水澳於東日斃其賊首林亞孫餘賊附於蔡牽判侯齊添共十餘船爲一黨風後艇匪餘

二船一沒於海一至閩糧絕投誠鳳尾鮮有存者存者惟蔡牽及  
侯齊添明年土盜陶小貓張阿愷投誠言蔡牽有五十船水澳十  
七船二者恃眾敢於拒捕又有剃鬚烏艚十二船晉江邱念二船  
然遇官兵則遠避而畏舟山李總兵尤甚六月癸酉之事 天子  
以爲誠感神應 敕建天后宮龍王廟於松門事詳陽湖孫觀察  
星衍所撰碑記六年夏四月巨艇成巡撫檄每鎮統艇十每艇統  
兵八十人各載紅衣洗笨等礮三鎮之合統於李兩鎮之合統於  
岳有知盜不追臨敵退縮者參劾治罪

右神風蕩寇記焦循撰

聖天子仁勇神武賞罰明信將帥用命嘉慶十三年夏 命阮元

復任浙江巡撫明年春 詔邱良功補授浙江提督秋八月丙午  
殲逆賊蔡牽於温州黑水洋海寇悉平閩師合戰之力也牽漳州  
民乾隆六十年閒入海爲盜時浙賊鳳尾閩賊水澳最強牽及籍  
黃附之嘉慶五年夏六月神風蕩寇之後鳳尾盜首莊有美其母  
李縛獻水澳賊首林亞孫斃於東曰惟牽遁於閩牽之黨侯齊添  
不睦於牽收水澳鳳尾餘孽別爲一幫牽忌之六年冬與妻誘殺  
齊添於台州石塘洋官兵嘗追牽將及之一紅衣人自艙中出緣  
桅而上斧其篷索卻令兵船乘風不可畱擊紅衣者牽妻也齊添  
死其黨推張阿治爲總盜首稱竅嘴幫又名肥餅阿治分其黨爲  
三小賊首曰白面角卽陳角曰郭潭又名烏蛋曰紀江均又有爛



腳陳黃葵亦侯之黨也自爲新興幫又稱再興幫與張阿治並爲浙賊牽旣殺侯齊添并其眾七年五月在閩颶風碎其船賊黨星散勢最弱閩師不能期滅遂至瑤山招集餘賊然勢未強也八年正月丁卯朔牽竄漁山浙江提督李長庚温州鎮總兵胡振聲以舟師掩至牽僅以身免追至閩賊糧盡篷索戰具朽壞我師據上風賊不能遁乃遣其人干興泉永道乞降於閩閩使道赴三沙招撫之牽又言曰果許降勿令浙兵偪我閩又信之以令箭調浙兵居下風牽得聞不果降颶去自是乃猖獗無所憚至於渡臺灣稱王攻掠城野九年夏六月天子命李長庚總統閩浙水師以温州鎮海壇鎮爲兩翼專捕蔡牽其金門黃巖定海諸鎮各守其地

總統追賊至境率師助之 命未下温州鎮總兵胡振聲殺賊死  
之先是浙撫造艇既成名曰霆船船堅壯載以巨礮故漁山之役  
牽棧獲牽畏霆船厚賂閩商更造船大於霆令商載貨出洋濟牽  
用而偽以被劫報官牽遂能渡橫洋劫臺灣米數千石及大橫洋  
臺灣船粵盜朱瀆糧斷牽分米飽之與瀆合瀆駕紅頭艚船船猝  
入閩海牽瀆共船八十餘勢甚熾四月甲申胡振聲以船工木在  
閩往運之閩人懼賊止振聲於閩以禦賊六月戊午朔越五日壬  
戌胡振聲獨率二十四船首擊賊於竿塘閩師不援遂陷於陣同  
舟八十人同日死秋七月賊牽賊瀆以九十船分三幫入浙至於  
黃龍八月丙子總統率海壇鎮孫大剛温州鎮李景曾黃巖鎮張

成定海鎮羅江泰出普陀東擊賊於定海北洋大破之牽責瀆不用命瀆怒先返牽瀆分牽勢乃少衰十年春三月黃葵率其黨五百人降於浙浙盜自鳳尾外又有小貓幫補網幫賣沖幫皆土賊小盜六年五月小貓幫張阿愷等九十人先後降餘賊徐亞六等二十四人象山鄉勇陳元章獲之於玉環沖擔嶼小貓幫滅六月温州鎮兵禽丁亞歪四十八人於東日補網幫滅七年八月賣油幫盜首楊課率其黨百十五人赴玉環降賣油幫滅黃葵屢挫於黃巖定海兩鎮訓導葉機以鄉勇破之於江南小羊山至是詣玉環乞降新興幫亦滅浙海土盜惟張阿治合小肥餅邱獺而蔡牽竄於閩是年夏浙撫阮元以憂歸李總統致書浙撫清公安泰曰

蔡逆有舟八九十而長庚所統兵船八十二浙洋尙有邱搭

即邱

小肥賓

即小肥餅

等船三四十而定黃溫三鎮兵船亦不過三四十自

計兵力未足以勝賊用兵之道知彼知己謀出萬全萬一軍威一挫所關非細長庚自制府奏定勒限一年以來奔馳閩浙涉歷艱阻橫戈直前出入死生徒勞無裨者緣閩浙洋面三千餘里各處兵力俱單止恃長庚一人往來追捕或閩或浙顧此失彼賊反以逸待勞前奉有不可徒事尾追之旨仰見聖明洞鑒今日之病實在於此竊謂閩浙兩省必須合立大幫兵船屬之兩提督使不分畛域彼此呼應如賊在浙界閩兵卽由三沙四霜一帶策應遏截在閩界浙兵亦如之隨賊所竄勿予以暇而奸民之火藥蓬檣

亦不能源源濟賊庶事有少多云十二年冬十二月總統率浙閩  
之師追賊入粵海先是牽以百船合陸路萬人寇臺灣總統率金  
門鎮許松年澎湖副將王得祿大破之時所部止三千人閩不濟  
師助塞鹿耳門牽得遁去然已狼狽不支奸人濟之勢復張已而  
擊之大星嶼又擊之浮鷹牽僅有三船將就禽總統中賊破遠卒  
閩師遠見統帥船亂竟退牽遁入安南夷海中李公之威賊畏憚  
若神而屢不得志於閩 天子聖神先覺誅閩將士不渡臺者逮  
大吏之掣肘者洞悉讒忌之口專任長庚長庚沒 天子震悼疊  
下詔書封長庚三等壯烈伯諡忠毅以忠毅戲下士王得祿嗣其  
職勉以同心敵愾之義上以張國威下以洩眾憤爲長庚復仇於

是浙閩將士感泣激勵無不誓以死殺賊明年牽自安南夷洋回棹朱瀆資助之復與瀆合百數十船入浙浙中土盜張阿治滋擾亦急浙江巡撫阮元復莅任夏五月丙午親駐鄞縣肅軍政嚴防禦增器械配船械募義勇杜岸奸剋期剿賊一月之內定海鎮兵獲董清秀二十一人於鼠浪湖提督舟師禽陳丁五十六人於佛肚山禽陳雄二十四人於羊山黃巖鎮兵禽林桂二十六人於沙護黃巖遊擊劉成魁太平參將福爾敏生禽王宗榮二十三人象山知縣孫泉雯獲王阿倉三人玉環同知宋如林生禽李亞羅義勇船何廷模獲桑四三十四人於韭山斬首五級葉機在岱山獲盜十一人機弟樞追盜至江南崇明獲一船生禽李葛十一人皆

張阿治黨阿治竄於南秋七月蔡牽朱潰入浙巡撫駐鄞縣督擊  
用閒以離之浙江副將項統自閩歸遇潰於韭山攻之獲一船禽  
其黨王長潰竄於閩已而閩總兵許松年擊斃之其弟渥領其眾  
提督何定江擊牽牽不敢拒亦遁於閩乃並剿張阿治禽其黨百  
六十人阿治窮蹙巡撫訪得其母與弟在閩之惠安密告總督阿  
林保總督密飭惠安知縣吳裕仁繫其母與弟阿治乃率其黨四  
百七十六人破八十六乞降竄嘴幫滅小盜首郭潭紀江均先滅  
於閩陳角投牽黨青筋茂茂降角不知所終其黨惟亞盧存亞盧  
一名亞羅一名駱盧仔號小差幫冬十二月甲寅同知陳大琮攻  
亞盧於魚山外洋獲其船禽二十八人斬五級十四年夏四月温

州鎮李景留定海鎮朱天奇參將印章主簿朱錦城同知陳大琮候  
選知縣葉棧共勦之僅餘數船提督邱良功初莅任追之至温州  
秋七月乙亥颶風覆亞盧船亞盧溺死餘二船四十四人平陽知  
縣周鎬禽之浙洋土盜盡平亞盧溺之日牽舟亦壞漂於松門龍  
王堂至於定海邱良功自閩海追擊破之閩師亦至八月壬辰浙  
江提督邱良功福建提督王得祿海壇總兵孫大剛黃巖總兵童  
鎮陞合師擊癸巳雞鳴童鎮陞率所部首追及賊賊回拒鎮陞擊  
賊篷頂落守備武大定躍上賊船禽其黨王烏五十一人斬首十  
級獲其礮械九十賊落海死者無算牽由衢港竄入外洋先是李  
忠毅鎮定海巡撫阮元與相勉勵以盡心捕賊爲務忠毅嘗追賊



至極遠外洋於島嶼獲一獐貽巡撫蓄之誠本堂每聞其嘍巡撫輒曰非李總兵奮力勦賊不聞此聲嘗相與賦詩倡和以見志忠毅以鹿洲集貽鹿洲集耆漳浦藍鼎元作鼎元以其謀佐兄襄毅公平海寇朱一貴撰平臺紀略以是勉巡撫且示己志也巡撫復任時忠毅沒於賊巡撫慷慨涕泗芄蘭數親督戰海濱提督邱莅任推心相結親若兄弟嘗勉之曰 聖明塵念海洋無時或釋殲禽渠魁仰副 宵旰在此一舉又致以書曰蔡逆坐船高大浙師向攻往往不能得力然賊船雖大而少兵船雖小而多若今某鎮隔斷賊黨不令救援以隔斷爲功不以攻獲爲功別使某鎮高大堅好船若干隻專伺蔡逆本船連環施放槍礮破其篷胎桅牙使彼不

能行駛然後更番攻擊多用火箭火瓶賊行與行賊止與止久久  
相持賊之就禽可必矣時巡撫將入都祝 報又致以書曰一切  
勦捕事宜諸望專司指揮提挈並明示將士以功過所在俾共圖  
免過立功元身在省垣心繫海上今兩省舟師及所雇商船共得  
七八十號兵力壯甚殲滅渠魁定在此舉捷音不遠我公與王提  
軍平賊卽會奏勿違也牽旣竄閩師以朱渥入閩南還禦之浙師  
北追賊至馬蹟不見賊己亥牽由潭頭外洋而南癸卯邱良功至  
普陀簡舟師窮追南下甲辰至半欄基謀知牽匿黃巖之魚山乙  
巳黎明追及賊方起篷南竄偏之牽返篷拒牽所乘綠頭大船良  
功揮令眾舟趨而圍賊以礮擊黃巖鎮船桅拆時閩師猶在浙乃

合擊俱乘上風賊懼向東南遁浙師隨擊自卯至申斃賊無數轉  
戰至黑水深洋閩師亦至海壇鎮孫大剛從浙師與賊船偪以火  
燎賊賊亦以火拒時夜半風浪並怒不得登賊船隨浪散出良功  
據上風截之賊莫能遁丙午寅刻良功率各舟師聯絡攻擊牽且  
拒且逃右營遊擊陳寶貴左腕傷於礮午刻過黑水洋見清水良  
功曰深洋寫遠天且晚此時不得賊賊將遁大呼以己舟駢於賊  
舟東閩師至閩舟駢於浙舟東賊篷與浙篷結浙篷毀賊以旋扎  
浙船決死戰我兵奮勇無不一當十賊多跳水死賊以矛刺良功  
貫腓流血邱成勳良功兒子也與賊格鬪墜海死海壇鎮孫大剛  
乍浦參將陳琴守備李增階各以舟師趨賊賊火斗及增階藥艙

船轟琴兩足傷舟亦沈琴增階遇杉板救不死牽僅有二三十人  
船漏壞牽急將以火投藥艙自轟浙船被毀旋脫出閩船遂駢於  
賊船賊猶以死拒敵東風大起福建提督王得祿海壇總兵孫大  
剛力持賊浙師自外觀之礮火聯絡賊以礮擊王得祿傷額及肘  
忍之揮千總吳興邦以火攻賊船柁樓脫牽別子小仁與其黨矮  
牛等隔於眾鎮不能救牽船裂與妻子落海死是爲八月十八日  
越四日庚戌巡撫赴京師乙卯過揚余餞之北湖相墩及辦賊事  
巡撫曰賊平宜幾日矣因述所以制賊事宜時實未知捷音未幾  
閱邱提督報書乃得其詳余往來節署者有年稍知海上本末嘗  
慟李胡兩公之死自恨儒儒不能執殳從 王事既聞賊平大快

頌揚 天子之盛德以示里中父老里中人莫不歡獻太息浮大白以相慶也或曰蔡逆之滅由浙師奮不顧身首先攻擊致賊不能遁閩船大鈍於浙追及時賊已垂殆故收其功耳焦循曰否否方浙船破僅存底板邱將軍足且傷使非閩師戮力同心邱將軍縱不罹李胡之禍賊亦揚帆去矣當是時賊船與浙船結閩船夾浙船外浙船毀而閩船又駢於賊船賊所以滅耳向者三沙之役閩地也而閩誤之今賊所殲之地浙地也而閩助成之然則賊之生死視閩浙合與不合李忠毅殺賊之勇詎遜於邱乃抱恨而殞者抑又何哉牽旣死是冬朱渥亦以其黨降於閩海寇悉平胡振聲閩人嘉慶五年爲黃巖副將從總兵岳璽擒獲蒼黃盜首江文

晉黃滅授温州鎮總兵九月會黃巖鎮滅水澳於狗洞門六年正月追侯齊添於披山洋破之六月滅補網幫於東日十月擊蔡牽於南鹿生禽其黨林照四十四人八年正月從李長庚追蔡牽至閩牽幾獲十一月戊戌夜襲蔡牽於南鹿己亥與參將李景曾縣丞王正悅三路掩擊獲賊九十六人礮械數百是役也振聲身先近賊牽幾就禽振聲殺賊之勇亞於李戰死於閩聞者悲之葉機定海人由廩生官訓導八年夏請以家財募鄉勇下海捕賊數有功巡撫薦之升雲和教諭候選知縣陳大琮同安人壯烈伯李長庚女婿也安徽候補同知以諳習出洋巡撫奏留浙授同知

右神風蕩寇後記焦循撰

日本書紀卷之二十一

第廿二

國朝書獻類徵初編卷四十目錄

宰輔四十

王鼎

伊里布

李鴻賓

覺羅寶興

陳官俊

補錄

王鼎



臣等謹將奏稿  
卷二十一

國朝耆獻類徵初編卷四十

通奉大夫前署江西巡撫江西布政使司布政使湘陰李桓輯  
宰輔四十

王鼎

王鼎陝西蒲城人嘉慶元年進士改翰林院庶吉士六年散館授  
編修八年大考二等升詹事府右贊善充實錄館纂修十年  
擢司經局洗馬十一年升翰林院侍講十二年轉侍讀十三年三  
月充會試同考官時高宗純皇帝實錄告成下部議敘五月遷  
詹事府右庶子十四年二月轉左庶子三月升翰林院侍講學士  
十一月轉侍讀學士十七年二月授詹事府少詹事四月稽查右

翼宗學七月升詹事十二月提督江西學政十八年四月擢內閣  
學士兼禮部侍郎銜十九年升工部右侍郎兼管錢法堂事務均  
閔學政任二十一年六月調吏部右侍郎七月轉左侍郎二十二  
年四月充殿試讀卷官五月充教習庶吉士六月廷臣有以山西  
藩司習振翎年老健忘接見屬員皆需家丁指告謁見巡撫私帶  
門丁竊聽公事錄底存貯以備詢問又將忻州吏目費鈞調入藩  
署幫辦幕務等款入告 命偕刑部右侍郎成格往按得實振翎  
褫職遣戍巡撫銜齡坐失察罷任十二月署刑部左侍郎二十三  
年二月兼管順天府府尹事務三月以畿輔亢旱糧價加增請撥  
倉粟一萬石設廠平糶 允之七月署工部右侍郎兼管錢法堂

事務旋 派查三庫十一月刑部已革書吏劉錦江以主事余繼  
生爲四川劍州牧呂兆麟消弭處分句通書吏莫泳泉等裁割橐  
本等情具控 命會同軍機大臣按治之鞠實余繼生遣戍餘俱  
按律治罪二十四年四月充殿試讀卷官閏四月調刑部右侍郎  
六月充浙江鄉試正考官九月調戶部右侍郎兼管錢法堂事務  
十二月復署刑部左侍郎充經筵講官兼管順天府府尹事務二  
十五年四月因審訊兵部行印被竊日久未能定讞降三品頂帶  
旋審明行印確於前次秋圍在巴克什營地方遺失 賞還頂帶  
九月充 寶錄館副總裁十二月署刑部右侍郎道光元年二月  
命偕工部右侍郎那清安赴直隸按大名府知府王履泰河南

押運同知陸有恆挾優飲酒一案鞫實治如律五月山東齊河縣知縣蔣因培以前任臬司童槐調缺不平在官廳咆哮巡撫錢臻參奏 命偕戶部右侍郎成書往按之尋訊明蔣因培因兗州府屬調補州縣疑有私弊欲行稟阻被劾後輒敢刊刻稟呈詩句肆行傳播實爲狡詐擬遣戍軍臺錢臻辦理草率童槐向錢臻面稟情形訊非誣捏惟回奏諱飾擬議處分察議有差 上以錢臻年老平庸降補湖南布政使餘如所議行時河南原任鄭州牧降補佐貳阮文燾以見任知州孫傑隱匿錢糧捏欠冒豁等情赴京呈控 詔往鞫之廉得其實孫傑坐監守自盜例擬罪阮文燾認回攤捐之款尙欠銀一千二百餘兩巡撫姚祖同奏請降補尙無屈

抑第交代實無虧缺且控告孫傑得實請以佐貳赴部選用時有直隸永年縣民郭萬清京控知縣馮鈺浮收釀命 命往審辦旋訊明得實科罪如律九月 詔審完縣監生劉天保京控知縣黃觀藉差苛派押斃人命各款尋訊明黃觀於辦道派夫額外加增罔恤民隱請褫職遣戍二年正月升都察院左都御史二月偕兵部左侍郎玉麟赴江西鞫獄先是江西巡撫瑞弼劾守備徐富國求索得財而富國則以文武各員得受鹽規承審官袒護不辦等詞赴京呈控至是訊出星子縣青山鹽店向有餽送各衙門規費徐富國署南康營都司時於商人致送錢文移縣查辦並無絲毫入已斷難坐以賊私該撫計賊擬徒實非其罪應請註銷其所控

規費等情俱經得實本應量予開復惟曾與商人私相往來且將  
教諭黃中理所交規費清單任聽營書捏添通稟又指爲知縣邵  
自本所交希圖挾制情殊狡黠業經革職應毋庸議餘俱按坐如  
律四月回京行至直隸會河南陳畱縣訓導朱成勳京控知縣趙  
錦堂給賑不實 命回豫審辦五月奏查嘉慶二十四年黃水漫  
溢陳畱縣被淹成災趙錦堂承辦災賑於所屬之韓岡集各處並  
未親往查勘任聽地保開報致有遺漏應禡職遣戍六月復偕王  
麟赴直隸鞫高邑令范澍捏控趙州牧李景梅挾嫌出考獄成范  
澍坐誣控奪職戍新疆李景梅訊無挾嫌不公及收受規禮情事  
惟於密出屬員考語致有洩漏實屬疏忽應下部嚴議均 從之

尋以河南儀工奏銷有以少報多之弊解巡撫姚祖同任 詔往查辦七月署河南巡撫九月奏查明儀封大工計用銀四百七十五萬餘兩迨辦理奏銷覈與部例成規不符是以查照歷次奏過工程並奏過料物土方價值合之豫省成規互相增減將稽料引河等款增銷銀一百三十萬兩夫工麻斤各項下減銷銀一百三十萬兩報銷雖有通融而銀數仍歸實用疏入 諭曰儀工用項該省歷經辦有成案委無含混支飾著卽令覈實報銷十月丁父憂五年四月服闋 命以一品銜署戶部左侍郎五月 命在軍機大臣上行走 賜紫禁城騎馬六月充浙江鄉試正考官時有德清縣民婦徐倪氏謀斃徐蔡氏捏稱自縊一案懸宕三年未能



平反臬司王維詢因與署巡撫黃鳴傑意見不合自經閩浙總督趙慎畛參奏有旨著王鼎出閣後偕巡撫程含章提集嚴審尋鞠實坐徐倪氏謀殺律寘之法黃鳴傑下部議處原審原驗各官褫職鐫級有差六年三月充會試副考官九月補戶部尙書十二月有大興縣民陸有章等呈請於宛平等五州縣開採銀礦經戶部據呈具奏諭曰各省銀礦向係封禁況畿輔重地且附近易州一帶詎可輕議開挖戶部堂官並不詳加體察隨同畫諾著交部議處旋議降二級畱任七年二月以六十生辰御書宣勤受祉額福壽字並諸珍物賜之七月充教習庶吉士尋因回疆克復四城得旨一切軍報承書諭旨軍機大臣夙夜殫心勤勞懋

著王鼎著加太子少保銜十二月充經筵講官八年正月回疆底  
定首逆俘擒 賞戴花翎尋繪像紫光閣 御製贊曰國之大臣  
先乎品行命贊樞機謙謹申敬職司度支精勤報稱靖其乃心以  
襄庶政三月長蘆鹽政阿揚阿奏鹽務疲累日深商欠日重請停  
議改樁另籌歸補帑課經戶部查明所奏加價帑本等款多有未  
符 上命偕戶部右侍郎敬徵馳赴天津確查妥議四月疏陳察  
訪蘆商積疲情形若照限起徵必致那移懸墊弊竇叢生若再量  
加展緩是仍苟且目前之計伏思整飭鹽務首重年清年款先將  
節年帶款逐加釐剔則見年正款自不難按額清完查原奏以道  
光二年以前未完銀九百餘萬兩作爲舊欠三年以後未完銀二

百餘萬兩作爲新欠分別歸補係爲綉舊徵新按年清款起見惟所擬歸補章程請以堰工加價二文全數給商實屬漫無限制擬自本年六月爲始將每年所收加價以一半解部充公以一半抵完商欠俟新欠抵清再將舊欠接續抵完其未完道光六年七年加價銀二十七萬餘兩請於本年八月起按半年一提分五限徵完解部惟八年春夏二季應徵加價係未經滿限之款未便歷後帶徵應令本年照數提完以免延宕至蘆商生息帑本內有直隸水利銀趙北口銀兩項均非經費歲需應准其援照成案停利三年限滿後加一倍利本息一併完繳其舊有拔繳水利帑本息銀一百十七萬餘兩應停徵三年統於道光十一年起每年徵銀十

萬兩以五萬兩完繳舊拔本息以五萬兩完繳新拔本息以恤商  
力再近年商力疲乏不能豫買生鹽存地新鹽質嫩易消致多滷  
耗請每包於定數外加鹽二十斤免其交課俾資貼補一俟商力  
稍寬卽行停止從此款目既清自當年清年款經久可行又奏嘉  
慶十七年舊加鹽價一文係以一半歸商一半交官完欠除完過  
銀十九萬餘兩尙有未完銀一百八十四萬餘兩查明實因銀貴  
虧折請予豁免其半文加價並請 賞給該商貼補成本奏入均  
下部議行尋回京八月充順天鄉試副考官九年四月充殿試讀  
卷官十年十月長蘆商人華長裕等赴京呈稱運資短絀懇請調  
濟復 命偕戶部右侍郎寶興前往查辦旋奏言蘆商疲乏總以

錢椿賠折爲詞查前次清查案內業經豁免舊欠又將堰工加價  
一半歸商彌補積欠並於舊定斤數外每包酌加鹽斤免其交課  
仰蒙 聖恩已屬至優極渥無可復加何以甫經兩次奏銷卽行  
竭蹶復思變計是該商等妄生希冀以爲宕課地步自未便徇其  
無厭之請致於帑課有虧所有呈請調濟之處應無庸議時兩江  
總督陶澍以淮鹽疲敝已極疏陳積弊情形 命偕寶興前往江  
南會同籌辦十二月會奏詳覈淮綱全局力求課歸場竈之法大  
要有三而皆有窒礙之處一由竈丁起科竈丁皆瀕海貧民先納  
課而後賣鹽力有未逮若令先賣鹽而後納課設遇歉產之日勢  
必課宕丁逃此一難也一由垣商納課竈鹽歸其經理惟竈戶以

已業而聽命商人情必不願竈不樂以鹽歸商商亦必無資完課  
此二難也一由場官收稅但每場應徵銀數十萬兩鹽場徵員豈  
能任此巨帑況試行之初額難懸定若聽其儘收儘解難保不匿  
報侵欺此三難也至於就井抽稅兩淮場地延袤八百里非若滇  
省一井一官卽能查察未易做照辦理惟有卽舊章大加釐剔使  
射利者無可借端欠課者無可藉口似較課歸場竈確有舊轍可  
循謹擬定章程十五條一裁減浮費一議減窩價一刪減繁文一  
慎重出納一裁選商總一酌覈帶銷一積欠宜緩一竈丁宜恤一  
實給船價一嚴究淹消一疏濬運道一添置岸店一亟散輪規一  
整飭紀綱一淮北應請籌款收買竈鹽以濟竈丁口食疏入均

允其議又奏鹽政無管轄地方之責疏銷巡緝難期令行禁止請將鹽政一缺卽行裁撤其兩淮鹽務改歸總督辦理較爲妥善從之尋以失察捐納房書吏蔡繩祖等私造假照降二品頂帶十一年正月京察屆期 諭曰王鼎久任軍機贊襄勤慎著交部議敘二月御史梁萼涵劾山東海陽令張兆祥信用家丁飭法詐贓詔王鼎於經過山東時提訊旋訊明張兆祥借用鋪戶銀兩又於伊母生日收受紳衿餽送審理詞訟不知慎密致門丁乘機指撞所辦案情錯謬是非顛倒擬革職遣戍尋署直隸總督八月恭遇五旬 萬壽 賞還一品頂帶十二年七月因前署直隸總督任內失察清河縣民尹老須習教鑄一級畱任十二月管理刑部

事務十三年正月復署兼管順天府尹事務十四年正月時厝  
京察 上以王鼎承旨精詳匡襄是賴下部議敘十五年二月  
命協辦大學士仍管理刑部事務十二月刑部堂印被竊部議革  
職旋因人印並獲 加恩改爲降三級畱任尋 命在南書房行  
走十六年三月充會試正考官十七年正月京察屆期得 旨協  
辦大學士王鼎克勤克敬不愧贊襄著交部議敘二月七十生辰  
御書靖共篤祐額綸扉協贊承恩近煙閣圖勳受福多聯句福  
壽字並諸珍物 賜之八月充順天鄉試正考官十八年五月授  
東閣大學士仍管理刑部事務先是守護 景陵輔國公景綸等  
奏獲縱火要犯孫三等請 敕交刑部審訊尋訊明孫三等均無



放火情事因屢被熬審情急供認 諭曰此案情罪有關出入該部能悉心研究平反得實該堂官著各加恩賞加一級二十年正月 賞加太子太保銜時京察屆期 諭曰王鼎矢公矢慎贊襄攸賴著交部議敘五月充教習庶吉士八月充順天鄉試正考官二十一年三月充會試正考官七月河南祥符汛河決禡河督文沖職 詔鼎偕兵部右侍郎慧成前往籌辦八月署河東河道總督九月劾河工疏防員弁開歸陳許道步際桐等奪職遣戍有差二十二年正月工次猝遇大風河溜併力南趨兩壩口門刷深數丈險工迭出鼎因不能先事豫防下部議處尋議褫職 上加恩改爲革職畱任二月奏報合龍得 旨王鼎等在工實力實心經

理得宜允宜特沛恩施以示獎勵王鼎著晉加太子太師銜仍交部從優議敘開復革職畱任處分旋奏陳病久難支請緩起程諭曰王鼎著俟會議事竣後緩程來京俟病體全愈再行具摺請安三月回京覆命賞假調理四月卒年七十五遺疏入諭曰大學士王鼎持躬正直植品端方體用素優忠勤懋著嘉慶年間荷蒙皇考由翰林游擢卿貳朕御極後見其心地澹樸辦事認真日加委任俾入贊綸扉十餘年從無過失上年派赴河南辦理祥符大工鉅任獨肩剋期蒞事晉加太子太師銜以獎其勞覆命時見其精神疲乏特降旨賞假兩次旋因奏請展假復賞假一月令其安心靜攝方冀調理速痊藉資倚畀詎意數日閒遽於園

高溘逝遺章披覽悼惜殊深著加恩晉贈太保照大學士例賜卹  
入祀賢良祠賞給陀羅經被派成郡王載銳帶領侍衛十員卽日  
前往奠醊並賞給廣儲司銀一千五百兩經理喪事准入城治喪  
任內一切處分悉予開復伊孫王璵王瑋王瑩俟及歲時由吏部  
帶領引見候朕施恩應得卹典該部察例具奏五月得 旨大學  
士王鼎靈柩入城著派何汝霖代朕賜奠諡文恪二十三年九月  
陝西巡撫李星沅題請入祀鄉賢祠 諭曰原任大學士王鼎居  
心誠篤植品端方懋著公忠克孚令望允宜特沛恩綸俾資矜式  
王鼎著准入祀鄉賢祠毋庸交部議奏子沆見官翰林院編修

右 國史館本傳

伊里布

紅帶子伊里布滿洲鑲黃旗人嘉慶六年二甲進士授國子監學正因無旗缺奏以典簿改補十年補典簿十五年京察一等記名以撫民通判用十七年揀發雲南十八年補雲南府南關通判署澂江府知府二十年升騰越州知州二十四年雲貴總督伯麟等疏言騰越州臨邊各土司在在與緬甸國接壤本年春閒緬甸野匪搆亂有竄入內地者經署知州伊里布先後緝獲猛阿來瞞弄等交該國自行究辦伊里布頗有膽識熟練邊務於各土司駕馭有方是以各山野夷甚爲斂戢本年兩次訪獲緬匪俱能不動聲色刻卽就擒請給升銜以示鼓勵得旨以應升之缺升用道光

元年八月永北廳大姚夷匪唐貴等因地土給與漢民耕種起釁糾眾滋事伊里布隨雲貴總督慶保馳往勦平之慶保上其功賞戴花翎九月署永昌府知府十一月授安徽太平府知府二年升山西冀甯道三年遷浙江按察使四年閏七月升湖北布政使九月調浙江布政使五年四月授陝西巡撫五月調山東巡撫六月丁父憂百日孝滿命署理雲南巡撫十一月兼署雲貴總督六年七月密奏調任迤南道保亮識見暗昧不勝道員之任得旨勒令休致復諭曰各省督撫於所屬道府中有才具平庸或心地糊塗不稱職者自宜據實參奏俾知儆畏方合大臣辦公之道若皆爲密奏各員不知所勸懲嗣後各省督撫於所屬道府等

官不稱職者俱應據實入奏毋庸密陳更不可因有此旨稍存避嫌遠謗之見動輒一味姑容殊失朕望治之心矣十一月奏滇省應運京銅每年正運四起加運二起共額解帶解二百四十萬餘斤應領撥銅本銀九十六萬兩道光五年經戶工二部奏准將丙戌年加運二起暫行裁減查見在京局存銅約有二三年之儲請將丁亥年京銅正運四起照舊辦運暫裁加運二起較常年少用銀三十二萬兩於經費固可節省外閒廠務亦甚有裨下部議行七年七月御史廖敦行以滇省鹽務滷淡課短奏請廣覓子井酌盈劑虛上命伊里布偕雲貴總督阮元確查議奏旋奏言歷年短課始由各井滷淡煎不足額繼因開採子井私鹽充斥亟宜封

閉私井慎選井員所有猛野等處私井業經填封撥兵巡查以杜  
奸民私窆其昭通東川二府向食川鹽近有川私侵入毗連之曲  
靖府亦經堵緝不敢越界私售見在鹽務已見起色除煎辦足額  
及有溢銷外惟安甯等五井歲減課銀二萬七千七百餘兩請於  
溢銷較多之石膏元興永濟三井溢課項下抵補卽以帶徵名目  
入冊開報以專責成 允之九月服闋實授雲南巡撫八年八月  
偕雲貴總督阮元奏獲湖北嘉魚縣民人王士林私雕假璽將赴  
越南國小潮地方勾結滋事因查出小潮匪徒趙應隴李映川楊  
林仲等僞造逆詞圖爲不軌將各犯分別治罪如律九年奏永北  
廳土司夷目所典漢民地土有已屆三限力難全贖者請量爲變

通令該土司夷目隨時措價取贖其有願將土田賣與漢民者卽令漢民補價管業 上允其請十年喀什噶爾回匪入卡滋事伊里布奏請隨同帶兵大員前往勦辦 諭曰同仇敵愾固人臣分所當然但該撫遠在滇南於回疆不靖之事不能悉其梗概從前永北廳野夷糾眾擾及大姚與喀什噶爾夷匪滋事情形迥不相同何得以此比較該撫妄行馳奏徒勞驛站實屬不知輕重著先行拔去花翎交部嚴加議處旋議革職 加恩改爲革職留任十一年恭遇五旬 萬壽開復降級罰俸處分十二年二月揚威將軍長齡等奏籌辦回疆善後事宜請裁各省綠營兵額將節省經費解交甘肅藩庫歸入回疆搭放 命各督撫速查覆奏伊里布



循總督阮元奏言滇省額設馬步守兵四萬七千三百一名其應  
裁減八百十五名歲省餉乾銀一萬二千八百餘兩米二千九百  
餘石九月遵旨議裁文職閒員請將曲靖府同知劔川州沙彌  
井鹽大使曲靖大理永昌三府司獄順甯府知事六缺裁汰均  
從之十四年奏車里土司刀繩武前與土舍刀太康猜疑起釁互  
鬪之後將刀繩武奏請革職加調防兵震以威勢其猥夷俱已散  
歸復業刀太康亦遵諭撤練刀繩武結鬻不休於革職後猶復帶  
印逃竄所遺車里土司世職其子孫例不應襲卽諭飭車里所屬  
十三版猛夷秉公選舉查刀繩武之父刀太和尙有嗣子刀正宗  
年已及歲夷眾悅服應令襲職並請由部鑄印發給以重職守刀

繩武緝獲另辦十五年遷雲貴總督十七年京察屆期 上以伊里布熟習邊務鎮撫得宜下部議敘十八年二月 命以雲貴總督協辦大學士十月四川綦江縣民穆繼賢與貴州仁懷縣武生趙應彩涉訟繼賢挾讎擅殺應彩糾奸民謝法真等乘勢恣搶仁懷縣知縣王鼎彝綦江縣知縣毛輝鳳往捕外委章泗明倉卒遇害賊沿途裹脅貴州提督余步雲布政使慶祿貴西道周廷綬先後帶兵會剿賊屯方家溝負險抗拒十二月伊里布率兵抵方家溝會四川重慶鎮總兵張作功亦來協剿賊牆柵堅固於牆隙暗放槍礮兵進輒傷伊里布與余步雲慶祿合圍蹙之槍斃紅衣賊目一人斬僞元帥趙應松進逼賊巢拋棄柴草火彈燒斃無算賊

匪六七十人由水溝潛遁我兵分投追捕擒賊目穆繼賢謝法眞  
等燬其巢餘匪殄滅捷奏 上以伊里布辦理迅速 賞戴雙眼  
花翎十九年調兩江總督二十年正月京察屆期 上以伊里布  
久任雲南邊防靜謐下部議敘七月浙江巡撫烏爾恭額奏英夷  
船隻駛至浙江定海洋面滋事定海鎮總兵張朝發撤守失城  
命伊里布爲欽差大臣馳往浙江查實具奏尋奏查明張朝發因  
夷人投遞書辭言語甚悖欲卽攻勦署遊擊羅建功等以兵勢單  
弱眾寡懸殊請俟夷人登岸再行勦擊張朝發以夷情猖獗不宜  
退避令卽進兵夷船亦卽開礮以致我兵傷斃無數張朝發被礮  
轟傷左股墮水撈救入城夷人攻破東門定海失守張朝發愾諫

喪師咎無可道業已身故應無庸議九月奏堵剿夷船情形 諭  
曰前因英夷在天津海口起旋南旋已派琦善馳赴廣東查辦會  
飛示伊里布一體遵照此次伊里布因英夷登岸督率兵勇將其  
船隻擊沈礮位搶獲並生擒夷匪多名自係在未接廷寄之先見  
在該大臣已奉廷寄自必相機妥辦該夷所投回文欲將擒獲夷  
人釋放於交地退兵之事並未覆及該大臣惟當剴切曉諭告以  
爾等之來原爲訴冤乞恩起見前在定海係因言語不通以致互  
相攻擊此次擒獲多人亦因該夷直逼口岸先放槍礮是以力加  
防禦見仍仰體大皇帝中外一家之意將所獲夷人優加餼養爾  
等果能退兵交還定海將歷次所獲男婦剋日釋回天朝誠信待

人斷無加以欺誑之理該大臣如此曉諭一面派人偵探如甲該夷確係退兵交地始可將擒獲之人全數交還其前次擒獲收管黑白夷人亦著無庸解赴廣東統俟交地時一併辦理十一月奏定海居民內渡者八千餘名請籌款撫卹 從之二十一年正月命伊里布剋日進兵收復定海二月英夷起旋赴粵伊里布聞其將繳還定海咨會浙江巡撫劉韻珂入奏遂未進剿 諭曰前因逆夷占據定海特命伊里布爲欽差大臣降旨令迅速進兵不必俟廣東咨會卽行攻剿乃伊里布不遵諭旨惟知順從琦善屢次奏報始以兵礮未集藉詞緩攻繼以接得繳還定海之札卽信以爲實已有旨令折回本任命裕謙馳赴浙江作爲欽差大臣會

同提督余步雲迅速勦辦本日據裕謙馳奏逆夷未受懲創仍行  
前進一摺所奏均是朕竚望該大臣迅奏膚功懋膺上賞斷不可  
因該夷見有繳還定海之說稍事遲迴又墮逆夷詭計而蹈琦善  
伊里布辜恩誤事之故轍伊里布身膺特簡疊次催令進兵並不  
遵旨勦辦株守數月觀望遷延甚屬長憊不堪著交部嚴加議處  
尋議革職 諭曰因英夷在天津投遞夷書聲稱訴冤朕惟仁育  
義正無間華夷特命琦善赴粵查辦並諭知伊里布暫緩進兵旋  
因該夷日肆猖獗疊次降旨令伊里布迅速進兵收復定海乃伊  
里布屢次奏報總以兵礮未集爲辭直至探明該夷願繳定海確  
信始行遣將帶兵前往本日據奏定海業已收復夷船全數起旋

匪草之屬矣有示形  
等語逆夷占據定海已更數月見因粵省命將出師聲罪致討方  
行繳還定海全數起旋出洋可見逆夷並無能爲設使伊里布奉  
到諭旨熟審順逆主客之勢密籌勦防攻取之宜一鼓作氣四面  
兜擒復我故土殲除醜類庶足以伸天討而快人心乃伊里布觀  
望遲延株守數月直至該夷聞有大兵望風遠竄遂將定海收回  
可謂庸懦無能之至前將該督交部嚴議部議照溺職例革職實  
屬咎有應得姑念一時簡用乏人伊里布著革去協辦大學士拔  
去雙眼花翎暫畱兩江總督之任仍戴革職畱任處分八年無過  
方准開復以觀後效閏二月 命來京候旨 上派王大臣會同  
刑部傳訊六月訊出伊里布令家人張禧暫戴六品頂帶與外委

陳志剛渡海賞給夷人牛羊該夷回送洋呢權宜收受奏奉 嚴  
飭直至收復定海始遵 旨發還尋定擬罪名入奏 命革職遣  
戍軍臺二十二年二月改發浙江軍前效力旋 賞給七品銜交  
耆英帶往浙江差遣五月賞給四品頂帶署乍浦副都統 九月  
上以伊里布爲欽差大臣授廣州將軍先是夷船犯臺灣經總  
兵達洪阿督兵擊沈船隻俘獲夷人一百數十名奪獲槍礮旗幟  
無算已正法者一百三十九名見收禁者十一人十二月伊里布  
接夷酋照會稱遭風難夷被達洪阿俘獲殺戮多名積憤爭辯奏  
請將總兵達洪阿撤回得 旨朕辦理此事自有權衡二十三年  
正月伊里布抵粵接見夷酋樸鼎查諭以見經 欽派大臣渡臺



臣等查辦旋奏米利堅法郎西因准英夷添設馬頭亦求通商若不允准恐其船隻衣服無甚區別且慮英夷串通前來轉難阻遏反使惠出英夷怨在天朝亦爲失算請一併議定稅則 允之二月卒 諭曰廣州將軍伊里布由科甲出身洊膺疆寄擢任綸扉前因事遣戍經朕棄瑕錄用授爲欽差大臣廣州將軍令赴粵辦理善後事宜正資倚畀遽聞溘逝殊堪軫惜著加恩追贈太子太保銜照將軍例賜卹任內一切處分悉予開復應得卹典著該衙門察例具奏其靈柩回京時准入城治喪以示朕篤念蓋臣至意尋賜祭葬如例 子諡文敏子桂烱候補教授桂榮刑部筆帖式

右 國史館本傳

李鴻賓

李鴻賓江西德化人嘉慶六年進士改庶吉士七年散館授檢討九年充雲南鄉試副考官十二年充貴州鄉試副考官十三年充湖南鄉試正考官十四年二月授山東道監察御史稽察南新倉五月疏言江西有漕各縣開兌時買湊低潮米石每石給旗丁銀三五錢名曰倉廩使費運弁等亦暗收規禮頭伍丁復先期赴通賄商坐糧廳經胥人等回漕折價種種彌縫又在水次時運弁演戲備席斂取旗丁分金頭伍丁又勒派各船出銀若干名曰各衙門使費疲丁遭此剋扣運費愈覺不敷請 敕有漕各督撫釐剔弊端八月奏河南汝甯府屬匪徒結黨肆擾俗謂之紅鬍子

請 敕河南巡撫密派明幹大員設法堵捕湖北督撫飭所屬附近豫省之州縣一體嚴緝 上如其請九月轉掌廣西道監察御史十五年巡視西城以獲東安門內命案兇犯得 旨嘉獎並下部議敘十六年遷吏科給事中十七年三月奏山東大計本甫題該巡撫忽又將濱樂分司運同王訥奏請休致所遺之缺扣留題補臣思王訥既年老衰庸何不於大計題本內參劾恐不肖之員知此缺係屬部選輾轉鑽營巧爲扣缺地步請交吏部詳議 上是之十月轉掌工科給事中巡視中城十八年九月巡視東漕十二月奏言山東省泉池泉渠歸縣丞主簿疏導泉河歸各州縣辦理請嚴定勤惰功課章程 上命河道總督山東巡撫飭屬如所

議行十九年二月奏濟運全賴泉源見飭泗水等縣挑出新泉數處恐各州縣以添泉多費設法阻撓請嗣後疏出新泉該州縣將泉名勒石申報各上司彙冊咨部如有湮廢確查扣除其新泉隱匿不報者奏明參處 從之時直隸山東河南三省毗連地方頻年遭兵鴻寶疏陳善後四條一賑恤窮民宜令普霑實惠一查禁地畚以免潛匿匪徒一嚴禁私渡以防逃匪而濟災黎一做行倉哨以省繁費而示兵威皆奉 旨允行閏二月 命偕河東河道總督吳璈山東巡撫同興訪查已革河督李亨特劣蹟得實以聞五月 賞三品頂帶授東河副總河 命督率道將廳營催趨漕船收蓄湖水六月奏連日得雨開河水長新挑南沙引渠並能

收水入湖 諭曰李鴻賓正當趁此大雨時行之際將陂水泉水  
歸湖之路隨地疏濬務期湖水日有增益足濟來年重運八月偕  
河道總督吳璫奏言微山湖久涸瀦蓄非易而來春開壩時用水  
甚多乘此重運已過回空朱臨宜將河水攔蓄擬於朱姬閘南築  
壩並將湖隄開一缺口俾河水入湖 上如其請九月奏微山等  
湖均已瀦蓄充盈 上嘉之 賞換二品頂帶十月 命赴睢工  
會同吳璫辦理堵築事宜十一月奏山東各州縣報出新泉共九  
十八處覆加履勘可以經久者僅泗水等州縣十八處 上命再  
委委員詳加履勘凡可疏濬者設法利導十二月巡漕給事中卓  
秉恬奏河南汝甯府通判竹騰霄稟許藩司諸以謙剋扣賑恤河

工銀兩及前任糧道時收受漕規等款 上命鴻賓赴開封會同  
按察使琦善確訊尋訊明騰霄誣告坐罪如律以謙失察家人唐  
忠私侵銀項違例捐納縣丞又爲其子捐監應考請交部嚴議二  
十年正月擢河東河道總督三月奏蘭陽汛十一堡河勢南北頂  
衝塌成圍灣急需鑲埽築壩報 聞四月以湖漕充足下部議敘  
是月丁母憂 賜祭一次並 賞銀三百兩二十二年九月服闋  
署禮部右侍郎十月 命往河南訊民人孫逢午京控之案事竣  
讞獄山東並查勘黃運河湖水情形二十三年三月調署兵部左  
侍郎四月授廣東巡撫十二月偕兩廣總督阮元奏言廣州佛山  
同知近海非新選人員所能勝任應請在外調補瓊州府同知駐

崖州向定爲煙瘴要缺在外調補應請改簡下部議行二十四年  
閏四月偕阮元奏請添設巡檢一員駐豐順縣畱隍地方裁潮州  
府稅庫大使又請將饒平縣黃岡司巡檢移駐柘林大埔縣大產  
司巡檢移駐白猴五月奏粵東額徵米石實欠在民由州縣墊解  
者計米折銀共四十八萬九千六百有奇恭奉 恩旨普免二十  
二年以前積欠錢糧而節年墊解之數不能再徵於民反成無著  
之款請分限六年卽在各州縣任內分數按交均下所司議行旋  
授漕運總督八月復授河東河道總督時河溢蘭陽儀封 上命  
鴻賓偕尙書吳璥馳往籌辦尋 命鴻賓專駐儀封堵築會北岸  
馬營壩復決奉 旨北岸漫口地居上游尤關緊要著吳璥李鴻

賓上緊搶堵並 命將蘭儀料物運儲北岸刻期興工尋會奏馬  
營壩一帶土質沙鬆因河溜尙勁未能遽定壩基 上以鴻賓等  
株守坐待飭之十月自以不勝河督重任奏請辭職 諭曰李鴻  
賓由京員出身於河務本不諳習但於簡放時卽當據實陳明茲  
已視事兩月忽奏請辭職顯係因吳璈等辦工遲緩恐將來一同  
獲咎豫爲諉謝地步伊旣不諳河工卽簡任河督亦屬無益著革  
去河東河道總督給予郎中職銜畱於河南專司大工錢糧二十  
五年正月管理山東運河事務二月兼署山東巡撫 命專駐張  
秋辦理釘樁搭橋及堵築各事宜旋奏言本年重運經臨張秋仍  
應由正河行走惟東岸有三處決口均係黃水穿運必須於西岸



同治三年八月  
搭橋墊路以通緯挽至西坡乃去年回空舊路重運難行若水長  
數尺仍可由江家莊口門出運入坡至磨盤壩口門由坡入運此  
籌備張秋趲運之法也臨清開口向須蓄汶敵衛本年黃水分流  
入衛汶水不敵已飭臨清以上各閘嚴閉石板擡蓄清水如遇攔  
口一面啟放清水衝刷一面集夫撈挖並豫備畚鍤器具以供臨  
時之用此籌備臨清趲運之法也此外蜀山馬躡二湖收汶水太  
多已於戴村壩以上築攔汶壩俾汶水洩入鹽河泗水之魯橋壩  
見已加築引水歸蜀山湖俟運河水消再令啟放徽山湖潛水充  
盈見令暢放鋪水報 聞十二月授安徽巡撫道光元年正月  
諭曰安省倉庫錢糧聞虧空甚多該撫當督同藩司張師誠逐案

詳查該州縣如實有侵蝕入己必當據實參辦其實係因公那墊者應如何設法調劑該撫秉公確覈酌定期限不得以一奏塞責四月奏言安徽省虧空自嘉慶五年至十九年清查五次必先詳查舊案方得實在虧數自十九年以後續虧諒復不少應按年確查凡十九年以前未清之款俱在以後交代之中以交代所欠之款覈清查開報之數則從前有無隱匿朗若列眉如十九年以後未經交代之處恐仍隱匿應將經徵錢糧之紅簿串票及解銀之批回庫收等項逐年另覈惟持之過急轉恐疎率請稍寬時日俾局員得盡心察覈從之五月奏參試用知州李濤沈慶蘭試用通判黃樹荃均有玷官箴請勒令休致得旨所辦甚好又奏鳳

同治十一年六月十一日  
三  
頴一帶緝捕事繁員弁路費賞需無款可籌請在藩庫動給  
上  
允之六月復授漕運總督二年閏三月御史董國華奏江安各幫  
有尖丁名目常德廣馬回子數人皆著名刁橫累丁病漕 上命  
鴻寶密訪按名懲革並嚴減丁船費用四月奏言江淮四幫內有  
莫德光並無劣蹟安慶後幫有散丁控告頭船馬錦福亦謂之馬  
回子所控係鑽充頭船事與董國華所奏不符均須訪查明確再  
行革究至丁船費用每開必雇夫拉挽夫頭盤踞又與不肖委員  
勾通漁利深爲漕害臣已將著名刁橫夫頭盡行革退並查看水  
勢某開用夫若干需費若干刊刻木榜以免浮冒一切陋規早經  
嚴禁得 旨所辦甚好恐日久玩生該漕督總當身先倡率隨時

認真九月授湖廣總督三年六月偕湖北巡撫楊懋恬奏言遵  
旨查勘枝江縣羊角洲於縣營有大江之隔聲息難通應移駐千  
總一員添撥兵丁巡緝下部議行十月會同湖南巡撫嵩孚奏保  
靖營兵糧向係折色近來糧價日昂不敷買食請改放米石 允  
之四年三月奏鄖陽府白河口前經川陝楚三省督撫奏准設撫  
民同知應請改爲捕盜同知原議設訓導各官應行裁汰下部議  
行四月奏湖南巴陵縣君山居洞庭湖之中應責成岳州府知府  
暨岳州營參將按月親巡並飭同知守備隨時前往偵緝前督臣  
陳若霖等奏准設官移汛諸多窒礙應請停止 上允之七月奏  
言鄖宜施襄四府距省較遠押送人犯防範難周請嗣後尋常遣

軍流徒各犯並秋審人犯均歸巡道審勘 上如其請先是湖廣行銷淮鹽行封輪之法大商壟斷而小商每致向隅經前督臣陳若霖奏請開輪九月鴻賓奏開輪銷售以來又有跌價搶售之弊見議設立公局僉派妥商經理無論鹽船到岸先後將小商之鹽隨到隨賣大商之鹽按各家所到引數公同合計均勻派銷俟試行兩月再將議定章程具奏報 聞五年正月奏定長江漢江嚴巡章程二月奏漢岸自設立公局以來遠近水販均知鹽無私賣價無私跌源源販運踊躍如前商無虧本之虞民無增價之累試行兩月有餘銷數較旺請永遠增行 允之六月左都御史英和奏請酌折額漕以資治河 諭鴻賓等議奏七月奏言徵收折色

弊竇叢生莫若令民間完交本色由州縣賣米易銀轉解河工  
諭曰徵收折色既於民情不便本年湖北漕糧著仍循舊章由州  
縣賣米易銀恐啟州縣抑勒商民承買書吏捏報市價加收本色  
諸弊如明歲清水足資敵黃仍飭糧船照常由河運抵通儻或阻  
滯卽設法存儲待至下年搭運又奏遵 旨訪查湖北糧船水手  
御史王世紱所奏立教斂錢等弊並無其事惟水手良莠不齊未  
雇之先應由旗丁詳慎選募既雇之後應由運弁取結確查船在  
水次以前賣成該縣營彈壓兒米開行以後所過州縣悉按管轄  
地面照在水次時分別獎罰庶考察均歸嚴密得 旨如所議行  
八月會奏湖北漢陽縣新淤之地係白泥沙灘歷年被川江襄河

泛漲屢次淹沒請免升科十月奏請挑濬澤口等支河並擬於監  
利縣建閘兩處俾積水由閘達江均得 旨俞允六年正月會奏  
湖北石首縣文義洲新淤熟地水淹沙壓不能布種請酌減租銀  
並蠲免積欠下部議行五月調兩廣總督十一月因新疆逆回滋  
事估巡撫成格奏請於藩庫支銀三十萬兩解赴甘肅分十年在  
膏撫司道知府資廉內勻扣還款 上以其有夫政體 諭不准  
行七年七月會同成格奏言粵東外海內可奸匪叢集數十人共  
乘一船名曰快蟹其行如飛官船每不能及臣等於上年會議做  
照快蟹式樣製造七隻通派弁兵巡緝已陸續獲快蟹船六隻黃  
浦虎門一帶頗覺肅清 上嘉之八年會同廣西巡撫奏請將容

縣大岡巡檢移駐該縣自良墟下部議行九年御史張曾奏風聞  
廣東行使夷錢 上命鴻賓查禁二月奏粵東海濱各屬向與外  
夷通市光中景盛等夷錢攙雜行使當曉諭鋪戶居民於每月朔  
望赴州縣彙繳照收繳小錢例每斤給制錢六十文勒限半年全  
繳逾限卽照例治罪並嚴諭洋行不准夷船夾帶得 旨嚴飭所  
屬認真查辦十二月英吉利國夷商呈控洋行欠銀夷船延不進  
口鴻賓等提商追欠將所稟各款飭司妥議並以夷情叵測咨水  
師提督李增階密爲之防具疏以 聞 諭曰所辦甚是此事有  
關國體該督等務當詞嚴義正折其桀驁之氣杜其貪詐之謀不  
可稍涉遷就致失大體十年六月奏虎門海口鎮遠礮臺迤東有



沙角山橫檔礮臺迤南有大角山爲夷船入口要路而大角山向無礮臺應請添建得旨允行時銀價日昂上聞番舶專載洋錢收買紋銀又鴉片流行內地耗財傷人命鴻賓等妥議旋疏陳六條一洋商與夷人交易以貨抵貨如有尾數只准給付番銀鋪戶居民私賣紋銀與夷人者加等治罪一責成巡洋舟師分段查察洋船初到時嚴查匪艇運銷鴉片回帆時嚴查匪艇運送紋銀一關口委員書役及守口弁兵如有賄縱情弊或失於查察分別治罪議處一責成洋商通事買辦隨時查察如夷商夾帶鴉片偷買紋銀立即呈明一奸民偷運鴉片售賣各衙門書差兵役受賄包庇與販賣一律治罪一鴉片運赴各省責成沿途各關卡搜

查其冒充巡丁強搶入己者照例治罪如所議行九月奏請分大  
鵬營爲左右二營至前山營本屬陸路而與香山協界址相連請  
改爲內河水師下部議行是月授協辦大學士仍留總督任十一  
年正月京察 諭曰李鴻賓歷任封疆實心任事著交部議敘三  
月崖州黎匪滋事總兵孫得發等進剿斃匪數百人我兵聞亦被  
傷千總周明清中箭陣亡鴻賓馳抵雷州督辦提督劉榮慶馳往  
崖州會捕尋獲首犯張紅鬚並射斃千總之兇匪高老亮及爲從  
各犯懲治如律六月會奏查禁栽種罌粟章程略言粵東惟潮州  
府屬閒有種罌粟花者已飭令剷拔嗣後如有種罌粟花者責令  
保甲人等首報將地入官照販賣鴉片煙治罪如地保隱匿分別

懲治並飭各州縣隨時察訪按季具報該管道府卽飭員覆查年終具結詳報時給事中劉光三奏廣東匪徒有三點會等名目有旨命鴻賓查訪鴻賓奏言廣東並無三點會名目惟結拜弟兄糾眾搶劫及打單棍徒向耕戶勒索錢文根株猶未盡絕已飭屬隨時訪拏被誘者將首犯控告准照自首律免罪其被脅者自行投首或父兄代首免罪惟廣州一帶人稠地狹所有廣州潮州肇慶嘉應等府州屬山場荒地請令無業游民報官墾植成熟後永不升科庶粒食有資不至流於匪僻均 允之八月入 覲 諭 曰李鴻賓來京陛見適值萬壽慶辰念其宣力封疆有年著加恩賞戴花翎尋回任十二年二月奏鴉片煙來自外洋必應遏其來

路請嗣後夷人來粵令洋商開導毋許夾帶煙土儻經查出不准  
開船賣貨並令貨船外不得令帶船隻以杜私入之源仍於省河  
禁止查私快艇潮瓊各屬商船毋得攬近零丁洋面庶免偷販情  
弊 上如其請會湖南搖匪趙金隴滋事 上以兩廣與湖南接  
壤恐搖匪乘閒竄入 諭鴻寶嚴密防堵又 命派委兵弁在連  
州交界堵緝三月奏連山廳黃瓜衝及余高汎等處均有搖人搶  
劫見飭總兵得志等率兵七百進剿尋奏黃瓜衝等處搖匪經官  
兵剿捕均畏懼解散八排搖人俱屬安靜 上以連山各搖仍恐  
被楚搖誘脅 命鴻寶嚴防各隘口是月奏獲會匪胡亞豹等六  
十八人又請將崖州營參將改副將海口協副將改參將下部議

行四月奏獲李學問等訊係趙金隴遣赴廣東交界偵守隘官兵  
多寡欲圖竄入見已增兵防守 上命實力爲之五月欽差大臣  
戶部尙書禧恩盛京將軍瑚松額平湖南逆獠斃首逆趙金隴  
諭曰粵省逆匪實與趙金隴聲勢相倚撫則不散剿則兵單今聞  
趙逆殲斃自應膽落亟應懲辦以淨根株尋奏言東路獠匪掠倒  
流汎竹子坪等處副將王登科督兵擊卻之餘匪竄入山崗而西  
路黃瓜衝等處賊匪復熾見調連州兵六千進剿 諭曰該督見  
在行抵連州卽激厲將弁一鼓作氣聚而殲旃朕計日以待六月  
奏三路進兵殲斃獠匪五六百人而中路都司王珍東路遊擊謝  
國榮西路遊擊史鵠均因傷致斃弁兵傷亡者數十人請俟湖南

徭匪辦竣後再行進剿 諭曰覽奏實深憤懣該省調集官兵已  
六千名兵力不爲不厚豈有觀望鄰省賊匪撲滅再行進剿之理  
李鴻賓雖不知兵何至束手無措一至於此見已降旨令余步雲  
署理廣東提督該督等俟到粵後卽會同迅速剿辦稍贖前愆嗣  
又 諭曰前因逆徭趙金隴滋擾當湖南進剿之時卽降旨交李  
鴻賓妥辦如果先事豫防一切調度自必得宜何至任其蔓延用  
兵之道貴在神速該督聞信乃因循姑待至四月間奏請前往五  
月始抵連州且據奏稱俟湖南徭匪辦竣後再行籌辦尤屬意存  
觀望又據奏稱劉榮慶年將七十兩耳重聽此等衰庸之員早應  
參劾何以久事姑容李鴻賓種種錯謬著交部嚴加議處部議革

職 命拔去花翎改爲革職畱任旋以鴻賓辦理失宜 命禧恩  
瑚松額赴粵勦辦七月鴻賓奏擒捕搖匪屢有殲獲分兵守隘俟  
楚兵到濟後安籌勦捕並請用堅壁清野之法 上以堅壁清野  
未免曠日持久 命禧恩等俟湖南兵到粵後迅擊之禧恩瑚松  
額之赴粵也有 旨令將鴻賓辦理情形並奏報虛實查明具奏  
八月奏入 諭曰據禧恩等奏李鴻賓於五月間始抵連州定計  
分路進剿山深箐密偵探未確卽行進兵墮賊設伏奸計將弁兵  
勇多有傷亡辦理已屬失宜兩月以來雖聞有斬獲亦僅一二擒  
掠匪徒並未搗穴攻剿槍架斬馘且意主招安搖匪正在鴟張非  
大加懲創安能帖然就撫實屬懦弱無能節次所奏軍情與禧恩

等所查情形亦有未符是其含混入奏誤事之罪咎無可辭又據禧恩等奏該省調至軍營戰兵六千餘名不慣走山沿海各營兵丁多有吸食鴉片煙者該省營伍皆屬總督統轄如果平素整頓操防何至臨陣恆懼平日廢弛臨事畏葸種種乖方李鴻賓著革職來京交部治罪十一月經大學士軍機大臣長齡等會同刑部審訊奏請從重治罪諭曰李鴻賓辦理連州徭匪節次所奏軍情訊無含混情形而辦理不善耽延月日罪實難逭難隨同禧恩等辦理徭匪完竣僅罰軍需三成銀兩尙不足以示懲著從重發往烏魯木齊效力贖罪十四年二月釋回七月抵京 賞編修旋告假回籍二十六年卒子儒郊前任甘肅甘州府知府儒鄭庚子



科舉人捐納員外郎

右 國史館本傳

李御史鴻賓江西人成辛酉進士館選改官御史時值林清之變  
公上數疏皆言 朝廷利弊洞中窾要 上嘉其直言立擢河東  
副總河漢員升遷之速未有及者公亦感激用命其年運河淤壅  
微山湖蓄水盡涸糧艘壅滯公立率下屬疏淪上流湖水通暢船  
隻得以濟運實近年之罕見者逾年丁母艱歸

右錄宗室昭榭撰

覺羅寶興

覺羅寶興，黃旗人。嘉慶十年進士，改翰林院庶吉士。十三年四月，散館授編修。七月，升右春坊右贊善。十二月，擢翰林院侍講。十四年五月，轉侍讀。十一月，充日講起居注官。十五年，充順天鄉試同考官。十七年二月，大考三等，降左贊善。尋升侍講，轉侍讀。三月，命在批本處行走。四月，升侍講學士。十八年正月，入直上書房。二月，轉侍讀學士，遷詹事府少詹事。九月，巡幸木蘭回，蹕至白淵。途次時，逆匪林清潛令夥黨突入禁城。宣宗成皇帝方在上書房讀書，寶興散直將出東華門，見賊勢鴟張，官兵攔截，卽入乾清門告警。賊眾因得卽時殲獲焉。是月，擢內閣學士兼禮部侍

臣等謹將  
奏  
三

郎銜十月 命校勘清字 聖訓授正黃旗漢軍副都統十九年

三月充會試副考官四月授禮部右侍郎六月充經筵講官八月

署正白旗護軍統領十月轉禮部左侍郎二十年五月充左翼監

督八月調正黃旗滿洲副都統二十一年 諭曰寶興學問平常

著降補大理寺卿不必在上書房行走二十三年禮部頒發科場

條例恭載 廟號刊刻錯誤 上以寶興任禮部較久其咎較重

下部嚴議降二級調用尋 賞給三等侍衛充吐魯番領隊大臣

道光二年授大理寺少卿三年因吐魯番圍城與牙本什開墾地

畝所取租銀歷任領隊大臣並未奏明奉行支用下部議處鑄一

級以王品京堂候補四年正月補通政司參議四月擢都察院左

副都御史閏四月授兵部右侍郎八月授鑲紅旗漢軍副都統十月管理咸安宮官學事務五年二月復充左翼監督四月轉兵部左侍郎六月充順天鄉試監臨官九月授泰甯鎮總兵兼管內務府大臣尋授領侍衛內大臣六年五月調馬蘭鎮總兵兼管內務府大臣七年四月奏石門工部關防請照各衙門例不得擅自出境遇有應行事件由該管大臣畫稿用承辦衙門關防以符體制挑補石門工部匠役照各衙門差役例造冊報明承辦衙門備查以杜弊混至茶膳拜唐阿缺出向來官員子弟俱不許挑未免偏枯請以十八缺爲一輪差役人挑補十二缺效力班挑補四缺官員子弟挑補二缺其茶膳副委副管領等缺祇係金頂虛銜請照

茶膳拜唐阿之例專摺奏請毋庸咨送引 見 上是之九月以  
萬年吉地工程完竣襄辦出力 賞戴花翎并下部議敘八年  
三月奏參朱華山千總王靖祥收藏木料四百餘件訊有偷斫情  
弊請革職究辦並自請議處得 旨寶興於此案訪查得實辦理  
尙屬認真著加恩寬免五月奏本處八旗總管缺出限於成格俱  
無升轉之途請嗣後遇有總管缺出於翼長內揀選一員與京旗  
應升人員一并帶領引 見俾翼長以下各員咸知奮勉 允之  
八月授總管內務府大臣正紅旗滿洲副都統九月奏例載偷斫  
人濫各條係指盛京產濫官山而言至 陵山界內偷濫作何治  
罪例無明文請照偷斫樹株之例分別紅椿內外濫斤多寡明定

罪名俾賊匪知所畏懼下部議行十一月授理藩院右侍郎旋調兵部左侍郎稽查左翼宗學十二月復充左翼監督九年九月調戶部右侍郎兼管錢法堂事務十年閏四月授鑲白旗蒙古都統五月署鑲黃旗漢軍都統九月署都察院左都御史正藍旗滿洲都統十月以失察戶部捐納房書吏私造假照鑄一級畱任時長蘆商人赴京呈稱運資短絀懇請調劑 敕偕戶部尙書王鼎前往查辦旋奏言蘆商疲乏總以錢椿賠折爲詞查道光八年清查案內業經豁免舊欠又將堰工加價一半彌補商欠並於舊定斤數外每包酌加鹽斤免其交課體恤已極周至未便徇其無厭之請致於帑課有虧所有懇請調劑之處應無庸議會兩江總督陶

樹疏陳淮鹽積弊情形廷臣有課歸場竈之議復命寶興等前往會同籌辦十二月會奏准綱全局力求課歸場竈之法大要有三而皆有窒礙之處一由竈丁起科竈丁皆瀕海貧民先納課而後賣鹽力有未逮若令先賣鹽而後納課設遇歉產之日勢必課宕丁逃此一難也一由垣商納課竈鹽歸其經理惟竈戶以己業而聽命於商人情必不願竈不樂以鹽歸商商亦必無資完課此二難也一由場官收稅每場應徵銀數十萬兩鹽場微員豈能任此鉅帑況試行之初額難豫定若聽其儘收儘解難保不匿報侵欺此三難也至於就近抽稅兩淮場地延袤八百里非若滇省之一井一官卽能查察未易做照辦理惟有卽舊章大加釐剔使射

利者無可借端欠課者無可藉口似較課歸場竈確有舊轍可循  
謹擬章程十五條一裁減浮費一議減窩價一刪減浮文一慎重  
出納一裁選商總一酌覈帶銷一積欠宜緩一竈丁宜卹一實給  
船價一嚴究淹銷一疏濬運道一添置岸店一亟散輪規一整飭  
紀綱一淮北額引銷不及半容另設法辦理目下應先收買竈鹽  
暫濟口食俟來秋查照滯銷各岸委員領運售鹽繳價以還原本  
又奏鹽政無管轄地方之責疏銷巡緝難期禁止令行請裁撤兩  
淮鹽政一缺改歸兩江總督辦理均 允其議尋 命吏部右侍  
郎白鎔偕同寶興前往河南抽查料垛奏查各廳料垛尙無虛鬆  
情弊惟統計到工不過十分之六與新定章程勒限年前全數到



工之語不符揚糧廳埽段緯道等工率將尙未驗收之料動用五十三垛揚河廳舊料九垛色黑質朽均應照數賠補並請嗣後歲料應遵奏定章程於秋後一律購辦年前全數到工河臣張井坐失察下部嚴議十一年三月調吏部左侍郎五月山東巡撫訥爾經額奏卸任知縣王枚覈算交代情急自戕請將前任蘭山縣張希哲革職究辦 命偕刑部右侍郎戴宗沅往按之讞定張希哲坐有心蒙混致釀人命遣戍如律七月充崇文門副監督八月充順天鄉試副考官調鑲白旗漢軍都統授右翼總兵九月授吉林將軍十二月奏三省地方被災歉收請將新收舊欠分別展緩又奏吉林各項差務向無辦公等款請於稅銀淺餘項下發商生息

銀六千兩以一半備賞移駐京旗一半津貼吉林官兵差務均得  
旨俞允十二年正月遵查籌議吉林所屬閒山打捕牲畜地界  
章程疏言吉林打捕進貢牲畜圍場並松花江西岸輝發河北岸  
一帶向係封禁毋庸另議其餘閒曠山場均設有卡倫仍循舊例  
攜槍出卡打捕牲畜者不必查禁如有攜帶民人不領照票偷窆  
人浸私斫木植者查拏治罪 從之九月奏新城局屯田地畝連  
年鑿井無水不能開墾佃戶無力賠累將此項荒田二萬餘畝暫  
作禁荒責成伯都訥副都統出示招募有無認墾之民年終彙咨  
報 聞十三年四月調盛京將軍七月奏伯都訥界珠爾山一帶  
荒地先後開墾五千二百六十二晌此項租錢請自道光十五年

國朝書局叢刊  
卷一百一十一  
三

爲始以一半每年分賞兵丁一半存備該城報修工程免銷正款  
此外尙有可墾荒地五萬六千餘晌作爲官荒將來吉林如有籌  
款之處奏請招佃徵租又奏烏拉涼水泉地界開墾七萬三千九  
百餘晌請自二道河以東撥出二萬晌以七成賞給烏拉總管衙  
門三成賞給協領衙門招佃收租以資津貼其餘五萬三千餘晌  
亦作官荒將來吉林如需撥用再行奏明辦理均下部議行十二  
月山海關協領六十一等呈控副都統孟魁信用防禦德慶謀缺  
陷害各款 命偕理藩院右侍郎賽尙阿馳往查辦尋奏孟魁並  
無違例保送及挑甲受託情弊惟所參協領管轄廢弛而軍政考  
語又註管轄整肅前後自相矛盾請下部嚴議六十一等論誣遣

戊十四年 賜紫禁城騎馬十五年正月調成都將軍七月御史  
黃爵滋奏參四川布政使李義文挾制總督鄂山文武遷調高下  
其手順慶府知府金齊賢阿官聲狼籍 命理藩院左侍郎隆文  
馳往會同寶興查辦尋查明各款均無實證金齊賢阿年力就衰  
請勒令休致 從之十六年九月復調盛京將軍十月兼署四川  
總督以馬蘭鎮總兵任內失察所屬營兵王蚊長習教降三級  
任十一月請以鳳凰城內木植變價銀兩發商生息分給八旗閒  
散學習鳥槍以資操演并籌議挑補馬甲章程均如所請行時直  
省常平倉穀因公動闕 上命各督撫籌辦歸補寶興請暫撥鹽  
茶耗羨銀兩買穀還倉以資儲備並請分作兩次先行買補一半

庶於民食無妨俟續有款項籌買足額 上韙其議十七年三月  
廣州將軍蘇勒芳阿奏官兵攤墊庫項副都統孟魁奏協領海明  
等虧短庫銀蘇勒芳阿剋扣兵餉各執一詞 命寶興馳往廣東  
會同兩廣總督鄧廷楨查辦六月奏海明等虧短庫銀屬實請革  
追蘇勒芳阿以虧數無多令協領扣餉彌補辦理實屬不善請將  
攤扣之項責令罰賠按名散還仍交部議處十二月奏奉天省餘  
息制錢停止發商生息初盛京將軍奕經因奉省兵丁騎射向無  
官設馬匹請借庫存制錢三十萬貫發商一分生息每年息錢三  
萬六千貫以二萬四千貫備給內城兵丁一年馬乾其餘息一萬  
二千貫仍作本發商生息每年又得息錢一千四百餘貫買馬四

十匹分撥外城兵丁演習騎射嗣據各商呈稱力有不逮寶興請  
以此項餘息停止發商俟歸足三十萬貫原款再行奏明辦理以  
重庫款而恤商力 允之十八年三月奏獲紅陽教犯陳喜等請  
飭部會審得 旨查緝甚屬可嘉閏四月授四川總督御史賈臻  
奏川省前次辦理夷務未協請將保奏人員覈實甄別 上命寶  
興查辦十九年二月奏查明成都府知府謝興曉提標參將馬彥  
彪等均屬冒濫應摘去花翎候補知府吳延慶於所屬夷人滋事  
本有失察處分應銷去從優議敘時川省馬邊越巂等處夷匪屢  
出爲患節經前任督臣勦辦兵集則逃兵撤復出自上年溜馬槽  
官兵失利夷匪倡厥益甚四月寶興疏言禦邊之策不外勦撫防

卷一百一十四 卒補四十一

三者撫之之道在施於平時斷無失利之後轉而就撫之理比來勞師糜餉迄無成功爲今之計惟以修邊防爲急務謹陳防邊長策五條一添兵數以周防禦請於馬邊添兵一千二百名雷波普安安阜越巂甯越等處各添兵八百名峩邊屏山各添兵四百名擬於營務稍簡之處酌抽二千名移撥其餘由各廳縣添募足額一改營制以資控馭請以綏定協副將移駐馬邊廳城以綏定協中軍都司移駐馬邊之三河口作爲馬邊協中軍都司以三河口守備移駐馬邊之油榨坪作爲馬邊協右營守備再以夔州協屬之大昌營守備移駐馬邊廳作爲存城守備越巂大菩薩等處爲夷匪出沒之區擬添設遊擊守備各一員以建昌鎮左營遊擊守

備就近移駐雷波屏山擬各添設守備一員以青雲營守備移駐雷波之三積岡以小河營守備移駐屏山之茨竹坪峩邊廳擬添設都司一員以南坪營都司移駐峩邊之麻柳壩均請定爲三年邊俸題調要缺一築碉堡以嚴保衛擬飭各廳縣因地制宜多修堡寨外空壕溝使附近散處民人遷居堡內責令各集團練每堡官給擡礮烏槍督率教演并於要隘路口築立礮臺添鑄大礮務使官兵鄉勇互爲聲援一定巡查以壯聲威擬每年春夏之交建昌道前往越嶲峩邊永甯道前往馬邊雷波屏山各巡查一次秋冬之交提督建昌鎮總兵分赴巡行務於各邊隘周歷稽察各抽查較演如有兵技不精操防不力懸缺名糧情弊據實指參一優



同身者無差者不制  
三  
獎勵以昭激勸馬邊越嶲二廳同知均係夷疆要缺經前督臣奏請定爲三年邊俸期滿遇有應題應調應選知府缺出分別保題升補嗣奉部議祇准升補應題應調各缺不准以選缺升補查川省知府無題缺惟甯遠系調缺馬邊越嶲二廳同知祇得升甯遠府孤缺是與一無升途者無異不足以示鼓勵請仍准其三年俸滿以題調選三項知府缺出升補 上命軍機大臣偕部臣會議尋議馬邊越嶲二廳請照雲貴六年俸滿夷疆同知改爲久任邊疆之缺三年俸滿以升銜再畱三年准以題調選三項知府升用餘悉照所請行六月奏川省銀價昂貴制錢壅滯請將寶川局每年正鑄十二卯暫停六卯俟錢價起色次第補鑄八月奏馬邊雷

波兩廳之龍門溪細沙溪各銅廠及龍頭山鉛廠每年採辦例抽  
課耗以供本省補鑄自上年馬邊夷匪滋事商民不能復業請暫  
停採辦免其解兌俟邊防事竣招商煎採均 允之十月御史劉  
良昌奏請川省提督倣照湖南提督半年往駐辰州之例於越嶲  
等四廳酌量駐紮 上命寶興會同成都將軍經額布等議奏二  
十年正月奏言馬邊距越嶲甚遠若越嶲亦由提督往駐途次既  
多耽延而每處駐防之期亦爲日甚暫仍恐於事無濟擬於每年  
二三四月及八九月夷匪出沒之時提督親往馬邊越嶲邊雷波  
三廳駐紮建昌鎮亦依期往越嶲甯越駐紮提鎮未往以前仍令  
建昌甯甯兩道各就所轄地方親詣巡查又奏崇化屯所存麥糧

國朝書局影印 卷四十一  
無多不敷支放屯番人等口糧籽種均關緊要請酌撥撫邊屯存糧小麥二千石運赴崇化以資接濟得 旨允行三月督辦越雋廳防邊事宜奏言越雋邊防惟以大路爲重其閒如麥子營利濟站各汛均應添駐弁兵其向設之乾溝等汛應酌量移撤分設馬日槓等處至越雋甯越兩營相距寫遠聲勢未能聯絡前請以建昌左營遊擊守備移駐大菩薩一帶茲查大菩薩僻在甯越之東離大路甚遠而越雋營參將與遊擊又不相統屬請於越雋甯越兩營適中之界牌樓以建昌鎮右營都司移駐作爲保安營都司專管麥子營利濟站兩汛定爲三年邊俸聽越雋參將節制仍歸建昌營管轄 從之五月雷波廳報獲著名兇夷田易處漢奸湯

狗兒等鞠實實之法六月奏督辦馬邊等處防邊事宜完竣先是  
寶興以馬邊各廳縣添設防兵籌議防邊經費疏請按糧津貼統  
計川省可徵銀一百萬兩以三十萬兩爲初設防兵之需其每年  
練勇糧餉等項卽以辦防餘銀發商生息置田收租以供支用  
上以經費甚鉅民力津貼恐不能堪飭再詳悉妥議尋諭戶  
部特撥帑銀一百萬兩解川會侍讀學士王炳瀛奏川省前買義  
田已有一百八十州縣若再以數十萬之帑於各州縣置田收租  
是膏腴盡爲公產請於四廳近邊之地收買民田安置屯防上  
命寶興偕布政使劉韻珂議奏至是邊防工程一律完竣奏報共  
用銀二十二萬有奇以三十七萬兩發交鹽茶各商一分生息每

年息銀三萬七千餘兩足敷新添練勇糧餉火藥之需其賸餘四  
十萬兩置田既有格礙商力亦不能再領請 飭部另行撥用以  
重帑項十月奏言前奉部議馬邊越嶲兩廳照雲貴大關台拱等  
處徵爲久任邊疆之缺三年俸滿以升銜再畱三年准以題調選  
三項知府升補查川省應題應調應選知府共止五缺必須在外  
缺出始准保升其得缺正復不易況馬邊越嶲二廳地處寨邊幅  
員遼闊比年夷匪出擾撫馭維艱以視大關等處番夷久經歸化  
者情形大不相同若俟六年方准升用未免勞逸失均不足以昭  
激勸應請以馬邊越嶲二廳邊俸同知三年期滿邀免再任三年  
卽行撤省准以題調選缺知府升補下部議行二十一年二月授

文淵閣大學士仍留四川總督之任十二月奏參廣元營遊擊梁有才帶兵赴浙於過境應付兵船需索折價請革職以肅營政二十二年三月奏屏山縣舟壩一帶夷匪滋擾萬全營守備達騰昭並未親出堵擊請革職屏山縣知縣陳錕防範疏懈請交部議七月馬邊廳大涼山捏持黑乃等支夷匪出巢圍搶守備王廷剛率兵迎擊馬邊協副將張治自士子門繞出賊後兩路夾攻殲擒甚眾並拏獲漢奸一名審明正法奏入得 旨嘉獎彭縣白石溝紅巖子等處向有大夥匪徒聚眾搶劫掠取人民勒贖爲地方之患竇興檄飭城守營遊擊馬榮耀帶兵密緝旋將張國定等匪九十餘名悉數就擒事 聞 諭以竇興督率有方辦理妥速下部議

國朝書牘類考卷之十一  
叙二十四年八月奏金堂縣匪蔡璜等結夥肆劫置有槍礮號  
旗恣行不法當經官兵奮力撲滅賊首蔡璜由中江逃往蓬溪金  
堂縣知縣王潛金堂汛外委劉元述平日不能整頓署潼川營都  
司湯茂嶺派令巡緝中江一帶不能堵截均請革職 從之二十  
五年四月奏獲青蓮教犯鄭子青等五十四名按治如律五月獲  
教犯李一沅訊係四川陝甘三省行教之首審明定擬得 旨嘉  
慶十月奏成都府彭縣舊例專係歸選簡缺今則五方雜處時有  
匪徒與昔日情形大不相同請改爲繁疲難兼三要缺在外題調  
保甯府南江縣本屬簡缺嗣因該縣界連陝省中隔老林稽察非  
易改爲邊俸題缺至今地方安謐請仍舊作爲簡缺歸部銓選下

部議行二十六年正月奏查辦乍了夷案情形先是乍了地方兩  
呼圖克圖連年構釁以致往來差使阻滯 上命寶興派員開導  
秉公查辦兩呼圖克圖陰狡強悍各執一詞難期折服復請 飭  
駐藏大臣揀派番眾悅服之諾們罕一員前往會審至是疊次勸  
導斷令乍了地方由大呼圖克圖管理二呼圖克圖照舊協同經  
管商卓特巴白瑪溪等分別斥革薄示懲儆繕發斷牌令各遵照  
乃大呼圖克圖則稱二呼圖克圖聽信商卓特巴等慫恿與伊不  
和非驅逐二呼圖克圖重辦白瑪溪斷難輸服二呼圖克圖則稱  
與大呼圖克圖同管地方歷有年所商卓特巴等仍舊安設若將  
伊等驅逐必不遵依各將斷牌繳還查呼圖克圖本係西方黃教



國朝名媛集卷之四十一  
似此頑梗執拗蠻觸相爭斷非口舌所能折服惟於川藏往來差使均各承認照常供支不敢阻滯應請擬結不必再行提審以免煩擾十二月入 覲 命留京管理刑部充上書房總師傅翰林院掌院學士充日講起居注官尋 命充經筵講官署正紅旗漢軍都統二十七年四月充殿試讀卷官九月充武英殿總裁二十八年正月 賞加太保銜八月因病陳請開缺 賞假調理遣官視疾十月卒年七十二遺疏入 上深加悼惜 命 今上皇帝帶領侍衛十員前往奠醊并 諭曰大學士寶興由翰林洊躋卿貳擢至正卿前在上書房行走朕見其特立獨行公正不阿用是簡任將軍總督進秩綸扉均稱厥職昨因病請假旋請開缺疊經

賞假特派員前往看視並賞給護枝俾得安心調養方期漸次就痊遽聞溘逝深爲悼惜著賞給陀羅經被所有任內一切處分悉予開復應得卹典該衙門察例具奏伊幼子鍾綬鍾祿著俟及歲時由該旗帶領引見候朕施恩以示優待耆臣有加無已至意尋賜祭葬 子諡文莊子鍾齡陝西候補道鍾瑞前任工部員外郎鍾禱前任禮部筆帖式孫溥泰見官兵部員外郎

右 國史館本傳

--	--	--	--	--	--	--	--	--	--	--

四

陳官俊

陳官俊山東濰縣人嘉慶十三年進士改翰林院庶吉士充文穎館協修十四年散館授編修十五年充順天鄉試同考官十七年大考二等 賞線緞一匹二十年四月升右春坊右贊善九月轉左贊善二十一年六月 命在上書房行走八月充順天鄉試同考官九月充日講起居注官二十三年二月大考二等 賞緞三匹七月遷司經局洗馬十月升翰林院侍講二十四年三月充會試同考官六月充陝甘鄉試正考官九月提督山西學政二十五年四月轉侍讀九月升右春坊右庶子仍留學政任先是戶部尙書英和奏各省府州縣養廉不敷辦公取給陋規日益加增不若

逐一查明分別應存應革定以限制 上命各督撫體察情形議  
奏尋官俊疏言事不可行尙書汪廷珍侍郎湯金釗總督孫玉庭  
蔣攸銛亦先後奏阻 諭曰英和聽信邪言謂清查陋規有益於  
國計民生率爾陳奏幸朝有諍臣連章入告朕不勝欣悅之至陳  
官俊著交部議敘道光元年八月升翰林院侍講學士 命回京  
仍在上書房行走十一月山西巡撫成格奏劾官俊在學政任內  
各款 命交軍機大臣傳訊官俊承認毆差買妾兩款屬實 諭  
曰學政按臨各處州縣丁役如有過犯原應發交地方官懲處乃  
陳官俊自行責打辦差家人未免輕躁然此猶其過之小者也考  
試平陽時買通判之婢爲妾學政本不應與地方官交結乃不檢

東有違例禁此實咎無可辭其所參干預地方公事一節上年朕  
本有密旨諭令畱心察訪官吏賢否政治得失隨時密奏詎意陳  
官俊卞急粗率將晉省官員大加訪問以致聲勢侈張物議滋起  
殊與朕委任之意大相徑庭言不密則失身致干罪戾陳官俊著  
降爲中允贊善候缺補用念伊平日在上書房授大阿哥讀功課  
尙能認真著加恩仍在上書房行走時陝甘總督長齡請入 覲

上卽命長齡順道赴山西查辦並解陳官俊任就質十二月長  
齡奏稱成格所參陳官俊各款多係得自傳聞不能指實 諭曰  
前據成格奏所參陳官俊各款當降旨令長齡於來京陛見之便  
前赴山西省城署理巡撫事務將成格陳官俊俱行解任交長齡

臣等查辦茲據查訊具奏成格於奏參陳官俊各款多係得自傳聞不能指實又復措詞失體成格不勝巡撫之任著卽來京以六部主事降補陳官俊躁妄粗鄙不知慎密實屬負恩著退出上書房以編修降補又諭曰前因成格奏參陳官俊於嘉慶二十四年冬閒在太原縣毆打辦差家人又於二十五年六月買妾並稱干預地方公事擅作威福雖未能實指其苞苴之據而已大開奔競之風等語卽令軍機大臣等傳到陳官俊詳加詢問所參毆差買妾兩款均已承認至密陳官員賢否則堅稱實未向人洩漏當令軍機大臣寄問成格向陳官俊鑽營者何人奔競者何人令其明白回奏嗣於十一月二十四日具摺覆奏前來聲稱魏元烺邱

鳴泰諸人省中紛紛傳說俱經學院保舉此數人官聲素好所舉原不謬妄又稱陳官俊曾向伊說皇上見差太監前往河東查訪商人控告鹽務一案此則更不成話愈辨愈奇支飾尤甚試思此語若確陳官俊當得何罪必應徹底查訊按其是非治以應得之咎特令長齡於經過晉省時馳赴省城一面著陳官俊前往山西當面質對令長齡秉公查訊孰是孰非據實覆奏茲於十二月十二日長齡奏到據稱到省後傳旨詢問成格令其一一指證成格惟有伏地叩頭聲稱奏事不實以妄誕無稽之語冒瀆宸聰實屬荒謬不能指實惟求代奏從重治罪已降旨將成格陳官俊俱行降革示懲矣陳官俊於嘉慶二十四年冬閒毆差二十五年買妾



成格因何不卽行參奏乃一味姑容已屬不能秉公持正及至陳官俊奉有密旨畱心地方公事成格揣得其情心存畏忌以伺其短又值陳官俊不知檢束於前不能慎密於後高興妄爲自取罪戾但成格去歲回任今又將及一載且於嘉慶二十四五兩年終奏報本省學政摺內全未提及一語於此可見毆差買妾之事原不欲行參奏總因陳官俊查訪地方情事恐其遇事直陳有害於己輾轉狐疑蓋非一日也又計陳官俊未回京之前若行參奏朕必立派大臣前往查辦是非無難立辨伊焉能售其伎倆是以直待其回京後始行參奏而摺內復隱約其辭使朕存之於心知陳官俊不可信任在內廷之人奉命出差尙且如是其翰詹科道

等出差奏事更不足信矣卽使陳官俊有所陳奏朕豈有不辨別  
是非槩行聽納之理再陳官俊若係朕委用無疑之人何難授以  
地方大吏或留於山西以備查訪因何學差未滿反令其回京供  
職耶朕用陳官俊之意於此可見也詎意成格巧詐欺飾以無可  
質對之言屢行奏辨其居心直欲屏朕耳目使不聰明外省之事  
無敢過問此其咎之重者也至陳官俊奉命典學惟當盡心考試  
或有與撫臣交涉之事原可公同商酌至奉有密旨後惟當隨時  
察訪默而識之可奏者奏之無庸奏者置之不應將密諭顯露公  
然議論其賢否是非不特有乖素位而行之誠卽與朕之諭旨亦  
大相徑庭矣躁妄粗鄙深負朕恩必當立予降黜以爲不慎不密

者戒朕辦理庶政一秉公誠實則用之不肖則去之從不心存成見亦不能直受欺蔽也嗣後各省督撫斷不可因成格參奏學政獲譴卽有不公不法之學政亦不肖據實參奏各省學政亦不可因陳官俊言事不密獲咎明知本省利弊亦皆緘默不言如是則與朕用人行政之心大相刺謬矣故復申諭各省督撫學政知之二年充順天鄉試同考官四年大考三等奪俸半年五年充順天鄉試同考官八年五月充貴州鄉試副考官十二月升右春坊右中允九年升國子監祭酒十一年六月充江西鄉試正考官七月丁父憂十三年十一月服闋十二月補翰林院侍講學士十四年二月升詹事府詹事三月充日講起居注官九月稽查西四旗覺

羅學十月升內閣學士兼禮部侍郎銜十二月充文淵閣直閣事  
十五年稽查中書科事務充殿試讀卷官十六年三月升禮部右  
侍郎五月充朝考閱卷官轉左侍郎七月調吏部右侍郎十七年  
八月署戶部右侍郎兼管錢法堂事務旋充順天鄉試副考官十  
二月轉左侍郎十八年充庶吉士散館閱卷大臣十九年正月充  
經筵講官二月充大考翰詹閱卷大臣三月升工部尙書七月  
命查三庫十一月 賜紫禁城騎馬時 東陵郎中慶玉被馬蘭  
鎮總兵琦琛奏參查辦並籍其家以訊有隱匿寄頓等情經王大  
臣傳詢慶玉之戚戶部主事全孚供稱豫先得信係陳官俊談及  
官俊遵 旨回奏與全孚親供不符 上以官俊隱飾 命解任

聽候傳訊 諭曰前因查辦慶玉一案究出送信根由係戶部主事全孚牽涉工部尚書陳官俊當降旨分別訊究朕於此案並不計其隱匿寄頓之多寡惟須究出送信之人從嚴懲辦本日據載銓等將陳官俊全孚親供呈覽全孚之供仍稱陳官俊告知而陳官俊則過涉支吾以情理而論言者或出無心聽者早已有意卽令陳官俊偶有不檢摭拾空談亦不致遽罹重譴何以親具供詞毫無一語著實朕綜理庶政一秉大公在廷大臣無不相待以禮今遇此等案件既有旨訊問自當供明朕亦斷不疑陳官俊與慶玉有私故爲送信著陳官俊再行據實具供無得稍形影響儻經此訓諭之後仍復含混飾詞必將該尚書革職嚴訊勿謂朕薄待

大臣也尋官俊供因事談及屬實 諭曰前因查辦慶玉一案牽涉工部尙書陳官俊當降旨飭令明白回奏若該尙書於前經奉旨之時卽行據實奏明何致屢干訊究乃所具供詞俱設支吾迨經嚴旨訓諭始行據實供出陳官俊以一品大員言語不知檢點摭拾空談致令全孚藉端傳說以虛爲實咎實難辭陳官俊著交部嚴加議處部議革職奏上 諭曰此案查辦慶玉各款與陳官俊原不相涉惟陳官俊傳詢全孚時稽覈經手工程不應以臆揣之詞提出難免動家字樣以致全孚藉端送信指虛爲實已屬失於檢點至降旨飭令明白回奏並解任取供兩次所陳俱含混隱飾及至嚴旨切責始行供明殊失大臣之體陳官俊著照部議革

職二十年授通政使司通政使二十一年稽查西四旗覺羅學二十二年正月升戶部右侍郎兼管錢法堂事務二月復充經筵講官十一月調吏部左侍郎二十三年四月 諭曰戶部三庫總司出納事務較繁著派戶部滿漢左侍郎兼管向來管理三庫大臣僅派二員著添派廖鴻荃陳官俊凡遇收放銀兩日期輪應一人親往監視並專司啟閉五月以顏料庫不戒於火部議奪俸半年六月兼署戶部右侍郎兼管錢法堂事務時銀庫虧短案發官俊曾充查庫大臣坐失察革職畱任旋以應賠銀兩限內全完 恩予開復八月署兵部尚書十月以吏部行印被竊部議鑄級畱任十一月 賜紫禁城騎馬十二月升禮部尚書兼署工部尚書偕

軍機大臣順天府遵 旨申議科場章程奏言鄉會試謄錄各州縣選正身書吏字畫清楚者於親寫年貌籍貫外加以臂印派幹練丞倅解赴順天府查驗並監臨知貢舉覆驗入場該謄錄所官嚴密稽查一次無過紀錄一次三次無過加一級失察舞弊者議處又查彌封所謄錄所於至公堂東西分設本屬隔絕應責成巡察官見有二所人役私相往來者從重究辦以杜弊端又向來落卷祇由該生報名領發是否本人無從查覈嗣後應以領卷印票繳驗爲憑再查乙未年 特命舉行覆試惟各直省自行覆試恐屬具文若照順天府例殿廷分次考試亦形繁擾應請令各省舉人於會試年二月初十日前到京取具同鄉官印結送部十五日



在貢院覆試其道遠逾期到者歸順天府補行覆試其逾補試期者歸下三科辦理三科內未覆試者永遠不准會試亦不准截取銓選均如所請行二十四年二月調工部尚書三月充會試正考官四月充庶吉士散館閱卷大臣朝考閱卷官八月充溝渠河道值年大臣十月 命大挑各省駐防舉人十一月以己句絞犯朱添成臨刑呼冤 命軍機大臣會同恩桂陳官俊再行覆訊尋訊明宋添成闖殺屬實請仍照刑部按律問罪 允之尋調吏部尚書協辦大學士二十五年四月充庶吉士散館閱卷大臣尋以前署兵部尚書任內於候補主事恩麟違例派署掌印未能查明更正部議鑄級十月 命偕軍機大臣審訊福建臺灣刁民郭泚侯一

案尋訊明洗候斂錢上控抗捕負固屬實按問如律十一月遵  
旨偕軍機大臣審訊吏目蔣勤培責押無辜一案並訊明給事中  
雙壽巡城御史萬超有請託瞻徇情弊分別奏辦均 允之二十  
六年二月 上謁 西陵 命畱京辦事閏五月以吏部郎中慶  
文存用書吏張彤送繳節省工銀聽從干求改補經承名次郎中  
邱景湘收受張彤壽禮扶同瞻徇官俊坐失察交都察院議處十  
一月充 玉牒館副總裁 命管理三庫事務十二月 上以御  
門時吏部堂官全行誤班交都察院議處奪俸二年二十七年二  
月以官俊母年九十歲 御書書臣壽母扁額福壽字並珍綺等  
賜之四月充殿試讀卷官朝考閱卷官五月充大考翰詹閱卷

大臣六月 諭曰繙譯爲滿洲本業每科繙譯會試獲雋者止用部屬升途較隘茲將此項人員轉入翰詹衙門專心學習繙譯與各員一體升轉遇有考試之年卽照向例考試繙譯免致舍其所長用其所短其應如何分缺錄用之處著大學士軍機大臣會同吏部議奏至蒙古進士以主事用者得缺較難應如何疏通俾無積滯亦著一併議奏尋偕大學士穆彰阿等奏將繙譯出身滿蒙人員分缺轉補並分別內班外任及應行考試抵補之處擬就九條呈 覽并請將蒙古繙譯進士以主事用者掣分六部理藩院太僕寺行走三年奏畱後遇有題選缺出酌量補用 允之十一月 上以各省獲盜引見官員有題咨到部者有專摺奏請者殊

未畫一 命吏部明定章程畫一辦理尋奏言如有丞倅州縣以下等官獲盜與引見之例相符者均題請引 見如有續獲多案止題請給與加級紀錄者毋庸調取若未經引見該員已另案升補其所獲之案仍照例調取引 見其續獲多起併案赴部者於引 覘簽內逐一聲敘再文職獲盜例准調取人員州縣以上由督撫專摺奏請州縣以下具題如所議行二十八年十一月 命充上書房總師傅十二月以四川從九品包全春送伊戚引 見於吏部帶領時誤隨入乾清門官俊坐失察奪俸一年二十九年二月以給事中陳壇奏參翰林院編修童福承品行不端難勝上書房授讀之任並聲稱福承送官俊妻祭文有過當語官俊遵旨

回奏福承措詞失當屬實 諭曰童福承身列詞垣不自檢束致  
招物議著不准其授讀陳官俊於童福承措詞鄙陋原可不論但  
將該員派充師傅之後何以不卽奏聞實難辭咎陳官俊著毋庸  
充上書房總師傅並交都察院議處旋議降三級調用 上加恩  
改爲降六級畱任閏四月充考試試差閱卷大臣七月卒 諭曰  
協辦大學士吏部尙書陳官俊性情直爽表裏如一學問貫通慎  
勤供職蒙 皇考仁宗睿皇帝特達之知由翰林院入直上書房  
學識兼優克盡厥職朕御極後見其心地坦白誠樸可嘉日加委  
任洵擢正卿特命以吏部尙書協辦大學士奉職彌勤正資倚畀  
茲以痰疾猝發頃刻溘逝遺章披覽悼惜良深著加恩晉贈太子

太保入祀賢良祠賞給陀羅經被派悼郡王卽日前往奠醊任內一切處分悉予開復應得卹典該衙門察例具奏又 諭曰陳官俊以疾遽逝昨已降旨賜卹追念愴然伊長孫陳厚鍾加恩賞給舉人准其一體會試次孫陳厚滋俟及歲時由吏部帶領引見候朕施恩尋 賜祭葬 予諡文愨子介祺見官翰林院編修

右 國史館本傳

國朝詩林卷之六十四

七

國朝書獻類徵初編卷四十補錄

宰輔四十

王鼎

蒲城王文恪公鼎爲 宣宗朝名宰相長戶部十年綜覈出入人  
莫敢欺管刑部多所平反先後讞獄九省理重案三十餘起彈劾  
大吏不少瞻徇勘兩淮鹽務奏上節浮費革根窩等八條並請裁  
鹽政由總督兼轄准綱爲之一振道光二十二年河決開封公奉  
命往治駐工六閱月糜糈少而厥功速皖豫之民至今德之還  
朝值西夷和議初成公侃侃力爭忤樞相穆彰阿公退草疏置  
之懷閉閣自給糞以尸諫迴 天聽也時軍機章京領班陳孚恩



方黨穆相就公家滅其疏別撰遺摺以暴疾聞設當時竟以公疏  
上穆相之斥罷豈待咸豐初年葺爾島夷知 天朝有人或不至  
驕橫如此吁朋奸害正摧我屏藩滄海鯨波滔滔靡底 聖君賢  
相之靈當亦在天齋恨矣康祺初入京聞老輩言是事猶以爲未  
確不敢遽筆也嗣見馮中允桂芬顯志堂集有公墓銘稱公自河  
上還養痾園邸行瘵矣卒以不起詞意隱約殆公後人諱言之朱  
待御琦記公事亦言一夕暴卒頃見孫方伯衣言所撰張文毅芾  
神道碑銘首云子丑之間海鯨波山有臣一个奮回其瀾又云額  
額蒲城深曠太息閉閣草奏忠奸別白疏成在懷遂續以絕或匿  
不聞 聞以暴疾則情事昭然矣文毅與文恪同鄉故銘辭借爲

緣起古文家原有此例

右紀聞陳康祺撰

刻明書林黃氏刀局  
辛酉  
辛補四十餘錄

二



國朝耆獻類徵初編卷四十一目錄

卿貳一

阿什達爾漢

英俄爾岱

星訥

尼堪

索尼

吉思哈

古爾布什

武善

伊遜

車爾格

雅賴

薩穆什喀

納穆泰

國朝耆獻類徵初編

卷四十一 卿貳一 目錄



國朝耆獻類徵初編卷四十一

通奉大夫前署江西巡撫江西布政使司布政使湘陰李桓輯

卿貳一

阿什達爾漢

阿什達爾漢姓納喇氏葉赫貝勒金台石同族兄弟之子 太宗

文皇帝諸舅也 太祖高皇帝初年滅葉赫阿什達爾漢率屬來

歸授佐領隸滿洲正白旗天命六年二月從征明攻奉集堡圍其

城時入旗並進諸將無出其先者三月攻遼陽城先登克之論功

授一等輕車都尉 賜敕免死一次 太宗嗣位以阿什達爾漢

典外藩蒙古事嘗奉使朝鮮並齎 敕諭歸附諸蒙古部落天聰

六年明遣使議和 上命阿什達爾漢與文臣白格龍什等往報之既盟而歸白格以阿什達爾漢與龍什等私取明餽遺事奏聞 詔追奪其所取財物七年六月隨貝勒濟爾哈朗薩哈璘鞫獄蒙古部裔 敕諭二十道遺失其九所司奏劾論罰如律十一月宣布 欽定律令於諸蒙古部落八年五月奉 命徵兵科爾沁會大兵於宣府左衛時 上親征察哈爾其汗林丹遁走海上殂於道所部潰散其屬額爾德尼囊蘇等率眾來降 上命阿什達爾漢與前鋒統領吳拜等及額爾德尼囊蘇往偵察哈爾汗子額哲九月攜其台吉塞冷等還復 命奏曰察哈爾大臣若祁他特等率千人而來者踵相接也旋奉 命至春科爾大會蒙古諸

部分畫牧地使各守封疆復與諸貝勒訊獄斷罪十一月還報稱  
旨令專轄一佐領事九年二月隨貝勒多爾袞等率兵萬人往  
收察哈爾汗子額哲四月師抵托里圖貝勒等遵 上所授方略  
遣阿什達爾漢偕其族孫護軍統領南褚先詣額哲母營見之額  
哲之母南褚女兄阿什達爾漢族孫女也既見諭之降額哲遂從  
其母舉部來降當我軍未至時有鄂爾多斯濟農圖巴者來招額  
哲與盟而去阿什達爾漢察其有異志追及圖巴羈留之遂破其  
謀令悉還察哈爾之貨賄遺於鄂爾多斯者又領兵略明宣大界  
至山西多俘獲凱旋 上親迎勞之崇德元年六月授都察院承  
政 上御崇政殿侍臣巴圖魯詹額爾克戴青後至阿什達爾漢



與承政多爾濟達爾漢面責之曰汝屢從臣何擅離職守而後至乎叱出之十月偕文臣希福往察哈爾喀爾沁部明刑申禁宣論而還十二月從征朝鮮其國王李倬遁走南漢山豫親王多鐸率師追之圍其城朝鮮巡撫合兵萬八千來援分樹二柵悉眾出戰阿什達爾漢同貝子碩託帥驍銳競進大破其軍其副將以兵五千營山麓遙爲聲援別遣兵百人沿河而下阿什達爾漢馳擊殲之復攻拔其營餘眾皆潰明年正月李倬降七月論功晉三等男世襲會遣大臣往科爾沁巴林扎魯特喀喇沁土默特等部頒赦詔并會諸外藩清理刑獄阿什達爾漢爲正使三年五月部議阿什達爾漢前往科爾沁察審諸事徇庇失實且濫收

諸藩貝勒財賄應削職得旨寬黃解部任追奪財物入官七月復任都察院承政五年與參政祖可法等疏奏時事略曰皇上欲恢張治道深思篤行之今諸國景附朝廷清明而諸王以下至都統彼此觀望顧念身家莫肯精白一心爲國陳奏不知果無可言耶抑有所畏忌而不敢言耶夫刑法者所以防民之奸也軌於法則麗於刑此不可宥也今刑部斷獄不依本律或從重論輒削其職臣思諸臣經戰陣出死力恩授一官一旦有過豈可不論重輕而遽革之乎臣等竊思先時簡選議事十人此時皆不稱職宜罷斥又例職官陣亡者子孫襲兵士陣亡者妻受賞今未盡行惟聖主裁察疏入上嘉納之六年大兵攻明錦州明總督

洪承疇率師來援陳師松山 上親統大軍擊之明師宵遁分布  
諸將以追我偏將伊拜等駐兵杏山阿什達爾漢按其營壘及斬  
獲多寡之數敵眾既潰 上合眾圍松山明總兵曹變蛟營於乳  
峰山堅壁不敢戰乘夜棄山寨率步騎直犯中軍入 御營時右  
翼大臣侍衛等俱未歸部伍軍中大驚將士以死禦之始退 上  
以阿什達爾漢爲故舊大臣受心膂寄常隨侍左右是夜反安處  
帳中不至 御前防護遂歸本旗七年論松山失律諸臣罪罷承  
政任降世職爲騎都尉尋以疾卒年六十三子三席達禮次阿爾  
畢敦阿爾賓席達禮襲世職別有傳

右 國史館本傳

英俄爾岱

英俄爾岱姓他塔喇氏世居札庫木 太祖高皇帝時從其祖岱  
圖庫哈理來歸授佐領隸滿洲正白旗會界凡人犯境英俄爾岱  
奮勇迎敵破之於薩爾滸天命四年隨大兵征明攻開原有蒙古  
巴圖魯阿布爾者素驍勇降明爲邊將出戰英俄爾岱馳斬之六  
年克瀋陽授二等輕車都尉復進擊明鐵嶺兵斬蒙古二人克遼陽  
晉二等天聰三年從 太宗文皇帝征明 遵化等十一城進攻  
明北京 命英俄爾岱與文臣范文程等畱守遵化是年大兵所  
下石門驛馬蘭峪三屯營大安口及灤陽營等 以明兵夜至  
遵化合攻英俄爾岱率兵擊卻之平旦敵騎兵 以待我師將

出戰賊眾縱兵突入我步軍營英俄爾岱麾其眾鼓勇奮擊明兵退走斬殿後者五人擒一人敵宵遁我師躡其後復殲騎兵百步卒千餘遂以書諭降諸城五年授戶部承政七年奉命使朝鮮遺書責其王李倬倬上書報謝八年五月晉一等輕車都尉六月察哈爾林丹汗遁走所屬皆降上命英俄爾岱同副都統布爾吉率師偵之道遇察哈爾來歸戶口千餘因率其部長謁上進獻裘馬先是英俄爾岱與布爾吉遇察哈爾台吉布顏圖部眾招之降不從誅二百餘人俘獲甚眾還奏得賞賜至是布顏圖眾三十人來奔告曰前者餘眾欲降不允遂見屠戮幸逃匿得餘生也上怒命追奪所賜物尋以考滿晉爵三等男崇德元年八旗

及蒙古諸貝勒以 太宗功德日盛宜正位號布告諸國朝鮮王  
李倧亦具表請啟 遣英俄爾岱及參政馬福塔尼堪率諸貝勒  
使者致書朝鮮比至倧不見亦不納所致書陽令國人延英俄爾  
岱等至議政府潛以兵環守英俄爾岱率諸使者奪民馬乘之突  
門出走倧遣騎以報書追及而別以書誡其邊臣令固守英俄爾  
岱等併奪之以 聞道遇明皮島兵遮我歸路擊走之是年七月  
以額駙佟養性嫁女用六十人爲媵僕英俄爾岱知之不行阻止  
論罰鍰二年正月 上親征朝鮮克國都圍李倧於南漢山城  
命英俄爾岱與馬福塔齋 敕諭之倧感激稱臣以奏書至遂出  
降英俄爾岱復承 旨送倧還國都七月都統鄂莫克圖爲貝勒

國朝通志卷之九十一  
蒙古裔娶蒙古台吉博洛女事下部議英俄爾岱實先見其女以告鄂莫克圖及鄂莫克圖往視英俄爾岱復以其言告貝勒坐詔媚論罰贖十月齋 敕冊封朝鮮王敬謹無失禮三年以承政韓大勳盜取庫物事坐稽查疏忽議應革世職得 旨寬免論罰鍰四年復坐失察家人索借官商財物論革世職罰贖 詔並免之尋授都統五年偕鄂莫克圖等往朝鮮義州詰李侗罪六年三月奉 詔丈量地畝以道遇出征錦州軍離城遠駐不爲阻止還朝又不以奏論罰贖四月睿親王多爾袞復圍錦州英俄爾岱率師往濟其軍至則駐營高橋與大軍會明兵望風引遁九月隨貝勒多鐸等圍守松山城七年七月有副都統布三者以隱匿姦宄下

獄尋遇 恩赦令睿親王多爾袞約束不許隨征從獵及私往莊屯英俄爾岱爲之私請於睿親王令其往近邊牧馬處行走部議英俄爾岱應議罰錢復奉 旨寬免八月往朝鮮鞫獄還奏稱旨八年考滿晉三等子順治元年從睿親王入山海關破流賊李自成是年改承政爲尚書英俄爾岱仍任戶部二年敘先後功超升三等公三年奏請禁民間私售馬騾軍械火器以杜盜源 從之四年復以考滿晉二等公五年二月卒年五十三英俄爾岱以娶饒餘郡王女授多羅額駙任戶部尚書十餘年既授都統仍攝部務 太宗嘗諭六部諸臣曰英俄爾岱素性執拗而於本旗人亦閒有徇庇朕思有全德者少彼能盡心部務辦事明決朕甚嘉



國朝通志卷之四十一

之其餘各部大臣不如彼者多矣子伊圖襲爵仕至內大臣

右 國史館本傳

星訥

星訥滿洲正白旗人姓覺爾察氏初爲二等待衛兼佐領從太祖高皇帝征明遇蒙古兵四百於塔山之北射其渠魁殪之遂敗其眾天聰七年 太宗文皇帝命與參領蘇爾東阿等率兵三百駐守遼河先是我師征察哈爾星訥以二十人往張家口偵敵猝遇敵兵禦守四日夜俟貝勒阿濟格至請兵二百攻克之察哈爾部多爾濟塔蘇爾海倚山立寨列火器拒守星訥率護軍先登敵眾奔潰八年 上統大軍征察哈爾星訥隨額駙布顏代率蒙古兵進哈麻爾嶺遇其部俄爾塞圖等率所屬戶口來歸納之以聞時察哈爾林丹汗西奔土默特其下相率歸順 上乃移師征

四星訥同前鋒參領席特庫等略大同明將自龍門率兵三萬逆戰星訥擊之敗北斬獲甚眾論功予雲騎尉世職尋授刑部參政崇德三年同承政葉克舒征黑龍江奏捷敘功並以其兄辛泰弟西爾圖陣亡應得世職令併襲之晉三等輕車都尉參政吉恩哈有女爲雅什塔子婦新寡吉恩哈疾女歸省星訥之子阿思哈見而謀娶之雅什塔訟於所司論罪星訥應革世職罰鍰降理事官上命降罰如議免革世職四年授護軍參領兼議政大臣尋遷副都統六年二月授工部參政三月隨鄭親王濟爾哈朗圍錦州明總督洪承疇親以兵六萬赴援屯松山北岡星訥先登破其壁壘明援兵繼至星訥屢擊敗之七年敗明總兵吳三桂白廣恩等

兵於高橋八年擢工部承政 世祖章皇帝順治元年隨睿親王  
多爾袞入山海關擊流賊李自成以步兵破賊陣是年改六部承  
政曰尙書星訥仍任工部二年敍功授一等輕車都尉三年隨肅  
親王豪格師抵西安分勦賊於邠州賊潰遁進趨秦州賊將高汝  
礪率步騎迎拒大敗之與肅親王會師川中屢敗賊渠張獻忠兵  
凱旋晉太子少師加一雲騎尉六年逆鎮姜瓖據大同叛星訥隨  
大兵討之圍其城賊填塹毀垣簡驍勇蒙盾突犯星訥率將士持  
短兵力戰卻賊賊背城爲陣復以火器來攻星訥親督精銳馳壓  
其營大兵乘之賊兵不能支殲其勁兵略盡七年遇 恩詔晉爵  
二等男八年都統額克青等舉發英親王阿濟格令其子勞親以

兵眾迎睿親王喪謀干政法司鞫議星訥隸王屬下雖未與謀第  
不卽奏劾且爲王趣召勞親應罷尙書任又議其在工部擅撤  
昭陵工役五百人及不補植 陵樹罪革世職籍家產半九月復  
任工部尙書列議政大臣十年 上以星訥宣力有年衰老可念  
命以原官加一級致仕十四年自陳戰功請復世職部議星訥  
前任工部獲罪應削 恩詔所加之爵仍畱戰功所得世職奉  
旨復一輕車都尉兼一雲騎尉予世襲康熙十三年卒 賜祭葬  
孫巴爾達襲

右 國史館本傳

尼堪

尼堪姓納喇氏世居松阿里烏喇 太祖高皇帝時率眾來歸  
賜號巴克什後隸滿洲鑲白旗初以說降蒙古科爾沁部授騎都  
尉天命十年偕侍衛博爾晉等率兵征虎爾哈部收獲五百戶師  
還 上郊勞賜宴天聰初擢一等侍衛從 太宗文皇帝征明攻  
錦州有功七年隨貝勒等鞠獄藩部同行佐領阿什達爾漢以所  
齎 敕諭二十道付尼堪尼堪委之從役遂失其九所司奏劾論  
罰如律是年蒿齊忒部台吉額林等歸順 命尼堪往迎之明年  
正月收其所部戶口及牲畜以還七月 上統大軍征明道遇察  
哈爾部眾來降尼堪奉 旨還盛京安置降人家屬時鄭親王濟

爾哈朗留守盛京令尼堪同卦爾察席特庫率駐防兵十二人偵  
明兵猝遇敵奮擊之追至遼河凡三戰斬馘百餘眾悉驚潰九年  
隨貝勒岳託駐兵歸化城土默特部長博碩克圖之子私與明通  
使人往喀爾喀約明使偕來岳託遣尼堪同參領阿爾津等伺之  
擒其使十人及明使四人以獻尋與戶部承政英俄爾岱馬福塔  
等齎諭朝鮮崇德元年六月授理藩院承政二年正月大軍攻  
克朝鮮國都 上命尼堪同參領吉思哈佐領葉克舒率八旗及  
科爾沁扎魯特敖漢柰曼諸外藩兵征瓦爾喀將出朝鮮境有朝  
鮮兵於吉木海列營抗拒尼堪率師進擊大破之斬其平壤巡撫  
朝鮮合兵二萬襲我軍後尼堪與吉思哈等設伏誘敵殲萬餘人

敵遁據山巔立柵拒守我師圍之三日遂下降其哈忙城巡撫及各城總兵副使等官獲牲畜布帛等物無算進略瓦爾喀部卽以所獲分給外藩將士遣之還班師奏凱尋同承政阿什達爾漢往科爾沁巴林扎魯特喀喇沁諸部頒 赦詔並會諸部王貝勒清理刑獄三年五月部議尼堪於科爾沁察審諸事徇庇失實應解部任籍家產之半得 旨解任免籍家產七月授理藩院右參政四年大軍征明檄調科爾沁諸部兵來者俱不及額 詔尼堪會科爾沁王貝勒等訊其罪遂歷喀喇沁土默特諸部讞定罪狀五年四月 上以尼堪克副任使授三等輕車都尉先是承政薩穆什喀等征索倫部俘其眾數千至是復有數百戶來歸 命尼堪



往頒 賞賚并與郭爾羅斯部新附之眾共編爲八佐領而還七月奉 諭檄外藩兵征索倫簡其軍實 世祖章皇帝定鼎燕京以功晉二等輕車都尉順治二年隨豫親王多鐸平定河南統外藩兵由南陽趨歸德招服一州四縣遂晉一等輕車都尉三年復隨豫親王討蘇尼特部騰機思大破其眾多斬獲明年敘功晉三等男遷本部尙書六年喀爾喀使至餽睿親王多爾袞馬而不及翼親王滿達海翼親王使人告理藩院尼堪已啟睿親王王曰於例云何曰外藩職貢例不越送諸王王惡其語侵己令內大臣議尼堪罪奪其俸三遇 恩詔加至三等子世襲罔替十年 上以尼堪宣力有年衰老可念 特命以原官加一級致仕晉二等子

十七年以疾卒 賜祭葬無嗣以其弟阿穆爾圖阿錫圖及從子  
瑪拉兆資分襲世職瑪拉自有傳

右 國史館本傳

國朝詩林卷之十一

十一

索尼

索尼滿洲正黃旗人姓赫舍里氏父碩色大學士希福兄也 太祖高皇帝時碩色自哈達部挈家來歸 太祖以其兄弟父子並通 國書及蒙古漢人文字咸擢置文館理事 賜碩色希福巴克什號授索尼一等侍衛使出入扈從隨軍征討時哈達兵犯界凡城索尼身先士卒擊敗之復隨征棟揆蒙古援兵雲集立二寨互爲犄角索尼與諸將合兵攻勦拔其一寨餘眾悉降天聰元年從 太宗文皇帝攻錦州遇明兵千餘從大凌河戶口索尼以二十騎襲擊之多斬獲旋偵敵甯遠城內兵突出索尼奮勇力戰追擊敵兵至壕而返二年 上親征喀爾喀徵兵外藩科爾沁不至

既遣希福率健士八人往趣之復詔索尼與侍衛阿珠祐齋  
諭飭責土謝圖額駙奧巴初奧巴爲台吉入朝太祖以貝勒  
舒爾哈齊孫女妻焉既而奧巴屢違令約私與明通時復徵兵不  
至索尼於是稟受方略以行既入科爾沁其部人饋以牲索尼  
麾之去曰爾汗有異心爾物安可食耶部人以告奧巴奧巴病足  
居別室索尼與阿珠祐詣見公主以諭旨告奧巴奧巴聞之扶  
掖至佯問曰此爲誰索尼曰吾儕天使也爾有罪義當絕今特  
以公主故使來餽問耳奧巴語左右具饌索尼阿珠祐不顧而出  
奧巴恐使台吉塞冷等請其事索尼出璽書示之卽令從者先  
行奧巴得書大驚令所屬大臣環跪請曰汗獲重罪甚惶懼今寇

騎塞路恐使者卽歸遭侵掠益滋汗咎請少畱索尼曰銜君命而來死何足辭與阿珠祐拂衣起整鬻欲行眾皆泣且曰汗欲引罪自謝扣馬首力挽之乃止翌日奧巴辭以足疾欲令其台吉拜思噶爾及柔噶爾賽偕索尼等入謝索尼曰汝欲解己罪而使二人行吾豈爲取拜思噶爾等而來耶奧巴乃使人請曰上恕我我問應肉袒謝懼不我容而逐我耳索尼曰皇上覆載如天地汝果引慝入朝雖有罪必蒙矜恤奧巴叩首決計入朝索尼見其悔罪輸誠與阿珠祐偕其大臣黨阿賴先歸奏狀俱稱旨三年從征明至燕京明甯遠巡撫袁崇煥等赴援列營於城東南索尼奉諭傳令左翼迎擊貝勒豪格先馳入陣敵兵蹙之矢石如

雨索尼躍馬突入東西衝擊斬殺甚眾遂拔貝勒於重圍明年正月大軍至榛子鎮城內無官守索尼同文臣達海頒漢字詔諭降其民復招撫沙河驛越日拔永平與達海等奉命執黃旗於城上以漢語徧諭軍民皆歸順二月班師隨貝勒阿巴泰等率將士守永平五年正月朝鮮使臣樸蘭英來朝賜其王薺蘭英以賞薄辭索尼與參領英俄爾岱等斥責之蘭英懼拜命七月擢吏部啟心郎從征明圍大凌河城明兵自錦州赴援索尼持短兵步戰敗之九月奉命往瀋陽宣布捷音踰月偕參將祝世昌率漢軍千六百人及朝鮮使臣至軍營十二月與達海等奏定元旦朝賀儀制明年從征察哈爾由大同入明邊取阜臺寨會六部官

署工竣 上召索尼及諸啟心郎 諭以啟迪諸貝勒俾勤事改  
過毋曠厥官八年以索尼任職吏部事無闕失授騎都尉世職仍  
與學士羅什等日直內院凡宣示 諭旨及察審功罪咸當 上  
意值有 旨以郡王禮祭貝勒岳託吏部尙書阿拜誤以岳託子  
襲封郡王傳語都統葉臣事 聞下廷臣議誤傳 詔旨罪以索  
尼任吏部郎官應連坐論罰鍰 上曰索尼未經奉 旨豈冒妄  
言 特命免議崇德八年考績超授三等男 世祖章皇帝順治  
元年都統和洛渾等訐告肅親王豪格言詞悖妄王坐廢爲庶人  
詔王大臣集眾宣示以索尼忠貞戮力不附肅王與都統譚秦  
護軍統領圖賴並 賜鞍馬二年晉二等子是時睿親王多爾袞



攝政以索尼既列子爵不宜復列郎官令解啟心郎任仍理部事  
先是索尼叔父希福以不附睿親王爲譚泰構罪劾罷未幾索尼  
發譚泰隱匿 諭旨事譚泰亦坐削公爵有求古琴於索尼者索  
尼於庫內取漆琴與之索尼又嘗令僕從於 禁門橋下捕魚見  
庫院草長使牧者秣馬院中譚泰遂臚狀劾索尼下法司勘訊論  
死睿親王奏從經典削世爵永不敘用遂罷廢三年正月圖賴劾  
譚泰事涉索尼逮問圖賴曰譚泰有罪吾於途次作書致索尼使  
啟睿親王索尼以不啟聞及訊齋書者塞爾特曰書達索尼索尼  
囑我勿言也諸大臣論索尼罪當斬王親鞫之索尼曰吾發譚泰  
擅隱 諭旨罪願匿圖賴書以庇之乎復訊塞爾特因得佐領希

思漢慮譚泰得罪投書於河狀索尼遂昭雪尋復授二等子索尼終不附睿親王於政事多以理爭王由是惡之五年以貝子屯齊等訐告索尼於崇德八年秋與圖賴等謀立肅親王私結盟誓議罪應死有 旨免死褫職輸贖鍰遣守 昭陵追奪 賞賜八年

上既躬親大政以前議索尼罪不實 特召還朝復其爵遇

恩詔晉三等伯予世襲九年復 命諸王議功晉一等伯 賜敕免死二次擢內大臣兼議政大臣總管內務府事十七年應 詔上言十一事一曰小民冤抑有司不爲詳審者宜別爲嚴察使無壅於上 聞二曰凡犯罪發覺問官以奉有 嚴旨往往不察其情輒加重罪不無枉濫乞 敕法司量情詳慎三曰前議福建將

士罪在大將軍者止削一不世襲之騎都尉而所屬將領其子爵  
男爵乃盡議革輕重不均有乖懲勸請 敕更正四曰凡開國之  
臣自騎都尉以上皆有功行閒及贊成大業者所授之職宜予世  
襲其後非有戰功 恩詔所加不宜給世襲 敕書五曰在外諸  
藩風俗不齊若必嚴以內定之例恐反滋擾宜格外寬容六曰近  
聞大臣勢豪奪據行市姦宄之徒投託指引以攘貨財請 旨嚴  
禁七曰今四方商賈擔負捆載來京者多爲旗下大臣家人短價  
強買人將畏而不前請察禁八曰諸王貝勒以及各官私引玉泉  
山之水爲灌溉致竭泉流當禁九曰邊外木植皆商人雇民採伐  
水運解部故額稅之外令自售賣使利及商人今聞大臣於採木

之地私行強占以致商不聊生請禁止十日大臣不殫力公事惟飾宅第請懲禁十一日五城審事諸官遇世族富家與窮民構訟必罪窮民曲意徇私不思執法請嚴飭無得枉情納賄恣意妄行疏入 上以所奏皆實事宜申禁 飭部議行十八年正月 世祖升遐遺詔以索尼與大臣蘇克薩哈遏必隆鼈拜四人輔政於是索尼及諸臣盟誓受事尋蘇克薩哈與鼈拜爭事成隙索尼惡之年已老矣且有疾康熙六年正月與輔臣等奏請 聖祖仁皇帝親政四月 上諭吏部曰輔政大臣伯索尼 太祖高皇帝時龜勉效力 太宗文皇帝任以內外大事悉能果斷殫厥忠誠世祖章皇帝時亦任以內外大事竭忠純篤以其勳舊忠貞堪受

國朝通志卷之八十一

重託 遺詔俾令輔政恪遵 顧命夙夜靖共厥績茂焉今既染

病且復年邁宜特加恩寵以示酬庸之典下王大臣會議晉一等

公與前所授一等伯並世襲索尼以寵榮逾分悚仄難安陳情辭

一等公爵得 旨嘉獎仍令祇遵 成命不必遜辭是年七月卒

賜祭葬有加禮諡文忠以第五子心裕襲一等伯第六子法保

襲一等公長子噶布喇仕至領侍衛內大臣十三年十二月 聖

祖因 孝誠仁皇后 推恩所生授為一等公第三子索額圖別

有傳

右 國史館本傳

吉思哈

吉思哈烏蘇氏世居瓦爾喀馮家屯屬烏喇部見其貝勒不足事  
與弟吉普喀達來歸 太祖高皇帝並任佐領隸滿洲鑲白旗天  
命四年吉思哈從征明有功投三等輕車都尉世職六年以參領  
率兵圍遼陽城立雲梯先登天聰八年 太宗文皇帝念其功晉  
二等輕車都尉世職是同參領吳巴海率兵征東海虎爾哈部  
俘獲男婦一千五百有奇九年同副都統巴奇蘭等征黑龍江收  
二千丁以歸授一等輕車都尉崇德元年 太宗親征朝鮮聞明  
兵入鏖場遭吉思哈率兵躡其後擊敗之明兵遁二年正月大軍  
攻克朝鮮國都吉思哈奉 命同理藩院參政尼堪等率每旗甲

國朝文獻通考卷一百一十一 卿貳一

七

士十人及科爾沁敖漢柰曼扎魯特烏拉特諸外藩兵征瓦爾喀將出朝鮮境有朝鮮兵二萬分列營壘吉思哈率兵合諸軍進擊並設伏絕其去路斬其平壤巡撫礮數千人獲馬三十敵遁走山嶺設柵拒守我軍圍之三日敵眾遂降進略瓦爾喀卽以所獲牲畜等物分給外藩隨征將士遺之各還所部奏捷稱 旨累遷至吏部參政三年四月卒以其子吉瞻襲職吉普喀達亦以天命四年從征功授三等輕車都尉世職六年任參領隨大軍攻奉集堡明總兵李秉誠赴援爲我左翼四旗兵逐奔吉普喀達奮往追擊直抵城濠中礮卒天聰八年 贈二等輕車都尉子瓜爾察襲

右 國史館本傳

古爾布什

古爾布什姓博爾濟吉特氏世居西喇木楞本蒙古喀爾喀台吉也 太祖高皇帝天命六年偕台吉莽果爾率所屬六百戶驅牲畜來歸俱授爵三等子隸滿洲鑲黃旗 子古爾布什滿洲蒙古各二百人俾任佐領尙公主爲額駙 賜青卓理克圖號天聰五年 太宗文皇帝親統師征明圍大凌河城明監軍道張春以兵赴援古爾布什與額駙恩格德爾等禦戰弗力論罪應削職 上念其自外藩歸順功免罪罰鞍馬一白金百兩尋擢兵部承政崇德元年隨征朝鮮明年朝鮮國王李倬降大軍征明皮島旣凱旋以古爾布什於朝鮮王謁 上時亂班釋甲又私攜從役隨征論罰



緩繼以失察所管佐領下俄齊爾桑罪狀論罰奪所轄丁壯三年  
 更定官制改兵部右參政有護軍洪科許都統阿山之子塞赫隨  
 征明昌平臨陣退避古爾布什奉 命勘訊不令塞赫訴辨憑洪  
 科所評定讞法司以古爾布什與洪科為媼親徇情偏袒議降秩  
 詔從寬罰緩四年 上命理事官星鼐傳集蒙古官之舊隸喀  
 爾喀察哈爾者星鼐誤傳八旗都統及諸王貝勒下護衛法司議  
 星鼐罪並論古爾布什知蒙古官未集不即奏明宜召論罰如例  
 六年隨征明錦州敗敵於甯遠明年再圍錦州敵兵犯我壕塹古  
 爾布什擊走之復因失察護軍功罪論罰得 旨寬免 敏惠恭  
 和元妃之喪輔國公扎喀納以歌舞軍中獲罪部議古爾布什以

和碩額駙之親不行訶禁又不奏 聞應削爵籍家產半 上復免之 世祖章皇帝順治元年古爾布什隨睿親王多爾袞入山海關擊敗流賊李自成明年敘功晉爵二等子七年九月兩遇恩詔晉一等世襲十八年正月卒年六十有五 賜祭葬如典禮諡襄敏子色楞襲爵

右 國史館本傳

This image shows a page from a document, possibly a ledger or a form, with a grid of vertical columns. The page is mostly blank, with some faint markings and a right margin. The columns are separated by thin vertical lines, and there is a thicker line on the right side. The overall appearance is that of a scanned document page.

武善

武善姓伊爾根覺羅氏世居呼納赫後隸滿洲鑲黃旗父噶蓋  
太祖高皇帝時來歸授理事大臣從征兆佳城及攻納殷之佛多  
和集寨取安褚拉庫路俱有功嘗奉命同巴克什額爾德尼參  
訂國書後大兵滅哈達擒其貝勒孟格布祿以歸贍養之與噶  
蓋交厚孟格布祿尋謀逆伏誅噶蓋並坐罪論死武善其長子也  
初任佐領尋兼任參領天命九年明皮島總兵毛文龍遣兵渡鴨  
綠江入島屯田太祖命武善與副都統楞額禮率兵千人擊之  
途中獲閒牒訊知明兵晝則渡江入島收穫夜則還宿江岸遂乘  
夜進兵潛伏山僻平明度明兵已渡疾馳至島明將士大驚悉奔

潰武善與楞額禮追斬五百餘級敵爭舟盡墮水死因焚島中積  
聚而還旣而文龍復遣兵三百登島岸劫我房舍掠牛馬武善同  
護軍參領滿都禮等督兵追擊盡奪所掠以歸斬其遊擊一備禦  
一千總一 太宗文皇帝卽位以武善列十六大臣管鑲紅旗副  
都統事天聰八年 上遣諸大臣分兵爲三隊略明錦州武善同  
都統阿山率所部爲後隊遵 上方略相機設伏防護所俘獲還  
奏稱 旨是年三月授三等輕車都尉世職崇德元年戶部承政  
馬福塔以互市往朝鮮義州偵知明兵潛入蹉場遣使馳奏 上  
命武善同吏部參政吉思哈率兵馳援擊走明兵三年正月駐守  
歸化城土默特部長以喀爾喀扎薩克圖屯兵近城將犯城來告

上親統師往征武善與副都統吳巴海並從會扎薩克圖引遁  
師還餉米運畱中途者爲吳巴海之廝卒盜取武善坐徇隱革世  
職罷任八月授工部參政時瓦爾喀諸蒙古皆隸版圖修職貢凡  
通使及宴每以武善典其事順治元年卒

右 國史館本傳

匡... 卷之二

三

伊遜

伊遜姓瓜爾佳氏費英東弟音達戶齊之第三子也初隸滿洲鑲黃旗後改隸鑲白旗伊遜少從太祖高皇帝征伐屢立戰功太宗文皇帝卽位設十六大臣以伊遜佐理鑲黃旗事從征多羅特率步卒擊敗蒙古兵天聰三年大軍伐明攻遵化城伊遜先登中礮傷臂太宗臨視授三等輕車都尉世職尋擢兵部承政七年偕戶部啟心郎英俄爾岱齋諭朝鮮宣示威德定互市議咸稱旨八年管佐領崇德元年率八旗兵百四十人往助海州防守明兵望風引遁師還會都統都類獲罪逮繫兵部參政穆爾泰慮溽暑蒸鬱驅囚出繫所遣使爲都類設幕次且爲拂蠅因訴



其狀伊遜坐同官隱匿不奏罷任三年更定部院官制仍授爲兵部承政明年兼管副都統奉命副工部承政薩穆什喀率左翼兵征索倫至虎爾哈部是時達爾布尼阿哈爾都戶白庫都漢必爾岱等聚眾抗拒於伍庫爾城伊遜乘夜舉火攻克之進攻鐸陳未下聞博穆博果爾兵來援我師遂還已而佐領薩必圖卓布退等率師繼至伊遜復整兵往鐸陳設伏斬敵七十餘級當薩穆什喀之以師還也博穆博果爾以兵襲我輜重甲士廝卒多陣亡者伊遜坐不急入援罪應罷職詔寬免以罰贖懲之八年卒于噶達渾襲職順治十二年追諡伊遜曰襄壯賜祭葬建碑紀績

右 國史館本傳

車爾格

車爾格滿洲鑲黃旗人姓鈕祜祿氏額亦都第三子也幼從太祖高皇帝於軍中屢建功績授騎都尉世職晉三等輕車都尉賞奉命征東海瓦爾喀部大勝凱旋太祖親出郊宴勞之又念其父勳晉三等子太宗文皇帝卽位設八大臣車爾格與焉分理鑲白旗事天聰元年隨大貝勒阿敏等征朝鮮其國王李侗懼服願效職貢乃與其盟而還二年五月隨貝勒阿巴泰等略明錦州松山俘獲甚多五年七月授刑部承政尋遷兵部七年八月命同刑部承政索海往征明邊隘至錦州斬七人生擒把總一人兵九人來獻十月明廣鹿島副將尙可喜遣吏納款車爾格奉

列傳卷之四十一 一 廟貳一

命率將士往招之明年二月自廣鹿島馳疏言可喜統集廣鹿長  
山二島男婦三千餘來歸因道遠需乘騎於每佐領下有四馬者  
撥二馬給之卽日起行遂與俱至崇德二年四月隨武英郡王阿  
濟格等攻皮島師還以屢違軍令又爲阿濟格索獲婦女於睿親  
王多爾袞論罪削職罷任三年七月起授工部左參政五年二月  
擢戶部承政八年考滿復授騎都尉世職 世祖章皇帝定鼎燕  
京 恩詔加一等雲騎尉順治二年二月卒子法固達襲職長子  
辰泰第五子拉哈達各有傳

右 國史館本傳

雅賴

雅賴滿洲正白旗人姓佟佳氏扈爾漢第七子也 太祖高皇帝時從征烏喇略地朝鮮數被創天命六年隨大兵攻遼東破蒙古兵俱有功又征察哈爾先登殺敵俘獲甚眾天聰三年五月與參領羅璧等率兵千人略明新城路遇其故將毛文龍部眾採蕩者斬六十人毀其船九月同額駙揚古利等躡捕逃人於雅爾古復還文龍部眾殺九千六百餘人生擒其千總三員及從者十六人以歸十一月 太宗文皇帝征明北京巡撫袁崇煥來援圍我護軍營城中敵兵亦出應雅賴奮勇力戰卻之五年從圍大凌河城累戰皆捷正白旗上卒有沒於陣者雅賴單騎直入殺敵三人取

屍而還七年征旅順口與副都統薩穆什喀同舟進敵據岸列陣以拒雅賴超躍登岸大呼曰雅賴先登矣遂衝入敵陣黎明與敵兵戰入城門身被一創督戰愈厲我兵或少退輒手刃之大敗敵兵論功授騎都尉世職崇德二年授議政大臣六年以從圍錦州依附睿親王多爾袞私遣兵丁歸家及離城遠駐議革職籍其家之半得旨從寬罰贖明年兵部追論攻錦州時明兵出犯鑲黃旗汛我兵有未戰者雅賴坐徇隱應罰贖上以雅賴素著勞績特命免之八年敘征明錦州松山北京山東等戰功加一雲騎尉順治元年隨睿親王破流賊李自成入山海關定燕京二年復隨豫親王多鐸破流賊於潼關平定河南江南敘功晉三等男兼

一雲騎尉兩遇 恩詔晉一等男兼一雲騎尉八年三月擢戶部  
尚書四月以尚書巴哈納給餉不均爲駐防河間佐領碩爾對所  
控雅賴坐不行奏 聞論罪罰贖尋罷尚書任康熙三年四月卒  
賜祭葬如例子花色襲

右 國史館本傳



薩穆什喀

薩穆什喀姓佟佳氏滿洲正白旗人扈爾漢第三弟也少從太祖高皇帝征伐積功授三等輕車都尉世職征董夔年率十二人追敵至山下斬百人獲礮五十三人馬牛羊千計 太宗文皇帝卽位列十六大臣佐理鑲白旗事天聰四年從征明灤州率眾射敵獲勝七年隨貝勒岳託等征旅順口由陸地運舟於水眾皆乘馬薩穆什喀建議曰兵旣潛進何乘馬爲於是率眾步行比臨水次鑲黃鑲紅鑲藍三旗所運舟俱未至貝勒岳託謂薩穆什喀曰汝可努力如貝勒命此城誓必得不空返也遂與步軍統領巴奇蘭連舟先入旗進身被百創戰益厲大軍繼進遂破旅順口八月



凱旋 太宗郊勞之 親酌金卮以賜先是薩穆什喀坐事削職至是復世職加一等輕車都尉八年任參領同貝勒杜蘭防守海州十二月奉 命副巴奇蘭往征黑龍江虎爾哈部明年四月降其眾盡取其地俘獲無算敘功加三等男世職授步軍統領崇德元年隨武英郡王阿濟格等征明入長城同額駙蘇納率兵攻容城縣先登克之三年授議政大臣後隨武英郡王攻皮島薩穆什喀督前鋒兵渡江先抵岸與都統阿山葉臣等攻克之斬其守將沈士奎七月敘功晉二等子是月任工部承政四年同刑部承政索海分統左右翼兵往征索倫部有達爾布尼阿哈木都戶白庫都漢必爾代四人於厄庫爾城聚眾抗拒薩穆什喀帥左右翼兵

攻克之隨攻鐸陳不下會佐領薩必圖等引兵來助鐸陳阿撒二  
城兵潛出截戰薩穆什喀設伏敗之斬七十人五年師還 上郊  
勞賜宴旋因征索倫時所得三屯人民不加撫輯以致復叛及博  
穆博果爾兵攻掠正藍旗輜重坐視不救致士卒爲所殺議應革  
職籍沒得 旨削世職免籍家產罰贖以懲薩穆什喀復辨曰博  
穆博果爾攻掠時實率將士五十人擊敗其眾復追里許值右翼  
索海譚布伏兵衝擊二人遂冒吾功 上命王貝勒及議政大臣  
等詳審會議以薩穆什喀巧辨欺誑應論死籍其家 上念其舊  
著勞績從寬宥之部臣追論薩穆什喀駐防海州時知義州山寨  
有敵兵不嚴誠士卒警備以致左翼屯丁多被殺掠依律罰贖明

鞏從睿親王多爾袞征明坐依附王貝勒私遣兵丁歸家及離城  
遠駐復論革職籍沒仍命以罰贖懲之七年復從大兵征明攻  
錦州敵兵來犯我寨柵勢甚銳薩穆什喀力戰三敗敵兵錦州既  
克復騎都尉世職八年以疾卒子羅什襲

右 國史館本傳

納穆泰

納穆泰滿洲正黃旗人姓舒穆祿氏揚古利第三弟也自少從太祖高皇帝征伐累著勳績 太宗文皇帝卽位擢爲八大臣授本旗都統天聰元年隨貝勒阿敏等征朝鮮以功屢蒙 優賞三年 太宗親統大軍伐明令納穆泰率兵攻遵化城北面之西克之四年春同都統圖爾格守灤州明監軍道張春等來攻城納穆泰與圖爾格分兵守禦矢石齊發出精銳繞城轉戰擊敗敵兵驅之濠外敵復突至攻納穆泰所守門焚城樓有執纛立雲梯登城者我兵阿玉什斬之奪其纛敵兵稍卻會貝勒阿敏等怯不赴援敵兵發礮攻城我兵力不能勝遂奔永平隨阿敏棄城歸六月論

罪納穆泰坐敵兵復至時不率兩旗將士擊敵及奔永平不能全軍以還又阿敏退歸不能力阻罪應死 上命免死革職籍其家五年同正紅旗理事大臣布爾吉入明邊緝捕逃人攻拔臺堡獲明哨卒還遇逋叛斬六人執九人以歸是時甯遠人張士粹等來降詭言明築大凌河城工竣納穆泰與圖爾格奉 命率兵千人往覘虛實俘獲而還具奏士粹等姦宄狀遂誅之尋擢兵部承政授三等輕車都尉世職復同圖爾格率兵略錦州松山俘獲甚多八年從征明入上方堡略朔州軍至大同攻王家莊納穆泰先登有功九年 詔統右翼兵隨睿親王多爾袞等往取察哈爾林丹汗子額哲我兵自應州赴平魯衛城內出馬步兵五百列陣邀戰

納穆泰合左翼圖爾格兵衝擊破追之斬百餘人敵又糾合潰兵  
數百據堡列營納穆泰率眾奮擊盡殲其眾敘功加三等男是年  
十月卒子阿哈連襲阿哈連積戰功授騎都尉加一雲騎尉以其  
兄阿拉密襲襲三等男阿拉密緣事降爲一等輕車都尉順治九年  
從征湖南陣亡卹贈復爲三等男

右

國史館本傳

按公名納穆泰一作那木泰



國朝書獻類徵初編卷四十二目錄

卿貳二

蒙阿圖

喀蘭圖

噶達渾

覺羅郎球

滿達爾漢

弟馬福塔 譚拜

碩詹

譚布

佟圖賴 孫法海  
曾孫介福

薩璧翰

興爾

棟阿賚

庫禮

金維城 子世鑑

多爾濟達爾罕

阿哈尼堪

阿喇善

佟國印

哈世屯

補錄



哈世屯

國朝耆獻類徵初編卷四十二

通奉大夫前署江西巡撫江西布政使司布政使湘陰李桓輯

卿貳二

蒙阿圖

蒙阿圖佟佳氏巴篤理之弟初爲佐領隸滿洲正白旗擢本旗副都統列十六大臣以丈量地畝有功授總理糧餉大臣克勤職守晉三等副將由多取田地又以餘地私給漢官及擇各處餘地別立莊屯爲本旗大臣阿山所劾坐削職天聰三年 太宗文皇帝命率官八員兵三百人往征瓦爾喀 諭之曰爾等行軍宜嚴紀律毋妄殺毋劫掠歸附之眾皆編爲民攜還所產貂皮諸物毋織

竊私取蒙阿圖奉命往俘獲男婦三千餘口及牛馬等物凱旋  
太宗至十里外迎勞蒙阿圖遙見卽拜近前復拜行抱見禮禮  
畢設宴太宗以蒙阿圖出征勞苦特撤御膳賜之卽授遊擊  
世職五年任工部承政駐天瑞山一載緝獲逃人無算從征明北  
京擊敗明兵於遵化又征虎爾哈並以俘獲多論功加三等參將  
天聰六年大兵征察哈爾太宗遣蒙阿圖還瀋陽命移餉駐  
遼河加意防護撤回阿巴泰等防禦兵守城及催督喀喇沁人於  
法庫山耕種者尋任工部承政八年考滿晉二等輕車都尉崇德  
三年七月召見諭曰爾今年老且復有疾不必管理部務宜  
閒居調養病痊之日朕當起用爾等舊臣朕見之輒爲心喜仍不

時召見可也未幾卒於家子翁克任護軍參領兼佐領

右 國史館本傳

A large rectangular area with vertical lines, possibly representing a redacted table or a scan artifact. The lines are evenly spaced and run vertically across the page. The background is white, and the lines are black. There is some noise and graininess in the image, particularly along the right edge.

140-548

喀蘭圖

喀蘭圖姓博爾濟吉特氏先世居克呼倫地 太宗文皇帝時隨其兄額爾格勒珠爾率屬來歸隸正黃旗蒙古尋授一等侍衛順治二年 世祖章皇帝以喀蘭圖素荷 太宗眷顧予騎都尉世職七年八月三遇 恩詔晉世職至二等輕車都尉先是睿親王多爾袞請 上幸其第喀蘭圖方退直聞扈從內大臣及侍衛等不及二十人卽持弓矢趨至密爲防衛及睿親王獲罪 上嘉喀蘭圖忠誠賚金帛鞍馬及屯莊改隸正黃旗滿洲晉世職一等後以扈 駕行圍遲誤仍降二等輕車都尉十五年授散秩大臣尋擢內大臣 聖祖仁皇帝康熙八年擢理藩院尙書九年奉 命

往科爾沁烏珠穆沁等外藩會盟十年以老乞休 上念其勞績  
素著允解任仍授爲內大臣加太子太保十二年三月卒 賜祭  
葬如例謚敏壯以其子察琿襲先是察琿已襲額爾格勒珠爾之  
騎都尉兼一雲騎尉世職至是合爲三等男康熙十三年隨安親  
王岳樂討逆藩吳三桂至江西袁州擊賊鈴岡山賊將馬寶領眾  
萬餘列礮拒敵察琿力戰歿於陣議卹追晉二等男 賜祭葬如  
例無子以喀蘭圖弟之子恩克襲爵

右 國史館本傳

噶達渾

噶達渾姓納喇氏世居哈達 太祖高皇帝時有約蘭者率其子  
懋巴里等來歸遂隸滿洲正紅旗噶達渾其裔孫也初任護軍參  
領天聰二年從 太宗文皇帝征多羅特部有功八年從征明山  
西克應州城 賜人戶牲畜崇德五年隨大兵略中後所同護軍  
統領敦拜擊斬敵眾睿親王多爾袞等率師圍錦州令噶達渾領  
纛先進敗杏山騎旋往設伏松山敵至斬十餘人敵據嶺列營擊  
敗之復同前鋒統領勞薩等合兵追襲抵北岡乃還七年隨豫親  
王多鐸征甯遠敵兵出躡我後噶達渾先眾還擊敵潰走師旋有  
護軍達哈塔者中創仆掖之以歸順治元年擢護軍統領從大兵



入山海關破流賊李自成以功授騎都尉世職二年隨英親王阿濟格擊流賊至九宮山凡三敗敵三年隨肅親王豪格征四川師至西安分兵勦邠州賊渠胡敬德結營三水縣噶達渾與副都統和托攻堅直入拔其營復與護軍統領蘇拜哈甯阿副都統阿拉善擊敗高汝礪武大定二賊兵於三寨山用步卒搜勦山谷賊據山巔以拒遣其眾左右馳下迎戰噶達渾與護軍統領阿爾津奮勇斬殺連敗賊眾賊兵復犯正藍旗營哈甯阿被圍噶達渾與阿爾津蘇拜疾馳往援擊卻之又破賊兵於增益尋擢戶部侍郎五年三月調吏部侍郎六月敘功晉三等輕車都尉十二月與阿拉善承命率八旗兵赴英親王軍協討大同叛鎮姜瓖至則七戰

皆捷賊黨自代州北關遁追斬無算遂平代州復渾源州六年擢  
本旗蒙古都統仍任戶部侍郎七年以從睿親王行圍私出射獵  
罷都統任降職爲騎都尉又一雲騎尉 世祖章皇帝親政擢戶  
部尙書明年二月噶達渾訟鑄職寃 詔復職晉二等輕車都尉  
三月改都察院左都御史四月以駐防河間佐領碩爾對許戶部  
給餉不均事下部鞫訊坐隱匿不奏論削世職得 旨改罰鍰五  
月復調戶部尙書九月奉 命率師往征鄂爾多斯部九年擒斬  
叛逆蒙古多爾濟並殲其眾於賀蘭山兩遇 恩詔晉三等男世  
襲調滿洲都統十二年二月尋調兵部尙書十一月奏言京城廣  
闊向設殿塔山以爲信今停止無憑集眾請用盛京時鳴鼓聚眾

之法疏入 詔曰塔山及九門仍各設礮十年三月敘功晉二等  
男八月以濫引赦例請貸行賄之雲騎尉呂忠罪 飭令回奏奏  
復稽遲下王大臣議坐削爵得 旨改降一等輕車都尉會海賊  
鄭成功潛據海島攻陷福州內地 命同定遠大將軍世子濟度  
等統師征討並 賜世子敕曰凡爾調遣官兵勿令噶達渾離左  
右也既至與督臣李率泰等會兵勦撫克復海澄分遣將領水陸  
並進擊敗賊眾克福州下泉州攻惠安之海港衛套及閩安鎮陣  
斬數千級獲戰艦軍械蕩洗賊巢成功遁入海十四年三月班師  
四月卒 賜祭葬 贈太子太保諡敏壯子噶爾漢襲職

右 國史館本傳

覺羅郎球

覺羅郎球滿洲正藍旗人 景祖翼皇帝第三兄索長阿之曾孫也初任理事官兼護軍參領天聰三年從 太宗文皇帝征明燕京以中途逗遛罰鍰奪所俘獲九年大軍征明廣甯郎球同參領圖賴等率兵四百先趨錦州有斬獲功擢刑部承政兼護軍統領進列議政大臣崇德三年睿親王多爾袞征明 上親帥諸王送之豫親王多鐸不至 詔禁王不得出府門是時郎球爲豫親王屬下 上因怒曰朕屢諭郎球王若有過爾當諫諍乃竟諂媚逢迎見王怠玩如此不行規正可速執之既而 上命豫親王同大軍赴山海關牽制明甯遠錦州援兵 諭諸王貝勒大臣曰多鐸

等前罪姑俟班師後議郎球出任職如初會豫親王軍征行失律

上欲申飭其罪 命郎球召王郎球違 命不往 詔解任下廷

議並論前罪明年五月王大臣等以郎球瞻徇隱默復藐視 上

命罪應死籍沒奏 聞得 旨從寬革世職罷任六年隨征錦州

與副都統星訥擊敗松山援兵登山克敵又與參領鼇拜敗敵步

兵論功抵前罪復任參領 命率護軍助內大臣錫翰等設伏高

橋擊敗杏山逃兵追至塔山斬獲甚眾七年授禮部參政旋擢承

政順治元年 世祖章皇帝定鼎燕京郎球任禮部尙書贊定

郊 廟大典二年授騎都尉世職三年隨順承郡王勒克德渾征

湖廣流賊師至石首縣偵知賊欲渡江攻荊州大軍進擊郎球先

率兵趨江濱斷賊後路取賊船千餘賊自荊州敗還不得渡悉爲  
大軍斬獲四年六月考滿晉三等輕車都尉六年授本旗都統兼  
禮部尚書七年四月調刑部尚書先是五年九月鄭親王濟爾哈  
朗統兵之長沙耶球署副都統以隨至是凱旋得 優賚八年正  
月英親王阿濟格有罪耶球坐徇隱罷任削世職籍家產之半明  
年三月復授禮部尚書十月列議政大臣十一年加太子太保尋  
加少保兼太子太保調戶部尚書十三年五月以員外郎朱世德  
虧缺權稅戶部援 恩詔請豁部臣均坐徇庇耶球削少保解任  
康熙五年二月卒年七十有三 賜祭葬如例

右 國史館本傳



滿達爾漢

弟馬福塔

滿達爾漢姓納喇氏先世居哈達父雅虎率十八戶來歸太祖  
高皇帝命爲佐領隸滿洲正黃旗列理事十大臣嘗同大臣哈穆  
達尼征東海卦爾察部俘二千人以歸命設宴郊勞之又以克  
舒桑哈達功賜俘獲人百旣乞休滿達爾漢襲管佐領事從  
太宗文皇帝征虎爾哈部招降五百餘戶天聰五年五月命齎  
敕往朝鮮諭以征明海島令供備舟艦時朝鮮初附懷反覆  
滿達爾漢旣至國王李倬遣兵守其館弗與見越三日滿達爾漢  
謂守者曰我奉命齎諭至此何慢我不相見我歸矣遂偕諸  
使臣控騎行李倬使侍臣追及以願見請乃致書而還七月授禮



部參政閏十一月復同文臣庫爾禪等責朝鮮縱匪越境隱匿逃  
人諸罪李侖乃引咎願輸忱入貢八年 太宗親征明至大同滿  
達爾漢分兵克四堡一臺又攻王家莊拔其城敘功加騎都尉世  
職尋擢禮部承政復奉使朝鮮崇德二年隨武英郡王阿濟格征  
明攻克皮島 賜白金裘馬三年更定官制六部承政各畱一員  
餘皆改爲參政滿達爾漢任承政如故七年五月 命同大學士  
范文程等宴明國議和使臣順治元年 世祖章皇帝定鼎京師  
滿達爾漢以年老解部務專任佐領二年晉世職三等輕車都尉  
遇 恩詔晉二等尋卒 賜祭葬如典禮諡敬敏立碑墓道第十  
子阿哈丹襲職兩遇 恩詔晉一等輕車都尉兼一雲騎尉以一

等侍衛從征福建擊海寇於廈門陣亡康熙二年 卹贈三等男  
以其子武格襲

右 國史館本傳

馬福塔

馬福塔滿洲正黃旗人姓納喇氏初任佐領與兄滿達爾漢分轄  
所屬人戶 太宗文皇帝天聰五年授戶部參政八年三月 命  
同戶部承政英俄爾岱責朝鮮國王李侗罪李侗引咎報 聞五  
月 太宗親征明大同馬福塔隨貝勒濟爾哈朗等畱守盛京九  
月齋奏 行營道出明鐵山路遇明兵邀拒者斬五人俘一人又  
誠一人誠諭縱還遊人憚之尋擢戶部承政九年偕參政博爾惠

商 諭朝鮮自是通使朝鮮馬福塔輒奉 命往崇德元年復同  
英俄爾岱等使朝鮮明皮島兵遮於途盡擊走之還奏得 賜賚  
是年七月部議額駙佟養性嫁女與貝勒岳託子以六十人爲媵  
戶部諸臣弗阻止馬福塔應革任罰鍰得 旨免革任九月以互  
市往朝鮮義州擒獲明哨卒知明兵入嫌場因率百人躡其後明  
兵遁值武英郡王阿濟格等征明凱旋偕諸參領渡遼河備舟艦  
十二月 太宗以朝鮮背盟逆命將統師 親征先遣馬福塔同  
前鋒統領勞薩等將兵三百爲賈人裝晝夜疾馳將至國都其守  
將率兵拒戰我兵奮擊盡殲之李侖爲綏兵計遣其臣至郊外迎  
問馬福塔答以有事欲議其臣曰爲議事而來當啟知吾王以禮

相迎請少待遂閉城不納明日李侗遁往南漢山城追至城下還  
奏 行營明年正月大軍破其國都進圍南漢山城馬福塔兩奉  
敕入城數李侗罪導以輸誠納款侗先使其臣請罪隨率羣僚  
出城乞降具表稱臣二月大軍凱旋李侗跪送於十里外馬福塔  
復奉 命與英俄爾岱送李侗還侗餽以金卻之奏 聞四月隨  
武英郡王阿濟格征明皮島自北隅督戰大捷六月法司議前征  
朝鮮時馬福塔擅攜其子隨往以俘獲諸物先眾齎歸又奪取降  
民鷹與貝子碩託索易婦人私令朝鮮將臣與碩託交結應奪俘  
漢論死得 旨免死罰贖十月復同英俄爾岱齎 敕封李侗爲  
朝鮮國王三年正月戶部承政韓大勳盜取貯庫金銀珍珠馬福

朝鮮國王三年正月戶部承政韓大勳盜取貯庫金銀珍珠馬福

塔以同官弗舉坐罰鍰七月更定官制改授馬福塔爲戶部左參政四年正月部議馬福塔購買官商胡有徵黃金負債未償應革佐領降副理事官得旨宥之六月同刑部參政巴哈納齋敕往朝鮮封李侖妻趙氏爲王妃八月其兄參領福爾丹出征退縮伏法以所籍家產賜馬福塔九月擢戶部承政十一月朝鮮頒上恩德立碑三田渡具表以聞命與禮部參政超哈爾等同往驗視五年二月卒子馬希納襲管佐領

右 國史館本傳

譚拜

譚拜滿洲正白旗人姓他塔喇氏父阿敦官都統嘗從 太祖高  
皇帝征撫順招明遊擊李永芳來降譚拜初任佐領 太宗文皇  
帝天聰五年大軍圍大凌河城明總兵祖大壽遣百餘騎逸出譚  
拜同護軍參領布顏圖追斬三十餘人獲馬二十有四八年以克  
副任使 子騎都尉世職兼任參領九年大軍征察哈爾收其降  
眾遂征明代州譚拜同前鋒參領蘇爾德安達立率四十人伏忻  
口明哨卒三百至擊斬過半崇德元年隨武英郡王阿濟格征明  
敗敵燕京城北趨盧溝橋遇敵復敗之二年同參領丹岱薩蘇喀  
等率護軍驍騎各四十略明邊境次清河敵兵七百拒守奮擊之

續纂藤二並獲其馬三年隨貝勒岳託征明入牆子嶺薄豐潤縣  
城擊敵墮壕殲殪無算復擊敗明太監馮永盛等拒戰兵四年隨  
鄭親王濟爾哈朗略錦州率護軍破敵步兵於城南是年七月敘  
功加一雲騎尉五年授兵部參政六年兼任正白旗蒙古副都統  
七年冬隨貝勒阿巴泰征山東攻利津縣克其城八年春出邊遇  
明總督趙光抃范志定總兵吳三桂白廣恩等邀戰率本旗兵戰  
皆捷凱旋 賚白金是年十月敘功晉世職三等輕車都尉 世  
祖章皇帝順治元年隨大軍入關定燕京三年擢兵部尚書尋隨  
肅親王豪格征流賊張獻忠過陝西同都統瑪喇希等擊敗叛鎮  
賀珍於鍾頭關進次四川屢擊敗賊忠賊眾復同都統李國翰渡

涪江擊敗賊渠袁韜四年遷吏部尙書先是敘入關定燕京功並  
以考滿兩晉世職爲一等輕車都尉及獻忠滅晉爵三等男嗣遇  
恩詔晉二等男七年三月卒子瑪爾賽襲爵別有傳

右 國史館本傳



國朝才學考卷之八

三

碩詹

碩詹滿洲正紅旗人世居納殷姓富察氏父舒穆祿 太祖高皇帝時授佐領既卒碩詹仍其任尋兼參領 太宗文皇帝天聰五年同參領杭什木沙爾虎達等略明邊境斬三人擒哨長一哨卒五以歸八年以克副任使 子騎都尉世職崇德元年 太宗親征朝鮮克其國都國王李倬遁南漢山城進師圍之偵倬妻子在江華島分兵攻取碩詹乘船渡海衝越朝鮮戰艦繼佐領阿哈尼堪登島岸率眾攻圍降其城敘功加一雲騎尉三年七月兼任刑部理事官八月隨貝勒岳託征明由牆子嶺毀邊牆入越燕京略山東攻克禹城縣及平陰縣明年春旋師出邊敵襲我後營碩詹

同巴圖魯尼哈里等擊卻之敘功晉三等輕車都尉是年九月許  
本旗都統都類征明山東時索降城中財賄又於濟南府私發明  
德藩埋藏珍玩攜歸下法司鞫實革都類職籍財賄入官 命以  
其半資碩詹尋擢戶部參政五年三月大將軍征明錦州 命碩  
詹赴朝鮮國安州徵其糧艘及水師由旅順口至大凌河還報稱  
旨秋隨大軍圍錦州我參領禧福率甲士二十四駐守駱駝山  
敵以步騎四百乘夜劫掠碩詹聞警趨援同禧福斬敵二百餘獲  
馬十六七年管正紅旗滿洲副都統事 世祖章皇帝順治元年  
四月隨睿親王多爾袞入山海關擊敗流賊李自成既定燕京改  
參政曰侍郎碩詹仍任戶部八月 上將遷都燕京 命碩詹統

右翼兵畱守盛京十月隨豫親王多鐸由河南征陝西二年正月  
擊敗自成迎戰賊眾連破賊營克潼關進取西安復隨征河南江  
西是年敘山海關功晉二等輕車都尉明年敘河南陝西江南功  
晉一等四年考滿加一雲騎尉五年隨鄭親王濟爾哈朗征湖南  
時衡州府爲明桂王朱由榔之將所踞六年四月碩詹同都統佟  
圖賴伊拜等自湘潭進征距城三十里賊千餘據橋立寨碩詹督  
兵擊敗之進奪賊寨斬僞總兵陶養用遂定衡州七年凱旋 賜  
白金三百兩兩遇 恩詔晉爵一等男八年駐防河間佐領碩爾  
對訟戶部給餉不均部臣並坐降革碩詹降世職爲一等輕車都  
尉復遇 恩詔加一雲騎尉九年以老病罷侍郎及副都統任十

年 上命碩詹前此因給餉事降世職處分過重仍復一等男康熙二年卒年六十有四 賜祭葬如典禮諡明敏以其孫達色法色分襲世職並授二等輕車都尉達色尋任參領十七年隨征福建剿海賊鄭錦屢擊敗偽將軍劉國軒吳淑等拒戰賊眾會國軒糾賊萬餘犯海澄縣達色赴援身冒槍礮力戰聞城陷自經死詔如陣亡例子恤加一雲騎尉無子以世職予其弟法色併襲改爲一等男兼一雲騎尉

右 國史館本傳

譚布

譚布滿洲正黃旗人姓舒穆祿氏揚古利從弟也初任佐領天聰五年 太宗文皇帝統師征明圍大凌河城明兵出城樵採譚布時爲護軍叅領率先邀擊斬三人生擒二人復同佐領希福等擊敗明錦州援兵崇德三年列議政大臣四年十一月奉 命隨承政薩穆什喀索海等征索倫部取道虎爾哈部同諸將攻雅克薩城獲丁壯三百餘索倫部長博穆博果爾迎戰擊卻之護所獲以歸五年三月奏凱分 賜貂皮及人戶授騎都尉世職尋擢副都統時我兵屯田義州譚布同副都統覺善等奉 命駐防其地值明兵突出山寨肆掠屯丁有被害者論駐防諸將罪罰如例六年

隨大兵圍明錦州掘長壕駐守明總兵祖大壽遣步兵出城來犯  
護軍統領噶布喇戰失利譚布衝入敵陣戰卻其眾復擊敗敵騎  
斬其材官一明總督洪承疇集眾松山援錦州譚布隨其兄都統  
譚泰迎擊破其步兵三營既而敵騎屢犯我右翼營譚布皆奮戰  
挫敵明年敘功加一雲騎尉 上幸牧馬所 命諸大臣與降將  
祖大壽等較射獎賞有差譚布得 賜駝一八年正月 命同覺  
善率兵駐守錦州九月隨鄭親王濟爾哈朗征明甯遠敗其拒戰  
兵 世祖章皇帝順治元年隨大將軍入山海關擊敗流賊李自  
成追至望都晉世職爲二等輕車都尉二年隨饒餘郡王阿巴泰  
鎮守山東勦平滿家洞賊巢同都統準塔進征徐州連敗明兵獲

船五百餘紅衣礮五十有七時豫親王多鐸統師自河南進征由泗州渡河趨揚州下江甯而明總兵劉澤清總漕田仰等尙踞淮安譚布同準塔率兵至清江浦澤清及仰俱遁遂定淮安招降附近城邑分兵勦平如皋通州賊眾敘功晉一等輕車都尉加一雲騎尉三年隨肅親王豪格征流賊張獻忠屢擊敗拒戰賊眾五年凱旋以在軍中時不勘決參領希爾根爭功狀議罰上命寬免六年隨端重親王博洛討叛鎮姜瓖圍大同城瓖潛結賊黨外援倚北山偪我軍自糾眾出城來犯譚布同護軍統領噶布喇車爾布等先破賊援還擊卻瓖入城斬殪甚眾又分兵勦滅賊黨於太原平陽汾州先是譚布以不禁其妻信魘魅術削雲騎尉遇恩



詔復之及大同平敘功晉三等男世襲復兩遇 恩詔晉一等男  
八年三月擢工部尚書時譚泰任吏部尚書專擅是年八月伏誅  
詔免其兄弟連坐罷譚布尚書任尋甄別譚泰任吏部時援

恩詔優加世職譚布仍降三等男康熙四年卒子喀岱襲爵

右 國史館本傳

佟圖賴

係法海

曾孫介福

襄勤公諱佟圖賴初名盛年後改今名遼東人其先爲滿洲世居  
佟佳以地爲氏後以貿易居開原繼遷撫順遂家焉父忠烈公佟  
養正天命初因從弟佟養性輸款於太祖導大軍克明撫順忠  
烈公遂挈家并族屬來歸隸漢軍正藍旗後忠烈之孫曰國綱於  
康熙二十七年疏言臣先世本係滿洲曾蒙太祖皇帝諭令與  
佟佳氏之巴篤理蒙阿圖諸大臣考訂支派敘族譜今請仍歸滿  
洲事下部議以佟姓官職甚多應仍隸漢軍惟國綱本支許改入  
滿洲遂爲鑲黃旗人天命六年忠烈公從征遼陽以功授輕車都  
尉世職奉命駐守朝鮮界之鎮江城時城守中軍陳萬策潛通

明將毛文龍詐令謀者稱兵至各堡皆呼譟城中大驚萬策乘亂  
據城叛忠烈公被執不屈死之長子佟豐年并從者六十人皆被  
害 詔以次子佟圖賴襲世職卽襄勤公也天聰五年從征大凌  
河破明監軍道張春援兵有功授兵部右參政崇德五年隨睿親  
王圍錦州取白官屯六年隨鄭親王復圍錦州取金塔口三臺七  
年攻松山城明人突出騎兵奪我紅衣殿公擊敗之又敗山口步  
兵攻塔山杏山下其城晉世職爲一等擢都統是時各軍多奉  
命分略明邊公以爲不若深入明境直取燕京乃與都統李國翰  
等奏言天意歸於 聖主大統攸屬明國人心搖動宜因天時順  
人事攻拔燕京控扼山海則萬世之基由此而定 上以大兵不

克關外四城何能卽克山海 優旨開諭之八年隨鄭親王收前屯衛中後所二城加一雲騎尉順治元年與都統巴哈納石廷柱招降山東府四州七縣三十有二擒明濟王七月師圍太原公獨率數騎東西繞城相形勢城中兵突出且邀擊之來若風雨從騎皆失色公控馬大呼目光如電敵兵當之盡靡引北將入城大軍一麾乘之城遂破實奇捷也遂招降府九州二十七縣百四十有一師還 賜白金四百兩尋隨豫親王勦流賊李自成屢破賊於黃河岸毀其柵獲戰艦十五遂平河南二年五月軍次江南敗明舟師於揚子江先後攻揚州及嘉興諸城皆下之晉爵二等男賜蟒服黃金三十兩白金千五百兩五年授定南將軍與都統劉

之源帥左翼漢軍駐寶慶時湖南賊渠馬進忠等寇衡湘辰永間  
陷寶慶公至擊破賊眾拔其城六年鄭親王帥師征湖廣公分兵  
趨衡州所向皆捷陣斬偽總兵陶養用破偽伯胡一清等七營兵  
於城南乘勝疾擊連敗之一清窮竄集潰眾萬餘距廣西全州三  
十里立六營以自保又破之遂下全州還師駐衡州賊犯常甯遣  
佐領陳天謨等馳勦之戰於石鼓洞賊大敗斬其渠二人八年凱  
旋 賜宴得 優賞授禮部侍郎晉爵三等子世襲罔替十三年  
請老 世祖篤念前勞 命加太子太保許致仕十五年薨年五  
十有三 子祭葬 贈少保兼太子太師諡襄勤子二國綱國維

右事略李元度撰

法海

法海滿洲鑲黃旗人姓佟佳氏祖圖賴都統議政大臣一等公諡  
襄勤父佟國綱都統內大臣一等公諡忠勇 贈太傅均有傳法  
海國綱次子也康熙三十三年進士改庶吉士 命在南書房行  
走三十七年授檢討上書房行走三十九年三月充日講起居注  
官四十四年五月遷侍讀學士五十五年十月擢廣東巡撫五十  
七年正月疏言沿海官員向有遊巡之例請輕裝減從由粵東至  
浙江江南等處查勘海道 上特允所請四月疏言雷州府屬遂  
溪海康二縣近海洋田萬頃設隄岸包圍因年久未修致潮溢侵  
田今見任福建巡撫陳瓊奏請修築 敕臣查明臣查二縣東洋

塘隄岸十七處水閘十三處向用土築今請改木石工可免隨時  
修築之勞 從之先是廣東巡鹽御史常保奏因欠課撤鹽政交  
督撫專管至是法海奏廣東鹽務緊要不可無專轄之員請仍遣  
御史會撫臣督徵下部議行八月 上覽法海請安奏語意似病  
癩 命九卿詢明議奏尋議法海患噎膈不勝封疆重寄請革職  
詔赴西甯軍營效力雍正元年 召還 命提督江南學政二  
年十一月授浙江巡撫時兵部右侍郎牛鈕請酌裁各站驛馬額  
數變價充餉 敕下各省督撫詳查議奏三年四月法海奏言浙  
省驛站從前酌定衝僻設兩差馬百匹分隸嘉興秀水石門仁利  
錢塘五縣所屬西水阜林吳山浙江四驛無可再減惟查仁錢二

縣各馬十八匹吳山浙江二驛各十二匹應差相同馬數稍有多寡應將仁錢二縣各撥三匹入吳山浙江兩驛各設十五匹其嘉秀二縣共一西水驛每縣各十五匹石門縣之阜林驛祇十四匹應將嘉秀二縣各撥五匹入阜林驛則西水阜林各二十四匹多寡適均至養馬募夫歲需銀二千九百餘兩今以仁錢二縣每匹日支銀六分每夫日支銀三分適中之數爲準一例支放實減衝餉銀二百三十兩有奇下部議行六月疏言吳上大夫伍員唐武肅王錢鏐宋安濟公張夏實爲浙江江海保障之神明紹興府知府湯紹恩勅建三江閘有功其地請各加封修廟歲春秋致祭得旨  
伍員封英衛公錢鏐封誠應武肅王張夏封靜安王湯紹恩封甯



江伯八月 諭曰法海操守頗好但人性情偏執於外任不相宜  
著調來京是月署兵部尙書十二月授左都御史四年二月授兵  
部尙書充繙譯鄉試正考官七月 命協理禮部事兼內務府總  
管十二月 諭曰法海本無能之人 聖祖仁皇帝加恩擢用獲  
罪革職發往軍營效力伊至西林遂與允禩私相交結允禩貪縱  
不法之事法海並不勸阻朕卽位後令允禩來京法海乃效力廢  
員未奉朕旨卽潛至京師且諂附年羹堯稱爲天下豪傑其所言  
之狂悖如此朕近命法海往西甯搬塞思黑家口伊竟不請訓旨  
冒昧前往及至保定又不候朕旨擅將塞思黑家口帶領來京強  
交內務府收管種種不法悖亂妄行著革職拏問五年閏三月王

大臣等議照大不敬擬斬決 特旨從寬免死發往察罕托渾在  
水利處效力九年十二月 命回京乾隆元年五月給副都統銜  
協理咸安宮事務二年五月卒

右 國史館本傳

康熙癸巳 詔修樂律厯算書特開 蒙養齋 命皇子董事余  
與徐公蝶園承修樂律開叩同官及勳戚中志在君國而氣足以  
舉之學足以濟之者首推法公淵若且曰 上爲諸王擇傅吾對  
法某雖以侍 皇子得過而臣愚心竊謂舍某無堪此者乙未夏  
公復侍 皇子始見余卽曰吾與子未面而心傾久矣然子頗知  
並世有法某否時中貴人有氣倖者朝夕傳 旨非命事專及於

余不敢交一言而公則視之蔑如辭色間無幾微假借乃與公爲友逾歲公巡撫廣東旋奉命巡察海疆歷粵閩兩浙江南以使事歸報懇請削職赴西邊敵愾越八年雍正甲辰余請假歸葬而公督學江南時叩吾廬出所爲詩以心腑相示始知公忠孝發於至誠體國愛民常恨未得同志合道人相與輔成治教而深患時人惟知以虛僞比周自便其身圖公自爲庶常即荷聖祖仁皇帝特達之知以檢討擢侍講學士及中廢復起驟越班行開府廣東及聖祖登遐公自西邊入臨世宗憲皇帝旋命校士江南移撫浙江入爲大司馬天下士皆想望風采而公益以國事爲己任然居津要者多畏公伉直深心嫉之世宗憲皇帝亦微見其

然以公爲勳戚故舊聽公閒居眾謂實相保全以待異日之大用也公時寓居古寺終歲不還私室余數過從見公疏布羊裘從者老僕一人脩然若有以自得者 今皇帝嗣位大司空來公學圃掌教咸安宮官學生引公與故大司空赫公自助時余以 先帝之喪入宿 武英殿直房踰再期公與赫公時冒風雪扶杖過余講問移時余陰喜二公雖老天或畱之而尙有以爲而赫公旋以疾乞休公臥疾不起病既深余往問俯仰平生毅然也已而相視泫然公之歿也命家人毋作狀誌故出秉節鉞入爲九卿訐謨美政胥無傳焉惟在廣東特參大吏更鹽政粵人至今思之而蝶園言公爲近臣 上時巡齊魯秦晉吳越朝夕扈從侍 皇子講誦

十年直辭正色 聖祖嘉與謂獨能不欺又自西邊歸者言公偃臥土室枯寂如老僧而見王公大帥時以大義相責皆人所不敢言嗚呼公之誠心義氣動於 君信於友朋者豈偶然哉公諱海元舅忠勇公諱國綱之次子也癸酉舉京兆甲戌成進士母他塔拉氏 誥封一品夫人生母徐氏妻崔氏 封贈如公階卒年六十有七無子以兄子介祿嗣後九年兄子介福督學江南安徽諸郡以叔父慶上公選刻公詩請表嗚呼根於忠孝剛正之氣不可屈撓者公之學也詩豈足以傳公之學哉然讀其詩足以發人忠孝之心則亦其學之誠而形者乃流涕而爲之書

右墓表方苞撰

介福

介福佟佳氏滿洲鑲黃旗人父國綱鑲黃旗漢軍都統襲一等公爵自有傳介福雍正十一年進士改庶吉士十三年 命在南書房行走乾隆元年散館授檢討二年大考二等擢侍講尋充日講起居注官四年 上御乾清宮西暖閣 賜羣臣宴賦柏梁體詩賞箋硯筆墨有差介福與焉五年轉侍讀六年 命提督陝甘學政八年調安徽學政九年七月奏鳳陽府屬之鳳陽鳳中長淮三衛童生考試應照新安建陽各衛之例令於該衛守備處報名造冊錄送提調轉送學政並令該衛廩生認保如無廩生卽令增附生互相稽察以杜頂冒等弊下部議行十二月差滿回京十一

年二月遷太僕寺卿四月擢內閣學士兼禮部侍郎銜九月授盛  
京刑部侍郎十二年以中後所佐領色泰吳宗元分受海運陋規  
按問如律並查明該旗員役向多染指之處請 飭下盛京將軍  
奉天府尹衙門凡屬沿海一帶地方嚴飭該管官將向來所有陋  
規悉行革除報 聞十三年閏七月調吏部右侍郎仍在南書房  
行走十月充武殿試讀卷官十四年正月充經筵講官十二月轉  
左侍郎十五年正月以前在盛京刑部侍郎任內失察郎中錫林  
等玩法婪贓降二級調用二月授禮部左侍郎十二月復充經筵  
講官十六年充會試副考官十七年二月兼管內閣學士事務三  
月充順天鄉試副考官尋兼正紅旗蒙古副都統九月充殿試讀

卷官十八年調正紅旗滿洲副都統十九年三月復充會試副考官五月充教習庶吉士二十年以瞻徇議准尙書王安國左都御史楊錫紱之父入祀鄉賢祠降二級畱任七月兼翰林院掌院學士二十一年六月充江南鄉試正考官十月 命偕尙書伍齡安管理太常寺事務二十二年正月充 玉牒館副總裁三月復充會試副考官五月復充殿試讀卷官十月充上書房總師傅尋以湖南巡撫蔣炳訊擬已革藩司楊灝侵肥剋扣一案未入情實秋審時九卿蒙混照覆介福下議降調 上加恩改爲畱任二十三年偕漢掌院學士蔣溥疏陳功臣館事宜先是雍正二年 命翰林院纂輯 國初以來陣亡將士事蹟爲功臣傳以冊檔行取未



齊且無專員經理迄未成書至是準噶爾平介福等請自雍正十三年以前統爲一集乾隆九年至二十三年續爲一集嚴立課程速行纂辦並查照文穎館例辦理如所請行二十四年充浙江鄉試正考官二十五年三月復充會試副考官五月復充殿試讀卷官八月復充順天鄉試副考官二十六年復充教習庶吉士二十七年三月充 召試閱卷官閏五月卒

右 國史館本傳

介野園少宗伯福嘗四主會試四主鄉試其他 殿廷衡文不可枚舉嘗有 恩榮宴詩云鸚鵡新班宴 御園摧頽老鶴也乘軒龍津橋上黃金榜四見門生作狀元于文襄公亦嘗贈以聯曰天

下文章同軌轍門牆桃李半公卿可謂儒官榮遇宗伯後以隨扈南巡道卒先一夕有大星實於舟前殆天上奎婁紅塵小謫來助昌明之文運歟

今各省鄉試官生卷什九呈薦其事始於富陽董文恭公以官生應試時乾隆庚辰秋劉文定公與介野園少宰典京兆試有同考官某素識文恭名得一卷呈介公公不取某曰觀其詞采富麗必董公子也

時文恪公邦達在朝

介公大怒曰科場法至嚴肅果爾卽奏

聞賴文定力爲寬解乃悉取官卷付介公去取自此沿爲成例順天鄉試官生卷遂盡呈主考而外省亦然矣是科揭曉後文恪公聞文定闈中排解事退朝卽率文恭踵門謝命稱弟子見文定孫

國朝通志卷之五十一

三

禮部集記董文恭公遺事

右紀聞陳康祺撰

薩璧翰

薩璧翰滿洲正藍旗人姓納喇氏先世居輝發父三檀 太祖高皇帝時率屬來歸任佐領既卒薩璧翰與其兄薩珠瑚並授佐領 太宗文皇帝卽位以薩璧翰列十六大臣管正藍旗副都統事 天聰五年擢戶部承政是年八月從 上征明圍大凌河城明總兵祖大壽遣兵出城來犯薩璧翰舍騎步戰逐敵薄壕獲馬一敵突於城上發礮矢我軍士巴遜歿於陣薩璧翰衝入敵陣取其屍以還八年五月 上親征察哈爾以貝勒濟爾哈朗畱守盛京薩璧翰同副都統蒙阿圖副之十一月考滿 予騎都尉世職崇德二年大軍征朝鮮及明皮島凱旋薩璧翰同兄薩珠瑚首貝子碩

託隱匿貝勒岳託所產馬又以死於皮島之廝役六人詭稱甲士  
冒領賞賚碩託坐罰鍰薩璧翰族屬初隸碩託下至是奉命改  
隸饒餘貝勒阿巴泰會薩璧翰之從子侍衛吳達禮隨征朝鮮私  
攜蓋州駐防甲士爲廝役事覺薩璧翰坐失察革世職三年裁六  
部承政各一員改薩璧翰爲吏部右參政四年列議政大臣六年  
八月隨大軍圍明錦州明援兵自松山誘戰薩璧翰被創卒於軍  
長子漢楚哈承管佐領次子哈爾沁亦任佐領康熙十三年擢護  
軍參領隨大軍討逆藩吳三桂攻沅江縣被創賚銀五十兩先  
後得功牌三十六三十五年隨撫遠大將軍費揚古征噶爾丹戰  
於昭莫多有功子雲騎尉世職漢楚哈子哈爾弼任一等護衛

康熙十八年隨甯海將軍喇哈達擊海賊於廈門歿於陣亦  
雲騎尉世職

右 國史館本傳

匡  
身  
言  
鳳  
奕  
名  
牙  
素  
身  
口  
一  
一

三

興甬

興甬滿洲鑲白旗人姓納喇氏世居哈達地父素巴海 太祖高  
皇帝時率二百人來歸編佐領令其長子莽果統之興甬素巴海  
第三子也受知 太宗文皇帝天聰八年 予騎都尉世職崇德  
元年隨英親王阿濟格征明同都統達爾罕攻順義縣先登克城  
敘功加一雲騎尉三年任工部理事官考滿晉世職三等輕車都  
尉 世祖章皇帝順治元年隨大軍征流賊李自成至陝西賊眾  
自延安府出犯興甬率眾截擊大敗之二年追勦自成於武昌躡  
擊之富池口獲其船賊黨整眾據河岸拒興甬同護軍統領哈甯  
阿參領希爾根擊潰其眾又同護軍參領布克沙至江南池州府



明總兵黃蜚乘舟拒戰我兵奮擊潰走斬首二百級獲船十二三年蘇尼特部落騰機思等叛奔喀爾喀興鼐隨豫親王多鐸率兵追之敗土謝圖汗及碩類汗兵敘功晉世職二等輕車都尉七年擢工部侍郎尋以考滿並三遇恩詔晉至二等男爵十五年以會勘出征福建將士在羅源縣敗遁事徇情定讞罷任革世職十八年聖祖仁皇帝卽位以興鼐處分過重復予世職一等輕車都尉兼一雲騎尉康熙三年九月卒子成格襲世職其兄莽果之孫喀爾奇於順治十六年以護軍校隨安南將軍明安達禮駐防荊州聞海賊鄭成功犯江甯率兵赴援敗偽都督楊文英於揚子江口康熙十三年署護軍參領隨安南將軍希爾根討逆藩耿

精忠師次南昌賊已陷建昌撫州因督兵圍撫州敗賊於四十里塘堡地十四年僞都督楊益茂踞九江府七里岡喀爾奇偕眾戰卻之尋擊敗僞將軍邵聯登復建昌府城時逆賊吳三桂據湖南其黨夏國相陷萍鄉喀爾奇隨大軍進征國相敗走遂趨長沙破僞總兵謝勝先於瀏陽十七年隨貝子彰泰敗僞將軍吳國貴於武岡州凱旋敘功 子雲騎尉世職尋卒子喀爾岱襲

右 國史館本傳

國朝通志卷之六十一

三

棟阿賚

棟阿賚姓蒙郭氏滿洲鑲白旗人初任護軍參領 太宗文皇帝  
天聰八年隨都統阿山征明錦州敵列營城南山岡棟阿賚先眾  
衝擊破其步兵營崇德三年隨貝勒岳託征明由牆子嶺入邊擊  
敗明總督吳阿衡軍五年隨豫親王多鐸圍錦州設伏擊敗塔山  
援兵六年四月隨鄭親王濟爾哈朗圍錦州我軍分伏於錦州南  
山西岡及松山北嶺而令前鋒兵誘明援兵之自杏山至松山者  
敵至棟阿賚率眾奮擊斬獲無算又破敵營於松山北岡九月大  
軍圍明總督洪承疇巡撫邱民仰等於松山城城內兵逸出棟阿  
賚率兵追擊殲之敵步兵乘夜出城犯我鑲黃旗汛地復奮擊敗

走追越城濠而還八年四月同護軍統領阿爾津哈甯阿等征黑  
 龍江湖爾哈部攻克博和哩諾爾噶勒都里三屯招降大噶勒達  
 蘇小噶勒達蘇二屯又進圍綽庫禪能言勒二屯俘丁壯百人師  
 還 賚貂皮及白金九月隨鄭親王征明甯遠城內兵出戰棟阿  
 賚率護軍四十人奮擊明兵遁走遂進克前屯衛城復同護軍統  
 領阿濟格尼堪布善等攻拔中前所城 世祖章皇帝順治元年  
 正月兼任刑部理事官二月敘錦州甯遠功 予雲騎尉世職四  
 月隨睿親王多爾袞入山海關敗流賊李自成二年正月敘功晉  
 世職為騎都尉三年擢正黃旗滿洲副都統是年隨順承郡王勒  
 克德渾征湖廣擊敗自成餘黨一隻虎等於荊州凱旋 賚白金

四年正月 命率兵駐防杭州既至遭兵勦滅孝感縣東柏山土賊時海賊鄭彩等寇掠福建十一月棟阿賚奉 命同侍郎辰泰統兵征勦五年師至建甯連敗賊將曹大鎬傅國用張耀星等復建甯府城及同安平和二縣鄭彩聚賊船千餘踞長樂連江二縣棟阿賚辰泰及副都統李率泰等分兵進擊盡驅出海又勦其餘黨於興化擒偽總督顧世臣等十一人斬之其被賊脅從城邑亦皆就撫六年 召還京授都察院參政兩遇 恩詔並敘平福建功晉世職至一等輕車都尉八年二月卒子棟山襲職

右 國史館本傳



庫禮

庫禮滿洲正白旗人姓喜塔臘氏 國初有昂果都理巴顏者來歸其四世祖也庫禮逮事 太宗文皇帝崇德初朝鮮臣服歲以兵從我師征討庫禮嘗奉 命統其軍五年睿親王多爾袞等征明圍錦州 上遣戶部參政碩詹徵朝鮮水師五千及米萬斛赴大凌河濟師庫禮與副都統洪尼喀率三十人導其舟以行明年復隨鄭親王濟爾哈朗圍錦州克其郭斬八百餘級復同前鋒統領薩穆什喀攻松山北崖庫禮率朝鮮兵二百餘人奮勇先登克焉有科爾沁降明蒙古兵來犯礮傷庫禮手不爲動卒與朝鮮兵併力破敵從攻松山敵襲我正紅鑲藍二旗汛地庫禮同左翼將



領勒卜忒擊退其眾斬獲甚多 上嘉其功賞所獲牲畜授騎都尉世職七年擢戶部參政 世祖章皇帝順治元年改定官制庫禮仍任戶部侍郎以聽從豫親王多鐸擅集視八旗女子論罪輸罰鍰二年敘克燕京功加一雲騎尉尋奉 命往淮安總理漕儲四年九月鹽城土賊潛訑庫禮會漕運總督楊聲遠親往撫慰民心始定無何賊渠周文山等率其黨八百餘人夜襲淮安從夾城東門缺口突入偪庫禮衙署庫禮率中軍張大治旗鼓王國印暨帳下數十人挺身迎擊發矢揮刃大呼殺賊其妻悉出署中所存箭使僕婢齋送助戰眾皆以一當百自丑至辰斬殪甚眾賊大驚奔潰復追斬百八十餘級盡收其偽印劄兵械等淮城獲全賊渠

偽益王朱隆武者時襲據廟灣城糾醜徒數千船百餘乘間將窺淮庫禮與楊聲遠等議曰賊勢橫非出奇設伏不足制其死命乃遣兵分布要害賊謂無備也方揚帆直上至車家橋伏發步騎四起水陸蹂躪賊被刃及溺死者過半獲偽印劄及舟楫器械無算餘遁歸廟灣庫禮復集眾議以都統張大猷巡撫陳之龍分統水陸官軍直趨廟灣羣逆望風竄匿於是次第剿撫劉莊場等十巢旬日之內根株肅清鹽城廟灣民各復業事 聞得 旨嘉獎以考滿晉三等輕車都尉未幾回戶部侍郎任七年乞休 予致仕屢遇 恩詔晉世職一等輕車都尉又一雲騎尉尋卒 賜祭葬如典禮諡僖恪子堯泰襲

右 國史館本傳

金維城子世鑑

金維城漢軍正黃旗人總兵金玉和之子初由侍衛授參領 太宗文皇帝崇德元年大兵征明錦州維城奉命同副都統金礪督運京糧三年任兵部副理事官四年擢鑲白旗漢軍副都統五年隨鄭親王濟爾哈朗圍錦州明兵自城出戰維城同都統石廷柱率兵擊卻先後攻克其臺十有八屢敗松山杏山敵眾六年松山兵來奪我紅衣礮擊之遁七年錦州下移師攻克塔山杏山城維城皆在事有功 予雲騎尉世職是年六月調正白旗漢軍副都統兼任兵部參政十二月奉命率漢軍馬步兵四百駐防錦州八年隨鄭親王征明甯遠克中後所前屯衛二城敘功晉世職

爲騎都尉 世祖章皇帝順治元年定燕京改六部參政曰侍郎  
維城仍任兵部侍郎兼副都統四年考績加世職一雲騎尉五年  
隨鄭親王征湖廣六年攻克湘潭縣趨寶慶擊敗偽總兵馬進忠  
王進才袁崇第等追剿至武岡沅州靖州俘斬無算七年凱旋得  
優賚遇 恩詔晉世職至一等輕車都尉九年調正黃旗漢軍  
副都統十年以總兵任珍擅殺懼罪行賄兵部事覺部臣均坐降  
革維城罷任降世職爲三等輕車都尉十五年卒長子世需襲職  
次子世礪初任佐領康熙十七年隨平南大將軍賚塔征福建擊  
敗海賊於江東橋太平寨諸處十八年賊將劉國軒合眾萬餘犯  
漳州世礪督兵進戰中流矢歿 賜卹 子雲騎尉世職孫興祚

龔雍正七年以世職入祀昭忠祠

右 國史館本傳

金世鑑

國家受命七十餘載文教誕敷武功赫濯中外臣鄰罔不恪恭砥礪以贊至治而豐鎬望族累葉濟美者尤光炳史冊如奉天府尹萬舍金公其最著者也公以門廕入仕歷官有聲凡八遷而至工部侍郎及註誤左遷又四遷而爲京兆尹甫一載遘疾而卒余爲學士時曾與公同官知公爲深公子瀚等將葬公鐵嶺之陽以耐先兆持狀乞文於余余不敢以不敏辭按狀公諱世鑑字萬舍其先世居臨濠有宦於遼者遂占籍鐵嶺祖諱玉和當 太祖高

皇帝龍飛之際攀附鱗翼仕至禮部尙書授一等阿思哈哈番世襲豐功偉烈具在 國史祖母宿氏周氏俱 封一品夫人父諱維城仕至兵部左侍郎兼副都統母郎氏 封一品夫人侍郎子六人公居第五少秉粹姿卓犖不羣旣長好讀書諸子百家無不博涉尤精於天官家言康熙六年授刑部他赤哈哈番持論斷事迴越於眾以是顯名十年遷通政使司知事十二年典銓者知公才特請於 朝進文選司員外郎不激不隨銓政釐舉十六年出權天津關稅事竣吏抱贖進曰此額外餘羨也公喟然曰 國家設關雖云抑末然商賈困億已極司權者不能利民而忍自利耶悉以歸度支十七年五月進刑部郎中閱一載獄無冤民而 朝

廷稔聞公權關之政以公才宜居要職遂擢江南道監察御史會  
地震公條上五事具言陰陽災沴由人事怨鬱於下而後天變感  
應於上今大小臣工不可謂不上負 朝廷下負生靈矣仰請乾  
斷勸善懲惡以弭天變十九年 上以內閣官屬職司文翰召諸  
曹郎試滿漢學士於 廷公得優擢授內閣侍讀學士二十一年  
七月進學士兼禮部侍郎公外若木訥而遇事陳奏辨理析微深  
中窾綮 上時顧而領之十一月纂修 太宗文皇帝實錄成  
恩賜表裏加俸一級十二月授工部右侍郎是時海氛雖靖而邊  
界之禁未弛民多失業二十二年有 詔分遣大臣巡歷海疆察  
其地之可以畀民者悉與清理於是公偕副都御史雅公越江浙



同地方大吏徧閱沿海形勢因歎海濱餘黎凋瘵日甚假使結桴而漁亦何至觸冒禁網而顧令坐困若是遂奏請復溫台甯三郡界外民田九十餘頃鹽田七萬四千七百畝有奇要害地應設防者仍分兵戍守其餘一切奏罷以省冗食自是棄田盡墾營制亦定民生安堵僉以爲子孫百世之利二十三年以管理錢法牽連被議左遷光祿寺少卿久之轉大理寺丞太僕寺少卿二十七年四月擢奉天府府尹十月遇 覃恩授通議大夫畱都旗民錯處習尚漸澆公察利弊諮疾苦勤拊循嚴教誡不鉤距而奸無不聞不市惠而澤無不渥匝歲之內都人戴之如慈父母願勞苦積鬱結輶於中忽食次疾作竟不起康熙二十八年五月二十六日也

距生順治四年十一月初七日享年僅四十有三公生平以氣節自許不肖詭隨徇俗每大廷集議意有不合輒用兩議上請事主以誠交友以信接士以謙御下以禮雖忌者亦傾心折服而持己廉潔尤出天性尹京時一屬吏鄉產茶親齋餽公溫語慰謝之固請終不受其人歎息而去比卒家無餘儲不能具含殮戚友咸悲感致賻而遼之士民奔走號泣如喪私親所在釀錢設像爭爲祠以祀公嗚呼使天不靳以年俾得竟其用其所設施當益焜耀而竟止於此是可悼也元配張氏總督福建兵部尙書諱朝璘女繼白氏總督三省兵部尙書諱秉貞女俱 贈封淑人又繼克爾德氏兵部掌印郎中諱卜書庫女 封淑人子二長瀚次瀆女一

適廣東雷廉道僉事蘭公諱一元子候補筆帖式梓銘曰  
暨聞我遼水湯湯篤生碩哲實爲 國光崇論閎議在 廷侃  
侃惟義是非或舒或卷爲民請命有害必除苟利於物遑恤乃軀  
無負於 國無忝所生爲清白吏克保令名惟遼之左枌榆舊壤  
公之來也膏澤是仰惠則露濡威則霜肅公之逝也言歸不復窳  
窳其魄箕尾非神松楸菁鬱百世如新

右神道碑張玉書撰

多爾濟達爾罕

多爾濟達爾罕姓博爾濟錦氏世居翁牛特爲察哈爾部大臣天聰八年 太宗文皇帝征明大同凱旋出尙方堡二十里駐營多爾濟達爾罕與察哈爾大臣噶爾瑪濟農多尼庫魯克達遣三十人至奏言林丹汗已死其子及餘眾不能守願率眾六千人歸附 上遣使迎之遂各攜族屬來歸分隸八旗多爾濟達爾罕隸鑲黃旗蒙古 賜賚優厚崇德元年 予一等男爵任都察院承政三年更定官制裁部院承政各一員多爾濟達爾罕改都察院參政六年 上統師征明松山授方略與都統阿賚伊拜等截擊敵兵之奔入杏山者 命多爾濟達爾罕同承政阿什達爾罕往度

善地以駐軍並察覈斬敵多寡還報稱 旨尋擢內大臣仍兼任  
參政七年七月 上幸牧馬所 命內大臣侍衛與新降之明總  
兵祖大壽等校射獎賞有差多爾濟達爾罕得 賜駝一十月隨  
饒餘貝勒阿巴泰征明薊州至山東八年六月凱旋奏言自兗州  
班師之日右翼諸都統不遵貝勒期約離左翼軍先行迨出邊後  
乃會合幸賴 聖主威福敵人驚怖我軍縱橫如入無人之境雖  
前後不齊皆得全軍以還萬一有失悔之何及請論罰以警違令  
妄行者疏入 詔停右翼軍賞賚 世祖章皇帝順治二年以多  
爾濟達爾罕素荷 太宗眷顧加一雲騎尉四年考滿晉爵三等  
子復擢都察院承政七年三月解都察院任仍爲內大臣尋列議

政大臣三遇 恩詔晉一等子兼一雲騎尉九年解議政大臣任  
十七年四月卒 賜祭葬如典禮諡順僖子博第襲爵

右 國史館本傳

--	--	--	--	--	--	--	--	--	--

140-622

阿哈尼堪

阿哈尼堪姓富察氏世居葉赫天聰時曾祖椿布倫偕兄楚隆阿弟昂古里來歸隸滿洲鑲黃旗阿哈尼堪初任佐領同蒙古兩黃旗將領布哈塔布囊阿濟拜略明甯遠明兵千人追至還擊敗之崇德二年從征朝鮮先右翼眾兵突過朝鮮戰艦遂取江華島五年正月承政薩穆什喀索海征虎爾哈部阿哈尼堪同右翼兵助戰克雅克薩城時烏魯蘇屯之博果爾及烏喇哈兵六千來襲正藍旗後隊右翼索海設伏擊之斬殺甚眾阿哈尼堪與焉又攻卦喇爾屯先入有功四月任禮部參政敘功授騎都尉世職六年四月隨鄭親王濟爾哈朗征明圖錦州同左右翼兵合擊松山又與都



統宗室拜音圖敗明總督洪承疇兵松山守將乘夜來襲我營其步兵復犯正黃旗蒙古汛地阿哈尼堪並擊卻之八月管鑲黃旗都統事順治元年五月隨睿親王多爾袞入山海關擊賊流賊李自成八月世祖章皇帝以將遷都燕京分命大臣統兵鎮守盛京各城阿哈尼堪統左翼防盛京十二月同都統阿山等率將士回蒲州濟河協征流寇二年正月晉三等輕車都尉二月奉命率兵會豫親王多鐸南征平定河南江南皆著勞績攻揚州府時擊敗城內拒戰兵尋福王餘孽三千眾來犯阿哈尼堪率參領班代等連戰皆捷遂與都統馬喇希進攻常熟破之三年蘇尼特蒙古騰機思等叛聞豫親王率師進討先遁走阿哈尼堪同四旗

將領勦兵擊斬其黨百餘人俘獲無算以功晉一等輕車都尉四年擢兵部尙書六年八月鄭親王征湖廣阿哈尼堪同都統劉之源率兵別趨寶慶間賊渠王進才馬進忠據城乘夜馳往平明賊眾迎戰急擊殲之遂克寶慶時偽總兵馬有志等九營在南山坡阿哈尼堪乘勝進剿陣斬有志等七人又擊破賊渠袁崇第等十營於洪江大軍入沅州畱阿哈尼堪駐守十二月賊渠王强等復犯沅州阿哈尼堪遣署護軍統領都爾德等破之於沅水斬偽副將三人及賊兵七百餘級七年正月師旋 賜白金三百兩三月調禮部尙書遇 恩詔加一雲騎尉並予世襲先是睿親王遣往迎朝鮮王弟阿哈尼堪啟異親王滿達海等以參領恩格德代之

事覺下諸王大臣會勘論死得旨革職罰贖畱尚書任尋復原  
職遇恩詔晉一等男八年十二月卒子噶爾哈圖襲別有傳

右 國史館本傳

阿喇善

阿喇善姓博爾濟吉特氏先世居扎魯特 太宗文皇帝時隨其  
祖喀喇巴拜來歸隸滿洲鑲黃旗尋授護軍參領崇德二年列議  
政大臣四年 上征明錦州班師以阿喇善與參領鼇拜等董修  
道路有泥濘不治者罰所乘馬入官六年隨睿親王多爾袞圍明  
錦州王遣將士離營歸家阿喇善未奏 聞論褫職籍家產半得  
旨從寬罰鍰八年擢鑲黃旗滿洲副都統隨征明甯遠攻克前  
屯衛中後所二城 世祖章皇帝順治元年正月兼任刑部侍郎  
四月隨大將軍入山海關擊敗流賊李自成追至望都二年隨英  
親王阿濟格西剿自成同參領路什敗賊於綏德州進克延安府

追賊至湖廣七戰皆捷是年敘入關功授雲騎尉世職三年隨肅親王豪格征流賊張獻忠過陝西擊敗叛鎮賀珍於漢中偽副將武大定踞秦州之三寨山阿喇善同護軍統領哈甯阿等以兵六百由僻徑登山奪賊壘斬級無算進擊獻忠於西充大敗其眾獻忠既滅復勦餘賊攻克遵義五年凱旋以在軍中時不勘決參領希爾根爭功狀議罰上賞之仍敘功晉世職二等輕車都尉六年隨英親王討大同叛鎮姜瓖攻渾源州及左衛並復其城七年擢刑部尚書兼鑲黃旗蒙古都統尋追論克左衛時違英親王令不以登城將士名啟王及王詰問反巧飾罰鍰罷尚書任八年奉命率兵征山東土賊至沂州攻圍蒼山賊寨斬賊首劉遜張齊

及其黨百餘又搜剿附近山寨斬賊首王家臣王家盛張榮魏在  
斯等三百餘級俘獲甚眾是年敘征姜瓖功晉爵三等男嗣兩遇  
恩詔晉一等男兼一雲騎尉九年四月兼任都察院左都御史  
尋隨敬謹親王尼堪征湖南爲參贊大臣擊賊衡州王歿於陣坐  
失援罪應褫革籍沒 命革世職仍畱都統任十二年卒 賜祭  
葬如例

右 國史館本傳



佟國印

佟國印漢軍正藍旗人父佟恆年以驍騎校隨其從父佟養正守朝鮮界之鎮江城 太祖高皇帝天命六年守城中軍陳良策叛執養正投明總兵毛文龍恆年亦被執不屈死 贈騎都尉世職以弟成年襲尋卒佟國印襲職 太宗文皇帝崇德三年授工部副理事官六年隨睿親王多爾袞征明圍錦州與都統石廷柱擊敗李洪步兵 上尋親統大軍進征圍明總兵洪承疇於松山敵兵有逸入高橋南三臺者國印與都統劉之源以礮攻克之盡殲其眾七年四月鄭親王濟爾哈朗等圍杏山塔山國印俱以礮擊其城下之敘功加一雲騎尉尋遷工部理事官奉 命同副都統



馬光輝等赴錦州督鑄神威礮十月隨饒餘貝勒阿巴泰征明由黃崖口入邊時明將於沿邊設臺分兵防守甚密而國印同都統李國翰屢擊敗敵眾克邊臺七又擊敗牆子嶺守兵八年鄭親王征明甯遠既克中後所進取前屯衛國印以紅衣礮擊其城風迴礮火傷領下創甚攻城益力卒克之 世祖章皇帝順治元年敘功晉二等輕車都尉三年擢工部右侍郎七年九年三遇 恩詔晉爵三等男十二年以疾解任康熙十一年四月卒 賜祭葬如例子佟世德初因國印乞休襲爵尋授參領康熙十三年擢正藍旗漢軍副都統十四年八月隨貝勒洞鄂征叛鎮于輔臣於平涼賊眾迎拒世德同都統海爾圖率兵擊卻之賊復倚山據險列陣

世德率兵直前衝擊破賊陣追斬甚眾十五年同前鋒統領穆占設伏於平涼之南山擒賊偵卒擊敗賊騎百餘賊將屢糾眾來犯世德率兵五戰皆捷復以紅衣礮擊毀賊壘殲賊無算尋招降王輔臣及其叛黨陳彭等並在事有功十七年五月命隨撫遠大將軍圖海規復漢中興安十九年五月卒於軍 賜祭葬如例子  
銓襲爵

右 國史館本傳

國朝書目類考卷四十一

四

哈世屯

哈世屯滿洲鑲黃旗人姓富察氏 太宗文皇帝時擢侍衛每遇行兵出獵哈世屯必在 御幄供宿衛未嘗一日去 上左右崇德六年明洪承疇率兵十三萬來援錦州 太宗親統大軍往征之陳師於松山杏山之閒明兵結營松山城北乳峯閒承疇既敗太宗移營近松山環城掘壕困之明總兵曹變蛟棄寨夜遁有敗兵突犯 御營是夜守營右翼大臣侍衛等俱未至汛哈世屯捍禦帷幄奮力抵敵所擊殺甚多手肘中傷旣而分別功罪 賜哈世屯一雲騎尉世職又 賜蒙古二戶 世祖登極知哈世屯於 太宗時竭誠奉職特加任用連擢內務府總管內大臣議政

大臣哈世屯因事盡忠以樸誠上結 主知 世祖益深倚畀禮

遇日隆前後屢荷戶口馬匹地畝之 賜由騎都尉世職疊加至

一等男十二年晉太子太保以年老乞休 世祖勉允其請加一

雲騎尉致仕仍 命隨時入朝備顧問由左掖門出入大官賜饌

以示優眷老臣之至意康熙二年卒 子祭葬如典禮諡曰恪儻

高宗追思舊德復予祭一次哈世屯以恪勤之性宣勞匪懈歷

三十年故得秩顯 三朝慶流後裔垂勳名於勿替云

右 國史賢良小傳

國朝耆獻類徵初編卷四十二補錄

卿貳二

哈世屯

哈世屯滿洲鑲黃旗人姓富察氏先世居沙漠祖旺吉努 太祖  
高皇帝時率族屬來歸授佐領既卒長子萬濟哈襲管佐領哈世  
屯爲萬濟哈長子初任前鋒校隸正藍旗 太宗文皇帝天聰時  
隸鑲黃旗授侍衛尋襲管佐領擢禮部參政崇德二年同佐領喀  
愷等率兵分道征瓦爾喀俘獲甚眾三年 太宗親統師征喀爾  
喀部畱守盛京禮親王代善聞明總兵沈志祥欲率石城島兵眾  
歸附遣哈世屯招之志祥遂來歸是年重定官制改禮部副理事

官六年大軍圍明錦州明總督洪承疇率兵十三萬赴援據松山鎮守總兵曹變蛟乘夜率眾犯御營哈世屯先眾扞禦手腕中槍仍裹創力戰卻敵得優賚白金及蒙古二戶世祖章皇帝順治元年擢內大臣二年以勞績久著予騎都尉世職嗣以考滿並遇恩詔晉世職至一等輕車都尉加一雲騎尉七年五月列議政大臣七月睿親王多爾袞有疾哈世屯同議政貝子錫翰等往視睿親王曰予有疾上宜臨視又曰爾等毋以予言奏請既而駕幸視之睿親王罪大臣等違令擅請降世職爲騎都尉八年世祖親政鑒哈世屯無罪降職命復之兩遇恩詔晉爵一等男初冷僧濊與哈世屯同爲內大臣冷僧濊諂附睿親王及

睿親王卒冷僧機揄揚其功績因誣奏昔日兩黃旗大臣謀立肅親王豪格事 詔下法司鞠訊集哈世屯及議政大臣巴哈等質之盡得其阿諛誣陷罪狀肅親王之爲睿親王所害也尙書鞏阿岱與都統和洛輝等議叙肅親王子富綬哈世屯言王無滅嗣之罪同巴哈力持不可事乃已至是 世祖封富綬爲顯親王和洛輝以黨附睿親王爲議政大臣蘇克薩哈所劾磔死鞏阿岱與冷僧機朋比奸惡事覺 詔逮勘哈世屯亦質之鞏阿岱與冷僧機並伏誅時鄭芝龍隸正黃旗授子爵其子鄭成功踞海島寇掠福建哈世屯奉 命同內大臣遏必隆龍拜大學士范文程宣 諭芝龍導其招降成功芝龍因改隸鑲黃旗遣 福建取其妻妾



及幼子至京十年 詔以哈世屯宣力年久加一雲騎尉十二年  
詔獎奉職恪勤諸大臣加哈世屯太子太保十三年奉 敕使  
朝鮮鞠獄還奏稱 旨尋以年老致仕康熙二年卒年六十有六  
賜祭葬如典禮諡恪僖子米思翰襲爵別有傳乾隆元年孫大  
學士馬齊疏陳哈世屯勞績得 旨入祀賢良祠十三年 冊諡  
孝賢皇后 推恩先世追封哈世屯一等公十四年曾孫大學  
士忠勇公傅恆經略金川功成凱旋 詔視勳臣額亦都佟國維  
之例 賜建宗祠春秋致祭以獎忠勳祀自哈世屯始

右 國史館本傳

按公名哈世屯  
一作哈什屯

國朝耆獻類徵初編卷四十三目錄

卿貳三

明安達禮

孫憲德  
曾孫夢麟

甯古哩

羅碩

孫阿爾多

覺羅果科

費茂公

子荆山  
孫德音

納都瑚

尼滿

上官鉉

杜篤祐

龔佳育

李爽棠

董篤行

姜希轍

同治丁丑年  
名世十三

國朝耆獻類徵初編卷四十三

通奉大夫前署江西巡撫江西布政使司布政使湘陰李桓輯

卿貳三

明安達禮

孫憲德

曾孫夢麟

明安達禮蒙古正白旗人姓西魯特世居科爾沁父博博圖 太祖高皇帝時率七十餘戶來歸卽授爲佐領俾轄所屬 太宗文皇帝天聰元年隨征明錦州破於陣予三等輕車都尉世職明安達禮襲兼管佐領崇德三年任護軍參領隨貝勒岳託征明由密雲東北毀邊牆進同都統伊拜擊敗明太監馮永盛兵攻克南和縣六年隨大軍圍錦州敵據山巔列陣明安達禮率所部護軍衝

擊敵潰遁松山敵騎來犯復擊敗之我師鑿壕駐守敵兵出錦州  
城奪橋明安達禮擊卻入城 上親督師敗明總督洪承疇三營  
步兵明安達禮奮勇力戰又擊敗敵騎敘功晉二等輕車都尉七  
年冬隨貝勒阿巴泰征明薊州薄燕京破明總督趙光抃軍又同  
前鋒統領阿山擊走三河縣步兵進略山東八年春師還明總兵  
白廣恩張登科和應薦等巡哨螺山明安達禮率所部擊之潰又  
同護軍統領鼇拜破明總督范志完軍凱旋 賚白金是年擢禮  
部參政兼正白旗蒙古副都統 世祖章皇帝順治元年隨大軍  
入山海關擊敗流賊李自成二年隨英親王阿濟格征自成於延  
安府七戰皆捷招撫鳳翔等府降者三十餘城三年改兵部侍郎

值蘇尼特部騰機思與弟騰機特叛明安達禮隨豫親王多鐸率師往征扼據險要騰機思等聞風遁走明安達禮乘夜追逐至鄂特克山大破賊眾斬其台吉茂海復同鎮國將軍瓦克達等追剿手斬十一人獲其輜重並擊敗土謝圖汗及碩雷汗兵五年擢正白旗蒙古都統七年兼任兵部尙書先是敘入關征流賊及征騰機思功晉爵至二等男世襲罔替嗣以考滿並遇 恩詔晉一等男加一雲騎尉八年以議敘福建湖廣大同軍功遲延削雲騎尉罰鍰九年列議政大臣復遇 恩詔晉二等子十年以徇隱興安總兵任珍擅殺事覺罷尙書任降世職爲一等輕車都尉兼一雲騎尉十一年統兵征鄂羅斯敗敵於黑龍江十三年 上以明安

達禮在部日久練達庶務授理藩院尙書十五年十二月命爲  
安南將軍率師駐防荊州十六年海賊鄭成功犯江甯明安達禮  
率師赴援賊船千餘艘泊三山峽明安達禮督兵擊敗僞都督楊  
文英等擒斬僞副將一獲船艦器械甚多賊退竄入海明安達禮  
旋奉 詔移師浙江駐防舟山十七年還京仍授兵部尙書 聖  
祖仁皇帝康熙三年考滿加太子太保六年調吏部尙書旋因疾  
致仕八年二月卒 賜祭葬如典禮諡敏果子都克襲

右 國史館本傳

憲德

憲德蒙古正白旗人姓西魯特氏祖明安達禮官至吏部尙書有

傳父善官頭等侍衛康熙五十七年憲德由廕生授理藩院主事  
尋遷刑部員外郎雍正二年遷郎中四年二月授湖北按察使四  
月奏臣抵任有原任布政使張聖弼來謁查係虧空革職擬斬監  
道之犯臣牌行武昌府立拏監禁 諭獎其秉公執法十月擢巡  
撫五年三月請於漢口鎮增設巡檢一員分巡居仁由義二坊以  
循禮大智二坊隸舊巡檢轄部議 從之先是四川夔州府知府  
程如絲自販私鹽而捕楚民之私販者槍斃甚眾川陝總督年羹  
堯劾之適四川巡撫蔡珽威偪重慶府知府蔣興仁自盡被劾至  
京 召見陳冤抑且力保如絲爲四川第一好官事下甘肅巡撫  
石文焯亦言其冤抑如絲遂免逮擢四川按察使至是年羹堯敗



上閱其黨汪景祺逆書備載如絲貪殘不法珽受如絲重賄及  
文焯妄斷狀於是 命侍郎黃炳赴川覆按其事且 諭憲德將  
楚民被害者查帶往鞫已而鞫實如絲珽擬斬決文焯永停給俸  
憲德尋調四川巡撫疏言川省驛鹽茶三項向皆臬司兼管稽覈  
未周請增設驛鹽道專司其事 詔如所請尋請設鹽茶大使  
從之九月疏言成都府灌縣都江堰口廟祀秦蜀守李冰之子二  
郎相傳父子鑿山穿江溉田至今民享其利請 賜封號疏下部  
議封李冰敷澤興濟通祐王二郎承績廣惠顯英王十一月奏各  
屬增設裁改事宜一復設成都府之華陽縣增知縣教諭訓導典  
史各一裁府屬之稅課大使一改資縣爲直隸資州轄仁壽資陽

并研內江四縣裁縣原設之典史改縣州爲直隸州轄德陽安縣  
竹梓潼四縣改茂州爲直隸州轄汶川保二縣及各土司裁威州  
併入保縣一馬湖府應裁所屬屏山縣歸敘州府通判移駐馬湖  
舊治轄雷波等各土司部議如所請是月奏程如絲在監自縊

上嚴飭之六年正月疏言上年程如絲斬決部文到在十月二十  
九日而京報小鈔前五日已到洩漏實由於此請將各省提塘通  
行裁革 上以提塘之設由來已久未便遽革 諭九卿確議尋  
議提塘多係微末職銜承充且無保送不實處分請令各督撫於  
本省武進士及候補候選人員內揀選咨部頂補地方官出結有  
犯分別議處又安置入川人戶事宜一人戶眾多該管官挨查取

結編入保甲一戶口姓名人數移查各原籍有犯事故者逐回餘酌撥地畝令墾一願回籍者不必給口糧將姓名人數咨明本籍川省仍造冊存案再至者懲之一川省無著地畝見在清丈事畢應分科則編字號計畱川人戶之數按畝均分認墾三月又請畱川人戶以一夫一婦爲一戶給水田二十畝或旱地五十畝兄弟子姪成丁者丁給水田十五畝或旱地二十五畝一冊內老幼丁口多不敷養贍者臨時酌增俱給照票並牛種口糧分年升科均如議行七月疏言夔州關稅向委知府監收請照潯墅淮關例差監督一員徵課按年輪替十一月請改成都府同知爲管糧水利同知經理都江以下各堰工並從之尋請令清查地畝之員搜

查鹽茶積弊 諭曰川省鹽茶二項既經特設道員專司其事自應責成該道令其公誠督察期於清楚儻不能勝任卽屬瀆職當予參黜另用賢員今乃言該道亦茫然無端委則設立專官何爲耶至於差往科道京員係爲清理地畝以免豪強之爭奪兼安插流民之得所儘足辦理矣若又將鹽茶等事交手經營便寬予限期豈如該道之久在川省可比稽察過急必致騷擾民間滋生事故脫有遺漏將來反得推卸且據汝奏內搜查挨查之說更屬謬妄鹽茶積弊相沿已久自應商酌從容清理之法安可如此嚴急從事觀汝一切料理處過緊而欠通變只圖己身免咎而已不肖搢當從利害實心任事於此一奏心術畢見非朕委信之意也嗣

後當深以爲戒十二月奏於達州拏獲年羹堯案內要犯靜一道人得旨議敘加一級七年正月奏天全土司改流等事一天全改爲州設州吏目各一駐礪門州同分駐始陽一天全州應隸府轄請升雅州爲府設知府經歷各一增置附郭一縣設知縣典史各一卽以新置之一州一縣及名山榮經廬山三縣歸府轄從之尋定雅州附郭縣曰雅安十月疏言川省州縣先因地廣事簡將雙流等縣裁併今生聚日繁請復其舊成都府復設雙流崇甯彭三縣縣州復設彰明羅江二縣重慶府復設大足璧山定遠縣夔州府復設大甯新甯二縣潼川州復設安岳縣眉州復設彭山青城二縣嘉定州復設威甯縣設知縣訓導典史各一裁羅江驛

驛丞驛務歸知縣管理裁打箭鑪沿村二驛驛丞驛務歸雅州同知及鑪定橋巡檢管理十二月疏言黎大所地方爲西南孔道漢夷雜處請裁原議之千總改置一縣隸雅州府轄設知縣典史各一以典史分駐泥頭又建昌之甯番衛已改爲冕甯縣應裁去冕山所千總部議從之尋定黎大所新設縣曰清溪八年正月請新設甯遠府漢境內擇大村堡照義學例建學舍延塾師令熟番子弟俟學業有成往教生番子弟如所請行四月署川陝總督查郎阿奏言川省墊江忠州等屬奸民楊成勳等造妖謠吹螺嘯聚事覺成勳自縊獲其黨陳文魁楊成祿等訴狀怨白等案內列丈量田地科派需索累民等事有禍冤起於戊申年奉旨清丈民

田及上憲愛民如子察冤如神之語 諭曰四川清丈之舉始於馬會伯之奏朕惟恐不便於民諭令憲德悉心酌議以定行止隨據憲德奏稱蜀省昔年以來人民稀少田地存在荒蕪及至底定歸復祖業者從來未經勘丈是以多所隱匿迨歷年既久人丁繁衍奸猾之徒欺其界畔無據遂相爭構訟今應明白曉諭令將所管田畝分立地界各執本名立戶載入版籍每年納糧俱以串票爲據如此則侵隱欺奪之患可以悉除又川省詞訟爲田土者十居七八大率爲界址不清亦非勘丈無以判其曲直憲德之奏如此朕又詢問岳鍾琪據奏與憲德之言相同隨交九卿會議九卿亦以應當舉行合詞覆奏朕於是慎選科臣高維新等前往辦理

伊等陛辭之日諄切訓誨務期剔除積弊安插善良並非爲加增賦稅起見又復頒發諭旨百姓果有冤抑下請准其數十人同到督撫及欽差官員衙門控告爲之秉公審理此從前遣官清丈之始末也其勘丈造冊等費俱令動支帑金各官供應等項俱令從公支給不使幾微煩擾閭閻上年冬月丈量之事將竣朕又念各處徵糧科則輕重懸殊其田地肥瘠不等則賦稅自難畫一又復降旨凡隱瞞科則等處止據實按則更定至於額糧稍重之州縣卽比照就近適中地方之科則令其覈減以紓民力今年正月憲德以清丈事竣具本代達州民謝恩之詞稱通省士民咸稱清理疆界使強無兼併弱無屈抑又荷鴻慈將田不敷糧之戶悉予開



除疆界旣已分明額賦尤爲公溥等語朕亦以爲經理得宜矣豈  
意奸民嘯聚竟引清丈苛虐爲言怨白中公然寫爲奉旨清丈豈  
非該撫憲德等但以清丈之事稱爲奉旨於己身奏請之處並未  
曉諭於眾耶陳文魁訴狀內稱上憲愛民如子察冤如神伊旣稱  
頌川省上司是必憲德等有沽譽干名之道何不將朕之德意廣  
爲宣播而乃蒙混含糊使奸民得以藉口耶憲德旣稱通省士民  
懽呼感戴何以尙有陳文魁楊成祿此等匪類暗結邪黨肆行誹  
謗可見平日地方大吏化導之未周董戒之不力則深山窮谷安  
保無惑於妖言而妄爲邪議者乎清丈一事旣曾奉旨朕豈肯推  
卸於臣工但其舉行之由始於該撫陳奏而非朕本意朕不肯推

卸於臣工臣工又安可推卸於朕耶數年來朕以此事時爲塵念  
昨據各省謝恩之奏而論似於地方有益其功亦憲德之功若果  
如奸民所言則該撫失於覺察咎有所歸朕在九重之上萬里之  
外安能代爲之謀耶著憲德將朕此旨刊布曉諭務令遠鄉僻壤  
共知之十一月請改成都府屬之松潘衛歸龍安府轄又請復設  
川北道駐保甯府九年二月又請將平武縣之關家村石子村檢  
石壩紅豆樹等處歸江油縣轄播鼓坪鄧家渡等處歸石泉縣轄  
青蓮壩五郎溝等處歸彰明縣轄彰明與龍安府附近請卽改隸  
龍安并如所請先是建昌總兵趙儒奏請於會川甯番等處開採  
鉛砂事下憲德議行十年三月紫古別廠商民爲兒斯堡生番所

殺憲德言礦廠八處其獲砂多者請仍開採少者封閉以杜弊端  
諭曰從前趙儒奏請開採彼時朕卽不然此舉詳詢憲德回奏  
極言有利無害是以交部議行乃兩年以來並無成效徒滋煩擾  
當日奏請是何意見憲德替交部察議所開礦廠槩行封閉尋議  
降一級調用得旨從寬畱任十一年正月諭曰川省爲產米  
之鄉歷來聽商賈販運從長江至楚以濟鄰省之用雍正九年巡  
撫憲德以川省米價稍昂又復碾辦軍精奏請暫禁商販此不過  
一時權宜之計至雍正十年川省收成豐稔米價平減憲德卽當  
奏請開禁乃至今照前禁遏以致米價不能流通楚省不能得川  
省之益甚非大臣公平辦事之道況今浙江有需米之州縣望濟



工程二年疏劾承辦工程之工部郎中宏通在場私赴鄭州又藉覓料估之人來京日久未歸曠官廢職請交部嚴議尋議革宏通職憲德失察降一級畱任五年卒子夢麟官工部侍郎別有傳

右 國史館本傳

夢麟

夢麟蒙古正白旗人姓西魯特氏乾隆十年進士改庶吉士散館授檢討十五年三月充日講起居注官五月遷侍講學士充廣西鄉試副考官七月遷祭酒九月提督河南學政十六年授內閣學士十七年六月湖北奸民馮朝桂踞羅田縣之天堂寨謀不軌聞捕散匪夢麟以河南商城縣界連羅田親往查拏 上嘉之七月

丁憂十一月疏言商城界江楚峻嶺深巖奸匪易藏原設把總不足防守請酌撥守備增兵巡哨 敕下河南巡撫議准撥襄城營守備一兵一百移駐歸汝營轄十八年二月署戶部侍郎六月充江南鄉試正考官九月提督江蘇學政二十年五月授工部侍郎回京十月署兵部十二月兼蒙古鑲白旗副都統二十一年在軍機處學習行走二十二年河督白鍾山奏請開濬荆山橋河 命夢麟馳勘卽速興工三月 諭曰自去年孫家集奪溜荆山橋一帶淤沙爲患不細令夢麟與白鍾山等疏濬並施乃得尅期成功甚屬可嘉著交部議敘尋議加一級時 上南巡閱視河工以六塘河以下積潦桃宿諸縣窪地成巨浸分派夢麟率道廳等勘辦

尋奏六塘河上承駱馬湖水至清河以下分爲兩派由武障義澤等河入潮河歸海長三百餘里間淤數十處致水停積已委募急挑南北兩堰及去年水壞宿遷堰工並各處缺口俱加修築宿遷桃源清河等縣積水酌開溝十五設涵洞五建閘四以資宣洩疏入報 聞六月奏荆山橋善後事宜四條一銅沛廳北岸丁家樓漫灘黃水匯入蘇家閘直衝荆山橋河身淤墊最易令河員築堵壩一荆山橋河道在銅沛邳睢境者分四汛歸河務同知專管飭州縣協辦一自微山湖口至荆山橋下游之王母山紆長灣曲灘觜更多每歲霜降後疏掘一嚴禁居民於灣處圍築堰壩捕魚渡口接築馬頭阻塞河路得 旨如所議行先是山東巡撫鶴年奏

金鄉等縣水患 命侍郎裘曰修偕夢麟往來相度辦理至是合  
疏言金鄉魚臺濟甯久爲微山湖水淹浸當籌分洩之路韓莊閘  
南有伊家河至江南梁旺城入運久經淤塞今議開濬俾積水乘  
勢東注消涸自易 從之七月兩江總督尹繼善以沂水散漫入  
運爲沛邑害奏湖口閘應行事宜夢麟奉 旨與在工諸臣分任  
責成九月合疏奏淮徐海水患頻仍必原委並治支幹兼修庶可  
甦積困而收實效山東江南接壤諸湖已相機辦理惟沂河自盧  
口旁洩沒民田阻運河當築壩堵截使不得入運湖流可全力下  
注此籌酌沂水不礙微山等湖入河歸海之情形也六塘河在駱  
馬湖下游爲洩沂水要道北岸宿遷陵溝地方有水口桃源有港



口俱注流陽縣之流河入漣河歸海並加濬分路宣通六塘河歸海口門間有淺阻亦爲疏治此籌酌六塘河分導沂水入海之情形也河南夏邑永城等縣水由睢河下注江南洪澤湖出清口會黃入海近年河道多淤董家溝等處尤宜急濬至各水旣歸洪澤出口務須通暢查清口束水二壩業遵 旨拆卸其各閘收束時口門亦酌量加寬此籌酌睢河入湖並湖水入海之情形也以上皆先興舉其餘因地制宜逐一經理得 旨覽奏頗得要領宜和衷共濟不可草率塞責是月調戶部侍郎十二月各工先後告竣議敘加二級二十三年四月調工部七月署翰林院掌院學士八月卒 賜祭葬如例

右 國史館本傳

夢麟字文子蒙古人乾隆乙丑進士官至工部侍郎樂府宗漢人  
五古宗三謝七古宗杜韓雖不能至心嚮往之不必議其不醇也  
近日臺閣中無逾作者儻天假以年烏容量其所到

右 國朝詩別裁集小傳沈德潛撰

午塘先生未弱冠而入詞垣未三十而躋八座且屢掌文衡進參  
樞務而其爲詩五言則蕭寥澄曠七言多激楚蒼涼方處春華之  
時已造秋實之境蓋得於天分非人力所能與也

右聽松廬詩話張維屏撰



甯古哩

甯古哩滿洲正藍旗人姓託和洛氏崇德三年任吏部主事六年大軍圍明錦州甯古哩隨鄭親王濟爾哈朗營以擊敗敵兵馳齎捷奏七年錦州降復以降人及所獲簿籍馳奏順治二年四月遷吏部啟心郎四年五月山東巡撫張如秀以罷歸侍郎孫之獬因土賊謝遷陷城遇害爲請卹部臣陳名夏金之俊謂應復其原銜予卹甯古哩與侍郎馬光輝謂孫之獬旣革職爲民例不予卹以兩議上得 旨申飭議卹非例是年考滿 予雲騎尉世職嗣兩遇 恩詔晉世職騎都尉兼一雲騎尉八年閏二月以前此吏部銓選有越格濫用者革啟心郎任會御史張煊劾奏尙書陳名夏

在吏部專權徇私諸款並言其以尚書而卸罪於啟心郎致甯古  
哩革任已得脫然時尚書譚泰同陳名夏與己同掌吏部坐張煊  
誣陷罪未幾譚泰以把持部務恣意妄行獲罪 上命甯古哩仍  
爲啟心郎十年五月擢吏部右侍郎十三年四月因河西務鈔關  
員外郎朱世德虧課萬餘兩戶部援 赦免罪吏部亦弗置議並  
坐贖徇甯古哩革任降世職爲雲騎尉十四年四月 上以甯古  
哩前在吏部請習事務 命選侍郎缺出卽與推補十六年正月  
授禮部右侍郎十八年閏七月擢左都御史十二月疏言定例駐  
牧索哈爾蒙古向京城置買盞甲弓箭由八旗都統造冊送部出  
日時察驗放行其他蒙古不得私買恐日久禁弛有借名置買及

私相轉賣之弊請 旨嚴飭關隘官員察詰並令蒙古都統以下  
參領佐領以上申禁又設兵原爲剿賊之備近見各省匪徒或數  
千人嘯聚總督提督不親率標兵堵禦輒請京兵京兵一出不惟  
費餉抑且擾民請嗣後有竊發者總督提鎮先率標兵剿捕不得  
輒請京兵則餉運可省而民生得安又各省罪犯應解部審者向  
來各部差官提解仍須州縣官遞送今驛遞繁苦宜槩令在外督  
撫提鎮解送停止差官以省供應之費下部議 從之康熙元年  
七月遷戶部尙書二年二月卒部臣以任尙書未滿一年奏 諭  
曰甯古哩雖爲尙書未久念初設六部之時卽在部任事可予尙  
書卹典 賜祭葬諡勤敏子色楞襲雲騎尉世職

國史館本傳

右 國史館本傳

羅碩 孫阿剌

羅碩滿洲正白旗人先世居棟鄂以地爲姓祖魯克素 國初來歸管佐領羅碩初任刑部主事順治元年從睿親王多爾袞入山海關破流賊李自成追至望都縣二年敎功予雲騎尉世職六年四月以參領同副都統卦喇領兵駐防太原時姜瓖叛黨攻陷汾州 諭因守太原勿輕進勦汾州乃於城南八十里立營徐溝清源二縣境扼賊使毋薄城賊攻破清源城羅碩與卦喇分路擊賊棄城遁陣斬五千餘人五月賊擁眾犯太原據晉祠堡立柵羅碩隨端重親王博洛衝破賊營斬首萬餘級八月賊首雷和尚張五等糾眾萬餘圍絳州復大破之斬級二千餘又破賊首胡邦秀石

山西通志卷之三十一 職官三



滋龍湯平等於浮山縣南之老君廟斬首千級得 旨獎敘八年  
 三月擢任工部侍郎八月轉吏部九月復調工部以三遇 恩詔  
 加至二等輕車都尉九年隨敬謹親王尼堪征湖南失利十二年  
 議罪革一騎都尉解侍郎職罰鍰尋授大理寺卿十七年追尊  
 敬皇后禮成以 皇后伯父晉世職一等輕車都尉康熙四年卒  
 第三子舒敏第三孫伍泰襲羅碩長孫阿爾多康熙十二年由侍  
 衛擢刑部右侍郎十四年轉左十八年吏部考察以不謹革職  
 命從寬降二級隨旗上 朝尋以參領隨征湖廣四川二十三年  
 復任刑部侍郎是年調戶部二十五年授內務府總管二十六年  
 擢兵部尚書明年調戶部二十八年五月轉吏部尚書三十年七

月 暢春園奏事出得痰疾 遣御醫調治 賜御用衣服人蔭  
並派侍衛護送至其家踰時卒 賜祭葬如例諡敏恪

右 國史館本傳

天聰八年四月 太宗文皇帝命禮部考取通滿洲蒙古漢書文  
義者爲舉人取中滿洲習滿書者剛林敦多惠滿洲習漢書者察  
不害恩國泰漢人習滿書者宜成格漢人習漢書者齊國儒朱燦  
然羅繡錦梁正大雷興馬國柱金柱王來用蒙古習蒙古書者俄  
博特石岱蘇魯木共十六人俱 賜爲舉人並 賜衣一襲免四  
丁寔於禮部崇德三年八月 賜新中式舉人羅頌常鼐胡邱阿  
濟格畢禮克圖王文奎蘇宏祖楊方興曹京張大任干變龍等十

名朝衣各一領授半箇牛象章京品級免四丁六年七月 賜新  
中式舉人滿洲鄂貌圖赫德蒙古杜當漢人崔光前卅三元章于  
天下為鳳緞朝衣各一領是時取士之額雖少名臣多出其中

右記余金撰

覺羅果科

覺羅果科滿洲鑲白旗人初任護軍參領 太宗文皇帝崇德六年隨大軍圍明錦州分兵駐杏山河岸敵兵自甯遠來窺果科同前鋒統領努山擊敗之追至連山斬級三十獲馬三十二七年同努山略甯遠遇中後所敵騎五十犯我牧地戰卻之敵援兵四百踵至並擊之潰遁八年復同努山至界嶺口偵軍事與明兵戰斬其守備及步騎三百餘俘獲甚眾 世祖章皇帝順治元年隨睿親王多爾袞入山海關擊敗流賊李自成追至望都二年隨英親王阿濟格征陝西攻克綏德城自成兒子錦踞延安數犯我營果科同護軍統領希爾根奮勇迎擊三戰三捷自成奔湖廣我軍追

至安陸府屢敗賊眾獲賊船八十三年隨肅親王豪格征流賊張獻忠過漢中擊敗叛鎮賀珍獻忠自西充引賊眾逆戰奮擊敗之復與希爾根搜剿賊黨多所斬獲五年隨鄭親王濟爾哈朗征湖南任前鋒參領時明珠上朱由榔據廣西其總督何騰蛟守湘潭我兵薄城下騰蛟分兵三門拒戰果科與前鋒參領瑚沙敗其城西兵奮門而入尋隨都統佟圖賴率兵趨衡州距城三十里遇賊兵千餘擊敗之僞總兵陶養用據石橋立寨果科隨副都統領給等攻拔其寨復擊敗僞伯胡一清僞總兵周進唐等追擊一清至全州還京授刑部理事官敘功予雲騎尉世職兩遇恩詔晉世職爲騎都尉兼一雲騎尉十一年三月擢工部左侍郎七月署尚

書事十三年十月 乾清宮成加尚書銜十五年三月 壇 廟  
工成議敘晉世職二等輕車都尉十七年九月擢工部尚書穆理  
瑪甫任事以修理京師通州諸倉所給輒價視時值浮多與新任  
侍郎巴進泰同議減裁窳戶以不敷工費訴於部果科言新任官  
不知則例令典如舊補給十八年五月果科卒輔政大臣鼐拜等  
以修倉費請 旨下王大臣察議由果科主其事罰銀百兩革尚  
書銜削世職畱軍功所得雲騎尉以其子薩爾布襲康熙七年  
聖祖仁皇帝親政薩爾布訴枉求復世職大學士圖海等入奏下  
部議不准 諭曰前此議處時果科已故較同案官員處分過重  
命復還騎都尉以薩爾布兼襲

國史館本傳

右 國史館本傳

費茂公 子荆山 孫德音

余嘗緝閱國史伏見 祖宗朝鷹揚戮力之士項背相望雖當偏  
裨之寄其建樹已不愧爲名將而況久歷行閒戰功可一一指數  
者乎至於武績旣茂而又游登卿貳以清勤盡職爲 國家耆舊  
大臣則又前史所不能多覩者也工部侍郎費茂公諱某長白山  
東巴海人公父 贈光祿公諱某當 太祖高皇帝龍興之初卽  
以其族自巴海來歸越三載歲在甲辰而生公於興京之赫門村  
公天性孝友方五六齡時母夫人爲製新衣公見諸兄無衣新者  
輒不肖服比及十歲事親敬長儼若成人且穎敏嗜學習滿書數  
月卽貫通文義稍長勇毅過人精騎射嘗以公事遠出忽聞父病



篤單騎過返夜行灌莽中馬傷足僵卧公仰天號泣日得見吾父  
卽死無恨柰無馬何不移時馬起竟馳歸侍疾三日而贈公逝人  
皆以爲至孝所感越數月又遭母喪哀毀幾滅性比喪禮旣畢遂  
銳意立功名以成父志初從征旅順奪幟登城爲一軍冠大帥以  
一等功牌予之公曰余雖先登尙有貫藍甲者在余前安可冒也  
辭讓再三而自居二等大帥以下皆嘆異焉取安珠山時敵軍大  
集公率步軍爭先力戰大敗之守錦州南山城敵眾夜襲我軍戰  
卻之城得以完奉使黑龍江收祁勒里國有招徠功取明甯遠城  
衝鋒前進被槍箭傷入關之役率漢兵與流寇戰大破賊兵昌平  
州遇敵突入敵圍被重傷猶手殲二人生擒二人而還嗣取寶坻

通州皆有功順治元年 特命管佐領事從饒餘郡王征山東有  
取勞山功又從和碩豫親王追擊流寇至潼關率先破賊馬軍功  
居一等豫親王轉旆江南公復在軍中拔蘇州城時敵將黃蜚合  
四總兵軍力拒城南公以四十騎大敗之盡獲其戰艦槍礮旗纛  
蘇州既克蜚等復縱火攻城焚橋凡三至皆敗之自入關以後大  
小約百餘戰身中一等傷者以十數計創痍鱗次幾無完膚而銳  
氣未嘗少挫方 本朝初克遼東罹法網者甚眾公所至安撫善  
良多所全活師行數十年自臨陣誅戮外從未殺一不辜俘纍得  
更生者所在皆是蓋公生平仁心爲質如此又素性廉潔從下江  
南江西浙閩東粵諸路皆兼領戶工兩部事軍中所獲金珠貝玉

貨幣大帥一委之公公悉具冊登載無銖黍絲粒為私用者一軍

稱服師還擢工部郎中 朝廷知公有守 賜良田七頃居第一

區嗣是修 郊壇樂器儀仗及南苑行宮兩 賜金帛朝服督造

永陵工成加拖沙喇哈番 郊祀禮成加拜他喇布勒哈番天

下一統又加一拖沙喇哈番順治十六年晉盛京工部侍郎福陵

前渾河環繞時以漲溢衝損紅門累遣官督修不就公至董築大

隄成永無水患康熙六年 覃恩授光祿大夫又數歲引年致政

十一月 聖駕東巡賜宴大政殿念公為 三朝老臣 特召近

御座以金卮酒賜之並 賚冠服狐裘鞞刀諸物公每痛兩尊人

早逝慟聞優見追慕不忘遼陽收復後即訪善丹青者指指繪像

以祀於家廟王父母則刻木主奉焉歲時朔望及春秋節序必躬親展奠年踰七十而禮敬不衰兄弟十人諸兄皆先公卒惟第十六兄尙存公事之甚恭田宅服食車馬僕從悉推以與之遇恩賡不與己子而與兄子公山第某兄子索泰少孤公撫育成人教以讀書成乙未進士殿試第一甲三人公上念高曾世有隱德而譜牒殘缺恐年歲久昭穆益紊遂手輯家譜垂於奕世又撰務本家訓一書宗族中貧者衣食之孤寡者收養之無後者春秋祭之至今子孫猶遵行勿替康熙十六年病篤令諸子立侍榻前勉以忠孝以三月八日坦然而逝年七十有四嗚呼史稱鄧高密功高於諸將而修整閭門教養子孫皆可以爲後世法如公之才兼文

武內行篤謹以此媲美前賢何多讓焉子五人英山內務府營造  
司郎中荆山太常寺卿青山盛京禮部贊禮官名山筆帖式天保  
壬午副榜孫十五人興德興保俱候補筆帖式德音丙子舉人內  
閣撰文中書德玉都察院筆帖式德麟明玉亮德德新俱候補筆  
帖式祁蘭保貢生筆帖式德容生員明德宏德鄂紳德琛永貞俱  
業儒余與奉常公及中書君交久茲奉常公命撰次公懿行勒於  
貞石不敢辭因據原傳書其事之大者以示後人

古墓誌張玉書撰 按公姓費茂即費莫蓋茂莫雙聲譯音無定字謹與次篇各從其舊公諱待考

荆山

荆山滿洲正白旗人姓費莫由禮部筆帖式升任本部讀祝官康熙

二十八年遷太常寺寺丞三十九年遷戶部員外郎四十四年擢太常寺少卿四十六年晉本寺卿五十年轉大理寺卿五十二年授禮部右侍郎五十三年調戶部充纂修 玉牒副總裁官五十四年四月署倉場侍郎事七月疏言泗州等衛糧艘在通州張家灣遭風損十一隻沈米五千餘石內河向無題豁例但今歲北河水發風大湍急無異江湖請 賜豁免 上允之十一月疏陳漕運倉糧事宜一漕艘至濟甯臨清等處河水淺阻請交山東撫臣派司道督催出境一水次兌糧向有揀米及船到起卸迥不相符皆運丁偷米攙糠所致請令該糧道將各倉兌米一袋鈐封到淮漕督拆驗加封抵通日臣等率坐糧廳對驗起卸一漕糧挂欠例將

臣等奉命查不第  
弁丁畱通勒限賠補逾限不完者發回本省陸續追取搭運甚爲  
繁滯請卽於本年發回令速賠補一京通廩座號房多坍或以席  
圍收米何堪久貯請派漢堂官各一揀選賢能司官估料修造限  
內倒壞原辦賠修九卿會議如所請奉 旨依議五十五年閏三  
月順天永平二府饑奉 命監視散賑六月授禮部尙書五十六  
年三月卒 賜祭葬如例諡端簡子德音由內閣中書遷侍讀康  
熙五十二年擢內閣學士六十年授山西巡撫雍正元年四月以  
匿報平定州壽陽徐溝等縣旱災又不停徵部議革職尋授內閣  
學士因巡撫任內州縣虧欠錢糧逾限未完降一級調用七年卒

右 國史館本傳

納都瑚

納都瑚姓瓜爾佳氏費音東弟音達戶齊之第八子也初與其兄  
伊遜鍾金吉賽等俱隸滿洲鑲黃旗後改隸鑲白旗 世祖章皇  
帝順治元年納都瑚任護軍參領隨睿親王多爾袞入山海關擊  
敗流賊李自成尋隨豫親王多鐸敗賊潼關進定西安移師下江  
南追明福王朱由崧至蕪湖並有斬獲功授雲騎尉世職三年蘇  
尼特部騰機思等叛奔喀爾喀納都瑚隨豫親王追剿遇土謝圖  
汗及碩雷汗兵拒戰並擊敗之五年隨征南大將軍譚泰討叛鎮  
金聲桓屢敗賊兵後於章江西岸截賊餉運獲糧艘三十餘七年  
遇 恩詔晉騎都尉八年二月擢正白旗副都統九月改副都御



史先是伊遜之孫沙爾布卒無嗣 命納都瑚並襲其一等輕車  
都尉遂由騎都尉晉三等男復以敘前軍功及兩奉 恩詔晉爵  
三等子至是有 旨覈議各官濫邀爵職改納都瑚爲一等男兼  
一雲騎尉十三年四月考滿廕一子入監十四年七月 上以都  
察院奏請更定世職襲例或有受賄徇私情事 詔集院臣詰問  
副都御史能圖與納都瑚實先倡議並下部論罪應削爵革任  
詔從寬降爵一等革副都御史仍兼理藩院事十五年正月援  
赦款復原官及所降之爵十七年卒 賜祭葬如例無子以鍾金  
之孫貴欽吉賽之子盧柏赫分襲貴欽襲一等輕車都尉盧柏赫  
襲二等輕車都尉合所襲吉賽之騎都尉晉一等輕車都尉兼一

雲騎尉

右 國史館本傳

國史館本傳

三

國朝文獻通考卷四十三

四

尼滿

尼滿滿洲鑲黃旗人姓富察氏崇德六年考授筆帖式順治二年授編修八年晉內祕書院侍讀十年遷侍讀學士十三年考滿

恩蔭一子入監讀書尋擢內弘文院學士十五年遷保和殿學士兼禮部左侍郎十七年六月晉刑部右侍郎給事中孫光祀成肇毅及鎮海將軍劉之源江南總督郎廷佐疏劾蘇松提督馬逢知陰附海賊鄭成功命廷臣會鞠僉以逢知交通海逆罪重擬並其子駢誅上以逢知叛逆未得實情命尼滿往江南同之源廷佐確審尋以賊犯江甯逢知託言招撫陰相比附不誅賊黨交通書信入奏逢知抵罪如律康熙二年授本部尙書五年遷都察

院左都御史六年四月疏言流徙甯古塔尙陽堡各許認修城及部院衙門贖罪該犯家產籍沒工費數萬何自而得一經奉旨回籍視稍贍之家挾詐徇勒致良民受苦請嗣後認工贖罪者概停從之八年七月疏言民所賴以生者惟農與商大臣不宜與小民爭利今在外藩王等不能仰體皇上愛民至意凡商貨轉集多獲利益之所占據貿易縱屬放債牟利州縣官莫敢誰何此輩遂肆行無忌徇民變產償債甚至釀成命案請敕禁藩王等商人除本城貿易外如仍貿易各處地方官不卽查拏被人舉首者以徇庇論本主以縱屬治罪貨物債銀入官又疏言百姓困苦於不肖官員朘削更苦於差役繁劇如差遣官員船隻夫馬一切

供應雖有額設錢糧而貪官污吏率多藉端徵派侵漁請嗣後除  
軍 國大事仍由內差其他責成各督撫如隱匿徇庇重治其罪  
俱下部議行八年九月甄別部院堂官議以尼滿歷任年久辦事  
雖勤重大事未見指參應降三級畱任得 旨尼滿著以原品隨  
旗行走未幾卒

右 國史館本傳

--	--	--	--	--	--	--	--	--	--

140-694

上官鉉

上官鉉山西翼城人明崇禎十六年進士 本朝順治二年授中書充陝西鄉試副考官五年十月遷山東道監察御史十二月巡按湖南八年三月巡按江甯十二月疏言高淳縣素稱澤國有水衝浮糧八萬餘明時徵折色天啟閒改本色民困難堪請仍准折部議 從之九年三月疏言蕪湖鈔關向有保家百二十餘戶爲關蠶每正課一兩多索或至五兩商聽自納則表裏爲奸所費必倍又巡兵原爲偵查而設近則每兵帶幫役數名近關支河僅十二處委員多至七十五請裁保家及委員聽客船照款目投稅毋許多索巡兵亦照經制名數印給號衣腰牌以杜假冒五月疏言



江甯滿漢官兵歲需馬草交州縣採買距省遠者水腳既多及抵省歇家串通各役包納致日久草腐復行買補請歲差各郡糧官採辦不必再發州縣運省時或用官船或增水腳隨到隨收價則隨時增減十月疏言江右諸驛爲江浙閩廣通衢乃江西浙江兩省站銀數年不解皆官吏欺隱恃隔省參罰不及請 敕該省撫按補解以蘇驛困嗣後統於江浙藩司彙解江南驛傳道給驛十二月疏言鳳陽府屬多荒地前經勘明無主者免其起科如一戶尙存二人卽報爲有主閒有一人包賠闔戶一戶賠包闔甲者連年水旱流移請仍按熟起科豁其包賠並令有司及時勸墾又言江甯所屬英武秣陵廣武三衛屯糧積欠二萬八千有奇實由山

阻運艱請改徵本色以省運費十年正月疏言江南亳州城西有地五百七十三頃有奇原係民田明成化間地民投獻河南徽福二王府遂充王廠其地雖鄰鹿邑實隸亳州今王廠既廢請仍改隸亳州諸疏並下部議行是年丁母憂回籍尋丁父憂服闋補湖廣道監察御史掌河南道十四年疏言蘇松提督馬進寶 陛見其地邊海請令速回任並請嗣後督撫諸臣不必概請入 覲輕離重地如有機務面陳再爲請 旨疏入報 聞十五年二月疏言巡方首重舉劾先貪酷而後罷輒先方面而後守令差滿薦舉前經題定五六人誠甯嚴毋濫之意倉漕鹽茶祇以運司糧道苑馬河道鹽道爲其專管不許概及提學道輕舉市恩至官有多寡

請差滿日將見任知府至知縣每十員擇舉一二員以示激勸再  
提薦兩次者准爲一正薦凡各差報滿行取升任丁憂等官一概  
不許提薦部議如所請先是丁酉科江南鄉試考官方猶錢開宗  
濫中少詹事方拱乾子章鉞等七人致諸生閱辱同考官奉 旨  
革職提問至是鉞復疏參中式舉人程度淵噴有煩言請覆試江  
南新科舉人以覈真僞 從之尋以文理不通革中式方域等舉  
人刑部會鞫方猶錢開宗等作弊屬實依律斬決同考官葉楚槐  
等絞決方章鉞等及脫逃就獲之程度淵均發遣如律三月疏言  
臣近聞河南邢教蔓延地方官毫無覺察懷慶衛輝諸郡尤甚請  
敕撫按稽察州縣嚴懲失察者糾參治罪得 旨嚴飭行四月

疏陳四事一定臺規都察院舊有會典及題定新例但有古典當因而今未修者有新例增行而昔未備者請悉心參訂刊印成書一慎刑名御史爲執法之官刑名乃其專責臣伏讀順治十二年上諭三法司題覆稽遲皆由文移往來虛費日月且事不同審槩不面議豈能得平仰見我皇上好生之德請令該部先期鈔招送院分各道限期詳閱再行面審務求允協一速考選臺臣職司耳目豈可久懸請每屆年終將俸滿應考各官行取考選見缺御史七員作速考補一考取巡方近例考取皆部院開列正陪請嗣後正陪各官務詳開行過事實其不堪正陪者亦詳列其故每缺出一差送新一差送舊勿拘新人新缺舊人舊缺例部議考選

國朝書院考卷之三十三  
預取多員恐壅滯不便巡方一款事屬難行應照舊例餘均如所  
請 諭曰巡方得人自能稱職遇缺取用與預行選擇備差無異  
內外各差應用御史幾員除見在御史外應預增設幾員詳議具  
奏尋議增新舊各十五員 特旨增三十員選用據才品無拘新  
舊八月疏劾蘇松巡按王秉衡於各屬欺隱錢糧不加釐剔且縱  
役投民革職治罪如律九月疏言計典三年一舉恐各省督撫徇  
庇屬員反藉口待科道糾拾循良不免遺棄而漏網者多至浙江  
湖南蘇松俱無御史計典應責何官管理臣謹列四款一嚴升任  
間有不自量在任巧於彌縫去後猶有勢欲臣謂果有貪穢實蹟  
不得以既去槩從寬典一嚴參罰各省俸冊中有一官而數事牽

扯有參罰而數年不開者請將俸冊與計冊參閱如參罰過五件  
卽係才力不及降調過十件者革職一註事實凡造報賢否實蹟  
不得虛詞鋪張宜確覈職掌直註於冊一察委署凡委署官原與  
部選不同率鑽營得之當計吏時復脫然議外無怪貪風日甚請  
將三年內委署並隨征軍前暫署道府另造一冊疏下部議以府  
州縣錢糧繁多參罰不一難總計處分惟錢糧號件未完十件遲  
至半年者隨計冊參處餘並如所請行十六年五月疏言吏部四  
司司官額設十三員今見止五人懸缺過多恐致叢脞請 敕部  
作速考授 從之十八年遷順天府府丞康熙三年遷大理寺少  
卿六年授太常寺卿十年二月遷宗人府府丞十一月遷左副都

國朝書牘類集卷四十三  
御史十一年疏言臣前掌道時管理軍政各省提鎮計七十員數  
十年來幾至百員臣以爲披堅執銳宣力疆場者多在參遊以下  
蓋因登進有階不憚衝鋒破敵以博榮名至總鎮以上體統已尊  
祿位已極無可升加輒不肖實心效力徒糜百萬金錢請 敕部  
臣悉心籌畫養一將務得一將之功勿令坐擁虛名疏下部議提  
鎮止七十二員俱要缺難裁 諭曰上官鉉疏稱宣力疆場者多  
在參遊以下總兵官以上各員無可升加不行效力等語果有不  
勤於效力者爲誰應指名糾參乃概以不行效力具奏殊爲不合  
著吏部察議尋議照條陳不實隱含譏刺例降二級調用尋補太  
常寺少卿十二年以冬至 大祀供器不整潔部議降三級調用

請假回籍二十二年卒

右 國史館本傳

國史館本傳

三



國朝書牘類傳初編

卷四十三

三

杜篤祐

杜篤祐山西蒲州人明崇禎舉人 世祖章皇帝順治二年授延安府推官五年行取授戶科給事中七年疏言各省錢糧總歸戶部我 朝定鼎七年以數千萬金錢任部臣之出入從無一疏奏銷年復一年互相隱卸臣職司部垣屢催通州坐糧廳收發漕糧清冊久不造報一事如此其餘可知請 敕循舊例年終逐一奏銷以杜蒙混又司官出差期滿必經堂官考覈題准回部管事方許另差乃有揚州鈔關主事張彥珩甫屆報滿戶部不行考覈輒題管大迤橋糧務專擅違例並請 旨嚴飭疏下內院及吏部察議尋議錢糧雖有冊檔可據不依例奏銷實爲怠玩司官差滿未

經考覈不應題差戶部諸臣降罰有差八年四月 命赴山西齋  
頌 恩詔還奏沿途目擊達賴喇嘛等自直隸赴山西遇大雨泥  
瀟車輛遲滯夫馬苦遭鞭撻以致驛夫斃命者六人倒斃馬騾共  
十九匹應請 旨敕理藩院嚴飭嗣後滿漢奉差官員如有額外  
需索苦累驛遞各撫按指名劾奏治罪下部議如所請八月充山  
東正考官九年七月遷吏科給事中十二月疏劾左都御史房可  
壯自任總憲不能秉公糾駁惟以無益條陳苟且塞責大計在卽  
舉劾尤宜公正難容尸位素餐請 賜處分 上命可壯回奏奏  
上篤祐復劾其疏詞支飾可壯乞休歸事詳房可壯傳十年三月  
篤祐疏言前明詔天下戶口編造黃冊所以定賦役覈隱漏清逃

亡爲法甚善今賦役豈無潤冒戶口豈無凋零奸民豪戶豈無飛  
派貪官污吏豈無那移況窮民之失業者累及里圖紳衿之優免  
者加諸貧弱請查照前明舊例斟酌行之其過割之影射作何清  
剔審編之隱瞞作何釐正戶口之倒絕作何開除流移之就居作  
何安頓務將丁糧戶口編輯全書以重民命 上以奏有可採下  
部議行十一年三月遷戶科都給事中四月疏陳清釐關弊四事  
一關員例以一年報滿而吏員積年不換把持既久索端愈工宜  
令役滿者通行裁革一商稅止聽各關報銷無憑稽覈請別立稅  
票分給商船徑投所在官司按票造冊送部磨對以杜侵欺一各  
關主事宜迴避本籍豫絕弊端一差滿繳批毋得逾限逗遛滋事

下部議 從之是月又言通政使准過狀詞請 敕部速結以伸  
冤抑又因直隸樂城等州縣奉 詔蠲免錢糧仍私自徵收請  
敕各督撫清查被災戶口提驗各戶由單會送部科磨對使貪官  
藏奸無所並 從之五月疏言直隸報銷 國課本以防奸詎里  
書指名攤派牧令復借稱上官經承使費上下分肥至贓敗被參  
累民已甚 上曰銷算錢糧攤派使費急宜痛革其酌定畫一之  
規以除民害尋 允部議州縣逐年分晰款項備造清冊由司達  
部不得派費滋弊苦累小民并 諭各督撫嚴飭行八月升太僕  
寺少卿十三年四月遷左通政六月遷宗人府府丞十月擢戶部  
侍郎明年丁母憂歸十五年服闋補原官十六年三月 諭獎勵

勞奉職諸臣加篤祐太子少保 聖祖仁皇帝康熙四年調工部  
侍郎七年轉吏部九年三月擢都察院左都御史五月因御史季  
振宜劾吏部尙書黃機以降級侍郎蒙混開列升授尙書下都察  
院及吏部議以篤祐前任吏部侍郎時與尙書瑪希納等徇庇不  
舉應降級得 旨寬免十一月疏言降級革任人員不論有無冤  
抑甫經離任卽具呈辨復不足以清銓法疏下部議禁止十一月  
以京察屆期上言八法處分應詳註劣蹟無得混稱不孚眾論又  
六科向無堂官止令本科掌印關送恐有瞻徇應移送吏部都察  
院堂官考察皆下部議行明年二月乞休 命以原官致仕尋卒  
於家

右 國史館本傳

龔佳音

康熙二十四年春戶部尙書侍郎等上言邇者錢穀徵輸條目多而版籍繁兼有尾數冗雜官吏易作奸請屏除舊弊更造簡明全書示天下奏 出 天子曰可咨於九列舉練達 國計之臣董其事於是僉謀以光祿寺卿龔公充監修官公先取江西南州縣徵科最繁者剛雜梳剔歸於至簡次及山東尾數悉除慮昧者反以爲不便乃援唐元和四年元稹同州均田狀作收零積餘議書未成公疾作卒於京師公初仕爲龍驤衛經歷出知安定縣事逾年以治行聞擢戶部河南清吏司主事是年以 南郊禮成加一級歷戶部江西清吏司員外郎遷兵部武科清吏司郎中尋出爲山



東按察使司僉事分巡直隸通永道居五年擢江南布政使司布政使累加級一品舉天下卓異第一人 覲還旋被 內召未至除太常寺卿改光祿寺卿公之知縣事也至則舊令罷黜以逋賦未去者二十人道縣事不可爲涕泣語公公笑曰天下甯有不可爲之地乎及按籍則逋賦五年矣縣徵銀例有羨公曰革此是要舉也置櫝於堂存以抵舊賦繇是積逋悉完舊令得免罪歸民之流移者咸復乃繕學宮葺民居立市集修驛務清囹圄焚刑具於庭上官胥吏無敢下縣徵索者其入爲戶部也管通州西倉倉有蠹號黑白檔子遇八旗給俸先與交通故爲爭擊往司倉者不能禁輒避去委出入於胥吏公至立唱籌法日坐倉門驗出入倉蠹

不敢作奸差坐糧廳首禁牙戶毋治帳具取償運丁凡運米在石壩口經紀在土壩口車戶奸民爲之魁渠指供億官長爲名率稱貸於壟斷者追給腳價錢則魁渠與壟斷者析而有之公至革魁渠揭運米榜經紀車戶姓名於襪以次呼之預給腳價錢運者得無困又漕糧抵壩旣輸倉例有簞羨銀給運丁先是俟米入廠完日始給則運艘已回弁受其利公驗漕舟起運卽呼運丁以簞羨銀給之漕舟歡叩焚香於岸者千人勒碑交頌公德其官兵部也掌三司印務京察稱職居一等其分巡通永道也兼司空運廳稅課公周知其弊駟儉交憚公楊起龍潛京師謀爲變事發伏誅於時告訐者蠶起民有賽社者製儀仗迎神爲怨家所訐公取驗悉

國朝通志卷之三十一  
三  
焚之轅門外富家子爲盜牽連拘之則其貌不類公察其僞令僕  
三五偕富家子並立俾盜識之盜誤指僕爲富家子冤乃白平寇  
將軍出師自潞河南下塗方積雪公念輓夫寒飢分遣僕隸載餽  
饌五車給之飲以薑湯輓夫懽騰於路察哈爾叛公勘羽書恒至  
夜分置郵供餽無缺晨起念三河縣令甫之官未識其人遂懷白  
金二鎰以匹馬自隨馳入縣城縣令方急窘乏策公畀以金爲區  
置乃還蒙古兵經通州公慮爲民擾列軍校道旁持白梃俾按隊  
入城擊出隊者市不改肆九門水口圮僉估須七萬金公往勘謂  
三千金可集事修冷口邊牆估減類是俗人黃丁者投旗下橫行  
鄉曲貸錢運戶強畱其子女爲僕妾人畏避之會軍興有例輸烏

槍者官議敘公首以百杆進加二級吏胥入賀公曰若等知我意乎我非藉此爲榮也令甲責旗人者當降級我今可以撻黃丁矣吏胥多與丁往還潛誡之匿不敢出三等侍衛達爾馬詐傳 敕旨公解其佩刀執送吏部其在江南甫至督造戰艦湯斯祚者販木商也要結權勢長揖見督撫臧否官吏以治烏船爲媒恣伐民間墓木一日謁公語及私公起據案坐呼阜隸持撻將撻之斯祚叩頭乞哀乃遣去未幾以慙憤死江南北旱潦公請帶徵折徵命未下先檄州縣停徵且爲粥食餓者會有 詔蠲田糧督撫議富家不蠲公謂富民無一定里胥報未必實若質庫鹽筴皆有定稅欲於力田之民求富者實之則騷然不甯矣先是土有雜稅有

司倍徒徵於民公按其科則廣爲勒石江南素尙侈公以習俗之奢婦人爲甚禁士民妻妾不得用金珠犀玉飾釵珥喪禮有縛采爲亭翦紙象人鳥獸之屬及拔河走馬掉險竿爲戲者悉禁之守藩六年發滇黔楚粵閩饑六百餘萬未嘗後期營米必按汛地近遠分給勸課農桑力行常平義社倉墾田至三十六萬餘畝增人丁至二萬六千餘及率計吏入朝疏言腹地蘆洲與濱江有別不宜槩丈同時計吏凡五十疏天子獨俞公所奏焉其爲太常卿也 陛見命行禮於中和殿旣受事修會典更樂章遣祀與祭齋香帛步中規矩其爲光祿卿也寺雖設漢官案牘皆清書公飭筆帖式凡公文悉譯漢字禮部移取外藩供應率不用印公

不可須用印乃發寺歲造官酒取度支米二萬餘石復需帑金萬餘采麴麩公詣酒局止酒鎗一具計窮歲不過燒酒十萬斤其餘皆沽之市遂上言於朝凡郊廟宴享用官酒餘用市沽歲省米二萬石帑累千金公性孝友執親喪盡禮與弟同居五十年未嘗析箸李自成陷京師公靡所依倚主塾師王氏家旣而王歿惟留一少妾公與其飲食寢無帷薄之隔經年不亂見婦女俘獲者輒出私錢贖之築武林義莊於廣渠門內建育嬰堂於三山門外置義田收租入以哺孩提之棄於道者其爲善若不及嚴於取與錢穀出入一以平嘗有大帥愠公乘公發釀疑權衡未足密遣人索營弁所領銀則銖兩不爽提調武闈有遊擊入幄將有所干訶

之出縣令請見公望其行步蹢躅若負重者斥曰汝懷中非金耶  
吾豈受賂者亦不効汝以沽名也薦屬吏必以公不徇私好故多  
得人性喜聚書江甯學宮明德堂北舊有藏書版殘闕公選諸生  
磨勘補成完書數百卷又雕 欽頒四書講義以行其爲政持論  
利未可遽興當先祛其弊故所至有異績焉公諱佳育初名佳胤  
避 皇太子睿名改今名字祖錫晚又字介岑杭州仁和人曾祖  
景鵬祖應嶽考勤庶皆不仕以公貴俱累 贈至光祿大夫曾祖  
妣祖妣皆一品夫人配李氏 封宜人 贈一品夫人有賢行  
先公卒子一翔麟好學有文中康熙二十年順天鄉試副榜候補  
主事女一嫁舉人餘姚邵瓊孫一肫生於明天啟二年九月丁巳

卒於康熙二十四年七月丙戌卒之日橐無餘資次年翔麟乃扶  
柩歸以某月日葬於青龍山之原予嘗與公同爲戶部郎公入爲  
卿寺予官祭酒與公父子情益親於公之葬翔麟請銘不忍辭銘

公浙產廬江十年十五乃之燕宅爾宅城東偏遭坎軻卒自立掾  
東堂奮等級牽絲行執戟入視天庾領儲胥公所至聲有餘除武  
庫贊中樞左輔雄倚觀察時糗糧賦藁歛息爭訟執趨黠牧江表  
政更優剛不競柔不結宜報最宣殊猷金綺賜倍曩昨衣織袞章  
以鶴飲茶膏體仁閣歷太常光祿卿人高車公以萃人孔揚公不  
盈徵輸法算末渺民也愚胥則狡蹙數贏但中飽大農言 帝曰



俞孰善是編成書僉言公眾不如公之廉僚吏準公之心夙夜謹  
公之才試未盡登廡仕歲則多郭無田廩無禾有哲嗣能克家青  
龍岡神所舍漸江水走其下魂歸來娛大夜諏吉日宜子孫伐貞  
石鏤吾文百千禩銘斯存

右墓誌銘王士禎撰

光祿卿龔公以官卒於康熙二十四年七月丙戌歸葬宮簷濟南  
王公志其墓王公初郎戶部與公同官相善也故紀其治行特詳  
公以幕僚起家知縣事洵歷戶兵兩曹而爲戶部最久後由山東  
僉憲分巡永道陟江南安徽布政內遷太常卿改光祿卿始終  
多居錢穀要地出納平準胥絕乾沒政不靡茸公私交藉其利而

居無十畝之宮無食租衣稅之入遇事觸發沈機立斷如抑伶人之暴橫鄉曲執侍衛之詐傳 敕旨事尤奇偉而與人樂易恂恂長者一意當官遇請屬鋤豪強嫉貪沓人罕得以私干然雅好延禮名士幸舍常滿聚書至萬餘卷以故公子翔麟弱冠卽有聞於士大夫間人皆謂公才識使得秉節鉞整肅一道必有可紀迺迴翔九列者二年竟得疾捐館蓋 上方有意用之盤錯而公不能待矣任不充其才施不竟其志余讀濟南公之志而惜之友人朱檢討彝尊與公舊爲余言公當明崇禎末流寓昌平時李自成陷京師昌平已爲賊守密雲副將張誠帥兵至射血書城中諸生孫繁祉民白希賢等反城出縛賊渠磔之以僞署劉愷澤等四人獻

俘於陵側陵卽田貴妃藏也凡地宮例書某皇帝之陵合以石版  
奉安梓宮前時倉卒不及礱石用甄朱書之鈐之以鐵皆出自光  
祿手公憤賊不討屢以忠義鼓激其士民賊之殲公與有力焉然  
終不自言也蓋其微時節概已如此檢討又曰光祿爲余言曠始  
開入石門地甚窪溼衣被物多黧黑被錦繡裏皆用布長明燈油  
僅可二三寸許缸底盛以水金銀器悉鎔銅鉛充之時同入者皆  
咎當時內官冒破非也田妃寵冠後宮其下里物至瘠薄如此蓋  
由思陵儉德故然此公之緒論以有關事實余故並列之碑陰

右墓碑陰姜宸英撰

李爽棠

順治三年丙戌科狀元傅以漸山東聊城人授修撰官至大學士  
榜眼呂纘祖直隸滄洲人授編修官至侍講學士探花李爽棠順  
天大興人授編修官至侍郎是科會元卽李爽棠三藝渾穆蔚然  
開 國氣象二甲七十七人三甲二百九十三人 國初諸大老  
皆出此科大學士四人傅以漸李燾魏裔介馮溥尙書八人沙澄  
高景傳維鱗如錫朱之弼艾元徵魏象樞劉棐督撫三人袁懋  
功朱之錫林起龍左都御史一人劉鴻儒侍郎十五人李爽棠石  
闕張爾素陳協王天眷胡兆龍梁清寬梁清遠田六善楊時薦于  
嗣登朱裴李棠馥楊運昌王度左副都御史一人董篤行右副都

御史一人張汧通政使二人晉淑軾劉士蘭大理卿一人王景祚  
內院學士一人夏敷九

右記余金撰

董篤行

董篤行河南洛陽人順治三年進士改庶吉士四年授吏科給事中五年五月充浙江鄉試副考官七月調戶科給事中六年八月疏請頒刻徵糧易知由單將起運存畱本折分數條悉開載按戶分給以杜濫派從之九月疏言納粟監生宜與紳衿一體優待其有偶誤微眚者姑寬宥以聽艾悔不得妄加鞭笞俾人知愛惜樂輸疏入以篤行徇情曠職降三級調外用十二年正月詔開列科道從前言事不當及糾參失實降革諸臣篤行以原官起用十月補戶科給事中十二月疏言京師重地盜賊肆行劫掠有司怠玩隱諱以養癰爲無事請嚴加處分勒令捕獲庶盜風或可少

息 敕該管官員嚴察重究十三年三月轉禮科都給事中四月  
疏劾總河楊方輿徇縱河道方大猷賊私累萬請處分爲溺職者  
戒方興降三級畱任五月疏言河工旣重遴補宜破往例查往例  
推升者拘於俸薦候補者限於資次銓部循例掣補故官與人每  
相左而奏效者百不得一臣愚以爲河工遴補之法必得才品素  
著諳練形勢者方克底績諳練者莫如工部諸臣以其講求有素  
且久歷河干情形必悉宜不拘資俸選擇一二人考覈酌用才品  
素著者莫如卓異各官不論品之大小皆宜置之盤錯之中以別  
利器庶慎簡於始人地相宜河工賴以永固也十五年六月疏言  
黔中兵吏迭更士子數年來不覩詩書風教湮滅法紀蕩然今甫

經收復文教方興學政一官不可不急爲簡授但學政總轄全省  
鞭長莫及課習文藝惟教官是賴今部選查無其人請擇本處舉  
貢有學行者暫令委署以正人心隆治化二疏並下部議行十六  
年授太僕寺少卿十七年遷右通政十八年五月轉左七月遷太  
常寺卿九月授宗人府府丞康熙二年擢左副都御史三年正月  
疏請禁會試士子私謁以杜弊竇部議試前干謁例有明禁應嚴  
行申飭七年十月疏言朝審全憑讞冊今每衙門止送一冊各員  
目不及見朦朧畫題甚非慎刑之意請 敕刑部增設讞冊每人  
一冊得以查閱下部議如所請十一月 上諭董篤行才力不及  
念其效力有年著以原品休致二十六年十二月卒





姜希轍

姜京兆公以康熙三十七年五月十二日卒予扶服哭之且爲作  
事狀附公所著姜氏譜後其明年卜葬於褚里福全山之陽禮君  
卿大夫皆有二碑以下窆而墓門東南爲神道出入之所當以一  
碑移其地且勒銘焉予惟京兆公以司諫內遷奠天子都居作  
帥於京師首善之鄉然且舊京根本地並遭公坐鎮以倡九有其  
爲中外所倚毗爲何如者乃溯公在司諫時疏數十上值世祖  
章皇帝闢門伊始諸草昧荒略名法未備相視爲鏤刻毛舉而公  
以寬大處之會兩河地荒敕直指按視清丈諸衛所屯田歸併  
藩產廢斥諸地公請稽舊額覈全書所載而準其數勿令妄有增

益使州縣弓尺得上下其手夫增額爲益課計耳乃不思地力有限正課幾何在有司不過誇一時智計之能而永貽 朝廷以加派之名不可也 上深然之當是時地方新闢民錢多積逋催科者合新舊而並徵之而公任戶科力請勿徵謂量地所出一年祇得當一年之輸移新補舊將必并其新而逋之矣夫今年之新逋卽明年之舊欠也第有司考成旣以完欠爲殿最而完欠之數定限十分凡十分所覈不論繁條瑣件毫釐偶闕卽議處隨之自順治十三年諸王會議以後勒爲令甲諸科條件旣多而有司經承動輒罹網朝至夕行無半席煖者公請盡合諸項之十分而總作十分則毫釐細故不致輕去且分各年之十分而各作十分則捱

年遞察不至重累 上既是其言而廷臣上下皆以爲便遂立敕  
舉行永爲定例其在今四十餘年無變更焉乃西南用兵兩廣撫  
臣報始興曲江兩縣知縣皆同時自裁不知所由在 朝相視母  
敢言公惻然曰人孰不樂生乃甫邀一命而輕生如此此非將隸  
吹索之卽守臣儲備之不豫以致有是務根株所由勿使行聞居  
守兩得委卸以散國法書上聞者皆咋舌公嘗曰大學以理財爲  
本而理財之要實惟用人今 國家旁求亦云孔亟而一時吏治  
未登於古豈其賢實不足哉良由求治太亟進身之途寬而眞才  
反多蔽也夫弭盜催科輸贖辟土亦臣工恆事而乃開荒有升捐  
俸有升漕務全完有升多獲逃人有升浸假邑無荒田糧無漕件

四封無旗人官貧無餘俸則既無與於斯數而苟其興賢勸功課農養士修禮制而興教化有十百於此者將何鼓厲然且捐俸急公本屬臣誼而獎之太過將必有糜費金穀竭他有以足此數者此非所以厲廉而適足以獎貪也至若逆賊歸命遽受顯職則厲民尤甚夫穿窬駟僮狂逞海濫一旦計無復之叩首軍門不過旬朝夕之死初非有湔滌祓濯之能可立後效而乃監司守令冒濫名器夫居官必貴通經非謂柔翰之有良於弓矢也以爲天下惟讀書者始能明理識義燭民隱而飭官邪而況錢穀之稽覈獄市之裁決機務之參預無一不究之平時而施於一日否則茫然入官四顧無術勢必假手幕客諮請胥吏而後止此事權所由落而

線索所由生也且用人之途亦既不一 國家縱乏才亦何可使  
狡獪雜進至於如此其言皆侃侃切於時政而 上方好賢力求  
敢諫故公得盡言稱一時盛事至於調繁簡轄兵馬窮私販廣會  
推清改折蠲賠椿緩徵欠均銓法復勘合豫揀選重律例察關政  
凡三十八疏皆一一議行雖諸部所議偶有齟齬而 上未嘗不  
反復其詞而念其直也乃公方入戶科時關西參政吳允謙以督  
撫專薦既已遷太僕卿矣公發其爲道時貪跡立下吏議而其在  
兵科則海寇陳敬容以僞軍門投誠授山東兵備僉事公奏奪之  
至畿輔失盜有供義王家人李進才及范二達子爲之因緣有司  
莫敢聞而公爲發覺請直清盜本而後愉快至旱災求言公首以

罰鍰入告謂旱者歲不熟也乃民不苦凶歲之不熟而苦貪吏之  
酷罰向者贖杖分別有力者四兩稍力者一兩五錢擣虔之吏猶  
嚴刑以濟其惡今者贖杖一名動輒三四十兩然且以意眦睚  
不拘律令在 皇上不過期無刑之治而反開不肖者以貪黷之  
門甚非行法之意也夫年豐歲稔徵需稍急猶或有剜肉補瘡之  
嗟况當災旱之餘二麥不登何堪重鍰敲扑之下其不為鳥獸散  
者幾何矣及海寇縱橫沿海震動公疏請撻伐具有方略已奉  
章皇帝密旨議勦未及果行而 今上克詰加以六師遂耕犁其  
地而版籍之與公之所告若合符契其先見如此公諱希轍字二  
濱別字定庵明禮部尚書箴勝公之孫工部都水司郎中紫環公

之子也世居餘姚六世祖春軒公以工部主事劾逆瑾貶瑞州府通判高祖對陽公以行太僕卿忤分宜相公致仕曾祖翼龍公由禮部郎中出守以建國本上書罷職 贈光祿卿遂徙家會稽爲會稽姜氏公少穎異善文崇禎末都水公以出使張秋治故河詿誤下刑部獄公徒步入京請救會是年舉京闈鄉試公以諸生例咨監入試中式乃出公於獄而奉之歸里會 鼎革下令搜京闈見舉者授以官公以南歸免歲丙戌 王師下江東 大將軍貝勒檄公出授監司而公辭之乃循故例補温州教授攝縣事因以民兵大破海寇之寇溫者升元城知縣鄰郡饑流民至者如蝟毛時逃人令嚴曳銜道路無收者殍殮相望公憐之乃察其男無東



人語言婦耳無三環穴者悉畱之墾集北荒地受雇得食活者以萬計臺使下其法使鄰郡效之地之荒者悉以墾而饑民活者以數十萬計乃於順治十四年卓異 賜章服升戶科給事中明年轉禮科右給事中十六年轉兵科左給事中遂於是年冬升禮科都給事中會 今上登極公以禮臣襄諸大禮充辛丑會試同考官康熙元年內升京堂官候補歸越八年始赴都 上以公爲 先皇帝言官重之謂其言必有裨於今政破例仍補戶科都給事中乃連具三疏一請增科員以防壅蔽一請撫臣仍轄兵以防地方竊發一請緩期奏銷使催科不迫是年補順天府丞以憂歸又八年奉天府丞闕就家起視事三年以母疾子終養歸旋丁內憂服

闕不起自十八年至三十七年凡十九年無疾卒公丰儀峻整瞻  
視越恆量懷抱犖犖然見事急捷如飛隼之及物而予人和坦好  
推解能拯人之急而出人於厄予中於所隲流離展轉屢言諸臺  
使解之郡江防不守民居困於沈湛設法救援其於宗黨之惇睦  
凡鄉祠義學墓田亭譜皆一身修舉無稍遺闕至於友朋之相卹  
其得所告而去者踵踵也嗟乎賢矣公配朱恭人爲行取科員澹  
明公女生子二曰垚曰坦庶子埭垚以年貢補杭州府昌化縣教  
諭升國子監學正生子七長公銓丁巳科舉人餘俱列庠序有名  
公銓已有孫繼君五世稱極盛而垚以文章著自太僕公下文章  
經術至公益大而垚克繼之坦早卒銘曰

保氏箴尹見周季時宋人無學謂無專司兩省四品補闕拾遺有  
未便者因而去之不審鞞鐸所以納誨匡輿正軸全在於是以  
十論不削一二時謂良臣用使言事公之立 朝侃侃盡職少具  
亮節更抱饗德每事盡言爲古遺直 聖本無闕諫亦有力矧當  
草昧朝陽始曦宜以忠厚開萬世基竭我愷惻還於丕熙千秋國  
史猶應鑒斯特公歷世累顯文教太史傳書夏侯作誥惟公有子  
繼述大孝清芬是揚駿烈克紹況其成績早勒太常邦詞里頌亦  
云孔揚惟此片石雖表末光拜墓下者思之難忘

右神道碑銘毛奇齡撰

國朝音獻類徵初編卷四十四目錄

卿貳四

魏象樞

明倫彙編 家範典 卷四十四

國朝耆獻類徵初編卷四十四

通奉大夫前署江西巡撫江西布政使司布政使湘陰李桓輯

卿貳四

魏象樞

魏象樞山西蔚州人明崇禎舉人 本朝順治三年進士選庶吉士明年改授刑科給事中以明季大弊未禁革者督撫按聽用之官舍太雜道府州縣之胥隸太濫疏請清理報 可五年轉工科右給事中尋轉刑科左給事中劾安徽巡撫王懷徇庇受賄罷之八年 世祖章皇帝初親政 詔免天下額賦罷城工除加派其時有司有以私徵侵帑坐罪者因上疏極陳其弊請飭州縣各依

易知單造格眼冊註明人戶姓名糧銀款目及蠲賑各清數呈大吏覈驗印發開徵又請定藩司會計之法以杜欺隱立內外各官治事之限以清稽滯皆報可九年轉吏科給事中十年會大計連上四疏皆言計典其一言糾拾之舊制宜復言官不宜反坐下所司議著爲令因奏白順治四年糾拾被譴吏科左給事中劉樞冤得旨復職是年以九卿科道會議總兵官任珍落職怨望罪大學士陳名夏等漢官二十八人爲一議議科臣坐徇黨負恩罪應流有旨釋免各予降罰畱原任象樞供職如故明年大學士甯完我疏列陳名夏罪狀詞連象樞初象樞誤劾司官錢受祺擅委中軍下部議降級名夏票改罰俸至是謂象樞與名夏子婦家

山西牛射斗爲媼親名夏用是黨護及逮問象樞素不識射斗遂免議旋以名夏父子濟惡言官不先事舉發六科之長皆鑄秩一級象樞降補詹事府主簿累遷光祿寺丞十六年以母老請終養康熙十一年母憂服除用大學士馮溥薦授貴州道監察御史滿歲晉四品卿銜仍掌御史事屢有陳奏大要謂先教化則宜崇臣僚之家教亟治河則宜蓄任使之人才正人心則宜戒淫巧勵天下則宜輯禮書 聖祖皆是其言是年冬擢都察院左僉都御史明年二月遷順天府尹四月轉大理寺卿七月擢戶部右侍郎十二月轉左侍郎會西南用兵上籌餉三疏其略曰確估價值以杜浮冒嚴覈關稅以防侵漁慎用藩司以清錢糧 從之尋 命同



侍郎班迪清理部庫十七年授都察院左都御史首疏申明憲綱  
十事 聖祖嘉其切中時弊時嘉定縣知縣陸隴其有清名以盜  
案開報職名遲延革職象樞疏舉之鎮江府知府劉鼎瀆職已極  
而報升糧道絳州知州曹廷兪劣跡顯著而不被糾察象樞疏劾  
之又以磨勘順天鄉試卷陳科場八弊請設內簾監試御史以重  
關防陳學政十弊請據爲三年考覈之實廷議並著爲令明年遷  
刑部尙書疏請留御史臺爲 朝廷整肅綱紀 上可其奏以刑  
部尙書銜畱任選 諭舉廉吏疏薦原任侍郎高珩達哈塔雷虎  
班迪大理卿瑚密子侍讀蕭維豫郎中宋文運布政使畢振姬知  
縣陸隴其張沐十人皆得 旨錄用十九年任刑部尙書尋 命

同吏部侍郎科爾坤巡察畿輔稱 旨二十三年以病乞休許之  
賜御書寒松堂額寵其歸著有寒松堂集二十六年卒於家年  
七十有一 賜祭葬如典禮諡敏果雍正八年人祀賢良祠

右 國史館本傳

魏象樞字環溪蔚州人順治丙戌進士選庶吉士改刑科給事中  
彈擊封疆大吏無所顧畏前後疏凡三十餘上大要崇政本別人  
才開言路通民隱皆關時大政會以事左遷乞養母歸家居講求  
理學以躬行實踐深造自得爲宗 聖祖御極思得經術素著之  
士大學士馮溥以象樞薦授貴州道御史上言教化爲至治所先  
滿漢臣僚宜敦崇家教督撫有不容不盡之職分有不容不去之

因循宜責成互糾以昭法紀制祿所以養廉罰例太嚴請記過以示懲治河爲國家根本宜蓄人才以備任用又言戒淫巧以正人心輯禮書以勵天下皆 褒納遷僉都御史歷擢戶部侍郎措糧餉察帑藏經理悉當嘗奏籌餉三疏曰確估値以杜浮冒嚴關課以防侵漁簡藩司以清賦稅會升左都御史首請申明憲綱言國家根本在百姓百姓安危在督撫因列十事以上遷刑部尙書上疏辭請仍畱御史臺 從之尋復申刑部之命持法不撓嘗曰法自天子寬之則爲施仁刑官寬之則爲散法至邀 上恩矜宥又未嘗不對僚屬感頌德意宛轉以求法之可生也康熙二十三年以疾致仕家居三年卒 賜祭葬諡敏果

右 國史賢良小傳

國朝以理學名儒爲時用有清節直聲謀議勞烈聞天下則刑部  
尙書致仕魏公自公卿大夫以至窮閭委巷有識之士莫不樂道  
其行事而慨然歎慕其爲人蓋公之學用於時而天下信之久矣  
若夫 朝廷之知公與公之受知於 朝廷 君臣遭遇之隆俾  
得以行其所學世之人容有不得盡知者焉今欲誌公而傳之無  
已亦第舉其世之所能知者而於其所不能知者則俟之百世以  
後之知公者而已此亦公之意也公起家 先朝爲名諫議其始  
彈擊封疆大吏中外憚之由刑科給事中轉工科右給事中刑科  
左給事中時 世廟初親萬幾公言慎起居盡啟沃責備時宰人

爲公危 上曰給事言是因災異言天變爲人事所致語多忤權貴者 詔廷臣集議左給事故事不與議公則抗疏請與議議時面折諸貴人無所阿避由是眾皆側目矣遷吏科都給事中掌大計戒僚友絕賕賂日夜宿省中邸寓則令兵馬司傳檄關防於是言四事其一事 上尤嘉允謂言官糾拾例當復雖失實不當反坐得 旨比年糾拾反坐言官壞吏治塞言路其已之所糾拾與麗八法同科編之令敕又言言官得罪宜治以考功法不可置重典在諫垣前後疏凡三十餘上其大要崇治本別才修實政通民隱皆關時大政於是忌者思有以中之而未得其芽蘖也會故相溧陽得罪遂藉是以傾公 上察其誣釋勿坐然方其時尙重

言官比事未發不糾舉謂何於是則空垣皆鐫級而黜之公坐是黜爲詹事府主簿稍遷光祿寺寺丞尋乞養母太夫人以去講學讀書修身教家以化其鄉人居十年太夫人歿喪葬悉準古禮當是時今天子銳意堯舜三代之治政具畢張進賢退不肖思得學問經術有名跡可用佐國家興理平者於是相國益都馮公首薦公上召公以病辭再召趨朝授貴州道御史公初進見退而喜曰聖主在上以宏太平無疆之業實惟其時矣一切小功近利姑且補苴之論非所以告君也乃言教化爲王道所先滿漢臣僚宜敦家教以廣盛化言督撫有不容不盡之職分有不容不去之因循宜責成互糾並請慎重督撫之選言科臣余司仁欺

罔不法言湖南布政使劉顯貴侵公帑不當內并言制祿所以養廉今罰俸例太嚴密請紀過以示罰增秩以示恩言朝儀祀事貴肅言戒淫巧以正人心言輯禮書以勵天下前後所言 上多褒納比一年升京卿留管御史事未幾遷左僉都御史是時方急滇事用兵公所言戰守機宜有密奏輒削其橐累遷順天府尹大理寺卿戶部左右侍郎措兵食察帑藏公經營擘畫爲多蓋公十九在言官言官有章疏故其議論風采在人耳目閒恆易有所樹立六曹卿貳以循分盡職爲賢而已其可傳於世者常少公則不然至是又上三疏言事曰確估値以杜浮冒曰覈關課以防侵漁曰簡藩司以清賦稅皆 命確議以聞公在戶部稍久聲績益著左

都御史缺 上特簡任公公則首請申明憲綱其言曰、國家根本在百姓百姓安危在督撫督撫忍肥家誤 國以屬官之奇貪爲一己之奇貨耶臣願諸臣爲 國家培元氣爲 朝廷正紀綱爲臣子勵名節列十事以上 俞旨嘉焉次言吏治漸壞公道宜彰今貪官廉官參處同例盡職溺職保薦無分豈稱賞罰至意舉清廉知縣陸隴其劾知州曹廷俞最貪宜斥旣又舉督學道公明者二人貪墨者二人廉者或復其官或不次用貪者悉置諸法其時爲吏者肅然知警動矣爲左都御史閱九月遷刑部尙書上言主上宵旰憂勤臣不敢計身家恤嫌怨奉 陛下之法與海內臣工共相遵守臣忝風紀之司職多未盡敢援漢臣汲黯自請爲郎



故事得拾遺補闕辭新命而就見所領職 上鑒其無欺 從之  
仍加刑部尚書銜一日拜三疏言撫臣溺職司官不法等事疏甫  
入而地震公言地臣道臣失職則地反常臣總風憲咎實在臣是  
日獨被 召對近御座前語移時或至泣下其言祕不傳公既於  
言無所不盡尤畱意人才所薦引皆蒙擢用至是又列薦侍郎以  
下十人尋復申刑部之命始去言路然公始終以言表著者如此  
其爲司寇持法不撓嘗曰法自 天子寬之則爲施仁刑官市恩  
則爲散法至遇 上所矜宥則又未嘗不對僚屬感頌德意宛轉  
以求其法之可生也康熙甲子春以病乞歸 上溫旨慰畱八月  
再乞歸 降旨稱其實心任事令以原官致仕馳驛回籍 恩禮

有加焉蓋公之進退不違乎禮而其所建白施設彰彰如是可謂能行其所學者矣夫公之所以能致此者本主上知公公受知之深故也不然公抱其學修於身施於家而已矣化其鄉人而已矣其所建白施設豈能彰彰如此之盛哉又豈能進退不違乎禮如此哉是以記公之事而推本於君臣遭遇之隆以見君之得臣臣之得行其所學非偶然也戊午鄉試特命公磨勘順天試卷與公偕命者兵部侍郎孫公光祀及余余時爲翰林學士從公後公則相率宿禮闈如鎖廳校士竭日夜力繼晷焚膏覃思品隲蓋是科黜者三人其臨事精審有力皆此類也大臣巡察畿輔則特簡命公與公偕行者吏部侍郎科爾坤公兩人同心諮訪誅

剪奸慝稱使命焉奏事殿廷 命侍臣傳諭居官勤慎每當敷奏  
剴切詳明不負職任 賜御書唐詩一卷清慎勤恪物大字各一  
幅廷臣間 賜貂朝衣於公則 諭以今年暫著來年別製更賜  
公臥疾數日朝 上見之命近侍問公飲食如何他日 賜瀟膏  
一器人獲二斤自餘恩意與羣臣同者不書書公之特被者如此  
則 上之於公爲何如也公之歸也陛辭 上曰比行當三人朝  
入則 賜大內珍饌 命內侍視公所食幾何再入則 賜茶三  
入則 賜御筆題寒松堂額古北口詩一卷以榮其行去國之日  
朝士大夫祖餞國門之外道傍觀者相與感歎以爲 君臣相遇  
近古未有所謂進退以禮者不其然與公歸而張額於堂藏書於

閣更有書數百卷無長物顧瞻而樂之笑曰尙書門第秀才家風  
貽子孫足矣公歸三年而卒康熙丁卯七月二十九日也得年七  
十有一 上聞悼惜敕所司給祭葬如禮諡曰敏果蓋此皆公事  
之可記世之所知其所不能知雖余亦不得記焉公諱象樞字環  
溪別號庸齋以賜額故晚而稱塞松老人蔚州人也其先江南鳳  
陽人明永樂初從軍北渡河以武功顯世授明威將軍隨侍代王  
之國大同襲指揮有遷蔚州者數傳至儒官公諱宦有德行隱居  
不仕王考諱九經考諱卿孝義聞鄉國爲新城主簿兩世皆以公  
贈資政大夫刑部尙書祖妣劉氏妣蔣氏李氏皆 贈夫人李  
夫人生二子公其仲也公生而聰穎英異稍長孝弟忠信出天性

壬午以春秋舉於鄉癸未上公車比入試矣聞王父病急馳歸時流賊狃狃所至以官黥浼人士公奉母居山洞中賊慕公名大索不得我朝丙戌首設科舉進士選庶吉士歷今官公娶李氏太學生名經權女封夫人男三人學誠壬戌進士內閣試辦事中書舍人學謙學謚俱庠生幼某嗣公兄某爲後女三人一適天城參將劉君三汲子鄒平縣丞天賜一適大同府中路通判李君濬子候補內閣中書舍人恆姚一適陝西平涼府通判姚君永康子之稷孫一人吉祥公將葬學誠以狀來乞銘以余公之鄉人也謂稔知公嗚呼余何以銘公公自少至老未嘗一日輟書不讀讀有所得未嘗不見之行事而尤遠於宋儒之書故所得於理學者爲

尤深所著有儒宗錄知言錄若干卷公嘗謂余曰昔孔子歿羣弟子各以其學傳四方自子夏教授於西河之上彬彬乎文學之風晉有人哉薛公文清以來曹公真子而後斯道將猶未絕也子得無意於斯乎余愧公言而莫之能學也余又烏乎銘公旣不得辭則排纂公事而繫以銘銘曰

斯文未墜誰與作者四祀孔明河東磊砢參井之墟有爛其書於代有光豈適鄉閭惟蔚州公翼翼崇崇敬我桑梓惠我顓蒙開來繼往爲天下宗相彼洛閩誦言滿家干祿則已吐棄如遐公喟然云豈謂是耶其辭金殿其道瓦礫或飾其貌或騰其說公探密微老而彌樂公有令問流於海邦公有偉行勒之鐘鐻銘公宜此永

藏閣宮

右墓誌銘陳廷敬撰

刑部尙書魏敏果公之葬在某原有司以天子命襄其事於是  
諭祭有碑而太宰澤州陳公爲之誌銘康熙二十八年夏五月  
崑山徐乾學復刻其墓碑曰蔚州魏氏其先鳳陽人明永樂初從  
軍有功以明威將軍隨代王之國大同世襲大同衛指揮使其後  
支子遷蔚州累代隱居行義有諱宦者爲儒官尤爲鄉里所推公  
之祖考諱九經考諱卿爲新城主簿皆贈如公官祖妣劉氏妣  
蔣氏李氏皆贈夫人公李出也公諱象樞字環溪又號庸齋少  
讀書日誦數千言嚴重無子弟之過壬午舉於鄉偕計吏入都既

至聞新城病奔歸遂遭大故時寇氛方熾士大夫爲所得輒被汗  
公艱難喪紀奉母竄匿山谷得免 世祖皇帝龍興遼水入關定  
鼎丙戌開科公中進士選庶吉士館試賦詩有云上溯義與軒而  
及濂洛澤慷慨天人期區區非所畫館師重之明年改授刑科給  
事中尋轉工科右給事中刑科左給事中時 世祖皇帝初親政  
公所條奏彈劾凡三十餘上最後請 聖躬慎起居一疏詞偏輔  
臣大略言 聖政維新機務孔多中外想望治平非同昔日如  
皇上近巡京畿輔臣當陪侍法從以盡啟沃之忠僕遠有所幸亦  
宜諫止 鑾輿以副保傅之責人謂公獲罪且不測卒奉 兪旨  
又因災變陳言則謂天地之變乃人事反常所致語侵權貴尤亟



下部院科道議之左給事例不與議公固以請許之公與諸臣抗爭是非在廷爲之側目卒無以折公也己丑分校禮闈升吏科都給事中會大計鎮廳閱冊令兵馬司晝夜周廬巡徼一時懷懍復上四疏皆言計典其一以爲糾拾之舊制當復而言官不宜反坐疏下所司確議遂著爲令又言言官進言不實第以考功法處分不可加以罪譴闕敢言之氣督撫會推宜覈事實勿徇虛名又恭陳四款以佐聖主勤民大政詳陳民命民情民食民困之大端皆報可會溧陽得罪坐言官不先事發六科之長皆斥公隨例降補詹事府主簿累升光祿寺丞己亥得請終養家居講求理學以躬行實踐深造自得爲宗丁李夫人憂喪葬悉準古禮壬子

服除益都馮公方入閣特疏薦公清能矯俗才堪辦事 上卽召  
公公以疾辭再 召乃趨 朝有 旨以御史用八月授貴州道  
監察御史滿歲內升京卿仍管御史事公方嚴爲中外所憚四方  
餽遺無至門者公自 先朝告歸十餘年起自田閒入見 今上  
出謂所知曰堯舜繼世臣敢不盡其愚忠其所言大要以謂方今  
俗尙奢靡人鮮廉讓實政治之所宜先要以制度數覈名實杜欺  
罔定民志盡臣職 上皆以公言爲是是歲冬十二月擢都察院  
左僉都御史明年二月拜順天府府尹四月除大理寺卿七月升  
戶部右侍郎十一月轉左侍郎一歲五遷在戶部方西南用兵有  
籌餉三疏其略以爲杜浮冒防侵漁清賦稅生財足食之正經也

上因命公同侍郎班公迪清查部庫又閱月而事竣 上嘉悅  
之戊午升都察院左都御史公曰憲府任重非僅言責勉爲 皇  
上風勵百司使大法小廉足我願矣首疏申明憲綱十事言 國  
家之根本在百姓百姓之安危在督撫願諸臣爲百姓畱膏血爲  
國家培元氣臣不敢不爲 朝廷正紀綱爲臣子勵名節 特  
旨謂切中時弊立見施行舉廉介知縣陸隴其復其官劾貪酷知  
州曹廷兪置諸法中外肅然九月與侍郎孫公光祀學士陳公廷  
敬磨勘順天試卷因條陳科場八弊嚴立關防之法復條學政十  
弊舉學臣賢者勞之辨邵嘉參劣者盧元培程汝璞士論快之己  
未春二月 內殿奏對畢 上命翰林張英高士奇捧 御書唐

詩一卷清慎勤格物大字各一幅 賜公曰 上以爾居官克稱  
此三言奏事剴切詳明不負職掌故有此 賜他日 賜紫貂披  
領 上諭公今年暫著明年別製爲卿換之公掌憲未滿歲有刑  
部尙書之 命上疏言當貪風日長吏治不清大吏因循小民困  
苦之際仰見 皇上宵旰焦勞於上臣不計身家不避嫌怨奉  
朝廷之法與海內臣工共相遵守內而科道外而督撫參劾之疏  
屢達 御覽已有澄清之機臣職風紀夙夜兢兢不敢自安昔漢  
臣汲黯自請爲中郎補過拾遺臣亦請辭司寇畱御史臺 上可  
其奏遂加刑部尙書畱任總憲於是方上疏糾參司官劉源不法  
撫臣某溺職卽日京師地大震公與副都御史施公維翰入奏曰

地臣道也臣失其職地爲之不甯臣不能肅風紀以脩職業請先  
罪臣以回天變 上卽召公入內殿公伏地涕泣請屏左右語移  
時是時用事大臣爲之股栗然公之語近侍皆莫得聞施公迎於  
後左門見公淚流頰未乾也是日公與施宿署中語施云今民生  
困苦已極而大臣之家日益富饒皆地方官吏諂媚上司朘削百  
姓督撫司道轉餽送在京大臣以天地有限物力民生易竭脂膏  
盡歸貪吏私橐小民愁苦之氣上干天和致召水旱日食星變地  
震泉涌之異又會推選擇徇私不公行閒將帥復無紀律蠲免錢  
糧災黎不沾實惠刑官鬻獄豪右罔利等威蕩然貴賤倒置皆爲  
可憂施公曰公何不極言之公曰 聖明燭照何待吾言吾儕負

國萬死不足塞辜明日 上以六條宣廷臣集議大略如公指於  
是朝士或謂出於公造膝所請公之密友與子弟究不知公所陳  
何語也公嘗言大臣之誼在以人事君郝中丞浴起於徙所公所  
舉也其遵 諭舉廉一疏舉侍郎以下有清望者十人 上次第  
皆用之庚申復補刑部尚書公持論以爲司寇執法之官也書言  
士制百姓于刑之中又言茲用不犯于有司犯者固不可以宥而  
法固不可以斂也論者乃謂以縱奸爲寬大非所敢知若乃法外  
之矜全乃 主上如天之德亦非臣下之所可市恩也公主心仁  
恕獨當官而行其言之嚴正如此辛酉扈從謁 孝陵一慟綏紹  
賦詩誌哀明年奉 命同少宰科公爾坤巡察畿輔公以 特典

祇畏夙夜單騎按行墨吏豪家聞風斂戢爲除泰甚者若而人還  
報甚當 上意公老年馳驅登頓所至案牘填委積勞成疾一日  
上見其羸瘦垂問 賜以淺膏一器人淺三斤公逾感激疾甚  
欲引去而口不忍言也甲子春奏事 乾清門暈踏於地扶歸卽  
日疏乞骸骨 上慰留乃復力疾視事子弟勸邸舍少休公曰吾  
耽逸一日罪人待讞者增一日苦矣八月具疏再請 上惜其去  
以詞甚迫許之令馳驛還里 諭以三覲乃行始入 賜以御廚  
珍饌令內臣視公食多少再入 賜茶再入 賜御筆寒松堂扁  
額古北口詩公歸因自號寒松老人云去國之日公卿祖餞相與  
感歎以爲公清勁之節始終不撓固不愧斯稱而 天子之知公

亦可謂至矣公官至尚書門庭蕭寂度閣有書數百卷無異秀才時所增惟 綸誥宸章及諫草一囊而已歸後四年乃卒於家丁卯七月晦日也年七十有一 天子覽遺疏爲之震悼典禮有加親定謚曰敏果生平所著書甚多晚皆刪去存十之三合以奏議若干卷名曰寒松堂全集元配李氏 誥封夫人側室劉氏樊氏子四人學誠康熙二十一年進士內閣辦事中書舍人學謙學謚邑諸生學訥尚幼女三人銘曰

嗚呼魏公躬行君子 本朝以來誇誇一士彼其矚矚所畏一死公之盡言亦少懸矣實惟中孚非以掠美公忤於人人諒公只寒松晚節徜徉田里秀才家風尚書門第非余頌公公自云爾



右神道碑銘徐乾學撰

魏象樞字環極號庸齋其先世居江南之鳳陽明永樂初有明威將軍者從代王之國大同世襲大同衛指揮使其支子遷蔚州遂世爲蔚州人象樞少讀書嚴重無子弟之過明崇禎壬午秋試舉於鄉 本朝順治三年成進士選庶吉士明年改授刑科給事中 以明季大弊未革者若督撫按聽用之官舍太雜道府州縣之胥隸太濫疏請清理報 可五年轉工科右給事中尋轉刑科左給事中劾安徽巡撫王愷徇庇受賄罷之六年充會試同考官八年世祖章皇帝初親政免天下額賦罷城工除加派其時有司有以私徵侵帑坐罪者上疏極陳其弊請飭州縣各依易知單造格

眼冊註明人戶姓名糧銀款目及蠲徵各清數呈大吏覈驗印發  
開徵又請定藩司會計之法以杜欺隱立內外各署治事之限以  
清稽滯皆報 可九年轉吏科都給事中十年會大計連上四疏  
皆言計典其一言糾拾之舊制宜復言官不宜反坐下所司議遂  
著爲令因奏白順治四年糾拾被譴吏科左給事中劉樵冤得  
旨復職是年以九卿科道會議阿達哈哈番任珍落職怨望罪大  
學士陳名夏等漢官二十七人爲一議議上失 旨科臣坐徇黨  
負恩罪應流有 旨釋免各子降罰畱原任象樞供職如故明年  
大學士甯完我疏列陳名夏悖逆稔惡諸罪狀以 聞詞連象樞  
初象樞誤參司官錢受祺擅委中軍下部議降級名夏稟改罰俸

至是謂象樞爲媼親黨護逮問白其誣免議旋以名夏父子濟惡  
言官不先事發六科之長皆鐫秩一級象樞降補詹事府主簿累  
升光祿寺丞十六年以母老得請終養家居益潛心宋明儒先之  
學康熙十一年母憂服除用大學士馮溥薦授貴州道監察御史  
滿歲晉四品卿銜仍掌御史事屢有陳奏大要謂先教化則宜崇  
臣僚之家教急治河則宜蓄任使之人才正人心則宜戒淫巧勵  
天下則宜輯禮書 聖祖皆是其言是年冬擢都察院左僉都御  
史明年轉順天府尹除大理寺卿戶部右侍郎尋轉左在戶部方  
西南用兵上籌饟三疏其略曰確估價值以杜浮冒嚴覈關稅以  
防侵漁慎用藩司以清錢糧 從之尋 命同侍郎班迪清理部

庫十七年升都察院左都御史首疏申明憲綱十事 聖祖嘉其切中時弊以嘉定縣知縣陸隴其清介舉之鎮江府知府劉鼎瀾職絳州知州曹廷俞貪劣劾之又以磨勘順天鄉試卷陳科場八弊請設內簾監試御史以重關防陳學政十弊請據爲三年考覈之實 廷議並著爲令十八年遷刑部尙書疏請畱御史臺爲朝廷整肅綱紀 上可其奏遂加刑部尙書畱任遵 諭舉廉疏薦侍郎以下有清望者十人皆次第擢用是年京師地震 召對畢同列皆退象樞請畱密奏此非常之變惟重處索額圖明珠可弭此災 聖祖曰此皆朕身之過與伊等何與朕斷不以己之過移之他人也不許十九年眞授刑部尙書尋 命同吏部侍郎科

爾坤巡察畿輔稱 旨二十三年以病乞休 許之 賜御書寒

松堂額寵其歸因自號寒松老人以志 恩遇著有寒松堂集二

十六年卒於家年七十有一 賜祭葬謚敏果雍正八年崇祀賢

良祠復於本籍 賜祭如典禮

右傳鄭虎文撰

公諱象樞字環極其先江南鳳陽人明永樂初從軍北行以武功

顯授明威將軍隨代王之國大同家焉其子孫遷於蔚州數傳至

公會祖諱宦祖諱九經考諱卿官新城主簿兩世並 贈資政大

夫刑部尚書妣李太夫人生二子公其仲也崇禎十五年膺鄉薦

明年入京會試聞大父有疾不及試而歸流賊陷山西卿士大夫

多汗僞命公奉母匿山洞中以免我 朝順治三年登進士第選  
庶吉士明年改授刑科給事中公性骨鯁敢言事尤注意於當世  
人才賢不肖治術得失民生休戚故其所陳說本末瞭然是是而  
非非必盡意乃止在刑科時上疏言督撫按聽用之官舍太雜道  
府州縣之胥隸太濫宜加裁汰報 可五年轉工科右給事中劾  
安徽巡撫王懷徇庇受賄事 詔降懷三級用七年轉刑科左給  
事中八年 世祖親政上疏言 聖政日新聰明日進啟沃之責  
端賴輔臣 聖躬宜慎起居不當輕出閒有臨幸輔臣宜隨侍法  
從因事納規以盡保傅之責更請妙選儒臣置諸左右備顧問注  
起居報 聞又因災變陳言語侵用事大臣益切下部院科道議

卷四十四

左給事例不與議公固以請許之公與諸大臣抗辯是非無少詘  
在廷者多側目公獨大學士范文肅公心識之曰直哉此我國家  
任事之臣也其後遇有構公者輒於眾中剖析之卒得白自文肅  
去位而公亦不能安其職矣時有司有以私徵坐舉者公上疏極  
陳其弊請飭州縣各依易知單造格眼冊注明人戶姓名糧銀款  
目及蠲徵實數呈大吏覈驗印發開徵又請定藩司會計之法立  
內外官治事之限皆報 可九年轉吏科都給事中十年大計上  
疏言言官糾拾之例宜復雖失實不當反坐下部議著爲令時言  
官吳拜吳達以言事得舉公疏言 皇上以開言路爲心向來言  
有可行者未嘗不采其言言有不可行者亦未嘗輕棄其人所以

滿漢諸臣大作敢言之氣近日乃有一言不當問擬大辟者誠恐  
言路諸臣明知言者得辜不言者無辜以惴惴畏辜之心結成鬱  
鬱緘口之象亦言路之大可羞也夫人臣之辜莫大於懷偏私納  
賄賂若一言不當遽擬重辟何以處貪賊壞法挾怨報仇者臣謂  
失言之辜莫過溺職宜下吏部以考功之法處之貪賊壞法挾怨  
報仇是爲不法乃下刑部以司寇之法辜之如是則法紀當職業  
明矣 詔下部知之因奏自順治四年糾拾被譴吏科給事中劉  
捷冤得 旨復職是年九卿科道會議總兵官任珍落職怨望辜  
大學士陳名夏等漢官二十八人別爲一議章下所司科臣坐徇  
黨擬流有 旨但予降罰畱原任公供職如故明年大學士甯完



我疏列陳名夏臬狀辭連公初公誤劾司官錢受祺擅委中軍部  
議降級名夏票改罰俸至是謂公與名夏子婦家牛射斗爲姍親  
名夏用是黨護及逮問公實不識射斗遂免議旋有旨以名夏  
父子濟惡言官不先事奏發六科之長皆鑄秩一級降公詹事府  
主簿稍遷光祿寺丞十六年以母老乞歸康熙十一年母憂服除  
用大學士馮文毅薦授貴州道監察御史滿歲晉四品京秩仍掌  
御史屢有陳奏請申督撫互糾之令以懲貪旌廉吏以善治停正  
月開徵以蘇民困修禮書以一風俗加俸祿以厚廉恥下部議頗  
見施行尋遷左僉都御史明年二月遷順天府尹四月轉大理寺  
卿七月擢戶部右侍郎十二月轉左侍郎會西南用兵上籌餉三

疏一確審價直以杜浮冒一嚴覈關稅以防侵漁一慎用藩司以清錢糧 聖祖然其言十七年授左都御史上疏言 國家之根本在百姓百姓之安危在督撫願諸臣爲百姓畱膏血爲 國家培元氣臣不敢不爲 朝廷正紀綱爲臣子勵名節 詔以其言宣示中外公自初爲言官卽以進賢退不肖自任及後再起益嚮用自任亦益力順治中御史郝浴巡按四川疏劾吳三桂驕橫狀三桂奏辨浴坐臯流盛京及三桂反公三疏白其冤卒以原官召嘉定知縣陸隴其治行第一以盜案註誤公復三疏薦之仍起知靈壽縣會 詔舉博學鴻儒公以畢振姬湯斌等五人應先後所薦王天鑑宋文運高珩達哈塔蕭維豫張沐子成龍等並有名

蹟海內推爲知人其掌都察院時劾鎮江知府劉鼎絳州知州曹  
廷俞貪酷舉奏學道賢者勞之辨邵嘉參劣者盧元培程汝璞  
詔用其言或遷或斥大小之吏肅然警動矣會磨勘順天鄉試卷  
陳科場八弊請設內簾監試御史以重關防又陳學政十弊請據  
爲三年考覈之實下 廷議並著爲令明年春二月 內殿奏對  
畢 聖祖賜御書又特書清慎勤三字以賜 諭曰以爾居官克  
稱此三言故以賜爾頃之遷刑部尚書公言臣忝任風紀職多未  
盡敢援漢臣汲黯自請爲郎故事辭新命仍見所領職冀得拾遺  
補闕 從之仍加刑部尚書銜其年七月京師地震時大學士索  
額圖明珠方樹黨招權利廷臣莫敢言公奏言地臣道也臣失職

則地反常臣總憲綱咎實在臣願賜罷斥 聖祖立召見公伏地  
流涕言時政闕失乃索額圖明珠挾私市權所致乞重譴二人以  
消天變 聖祖尋下詔切責諸臣令勉圖省改二人皆惕息十九  
年仍授刑部尙書公在職持守不撓嘗言刑所以遏惡也惡者衰  
善者遂矣散法以縱奸善者奚勸焉書曰茲用不犯于有司恃吾  
有不可犯之法耳尋 命偕吏部侍郎科爾坤巡察畿輔還報稱  
旨二十三年以病乞休許之比行 命三人入朝 賜御書寒松  
堂額及古北口詩一卷寵其歸二十六年卒於家年七十一自公  
密奏索明二人梟明年秋索額圖致政二十七年春明珠爲僉都  
御史郭琇所劾去政府至四十五年春 聖祖始以公面對語諭

羣臣二人之卒見屏者公最先有以發之也公平平生好讀先儒書其於義理之學鑽研不倦與蘇門孫鍾元二曲李中孚及湯陸諸公俱通書論學所著有儒宗錄知言錄寒松堂集數十卷居官廉餽遺無敢及門其以薦起也度在外無以自給不欲出有李恆岳者其妻兄弟也謂曰子在京師日費幾何日日得一金足矣恆岳曰然則吾能任之子果出而有濟於世吾何愛焉公遂行終公在官無內顧憂者恆岳力也比歸老門庭蕭然獨增書數百卷而已公之卒也 賜祭葬如禮諡敏果雍正八年入賢良祠

右事狀彭紹升撰

公父諱卿官江西新城主簿除河南懷慶府經歷未任歸里止攜

二竹箱惟夏布竹篔數片而已

宣城守道非鳴何公謙見公文曰塞上安得此佳士遂題其門曰  
國士無雙

公丁父艱守制聞闖賊渡河之信爲避亂計蔚城東北有古寨名  
德勝莊甚險奉母夫人避此時賊查舉人未仕者迫授僞職公潛  
入山不令家僕知 本朝定鼎始出山迎母夫人歸

順治三年選庶吉士散館時授刑科疏言今歲各省災傷於疏  
聞之日遣員查勘酌量蠲卹業已報部題覆而上下咨移非旦夕  
可達應 敕部凡被災若干刊榜行撫按懸挂俾百姓共曉庶混  
徵之害可革 年譜

疏陳藩司會計奏報之法謂在內錢糧部臣掌其所出在外錢糧  
藩司掌其所入欲令各部之銷算徹底清楚先令各省之錢糧逐  
款奏 聞請自八年爲始各省布政使歲終會計通省應徵應解  
起運存留支發蠲免拖欠各若干分款冊送督撫按撫臣會題總  
數進呈其布政使例造清冊咨送在京各衙門互相查考有弊卽  
糾既可杜藩臣之欺隱又可覈部臣之參差實大有裨於錢糧者  
向例戶部奏銷原有定期今撫臣冊奏宜在各部奏銷之先所謂  
先計入後計出也至於勦逆產價蘆鹽租課贓罰銀兩本折物料  
等項一槩報明庶錢糧清而 國用足卽以定藩司之賢否可矣  
公疏參江南左布政劉漢祚侵欺額布銀五十餘萬漢祚議處又

疏陳積弊之由立革弊之法查各直省未解本折不止額布一項日久事發官去役逃而金錢不可復返病在國矣或牽房扯債包賠累及無辜病在民矣請以兩言蔽之曰追比於事後不如稽查於事前也夫完報有限查銷有法載在會典甚明一頒格眼文簿按月開填徵完起解錢糧數目歲終州縣赴府府赴布政司查比仍將比過分數另填一格具由呈部查考以防私徵欺隱等弊一立循環文簿各省登報辦解物料數目年月姓名各照道里遠近按期倒換查驗到者填註遲者拏究以防解役延挨侵匿等弊至累年拖欠錢糧物料果否在官在民有無未報未解新舊互掩等弊應逐項清覈無致久飽奸貪虧損國賦



疏言科道糾拾之例宜復雖失實不當反坐查科道拾遺被處者不一而足如劉樾糾拾張守廉林起龍糾拾楊雲鶴俱革職楊時化糾拾左光先劉鴻儒糾拾勞有學俱降級考之典章原用科道以彈劾有司非借有司以處分科道也乃科道以進言受累蓋糾拾之單款與撫按冊報相左撫按恐蹈徇縱之愆不得不代尋出脫之法巧爲遮蓋款子虛此一弊也所糾之官仍以見任質審百姓衙役尙屬管轄斷無供證賊私之理此二弊也科道必待吏部考察後有失當方許指名糾劾而降革反坐言官不合典例此三弊也且當日察審單款之無據者撫按也案墨未乾而參左光先等貪婪不法者亦撫按也則科臣之指參爲不誣矣嗣後被糾

官員如審無賊過不得藉端處分科道疏入下部議著爲令

公疏論今之所謂卓異卽漢之治行第一也卓求真卓必有賢聲  
異求真異必有實政今查各直省冊開卓異官員事實有據者固  
多平常無奇者不少卓異之選未可濫邀請以實政可指功蹟超  
眾者爲一等以治業平常僅能稱職者爲一等庶幾舉眞才求實  
用於吏治民生良有裨益

十一年畿輔饑 上發內帑遣大臣馳往賑濟公疏言大臣奉  
命而往宜兼行省問安插之事地方災荒輕重不等有本地逃亡  
而去者有別地就食而來者一體賑濟固不待言但恐流民棲身  
無地請將各府州縣空廡官房庵觀寺院設法安插向來大家富

戶因懼隱匿逃人之禍流民所到槩不收畱今須給與關防執照使人無疑設有逃人後不受累大戶樂收樂養則饑民有食有居矣災荒之後百姓必不能早辦錢糧或有官不恤民追比預徵重累百姓常問民疾苦某項累民勢當蠲除某官害民法宜糾參逐一詳奏則逃者可以復返貧者可以不逃矣

疏陳勤民大政四款一用真才以恤民命錢糧皆百姓膏血禾稼未登先行徵納徵納十分 朝廷尙不得五六分之用有蠹役中飽者有劣官蒙混者有徵無起解解無批迴者甚且軍餉不發災荒不問皆布政司之不職也臣謂督撫而下此爲第一緊要之官請照舊例吏部推列正陪務求真才特候簡用一慎刑獄以疏民

情按察司參拏貪汙申雪冤枉職任甚重若律例不諳才守不稱者爲之或久獄株連奸貪飭法必至下妨農業上千天和請定歲報之法將已結未結若干件年終造冊奏報一行勸懲以足民食八旗之民均屬赤子畿內地薄而物貴凶年度日維艱勸懲須有良法如某牛彙下察其給養窮人若干則實加升賞某牛彙下察有窮人未嘗給養則實加罰懲一均賦徭以蘇民困紳衿優免丁糧恩極厚矣但紳衿減去一分則百姓加派一分富家多有前程貧民代爲包賠情極苦矣其中儻有影射濫冒病民更甚請定歲察之法凡事故黜革及宦家親族不應優免者造冊申報庶窮民止包實在之紳衿不致苦累逃亡矣

寒松堂文集

掌吏垣或詢以職掌何在公曰條陳舉劾二者而已條陳當計後日之利害如目前有利後日有害不宜言也舉劾當論平日之賢否如素稱賢者偶有微愆不必苛也聞者韙之

十二年 詔求言時公已緣事降詹事府主簿疏請責成六部稽察兵民利弊兼請 上旌別大僚親記功過又疏陳薦舉文武道府等官格式並救拯兵民節目四款一請將邊地倉收糧米就近支放兵餉一嚴察房稅侵漏一設立八旗義倉勸輸備荒一將安插流民得所者比例議敘以示鼓勵

遷光祿寺丞退食多暇惟求躬行實踐之學博採理學格言有明諸儒分爲四類曰大儒醇儒名儒通儒手自論定曰儒宗錄嗣因

母老乞養家居嘉言懿行恆自鈔錄返而自思曰能躬行否知一字行一字知一句行一句積久成書曰知言錄讀書有得惟與陽城白東谷祁州刁蒙吉應州左翼宸容城孫鍾元柏鄉魏石生諸先生歷陽成我存代州馮訥生及門走書商推資取益焉

其以薦起也妻兄李恆岳助之資公辭曰後將安償恆岳曰宰相薦賢之章 天子召賢之典久不聞矣吾今上助 國家非助公也公遂行

公見馮文毅公曰何以見知於先生而辱薦耶文毅曰公居諫垣有直聲人所共知也余之知公則更有在憶余爲祭酒時每值丁祭凡不陪祀各官例於前一日瞻拜公每期必至敬慎成禮一日

大雨如注泥深三尺謂必無人來矣言未畢而公至肅然瞻拜此  
外果無一人余益起敬知爲至誠君子觀此一節他事可類推矣  
今服闋應 召而來此後皆報 君之日也公其勉旃 年譜 丁  
公疏言教化係 國家根本之圖伏讀 上諭謂至治不專以法  
令爲務而以教化爲先蓋法令禁於一時教化維於可久徒恃法  
令而教化不先是舍本而務末竊思 朝廷之教化安能家喻戶  
曉惟共分 朝廷之教化以爲教化自能端本澄源是在諸臣之  
爲父兄者家自爲政身自爲教也如父兄孝則子弟必孝父兄忠  
則子弟必忠廉則子弟必不貪仁則子弟必不暴蓋父兄居家居  
官子弟習聞習見標正則影正標邪則影邪此之謂身教儻父兄

所爲不正子弟尤而效之或馳情於聲色薰心於貨利惑於異端  
邪說溺於驕奢奔競如近日打馬弔鬪混江之類尤壞人心此避  
人之事非父兄其誰察之設異日以不肖之子弟作不肖之臣子  
是子弟之負朝廷實父兄之負朝廷也養其性情正其心志一家  
之教化卽朝廷之教化也教化旣行在家則光前裕後在國則端  
本澄源十年之後清官良吏君子善人皆從此出將見人才日盛  
世世共襄太平矣

疏論民窮財盡百姓之困於正月開徵者科道諸臣屢言之而夏  
稅秋糧終阻於部議而未之行夫兵民一體也兵窮則早給餉民  
窮則早開徵滿漢一體也莊頭地澇便給半米半銀百姓納糧不



論耕田下種所謂一體者安在今民之大困者莫大於正月開徵  
甦民之大困者莫大於夏稅秋糧早行一日民卽受一日之賜請  
著爲令永不許正月開徵以定常經而昭法守

公疏論督撫互相糾參雖有定例而瞻徇容隱不肖舉發如督撫  
有賑濟饑民侵銀十萬餘者有捏荒作熟苦民邀功者有將奇貪  
侵庫之官卓異者有賄賣武舉者其劣狀已俱發覺未見特疏互  
糾者何人又提學一官考試通省生童關係人才教化未見糾參  
者何人以瞻徇情面爲寬容以縱釋大貪爲渾厚此督撫之職分  
有未盡也嗣後如有應互糾而不糾者論罪事隸某部而部臣不  
糾參者予以處分再請 慎簡眞賢不使地方有姑試頻更之官

以致交代之際吏胥作奸迎送之間有司多累俸各畱心職分大破因循潔己奉公愛惜民命

疏言懲貪之法必先制祿以養廉天下之宦京師者房屋器用之需妻孥僕馬之贍惟祿是藉卽仕四方者選舟秣馬治裝裹糧所攜之貲非典則貸亦惟祿是藉今自一品至九品每歲俸入多不過二百兩少者三四十兩雖京官有公費月米外官有柴薪俱屬無幾而罰俸則例二百餘條實爲太密在不肖之輩上司奪屬官之贏餘屬官吮百姓之膏血何須俸祿若守法自持反因升斗莫給一旦改行易操剋軍剝民勢所必至人無廉恥卽國無人才查例官有功則紀錄以示勸豈有過者不可記過以示懲請酌情

定法略加變通嗣後應罰俸三月至一年者准其記過一次功過相抵仍從舊例俟錢糧充裕量行加俸既變罰俸之例乃有食俸之期並議給京官柴薪外官月米云云

疏言禮制之書尙未頒行有厭常喜新而干禁者亦有無知而犯法者況紳士軍民房屋輿馬衣服器具之過分婚娶死喪葬祭宴飲之妄費尙能家嫻禮制人遵禁約乎此 朝廷教化雖行於天下而實未嘗行於天下有文告而無成書故也請 敕部詳查歷代禮書及朱子家禮等書略做體裁爲崇儉去奢移風易俗之準品官與士庶務別等威吉禮與凶禮各分門類將屢年題定禮制禁約刊刻成書頒行廣布俾通都大邑無不見聞窮鄉下里盡知

遵守云

時吳逆叛亂公密奏三疏皆從地方人心起見一要地當設道員以資彈壓一川楚大兵屯集供應浩繁錢糧暫宜緩徵一煽惑句連人驚風鶴請申明法紀鼓勵人心

康熙十三年大兵指日蕩平地方恢復需人 詔廷臣虛公舉薦公疏薦原任御史郝浴原任江南常熟縣知縣魏允升且言允升體貌魁梧才華卓越其淡泊之學術勇往之擔當經緯兼長爲猷必著有用之器也 文集

由左僉都御史游升戶部左侍郎一歲五遷愈用警惕自題一聯云欺人如欺天毋自欺也負民卽負國何忍負之 年譜

保舉要地藩司疏云候補福建布政使李士楨操守清介才品優長順治年間臣同鄉同年張璿巡視兩淮鹽課以清正愛上知差滿回京臣問屬吏孰賢璿曰有守有爲惟李士楨一人耳此臣以信璿者信士楨也後士楨補授大同巡道父老子弟頌清廉愛民者如出一口此又以信百姓者信士楨也又訪士楨前爲安慶知府後爲河南臬司彼地之鄉紳僚友咸稱其賢此臣復以信鄉紳僚友者信士楨也方今閩省未開士楨暫畱在浙浙江藩司已經升任不可一日無好官江浙財賦重地又值軍興旁午之時得一廉明藩司而民膏兵餉均與國計有裨

疏薦要地堪用之人才請破格以收實效一王天鑑宣府進士歷

升慶陽道長才偉抱操守清嚴膽識過人當其未病之先有上馬殺賊下馬治民之略一鄭端直隸進士歷升貴州學道素履醇謹歷任著聲且孝友信義之人立朝忠愛可卜也尙書王熙保其實心守法大有執持潔己持廉克盡職掌年力精強才猷練達若授以旬宣之任效力恢復地方必能相機整頓云云。

上籌餉三疏一確審價值以杜浮冒直省米豆草束等項若逐案覈減則各處價值不一未便以侵冒之數駁參若槩准銷恐有以賤作貴之弊此等價值稍一節省則數十萬可得該督撫宜確訪時價據實節省以濟軍需一嚴覈關稅以防侵漁關稅每年部額銀六十餘萬軍餉賴之先因各省用兵以致收銀缺額今地方安

蓋關稅自當照常乃紛紛又報缺額嗣後凡各官到任每季將收  
稅銀數報督撫一次如一季缺額將本官題參撤回如能潔己恤  
商稅額全完者照例議敘一慎用藩司以清錢糧用兵地方款項  
錯雜有本省徵解有別省協解有臣部撥解動至數百萬兩頭緒  
紛紜弊孔百出非敏練之藩司不可抑又有請者一省之錢糧掌  
之者藩司察之者巡撫也近日多以本省藩司升本省巡撫豈有  
自行發覺而新任藩司又不得曲爲遮蓋臣不知互相覺察之  
意謂何也

文集

有科臣疏請清查隱漏人丁可得銀數十萬兩 敕下戶部議公  
力持不可或詰之曰脫漏戶口有罪人丁不當清查乎公曰人丁

固不可遺漏但無竭澤而漁之理五年編審非清查而何若盡行  
查報勢亦不能如淮揚地方河決爲災田產漂沒抱兒攜女日則  
沿途乞食夜則依隄露處此輩能納丁銀乎近賊之地被賊蹂躪  
今甫恢復家室蕩然此輩能納丁銀乎大凡屯駐地方供應糧草  
運送軍器蓋造營房以及刈草餵馬等役無一非用民力困苦已  
極何忍再加錢糧戶部爲養民之官若此令一行貽害百姓不小  
且恐奸民逃避差徭烏合嘯聚地方多事將誰歸同官皆以爲  
是遂公議不行

年譜

薦舉博學鴻儒疏云臣鄙陋失學安能知人有一二素知經諸臣  
具疏者臣不敢再舉謹就聞見所及得五人焉一原任湖廣布政



使畢振姬山西進士清操自苦才略過人博古通今有體有用請  
告十餘年躬耕讀古不輟而經史之貫通詩文之古奧所稱良史  
才庶幾不愧一原任江西嶺北道參政湯斌河南進士恂恂儒雅  
清謹可風謝病歸田閉戶讀書學有淵源興行實踐文詞尙實去  
浮一見任戶部江西司員外郎馮雲驥山西進士居家孝友辦事  
勤敏素以古學自勗畱心風雅退然抑損不敢自居一大理寺評  
事白夢鼐江南進士才識老成學問博雅蕭然四壁惟以詩文自  
娛一原任浙江督糧道參政王紫綬河南進士宏才積學兼工詩  
賦有倚馬之才終養在籍讀書二十年起補江西贛南道保守贛  
城尤覘經濟云

十七年授左都御史條奏一不許州縣官私謁督撫二督撫不許  
差家僕等往各府州縣三不許送督撫賀儀等物四督撫布按不  
許私開便門五不許督撫布按將優伶遊客人等轉送各府州縣  
六不許借公事需索陋規七不許縱容學道賄賣生童八不許虧  
短行價九不許借補庫變價名色準算部民子女送人十不許偏  
勒新官強接離任官交代

文集

磨勘順天鄉試卷陳科場八弊請設內簾監試御史查糾一場外  
買題之弊二主考房考通同揣摩之弊三攜卷入房暗查關節之  
弊四取中私人不呈佳卷之弊五將不應圈點者密圈密點呈  
主考之弊六暗帶主文假裝僕役尋查關節之弊七埋藏偷換硃

卷誤人功名之弊入不批落卷之弊又各省主考皆京卿部科等官同考不過州縣微員易於彈壓素非親暱難以私通惟順天主考其同考率皆部屬等員或官則比肩或情屬素交卽有一二謹慎之人難敵眾手障蔽之巧且仕宦子弟及遊學就館之士與應開考試之官朝夕相近題目易洩關節易通若不立法嚴防恐大典不光士風漸壞至會試同考多員心術不一難保無私必主考與御史共相關防庶可釐弊

又以順治丁酉科場事發後改爲公閱公薦反更滋弊請仍照舊例分房打印以便稽察謂與其名公而暗分不若分房註批之爲正與其既分而同罪不若按房參處之爲公又請考官處分視舉

子所犯爲輕重如舉子應革者考官革職停兩科者降調停一科者罰俸別人重犯法必實心閱文矣

疏言農事根本所關民食軍需並重民食足則軍需有濟農事重則民食無憂如閩疆多事儻州縣將弁不加撫卹或苦民供應驅民役使借民糧米虐民室家恐百姓不務耕耘揭竿走險一可慮也又解馬一事關係軍務每解一次挑出病弱馬匹照數賠補衝路難支勢必均派均派無出勢必暗取恐累民耕種無力輕去其鄉二可慮也又河工關係重大旣動錢糧大修又欲撥夫修築數百里隄岸萬一攤銀派夫處處騷動恐荒歉之餘又苦重役或致流亡三可慮也其餘或賊寇殘破元氣大傷田荒人少者有之或

兵馬屯集運送繁多輟耕罷耒者有之此病民妨業之大略也至於無事之地正當與民休息恐不肖官員罔恤百姓之艱難不念農桑之切要或以兩造之訟破人身家或以無名之徵奪人耒耜必致逃亡相繼地丁多逋是地方少一荷鋤負耒之人卽國家少一納糧供稅之人今萬方之供無窮公家尙有匱乏之慮終歲之入有限農家豈是不涸之倉下官取之上官又取之前官取之後官又取之官日富民日貧官有權民無告耳此民窮財盡之大略也各督撫當於民間之疾苦善爲調劑卽於有司之賢不肖力加勸懲凡有私派名色及徵收錢糧每兩加火耗二三錢及四五錢者通行嚴禁惟以政簡刑清務農重穀爲循良第一事大計亦

卽以此爲上上考其流亡失業者罪之俾小民有父母妻子之安  
雜大系麻之樂豈獨民食足而軍需裕哉

疏言學道一官關係士風文教 國家重之者爲其素習經史學  
問優長衡鑿不爽也爲其寒窗燈火半世艱難辛苦備嘗於前必  
能曲體於後又爲其讀書立志理欲分明師嚴道尊楷模多士且  
上有功令中有清議下有子孫良心難昧也聞學道有考較公明  
士子悅服者首則江南之邵嘉次則山東之勞之辨若肆行無忌  
士子怨恨者首則山西之盧元培次則浙江之程汝璞也請 敕  
部考覈勸懲以昭公道並列十款以杜弊端兼資考覈童生未經  
府考冊內無名鑽求徑取入學一弊也額外溢取撥發別學收冒

籍以占本學正額二弊也彌封號簿及坐號紅簿不發府州縣封貯收存道署私查對號賄賈三弊也考完一府不將紅簿發學徇私通賄更改等第拔下作上四弊也每考令書差人等先開六等草單嚇詐保等銀兩准放三等五弊也文章多武童少將文章充爲武童入學之後黃緣改文將娼優隸卒濫收善騎射者擯而不錄六弊也各府設有考棚憚於親臨將生童遠調考試其告病生員扛擡驗病七弊也縱容無賴教官包攬生童私通綫索效勞分潤八弊也曲徇上司同僚情面京官鄉宦私書及親族朋友討情抽豐孤寒之文棄如糞土九弊也報部學冊將溢取入學之生童未經歲科考試預附三等其姓名不入新案造入事故衣頂項下

以趨甲補錢乙十弊也

疏言各大吏督率有司曉諭小民力田節用多積米糧此根本之計也部臣請修舉常平倉令鄉里自行義倉社倉以備凶歉此補救之方也臣謂藏富於民經久不匱之道要在有司留餘於百姓而上官留餘於有司則火耗私派勒詐三大弊不但於根本有害亦於補救相妨也百姓種地除牛種人工納糧辦課外所贖幾何父母妻子男婚女嫁歲時伏臘之用皆賴焉上官取之於有司有司乃敢取之於百姓以直省計之徵收錢糧每兩加火耗二三四五錢不等是正賦百萬兩百姓多費已三五十萬矣又有各項私派按糧攤灑總而名之曰補庫謂有司動用庫銀應令百姓



補之也分而名之曰坐派曰開徵曰包賠曰解費曰水腳曰供應  
曰津貼曰運送曰預借及無名雜差等項謂地方凡有設處俱從  
百姓取之也每年私行派取又幾百萬兩矣或指人命盜案逃人  
戶婚田土爭訟等事每年勒索財物又幾百萬兩矣今欲修耕九  
餘三貴粟重農之實政非禁火耗杜私派嚴勒索不可如督撫潔  
己奉公實心體訪有犯必糾則布按府道等官不敢索取有司之  
錢而有司寬然有餘矣有司畏上司之糾參不敢巧取百姓之錢  
而百姓寬然有餘矣歲省百姓千萬兩無名之費畱在閭閻正賦  
可以早完一便也小荒可以相濟二便也盜賊可以潛消三便也  
逃亡可以漸歸四便也常平義社等倉可以次第舉行五便也除

三不便民之弊以收五便民之利此實政之所當修者也地方官又當崇儉黜浮刻意修省蝗旱災傷之地倍加撫綏凋殘疲困之民作何調劑如果風清弊絕物阜民安督撫亦可從容奏效矣舉廉吏疏云原任戶部侍郎雷虎滿洲人老成慤直清名甚著原任戶部侍郎班迪居官清正臣共事二年見其念念爲國有醇樸之風無奔競之習原任刑部侍郎高珩山東進士性甘淡泊志絕俗塵不自有其身安知世有富貴原任大理寺卿瑚密子滿洲人清謹自守家道甚貧原任吏部郎中宋文運直隸進士清而且直守正不阿掌選時錚錚有聲原任翰林院侍講蕭惟豫山東進士督學畿輔大著清名士子至今頌之原任湖廣布政使畢振姬

山西進士歷任部郎道員臬司清操絕世才略過人請告十餘年躬耕讀古臣前以有體有用薦之左副都御史劉健亦薦其操守清嚴一塵不染真學行兼優之人等語原任直隸內黃降補知縣張沐河南進士清操惠政深得民心有古循良風去任時老幼追送臨河尚不忍舍其愛戴如此

文集

二十年公從 上謁 孝陵詩曰薊門西望望 皇畿共侍 鑾輿展謁歸禮罷 祿門雲自闔夢迴寢殿淚頻揮老臣將去填溝壑何日重來拜翠微 廿載承恩無寸補鐘鳴漏盡尚依依五六句忠懇發於至誠令人感動

池北偶談

變理陰陽宰相之職也寒燠失節風雨不時皆咎焉魏子曰非也

陰小人也陽君子也進君子退小人變理之能事畢矣

人之存心忠厚者必立言忠厚立言忠厚者必作事忠厚身必享忠厚之福子孫必食忠厚之報

人之所畏者有三等畏天命上也畏國法次也畏冥報又其次也總以畏清議爲下手工夫人之所愛者亦有三等愛人才上也愛百姓次也愛文章又其次也要以愛名節爲切實本領

敗家子有二種淫蕩賭博驕奢縱佚花費祖父之資產者敗其家門也此則愚頑不讀書之人爲之妨賢病國罔上行私貪賂肥家害人利己辱沒祖父之名節者敗其家世也此則聰慧能讀書之人爲之不可不辨

弟子入則孝一節赤子備大人之事賢賢易色一節大人完赤子之心此二節卽聖域賢關也

好名是學者病卻是不學者藥

恭謹忍讓是居鄉良法清正儉約是居官良法

一味疾人之惡小人之禍君子者十有八九終日揚人之善君子之化小人者十有二三

今人見科目仕路中人謂某某有功名矣余不敢信或曰列高榜登甲第得顯官居要路非功名而何余始知今人之功名異於古人也古人之功或在社稷或在封疆或在匡君或在養民古人之名或在尸祝或在口碑或在文教或在史傳一代之有功名者不

數人一人之有功名者不數事也何今人功名之多也

怨由公起終日不解而再日悔之怨由私起終身不解而子孫銜之大凡同理一事意見偶有不合者公怨也各圖一事心志不能獨快者私怨也學者當以怨之深淺辨心之公私

曰正心曰存心曰洗心去人欲盡之矣曰盡性曰率性曰養性循天理盡之矣曰知命曰俟命曰立命曰至命去人欲循天理死生不渝盡之矣

人君以天地之心爲心人子以父母之心爲心天下無不一之心矣臣工以朝廷之事爲事奴僕以家主之事爲事天下無不一之事矣

昔人云省費醫貧彈琴醫躁安分醫食量力醫鬪參禪醫想獨牀  
醫淫痛飲醫愁讀書醫俗公曰對善人醫惡念交正士醫邪心  
修身如修屋一處不密一處便漏

脈理方書字字分明而良醫甚少何也口授之訣少也天理人情  
字字分明而名賢甚少何也躬行之力少也心安則言行安言行  
安則夢魂安夢魂安則生死安生死之不安者心不安也

庸言

祈穀說曰天災流行何代無之數也儒者不言數咎在人茲地也  
人虞詐歎俗健訟歎行誼悖歎天物暴歎淫祠盛歎有一於此足  
以致災

咎徐子星書書生卽不能爲朝廷建大功持大議以濟時艱然而

愛人才惜民命書生猶或能之若不大破勢分利欲關頭則氣不揚骨不動安有靡靡然唯唯然可任天下事哉

寄畢亮四書近見士大夫率以感應篇勸世自是好念頭然以福福勸不若以名節勸之之爲切方今吏治多雜何不集古儒吏廉吏才吏勞吏四種爲一刻使作吏者知所自擇以求進於古人耶與秦尾仙學使書近日士風漸壞文運不昌病在有情面而無文章有文章而無德行拂天下大公之望抑孔門首重之科請託公行廉恥道喪俾人才所從出之地既無眞秀才安得有眞舉人眞進士耶嘗觀人以情面進身者必重情面以文章進身者必重文章以德行立身者必重德行如銜取影毫髮不爽也足下之才之



學之品豈復慮此但功令森嚴身名爲重內外情面槩宜謝絕然後以處女之自愛者愛身以嚴父之教子者教士士風文運實嘉賴之

與馬步先廣文書朝廷設學校之師以訓士率皆老明經爲之今之用甲科者特例也喫緊者在孝弟節義四字循循誘人察諸生內某某孝則敬之某某弟則愛之某某節則表揚之某某義則崇獎之俾人人聞風起舞吾道尊矣吾職盡矣濟貧扶弱其次也講學課文又其次也至開報行劣如賭博武斷顯過可指者聊示薄懲予以自新其一切閭閻曖昧之事不得妄聽傳說指爲過端本以興教化而反傷教化也慎之

荅晉撫劉勉之書執事廉介自持肝腸如雪嘗言生平所見居官之家祖父喪心取錢欲爲子孫百世之計而子孫蕩費只如糞土不旋踵而大禍隨之此執事自愛愛人之格言也尤當書紳以志不忘

官者勢與法之藉而功過之府也其於吏治功多則臧過多則否其於民生功多則安適多則危其於立身接物功多則得過多則失功過何等關繫可冒昧恣睢而不知檢點乎

荅耿逸庵書云友道人倫之一也知固難交亦不易如某之於荆峴知之一日而交以數十年者也願獨鯁過慮者江南受荆峴之福而荆峴受江南之累耳何則不取地方一錢不徇鄉紳一情

不縱吏胥一事不尙聲伎遊覽不入詩文交遊此五者荆峴所優也然屬官有蒙蔽有貪婪有闒茸民累一錢糧有侵那有預徵有私派民累二地方有過往有抽豐有關稅民累三鄉紳有把持有包攬有交通民累四旗兵有窩盜有勾逃有營債民累五五者江南之牢不可破者也荆峴固不能不力挽而施救矣救一分則百姓免一分之累荆峴亦去心中一分之累此其不負天子不負所學也至於寬猛緩急之間必有成畫在胸且以言笑不苟之端人猶有敢於犯之者吾不信也

荅聶輯五略云驄馬西行惟望執法如山守身如玉愛民如子去蠹如讐誨屬吏如師之教弟閱招詳如弟之親師薦舉賢良如讀

古人之書使命可不辱矣

文集

陸清獻公祭公文云當今天下主持正氣俾直道不泯於斯世者非公倡之歟公出而後在朝者知以營私爲恥在野者知以干利爲羞雖未能盡如公之志而禮義廉恥一綫不絕者公之功也自古居高官大位文章事業彪炳宇宙者何代無之而一心光明洞達可以對天地質鬼神反之幽獨而無慚考之詩書而不愧者蓋難其人如公者非閒氣所鍾哉某浙西鄙士江南之賤吏也蒙公之知最深有不可解者方待罪膠城公千里貽詩獎其葑菲昌言於朝聞某罷黜搯腕不平不知何以得此於公也戊午入都始得仰見高山方且以樸訥無能負大賢期許自懼未幾以憂出都

卽所一二略知者亦未能盡吐於左右公反喜其樸而嘉其拙謂  
滔滔世俗中自立正當如此遂薦復其舊職又不知何以得此於  
公也及癸亥到都謁見不敢效世俗之感恩報謝見公如平常公  
不以爲傲顧愈益喜愈欲薦達之是皆不可解者豈非光明洞達  
之胸襟憂世之深憫世之切故其取人也苟樸且拙雖無足重輕  
之人猶取之如此而況其足爲輕重者乎

三魚堂集

蔡文勤公復張清恪書云本朝人物之有定論者魏蔚州湯潛庵  
陸平湖三公三公篤學力行皆同而規模器量要以蔚州公爲最  
公奏疏無慮數十皆有關係端教化疏所以厚風俗也申明憲綱  
疏所以肅官常也科場學政諸疏所以嚴始進絕弊竇也舉十賢

疏得以人事君之義至其辭尚書而處總憲原職慨然以肅風紀  
自任此皆古大臣之風今有不敢行者嗚呼蔚州公在雖執鞭所  
欣慕焉 二希堂集

右政學錄陸言輯

魏先生諱象樞字環極號庸齋官至刑部尚書以道自任在朝激  
濁揚清進賢退不肖無虛日自給諫游歷左都御史陳奏至八十  
餘疏凡 國家大根本大綱常大典禮大政事以及吏治積弊民  
生疾苦無不周悉而薦舉清廉參覈貪墨尤慷慨焉若日月之可  
揭鬼神之可盟先生之學蓋主於誠成於忠而終身存省於勿欺  
者也嘗曰士君子未有不學爲高賢大儒者也然只要實實行去

曾子之日省孟子之反身諸葛武侯之淡泊甯靜趙清獻之焚香  
夜告工夫各有所得予一言以蔽之曰勿欺無論立朝居鄉每日  
所作之事內可以告妻子外可以告朋友便是聖賢路上人若干  
百事中有一二事難以出口者還是工夫未純去聖賢路尙遠其  
講吾日三省一章謂看此章纔見吾身何等關係何等重大凡齊  
家治國任重道遠都在這身子上反身不誠便虧體辱親了怎麼  
擔的這擔子起雖指出三件事來卻總是毋自欺一念如爲人謀  
是人我一體的胸懷如舜爲堯謀禹稷契爲舜謀孔子爲天下  
萬世謀方是忠與朋友交乃五倫中大事四倫都要靠他成就必  
如久要不忘平生之言孔子所云朋友信之方是信傳是道統絕

續關頭必如精一執中舜承堯禹承舜孔子所云三人有師善者  
從不善者改方是習這三件在人看作小節目曾子看作大綱領  
人看作欺他人曾子看作欺自己故不忠不信不習都在心苗上  
檢點人不及知而我獨知之三件正是忠恕工夫用到純熟田地  
所以獨得一貫真傳後來啟予足啟予手時候方卸下宏毅擔子  
完了自省句當此真時習之學終身不能盡一日不可忘的想我  
輩受病處或不止這三件且學曾子從三件下手莫把天生父育  
的身子輕輕壞了令人痛惜大家各自一揣爲人謀較爲己謀孰  
忠責善的朋友交較與比匪的朋友交孰信傳道義之傳較與傳  
名利之傳孰習從此有一省便是曾子後身也其講賢賢易色一



章謂人在世學成箇賢人孝子忠臣信友纔不虛生一場學者終日講求千言萬語只要明這道理道理不明先由心地不清多因好色不肖好賢既不好賢一點誠心已彫喪了那有誠心愛父母於父母必不竭力那有誠心愛君於君必不致身那有誠心愛友於友必不全信人若識得好色念頭是病心上一轉移變而好賢妄念變爲真念人心變爲道心心地何等清明或見賢人所行之事實實效法他或聞賢人所立之言實實遵奉他世間孝子忠臣信友都是賢人都是我所好的我所好在孝子事父母就能竭力我所好在忠臣事君就能致身我所好在信友交朋友就有信這力如何竭也有菽水承歡的也有爵祿榮養的總要立身行道纔

不辱了父母這身如何致也有庶人服役的也有鄉士奉職的總  
要以身許國纔不負了君這言如何有信或言賢當好色不當好  
的或言爲子當孝爲臣當忠的總要責善告過纔不欺了朋友這  
操人人倫上明明白白完完全全難道沒些學力做到這地位既  
說他未嘗記誦這等清心寡欲明善誠身可以對親可以對君可  
以對友在不睹不聞之地理欲交戰之時用了多少功從勉強而幾  
自然豈不是真實學力子夏博學篤志切問近思一生功力和盤  
托出可謂善學聖人之學吾輩細看學莫大於五倫則以賢賢居  
首政莫大於九經則以尊賢居首可見虛心屈己是第一難事是  
第一要務此處見的明行的當別項一綫穿去自不差錯學者不

可不知也觀此可以知先生矣先生尙名節重道義而當時有毀棄防隅志行虧喪託尊崇朱子以爲名者先生與之往來問荅是亦不免失所審擇矣所著有寒松堂全集日知錄元明儒言錄嘉言錄

右學案唐鑑輯

余幼聞魏庸齋象樞胡東甌以溫王近微天鑑三先生講學於白登靈邱之間世稱塞上三君子心竊嚮往欲從受學無由也康熙己酉近微先生弟嘏公天錫任襄城都司未幾先生來遊余適鍵關紫雲書院未得晉謁先生以墨莊引徵詩邑士紳知音律無不爲者余以三詩應命先生乃獨稱賞枉駕樹余山中握手丁甯開

示以性命身心之學且曰余與東甌屏居田野而魏先生方仕於朝子旦夕飛騰公車至京不可不往見之印證所學正後進事也先生既別去二千里外一歲中凡三寄書諄諄然勸以追蹤往哲勿墮流俗古人之誼余固終身不能忘也丙辰余以計偕赴都時庸齋魏先生爲少司農余以闡事期近不敢通謁適三場號舍中晤馬子姓公麟定語次論學知於魏王兩先生之門皆嘗立雪邂逅中相得甚歡場事畢於二月十七日同馬子謁先生於邸中余首問爲學之要先生曰落學昌明確有源流子居其鄉讀其書桑梓遺老口傳手授必曾討論過來乃問道於旨乎天德王道盡於大學一書外此便非正學但須玩味體貼實求身心有得耳又

問小子賦質雖鈍實不甘於暴棄但苦妄念不斷旋滅旋起操持  
道心終不能使之凝定柰何先生曰此切己之問亦可以覘子之  
學力然於此處亦無別法只要立定志向志向既立天理漸熟久  
之妄念不去而自無矣譬如諸君今日公車雖有別處佳山佳水  
亦不暇觀志在進都耳所以漸次北行日近一程亦無不抵於都  
者爲學何以異是又問既儒多教人靜坐余以爲此只是收斂一  
法窮理力行此後更有事在不得單靠靜坐遂爲一了百了也今  
有專守靜坐厭棄事務者其學何如先生曰此論甚善譬如不佞  
待罪戶部一歲錢糧所入幾何所出幾何須逐一細覈經國之計  
方洞澈胸中若單靠靜坐雖心地靈明萬慮澄澈斷無懸空可知

之理自古學術難於得中。若此者殆務高而不求實地者也。誤人不淺。又問詩文一道。或借以明理。或借以述志。似不可盡廢。乃程子深以爲戒。毋乃懲浮華之弊。欲學者務其實耶。先生曰。若有爲而作。便足發揮性情。闡明道義。亦何害於性命之學。若溺志於此。專求工緻豔麗。玩物喪志。所害多矣。不佞平日不禁人作詩文。亦不勸人作詩文。正此意也。語未終。都憲桐城龍懷姚公文然來。晤先生。命與馬子侍坐於旁。先生一見。卽問病狀。姚公曰。連夜痰火作梗。今日差可。故圖一晤。先生曰。貴恙坐在憂國耳。若王師大捷。可不藥而癒。公問先生曰。昨相見否。先生曰。相見某謂之云。以國之洪福。公之威名。小醜蕩平。指日可埃。且今第一急著。在安輯百

姓若我得一良民彼卽少一強寇是得一而實兩也若我失一良民彼卽添一強寇是失一而實兩也已痛切言之矣時以兩先生語涉國政不便詳問然窺其辭旨似爲圖大將軍出師西征而發也又論副憲陽城田公六善疏劾總河請鬻學官弟子員事久之姚公辭去先生旣送姚公復畱論學余出寄近微先生書扇求先生命人轉致先生讀扇頭詩至末二句憑將不負蒼冥意檢點行藏報澗阿稱歎曰一動一靜或行或藏能自檢點求不愧帝天此不自欺之學也旣得主腦更須加功此學更無止境勉旃勉旃次日先生顧余報國僧舍出示聖人家門喻一冊並講義四章日令祖恭靖公勅建紫雲書院於成化十五年賜額今具載孝廟實錄

風徽未遠規模尙存。子其復之。恭靖公嘗摘取程朱許薛五子之書名爲輯要。眞得理學正統。子歸而求之。卽此有餘師矣。又曰學者居家則孝。居官則忠。是兩項名目。卻不是兩項事業。繼志述事。光大家聲。異日樹立。皆根本於此耳。又次日余出都南歸。宿清風店。人事頗稀。因援筆追次存其大略如此。

右書紳語略李來章撰



國朝書履考初編

卷四十四

四

國朝書獻類徵初編卷四十五目錄

卿貳五

王崇簡

艾元徵

傅維鱗

劉鴻儒

王楨

田六善

朱之弼

于嗣登

此處在則券有元道圖

國朝耆獻類徵初編卷四十五

通奉大夫前署江西巡撫江西布政使司布政使湘陰李桓輯

卿貳五

王崇簡

今太子太傅大學士宛平王公在 世祖皇帝時與先太子太保  
禮部尚書文貞公後先入翰林文貞公拜國史院學士太傅公亦  
遷弘文院學士文貞公之爲禮部也太傅公亦以考績加禮部尚  
書然勳階皆次文貞公下故不得追贈其先世及 誥封父母文  
貞公之屢得 恩典也輒貶封其本生父母至太傅公之加尚書  
始得以一品 誥命贈梁夫人云及 今皇莅政太傅公在中樞

文貞公薨後服闋膺爰立之命次年恭遇 太宗皇帝實錄告成  
以勞晉秩太子太傅然後 覃恩及於四世 贈文貞公如其官  
梁太夫人亦再 贈一品公既拜 命欽唵屬某曰吾受 國異  
數榮及所生願吾親不得見矣卽銘幽之辭已不及備將揭石墓  
道載前人功德表 天子殊恩顧非子文不可敢固以請某惟乙  
未歲以貢入京師拜公階下公一見待以國士指授爲文旨要使  
稍有所聞以至今者皆公力也敢以不敏辭謹按公行狀及墓銘  
碑文爲記其大略如左公諱崇簡字敬哉其先家任邱自公曾祖  
諱龍始來京師祖諱鏗考陝西參政加右布政使司諱愛母張氏  
三世皆以公 贈禮部尙書妣 贈一品夫人愛無子以兄錦衣

衛正千戶諱爵之仲子爲後卽公也錦衣公及本生嫡母張氏生  
母焦氏並得 賜封公七歲喪布政公未幾錦衣公亦歿早孤  
然嗣母張夫人督之成立情過已出公事兩夫人曲盡孝道二十  
六舉鄉試負海內重名爲清流引重中崇禎十六年進士甲申三  
月京師破值焦夫人喪給假治葬在外挈家潛奔金陵轉徙吳越  
間久之江南平北還時 世祖廣求文學耆宿以充館選首授公  
內翰林國史院庶吉士 特免教習預修明實錄除祕書院檢討  
歷侍讀國子監祭酒弘文院侍讀學士 詔察明末殉難臣公疏  
言內外死事者合二十有八人以上皆得 贈諡時論以爲允遷  
詹事府少詹事兼侍讀學士如故以疾請告十二年侍郎戴公明

說薦公可大用 世祖違部議特起之其明年以原官兼弘文院  
侍讀學士遷國史院學士及太傅公既遷弘文院 世祖臨朝歎  
爲盛事然以父子不可同列擢公吏部右侍郎兼學士尋轉左拜  
禮部尙書明年加太子太保公建言帝王廟祀宜及守成令辟因  
列商中宗以下七人以上又言宋臣潘美張浚宜罷祀 詔從其  
言公學問該博尤諳練歷朝典故居禮官多所建白皆折衷古今  
合於經義時議翕然歸重然公自以父子並列六卿彌存謙退以  
夙疾請告者再 優詔不許會 世祖崩復固請如前十八年冬  
始得 子告康熙三年病良已遂以老乞致仕春秋纔六十三自  
是徜徉林下者凡十有五年初公值喪亂播遷本無意當世用遭

遇世祖皇帝以文學被知遇時與道會感激思奮然其確乎不可羈縻以富貴之意時時見於言語發於吟詠後堅請至四卒行其志 本朝大臣年未及乞休於 主恩方渥之際進退終始卓然大節如公比者前此所未有也公家貧益讀書引掖後進爲文章凡四方人士至都者以不及見公爲恥客至攝齊升堂必下階握手酌醴延款恆至夜分乃散其論文曰爲文必本於道道在不出尋常行習之間自世有道學之名此道之所以日敝也又曰學莫要於自得知之非艱行之惟艱知而能行此聖賢之所以幾於得也平生嗜學不倦年七十欲依古人以每歲盡讀五經爲夏課其爲文雖卮言爛語無非仁義道德嘗爲青箱堂記云階前闢露



臺方丈餘歲之夏秋日暮父子兄弟六七人率坐臺上或駐論詩  
書或稱述祖父遺事旁及故舊家世之興衰以爲勸誠一偶不至  
徬徨四顧若有缺然者世傳陳仲弓之家門雍穆公益近之至今  
太傅公秉鈞贊化一本公之家學而推而大之以及於天下則傳  
所謂施於有政者豈不然歟公元配梁夫人撫治鄖陽右副都御  
史 贈兵部右侍郎諱應澤第二女以淑慎佐公成名孝廉常口  
授論語孝經教其子女公年二十卽請置側室廣嗣續其卒時年  
三十八公哀思之終身不再娶公薨於康熙十七年十一月某日  
上聞震悼 敕給葬祭如故事諡曰文貞太傅公與其諸弟以  
十八年四月某日葬公於梁夫人先所窆地畏吾邨之西原後十

年而乾學復表其墓道太傅公名熙公冢子丁亥進士見任太子太傅保和殿大學士兼禮部尙書加三級梁夫人出餘子樞官監生湖廣常德府桃源縣知縣卒次然官監教習見任刑部江西清吏司主事次照廕生見任雲南按察司僉事分巡驛鹽道次燕廕生見任江南鎮江府知府加二級次默歲貢生見任兵部督捕司務孫男十一人長克善廕生江西按察使司僉事分巡驛鹽道次克昌廕生戶部陝西清吏司員外郎加二級克寬監生次克任庠生克遠庠生克端監生克剛雙鶴蘭蓀穩住存住曾孫男五人長均次增次基次長麟次仲鳳余及公門垂四十年期待良厚再至京師公已薨逝自愧迂疏伉直與時齟齬茲請告將行撰公墓文

深媿無所成就辜負知己特書公雅尙及學問得力處以告來者庶幾百世以後聞風興起也夫

右墓表徐乾學撰

公諱崇簡字敬哉其先隸河閒之任邱曾祖龍遷居都下祖鏗父愛本生父爵皆仕明以世德顯公生而穎異少爲諸生有聲左公光斗督學順天得公文以公輔期之公於書無所不窺尤究極六經以爲士君子欲進斯世於三代之盛必以經術爲本嘗論春秋志在尊王而以夏時冠正月豈爲下不倍之義乎孔子所書之春卽周之春正月卽周之正月又云詩之正變以聲不以體官商角徵羽正也變宮變徵變也一時宿儒翕然宗之丁卯舉於鄉癸未

登進士第明年闖寇陷京師遂盡室南奔 皇清定鼎始閒道歸  
里會 世祖遴選文學侍從之臣首擢公庶常分校丙戌會試升  
祕書院檢討歷侍讀國子監祭酒弘文院侍讀學士詹事府少詹  
事以疾告歸時有薦公可大用者 特旨起補原官尋陟國史院  
學士先是公長子今相國亦爲弘文院學士 世祖顧笑曰父子  
同官固爲盛事然令肩隨以侍班可乎 特晉公吏部侍郎不數  
月拜禮部尙書又明年加太子太傅而相國復以考績加禮部尙  
書公願以盛滿爲憂因夙疾屢疏乞罷皆不允已而 世祖升遐  
公日夕治 大行喪及 今上登極禮勞劇疾益甚再疏請告得  
允越三載遂引年致仕公歷官殫心職掌所言皆洞中窾要其在

翰林日有 旨察明季殉難諸臣公疏在內大學士范景文在外  
巡撫蔡懋德等宜褒揚以作忠義之氣時喪亂後聞見失實公疏  
出遂爲定論及官宗伯奉 詔議祫祭禮言人人殊公言 肇  
興 景 顯及 太祖宜南向 太宗宜東向出入證據多宋儒  
司馬光諸人所未發又議 大享殿合祀禮公言 本朝所封啟  
運山宜附中岳壇天柱隆業二山宜附北岳壇時議者謂北岳恆  
山當移祀渾源州不應立廟曲陽公謂趙宋時北岳不在境內以  
真定在汴京之北故移置曲陽考漢書地理志所謂曲陽者有三  
惟上曲陽屬常山郡在恆山北谷今之曲陽距恆山絕遠議者言  
是又謂勃業守成難易正等如商中宗高宗周成王康王漢文帝

宋仁宗明孝宗皆宜祀歷代帝王廟其議論精卓不磨類若此公  
雖歸老於家凡 朝廷有大政士大夫疑不能決者皆就公取正  
焉年七十八以壽終竊嘗慨漢高以馬上得天下承秦火之後禮  
崩樂壞而當時爛禮制者僅一叔孫通故儀文章剝不足爲萬世  
法仰惟我 世祖睿烈宏謨混一區宇卽超然遠覽前世興衰治  
亂之由起敝維風整肅百度制作之隆上軼往古固由 聰明天  
廩亦賴大臣如公等贊襄帷幄以開文明之化嗚呼盛矣 今上  
繼承大業 特簡令子以名家碩德之裔由大司馬入典機務而  
相國當河海清晏 聖德日新相與黼黻 皇途益取庭訓而光  
大之後先濟美宣力 兩朝攷諸史冊可方公之先世王公祐及

其子旦然公以盛德享大年躋耄期則尤不易逮遺命吾儒以理  
爲主不得隨俗作佛事及公歿 朝廷遣使唁問 賜祭葬如禮  
禮臣請易名文貞 制曰可及入祀鄉賢 特命諸王大僚而下  
酌酒以奠澤宮之旁冠蓋櫛比父老聚觀嘆息以爲希覲六子長  
卽保和殿大學士熙次檇桃源知縣次然建昌知縣次照工部虞  
衡司郎中次燕戶部山東司員外次默國子監學正孫克善刑部  
山西司郎中克昌陝西司員外俱相國子餘皆績學厲行振振未  
艾所著有青箱諸集文在廬陵南豐間而詩格直追初盛唐人平  
生薦拔士知名者甚眾

毛際可曰余嘗執經於王浴青先生先生文貞公猶子也故得其

行事尤詳使公得居鼎鉉調燮之位必卓然有以自見乃急流勇退若以讓之後人而已不與焉語曰不於其身必於其子孫諒哉

右傳毛際可撰

公諱崇簡字敬哉其先家河閒府之任邱自公曾祖光祿府君始來京師資於晉故遂爲宛平縣人家譜散落不知其族望所自始凡再傳而家始大錦衣府君性孝友讀書知大義掌東廠太監陳矩賢之欲援府君爲理刑力辭不就布政府君舉萬歷中進士初仕潞安府推官以清節著一府人稱之曰王青天但飲潞安水耳自後歷官皆有聲績歿而董文敏公其昌表其墓府君無子錦衣府君生公甫倅卽以予府君爲之子稍長善屬文旁及詩歌古文



辭皆優爲之相繼受知於國子監司業張公爾提學御史左公光斗二公素名知人每見公文輒歎曰此公輔器也年二十六舉於鄉又十六年舉進士知公者欲引之入翰林公方請假營焦夫人葬未暇仕也而值流賊破京師遂挈其家播遷東南久之始歸順治三年世祖章皇帝慎簡文學之臣以儲後用公蒙首選卽授內翰林國史院庶吉士特免教習與諸詞臣一體辦事與修明實錄尋除祕書院檢討歷侍讀遷國子監祭酒入爲弘文院侍讀學士遷詹事府少詹事兼侍讀學士如故以病請告十二年刑部右侍郎蒙公明說薦公可大用吏部難之世祖素知公遂越部議而起公於家其明年以原官兼弘文院侍講學士尋以太宗

皇帝配天 詔加一級進吏部右侍郎兼學士加級如故尋轉左不數月遂拜禮部尙書又明年加太子太保公自爲諸生卽肆力於學日誦記數千言自經史諸子百氏無不貫穿每考論古今治亂興廢之故輒慨然有志當世益務爲經濟有用之術在弘文院詔察明季殉難諸臣始末公卽疏言在內如東閣大學士范景文以下二十有三人在外如山西巡撫蔡懋德等五人或以其身伏節死或父母兄弟婦子相隨死或家人闔門大小俱死其忠烈相同宜並 賜褒揚以廣作忠之典疏旣上時論悉以爲允及在禮部感 上知遇益盡心於職掌會御史乞更定帝王廟祀典公疏言廟制自前明迄於 本朝曾經增定皆祀從來開拓帝王功

業顯著者至於守成令主槩不及與中間如商之中宗高宗周之  
成王康王其行事具見詩書漢之文帝史稱其節用愛民方內安  
甯家給人足宋之仁宗恭儉仁恕明之孝宗亦與仁宗相類憂勤  
惕厲終始不渝此七君者宜百世祀不當以守成見格又言宋臣  
潘美不當在從祀列張浚三命爲將凡三致敗一敗於富平則關  
陝遂陷再敗於淮西則酈瓊叛命三敗於符離則中原遂不可復  
且劾李綱殺曲端與岳飛議不合奏其積慮在於併兵雖爲南渡  
名臣而初無灼然可見之功亦當罷其從祀 詔議給祭禮公疏  
言宜奉 肇 興 景 顯四祖及 太祖南向 太宗東向又  
詔議大享殿合祀禮疏言 本朝所封啟運山宜附中岳壇天

柱隆業二山宜附北岳壇如前明附祀例有建議請祀周公於孔子廟者公獨以爲不然疏言周公制作前代比諸帝王今既配享武王於廟禮數隆重若復祀諸文廟之中於體爲褻非尊崇之得也議者謂北岳恆山立廟曲陽非是公以先儒言考之曰按曲陽有三地理志上曲陽屬常山郡在恆山北谷下曲陽屬鉅鹿郡鼓聚少陽亭晉荀吳滅鼓其處也今之曲陽旣非鼓聚又不在北谷距恆山絕遠遂疏言宜從議者移祀渾源州爲便是時天下大定朔野乂安天子銳意勦興禮樂公旣鉅儒問學淹洽爲上所委任而又身居禮官之長一切制度沿革必皆援古證今侃侃建白雖或廷議糾紛亦皆俟公一言而決上亦必從公言由

是眷注日厚有賢長子曰胥庭先生熙先與公同爲學士至是亦以考績加禮部尙書父子後先同列海內榮之以爲 國家異數王氏盛事晚近數百年以來所無有也顧 天子方嚮用公而公且以夙疾請告矣疏凡再上 優詔皆不許會 世祖皇帝奄棄羣臣公治 大行之喪及議 今天子登極禮儀日夜辦事左掖門疾大作又再疏請解任 上不得已予告公雖里居士論益翕然推之康熙三年疾良已人咸望公復用或私相告語曰 天子且旦暮召公而公於是歲亦甫年六十有三動止康甯如少壯者故事當赴補公徑不甞起遽以老乞致仕自是迄公之歿凡十有五年終不復言出矣一時有識無不爲公惋惜亦無不服公進退

大節以爲仕宦者所難。公交游滿天下，少時所親密者，率多文章意氣之士。既躋貴顯，猶汲引不少。怠雖單門後進，輩行闊絕，每到門投謁，必相與握手款曲。凡被公禮遇者，人人色喜，謂王先生親我也。諸所獎借，其後率皆成名。性清慎，不苟於財，嘗貸前明中貴人何某金百兩，何死於盜，公無所歸。金遂舍諸僧寺，且設位爲文，以告曰：吾用資故人冥福。有同年生宋君某者，寓赤金百兩，白金千兩於公，其家不之知也。宋君歿，公促其子至，如數與之。金其子大驚，願以其半奉公爲壽。公笑曰：如是則與乾沒，有異乎？竟悉子之平居無聲色，博奕之尙，晚歲益嗜澹泊，惟潛心先儒義理之說，以躬行心得爲主。於諸儒論難，不强爲異同，及其發之於文，原

本本下筆輒數千言而悉根柢乎六經其論詩風雅正變以體不若論之以聲蓋體由聲而定也三代以上詩與樂出於一古人以聲詩奏之樂是故詩之本在聲孔子刪詩得其聲則存不得其聲則不存或謂詩有正變聲何以有正變不知宮商角徵羽正也變宮變徵皆變也後儒補六笙詩又補肆夏詩皆未達乎聲之義者也論春王正月則謂春秋之作孔子尊王之作也因魯史之文遵周代之制槩乎無可疑者使以夏時冠周月是倍王非尊王也是故孔子所書春者卽周之春所書正月卽周之正月也其說悉有裨於學者至其他碑銘之文尤見重當世子若孫欲榮其父祖者往往數千里惟公之歸其辭皆典覈有則今翰林侍讀學士葉君

方謫序公集曰色黝然而光味沖然而長蓋實錄也閒召賓從子  
姓與之觴詠及嬰遨山水閒所賦詩清新整麗見者爭傳頌之有  
青箱堂詩十卷續詩十二卷文集十卷家譜年譜各一卷雜著述  
若干卷以某年月日邁疾卒於正寢以某年月日葬於西城關外  
坊畏吾邨之西原配一品夫人梁氏有賢行前公四十年歿詳具  
公所撰行狀中公之葬也穿夫人墓而合焉子男六人長熙順治  
丁亥進士累任經筵講官兵部尚書加三級梁夫人出卽士大夫  
所稱肖庭先生也次標國子監典簿次然山西靈邱知縣次照刑  
部江南司員外郎皆側室趙宜人出次燕候補員外郎次默候補  
國子監學正側室周氏出女子子六人長適太倉州同知陳承吉



次適丁亥進士福建按察使張宏俊次許聘諸生朱持正天次適  
辛丑進士行取候補主事米漢雯皆梁夫人出次適諸生張宏佐  
趙宜人出次適候補兵馬司指揮孫道林側室田氏出孫男十人  
孫女十一人曾孫男一人於是胥庭先生衰經踵門以公之官階  
與其學術勳業當得 賜諡立傳不可不爲之狀以俟太史氏之  
采擇且精是乞銘於大人先生納諸幽竈登諸麗牲之碑以示來  
世而垂於無窮遂述公治命屬狀於琬琰辱於公爲年家子又嘗  
辱公誤稱其文又嘗與校公全集雖才識駕下不足以窺公之深  
然竊願上附於知公者故敢摭摭公家譜年譜及胥庭先生所述  
行略件繫如右

右行狀汪琬撰

惟康熙十七年冬十一月十有七日故禮部尙書文貞王公以疾薨於邸第嗚呼哀哉初世祖章皇帝在御天下大定朝野晏安無事天子思勗興禮樂釐定天地山川祠事成一代鉅典一時儒學文章偉異之人彬彬向用而公以是時歷官宗伯尤爲上所委任公問學淵洽知本朝故實一切制度沿革必援經史據古今侃侃持論務合於典禮或廷議糾紛待公一言輒決其尤大者詔議禘祭禮公疏言宜奉肇興景顯四祖及太祖南向太宗東向又詔議大享殿合祀禮疏言本朝所封啟運山宜附中岳壇天柱隆業二山宜附北岳壇如前明附祀例

又疏言帝王廟宜增祀守成令主如商高宗中宗周成康漢文帝  
宋仁宗明孝宗七君並宜世祀又言宋臣潘美不當在從祀列張  
浚三命爲將三致敗且劾李綱殺曲端疑岳飛薦秦檜雖爲南渡  
名臣無可紀之功當並罷從祀 上從其言公立朝議論多此類  
也長子尙書公熙先在翰林與公同爲學士尋以考績同官禮部  
尙書父子後先同列海內榮之會 世祖章皇帝崩公治 大行  
喪及 今上登極禮日夜辦事左掖門勞瘁致疾累疏乞歸後十  
六年年七十有八邁疾卒 天子哀悼予祭葬恩卹如著令禮官  
以諡請於是閣臣議曰臣謹按諡法道德博聞曰文大慮克就曰  
貞故禮部尙書臣王某兼茲二德宜子諡 詔曰可遂賜諡文貞

嗚呼哀榮之義備矣公諱崇簡字敬哉生平學行文章官爵世次  
子姓具詳汪公琬狀及葉公方謫誌銘中某辱嫻末敢託累德述  
哀之義而爲之誄其辭曰

猗歟宗伯系自任邱皇皇烈祖迺宅燕幽奕世克大厥聲以衰駁  
惟顯考分陝望重來旬來宣嶠潼關隴公實篤生岐疑少成岳瀆  
稟精靈曜苞純弱冠矯翮羽儀初升陽九否柱三辰泰亨 世祖  
龍飛拔茅彙征浴堂賜對禁掖掌綸公遽請告十載東山聲敷物  
聽賢簡帝心乃光薦揆達於黻辰冢宰難之 帝曰毋以予知女  
賢女其強起惟 帝有詔講幄女侍遂佐銓衡遂掌邦禮 世祖  
升遐鞠躬遺寄玉几揚命綴衣陳陛臣力孔艱臣心況瘁四疏乞

歸望高身退公之行已懷彼屋漏永言必孝因心則友公之文章  
披華振秀原木六籍斯足不朽公之下士吐握恐後嵩嶽竦峙俯  
彼培塿聖有遺言平格天壽昊天不弔喪此黃耇嗚呼哀哉 聖  
朝震悼僚屬增欵金吾復壙大官供酌累德銘勛考終定諡惟  
帝念之哀榮斯備某辱鼓琴覆露重陰承諱切怛涕淚雨傾託茲  
旒旗冀寫予情嗚呼哀哉

右誄邵長蘅代某撰

艾元徵

艾元徵山東濟南人順治三年進士改庶吉士四年六月授弘文院檢討十年遷左春坊左庶子兼祕書院侍讀十二年丁憂十五年正月服闋補原官二月遷侍講學士六月遷祕書院學士九月充武會試主考官尋敎習庶吉士十二月授禮部右侍郎兼東閣學士十八年授國史院學士康熙二年授戶部右侍郎四年轉左六年疏稱今日最爲民害者莫甚於私派各部駁查上官催提皆不免有費至司道府廳之差役一時雲集縣堂思厭其欲遂滋私派之弊臣以爲務澄其源簡其事使部臣不得借名詳愼而駁及不應駁上官不得託言急需而差所不必差更請 敕部院各司

詳議畫一以應駁應催爲一類餘卽結案不許滋擾章程既定懸之令甲敢有仍前多事者嚴治其罪則事少而雜費可省費省而私派可息矣部議令各督撫嚴查如有私派情弊卽行題參從重議處得 旨依議九年三月調吏部右侍郎四年轉左十一月遷都察院左都御史十年三月疏言查品級考會奉 旨將漢軍漢人應升官員俱照滿洲例先行開缺候 旨會推惟推升督撫提鎮仍擬正陪似未畫一嗣後督撫提鎮缺出請 敕部先行開列可否會推恭請 睿裁下部議行五月疏言 世祖章皇帝時於出位妄言風聞失實者皆加懲戒以伐異黨同挾詐報復也嗣後果有確見關係政治及大奸隱弊仍無論有無言責悉聽據實陳

奏外餘並不許以浮詞擅行入告部議如所請行十一年三月擢  
刑部尙書十五年七月卒於任九月 予祭葬如例

右 國史館本傳



附錄三 月表 卷之三

三

傅維鱗

傅維鱗直隸靈壽人。世祖章帝順治三年進士，由庶吉士授編修。五年充江南鄉試正考官。九年遷中允。十年御試翰林。命維鱗外轉授山東東昌道。時八旗兵駐防臨清，又由水程赴湖南等省，出征派民夫曳船，日以千計。維鱗議照勘合等定數，毋許苛索，濫應其牽挽。民夫量給工食，報銷總督李蔭祖如其言入奏。得旨允行。十二年九月，諭吏部曰：朕以京官習知法度，外官諳練民情，內外敷歷，方見眞才。故將翰林官酌量外轉。今東昌道傅維鱗愛民有治行，且學問素裕，仍以原官用。十月授大理寺少卿。尋游遷太僕寺卿、通政使、副都御史。十四年三月，疏言御史巡

方期滿復 命宜令自行條荅八事以嚴考覈一曰釐革奸弊今  
天下官貪吏橫假名色而科斂任情指公事而追呼紛擾吏胥無  
賂則廢格文移豪強使財則倖免差役奸弊難以悉數果否殫心  
察訪盡力革除二曰招捕盜賊今天下劫掠公行兵亦爲賊而官  
卽爲窩且山林有嘯聚之眾邪教有不軌之謀其撲滅若干捕獲  
若干招撫若干當覈實彙報三曰揚清激濁近來巡按薦章多至  
數十人所糾者不過一二人自今宜確指循卓實跡其貪酷衰庸  
者不得姑寬四曰清理刑獄近來人多狡詐訟獄繁興陷害至於  
株連捏砌恣夫憑臆伸冤理枉全在讞決公明所有勘鞫各案當  
敘列彙報五曰釐正士風邇來教官闒冗貓鼠同眠縱容劣衿起

減詞訟包攬錢糧當密察嚴究或學道徇庇一併糾劾六曰稽察風力凡遇事當即時勘擬不避權豪不徇情面若瞻顧遷延風力安在自今各已結未結事臚列具奏七曰糾彈督撫近來督撫功在封疆皦然自愛者固自不乏然或有驕縱貪婪視屬官如魚肉恐嚇誅求幾盈千萬在京科道固難得其實迹若同事一方則察訪甚易乃糾彈者少不過畏其力大而反噬耳如別經發覺宜以不職論八曰禁除侈靡近來大吏導從如雲飲食若流一日之費動至百金上行下效相習成風自今宜力崇簡樸正己率屬凡習俗之豪華風土之流蕩皆嚴法禁止此八者風紀攸關澄清要務各令按款自陳以憑考覈庶幾實心舉行各盡厥職矣疏下部院

議行四月疏言近見各部一切參罰不論升遷降調無得免者而敘功敘勞則曰某也已經升遷某也已經降調應毋庸議夫賞罰期平請自今凡有參罰仍照舊例毋以升降倖免而一切敘錄不論升降一體載敘在升遷者固得邀 疊錫之恩而在降革者量準功過分別復職還級亦得開自新之路疏下部議行七月左都御史能圖請更定世職承襲例同官合疏入奏 上以所奏似屬徇私 召集詰問下部論罪能圖倡議變亂成例革世職及加銜維鱗應革職得 旨從寬畱任十五年正月遇 恩詔復原職三月擢戶部侍郎十六年三月 諭獎勤勞奉職諸臣加太子少保十一月乞假遷葬十八年五月補工部侍郎七月擢工部尚書康

熙五年六月以病乞假歸六年五月卒於家 賜祭葬如例

右 國史館本傳

國朝重刊實錄卷之四十五 禮部五

七



劉鴻儒

劉鴻儒直隸遷安人順治三年進士授兵科給事中六月疏請頒賦制以慰民情裁衙蠹以除民害得旨明季加派錢糧恩詔已盡蠲免本內言順治二年徵納之數較明末不減且增是何地何官係何錢糧或本地私徵或部文多派著劉鴻儒明白具奏鴻儒復疏言臣籍隸遷安其催徵事臣知之切見之真遷安自明末每丁銀下下則二錢下中則四錢每上地一畝銀七分有奇百姓莫不稱苦逋欠甚多我皇上優卹殘黎下詔蠲免恩甚渥也乃所徵之數每丁二錢者加至三錢六分四錢者加至七錢二分上地每畝加至八分有奇臣草茅中見此不勝駭愕且本縣縣驛已



裁民壯已裁損夫已裁此三項當減幾許錢糧何爲加多一縣如此他郡縣可知乞 敕巡撫監司清查蠲免庶不致上有輕徭薄賦之名下無輕徭薄賦之實 上命戶部確察尋部臣覆覈該縣以錢糧缺額遂以荒地派之熟地亡丁派之見丁但念其徵收盡歸公用尙未侵蝕姑免議四年調戶科給事中五年糾鉅鹿縣知縣勞有學劣款失實降一級調用七年補上林苑蕃育署署丞十年 特旨以原官起用十三年補兵科給事中十四年三月疏言邇來 畿輔近地道途截劫殆無虛日 諭旨嚴緝不啻再三而盜未弭者大約責成不嚴防捕未善也失事有司多匿飾不報卽聞有開報往往遷延推諉臣以爲防守將領各有汛地按汛地失

事之多寡立參罰降革之科條不少寬貸有司自不敢容隱坐視  
如此則責成嚴今五里十里未嘗無伏路兵丁然截劫之賊動輒  
千數成羣寥寥步卒曷克有濟臣以爲沿路要害必多設弓箭鳥  
槍手馬步相閒不時巡邏互相救應賊可立擒又緝訪窩盜之藪  
發兵擒捕務淨根株不得牽連無辜其捕獲多者當紀錄功次以  
鼓勵之如此則防捕盡善盜未有不弭者也下部議如所請四月  
充福建鄉試副考官八月轉戶科給事中十五年十一月疏言古  
帝王以仁儉造邦其取民也不盡其財其制用也必有其式我  
朝開國以來百度維新勅制立法務臻美善獨於財賦一節度支  
屢見不敷遂至汰冗員增樞務廣輸納督積逋講求開節之道已

無不盡而其實皆不得已權變之策也在既往猶曰時當初始四方未盡歸誠南省用兵軍需旁午又兼賑濟修防建置之費勢不得不然耳今南服削平萬邦底定不於此時總計財賦之數准其出入定爲經久不易之規則日復一日因仍補苴豈能長繼臣愚謂天地生財原自無多必於本源末流詳悉權衡始足俱用今賦役既有全書掌握豈無確數請通計一歲內凡畝賦丁徭鹽徵津稅各省輕齋重運及贖鍰事例等項就其中猥瑣無藝者汰除約所存惟正金粟若干數然後計一歲之中上方供應官吏俸薪兵馬糧料及朝祭禮儀修築工役細至於師生廩餼胥役代食凡各部寺所掌就其中不經無益之費罷除其應用金粟若干數兩

數相衡要使所入之數得合於所出之數始堪定爲會計之準以  
永遠守臣又思 國家用財之大端惟兵生財之本計惟土若使  
兵農同業省度支而紓 國計莫善於屯田之法 朝廷下民屯  
之令招集墾荒立意未嘗不善然設官設役多糜廩祿更滋紛擾  
總計得不償失不旋踵而請罷歷稽古屯制原不在民而在兵今  
各省民田尙未盡闢明末廢藩勦舊田土新經察出者多何可使  
地有遺利請各省駐兵處無論邊腹地方察前項田土可耕者悉  
令兵丁充種先正疆界信賞罰以使之則趨事自力尤須豐其種  
具寬其程效行之數年收穫既充則額糧可減儲備益廣則轉輸  
可省且立有恆業漸成土著足以默制譁變之心唐初府兵之制

無事執耒耜有事執干戈不借司農而坐不乏兵古稱良法至於  
新復之地尤所宜行今蜀黔已入版圖所得之地必需駐守若令  
處處興屯則根本自固戰守咸資而進取有建瓴之勢矣此又漢  
臣趙充國之於先零晉臣杜預之於宛葉確然可循之遺策也抑  
臣又有請者順天左右郡縣拱翊王畿根本要地自令舊人圈  
住深得居重馭輕之意但畿輔之民失恆業則贍養無資卽撥補  
他所之地皆有係屬豈能據爲己業今喜峯冷口諸關外大甯以  
南一帶地方彌望千里咸稱膏壤請令民願出邊開墾者許認爲  
己業永遠耕種沃土新闢所收必饒先事有獲則趨者自眾數年  
後漸次起科成聚成邑堪作神京之保障茲二者皆軍國大計

若當事設誠致行人之兵食充足 國計可以漸紓民賦可以漸減不惟經費有資抑且緩急可恃立億萬年不拔之基業矣部議滇黔未靖各處投誠兵績至需餉無數難以預定會計其兵丁會屯及畿輔民出邊墾種自屬裕餉便民至計應 敕所司詳勘可墾之地施行十七年遷順天府府丞尋授左通政十八年遷太常寺卿康熙三年授通政使六年擢兵部右侍郎八年轉左十年調戶部右侍郎十一年轉左十二年九月遷左都御史先是鴻儒官戶部時甘肅巡撫華善因地方災傷擅發倉糧賑濟部臣循例題參並議罰賠鴻儒無異議至是官都御史疏論華善不應參處臣雖與同官共行之而竊覺未安請嗣後督撫大臣有經濟利民者

當准情酌理允其請不宜拘以文法給事中成性劾鴻儒明知罰  
賄過當不據理直爭又不另立異議曲從同官失大臣體下部議  
以鴻儒先未立議後將公議已結之事指摘沽名降二級調用尋  
卒於家

右 國史館本傳

王楨

故中憲大夫太常寺少卿長山王公以康熙二十七年十月二十九日考終於里第以三十二年冬十一月初三日葬於邑東郊先壙之次其子廷鸞等遣使請銘余乃列次其家世行事而爲之序曰公諱楨字大木號兩嵐其先直隸之棗強人始祖繼安遷長山卜居孝水之南數傳至孝爲靈壁尉孝生東漢東漢生廕廕生重明是爲公考以明經官山西沁州同知以公貴 封徵仕郎兵科給事中生八子公長也公弱冠補上庠有聲場屋順治乙酉 世祖章皇帝龍飛首科領鄉薦明年丙戌成進士以二甲高第除中書舍人是年再行鄉試公分校得故吏部尙書諡恭定郝公惟訥

卷之五 鄉賦五

五



等十二人已丑考選授兵科給事中癸巳轉吏科右給事中掌登  
聞鼓尋轉吏科左給事中乙未分校禮闈得故太常寺少卿尹君  
源進等二十一人得人之盛前後無與比丙申進戶科都給事中  
公四歷諫垣疏數十上皆關國計民生之大者東省賦役國  
初仍明季故額公力陳其弊濟兗東三郡得除荒糧數萬餘頃民  
困以起時方嚴窩逃之例廷議窩主遣戍籍沒鄰佑保甲出銀  
給逃人主家公病法太重上疏其略曰既經發配宜照充軍例止  
發一夫一妻家口田產宜免追論至保甲給銀僮遇極貧之人必  
至蕩產傾家是逃而傾數家之產宜寬其禁世祖章皇帝建  
之卒從公議壬辰癸巳開黃河衝決畿南山東以及河南江北流

亡載道公疏請責令地方官設法安置一時全活無算陝西西安諸州縣輸運本色糧米以供兵食每一石抵銀一兩值歲祲米騰貴每石價四兩糴諸市而四之輸諸官而一之秦民困苦幾不聊生陝督以疏聞部覆曰例也公上疏爭之其略曰秦中年來水旱屢告今以納米之故以四兩之銀止完一金之正賦是一年而納四年之糧民何以堪之夫兵者所以衛民民窮則亂生況秦地西接羌番萬一急而走險變生不測所費豈止數百萬之金錢哉自是罷民輸米國朝以來鄉試副榜准貢閒遇恩例始行公上副榜充貢一疏永著爲例至嚴鎮將之駐防定八旗之官制與夫查叛產興屯田斟酌帶徵之條通融解米之法皆條奏施行他

如川廣缺員就近推升守令量才繁簡互調方面之升遷太速糧道之專責無功嚴覈存留急更協濟等疏皆關切時政之尤者又外糾貪吏之鑽營內指大臣之縱恣悉蒙 乾斷立賜罷斥公荷世祖章皇帝知遇最深每入奏 詢及鄉里父母存亡恩意曲至一日 賜九列大臣褒忠錄臺諫與者僅三人公與焉其膺眷注如此戊戌升太常寺少卿公以父春秋高乞假歸又二年遂致仕公器量凝重平生無疾言怒色在言路侃侃正論不引嫌不避怨不撻拾細故以飾虛譽庶幾矯矯古風節之臣矣假令迴翔廊廟洵至崇階其所樹立豈出古人下哉顧奉身而退棲遲於山顛水涯者至三十年之久識者以未竟其用爲 朝廷惜然公於

出處之際亦有足多者矣公生於萬歷三十七年十一月初八日  
距其卒得年八十元配韓繼配孫并有婦德母儀今耐葬子十人  
某某女五人適某某孫男二十四人舉於鄉者某孫女二十一人  
何孫八人銘曰

嗚呼太常古人風直諫強毅性所鍾進則矯矯爲雲龍橫掃寥廓  
意氣雄退則杳杳爲冥鴻勁翻飄搖謝樊籠福祉在天道在躬聿  
享遐年厥報豐子孫奕奕芝蘭叢鳳毛麟角光大東逝水東歸月  
墮空長白之陰松柏桐我作新銘納幽宮天荒地老相始終

右墓誌銘王士禎撰

卷之四十五

七

田六善

田六善山西陽城人 世祖章皇帝順治三年進士授河南太康知縣九年以巡撫吳景道疏薦才守兼優內遷戶部主事洊陟郎中十五年十月授江南道御史疏言近者部臣條議禁民乘馬蓋欲歸諸官以供驛站軍營之用特是富民之馬固其資財所餘窮民之馬每爲衣食所借一旦強使納之在官或賣之營伍皆不能酬其價值苦累滋繁若謂盜賊無由馳騁彼不畏殺人之令安保其畏禁馬之令且南服未靖船有餘而馬不足奸人乘閒圖利恐官馬之增未多民財之棄無算乞勿禁爲便疏下九卿議弛其禁十六年二月疏言欲安民在勸清吏乞 敕各督撫遇有清吏特

行薦舉吏部於各督撫莅任一二年後列奏其曾經薦舉何人卽可鑒別其能否察吏安民議者或謂舉薦清吏無以處乎不在清吏之數者一難也恐督撫依舊受賄徇私二難也徵糧緝逃各處分未必無望礙三難也然臣謂清吏果得薦舉則飲冰茹檠者見公道尙存益堅其持守一便也羣吏以不著清名爲媿亦力自濯磨二便也某省有清廉幾人以驗吏治之修廢三便也天下曉然知有能必先有守風俗可以不變四便也向日督撫厭憎清吏無益於己今必且卵而翼之親而愛之五便也不惑於三難力致其五便將循良之風不讓前古矣疏下部議行是年巡視長蘆鹽政十七年還掌江南道事 聖祖仁皇帝康熙元年請假歸三年補

貴州道御史四年五月疏言前日部議山陝河南等處三營各裁一營其遇裁之兵窮無所歸飢寒相迫遂爲賊盜如山西督臣奏報大同洪洞所擒獲者是矣蓋挾久練之技處坐困之時故鋌而走險耳請 諭督提諸臣察閱已裁之兵如有弓馬嫻熟膂力精強者仍收入伍給與錢糧自後老弱必斥逃亡不補所漸去者疲卒不慮其爲非所招回者勁兵可收其實用行之既久營無浮濫餉不虛糜矣疏下部議令各營汰去老弱凡年力精壯者仍畱充補六月疏言吏部於往日曾行之事率皆援以爲例意欲如此卽有此例意欲如彼卽有彼例冊檔充棟頭緒紛紜莫窮其弊請令部臣以 睿裁欽定及奉有著爲例之 旨者彙爲一冊敬謹遵



行其餘仍循舊章得旨如所請又疏言皇上憫念候選官員  
飢寒客邸令吏部酌截一年選人畱京半載以來截畱之推官八  
十選一人知縣三百選三十一人其餘尙須守候三四年者按月  
點卯不收少離陪掣空籤選期難料臣以爲業已應選當按名次  
挨掣實籤臨選前兩月投供毋庸按月點卯疏下吏部議罷點卯  
及掣空籤詔此後視原定之數折半截畱餘令回籍聽候行文  
截取七年九月疏言前者吏部見內升候補卿寺等官將近三十  
人計數十年不得補者有之故有漢軍漢人分缺一疏然舊日漢  
軍所升之各部侍郎漢人所升之太僕尙寶各卿皆經裁併非斟  
酌何者當復則壅滯者仍難疏通又臣聞古語爲官擇人非爲人

擇官古之人臣有度量力引身自退者曰恐妨賢能今此風杳不可覩宜於引見啟奏之際察其年貌才力時加甄別亦疏通仕路之一法上可其甄別之奏餘令王大臣詳議改參議道應升之鴻臚寺卿爲科道官升缺是年巡視京通二倉還掌山東道事得旨內升因回籍需次十一年五月授刑科給事中以正四品頂帶食俸十月疏言臣里居時伏讀上諭以蘇克薩哈爲釐拜仇陷殺其子孫連坐族人白爾赫圖皆爲冤枉恩予昭雪眞合王者罪人不孥之意臣思法律爲天下公共者也以滿洲勞苦功高之人因與執政諸臣意見相左輒牽累大案恐百世後尤而效之怨仇相尋借端推刃考周禮有八議之條議親議故議賢議

能議功議貴議勤議實凡有此八者之一罪大可減罪小可赦請  
特制訓誥昭示來茲滿洲犯罪非反叛有實迹者一准於律勿  
妄議株連則儲人才之用固根本之圖皆於是乎在 上是其言  
下王大臣議 從之十二年三月疏言史者古帝王得失之林也  
寬仁明斷之君崇儉納諫之主其民必安其事必治其世必興且  
隆若夫不寬仁而苛察不明斷而因循惡聞過而樂逞欲其民必  
不安其事必不治其世必衰且亂祈 諭日講諸臣通鑑與經書  
並進無所忌諱則其文易明其效易覩得 旨俞允八月轉戶科  
掌印給事中旋擢光祿寺少卿十二月轉通政使司右參議十三  
年二月擢右僉都御史疏言吳三桂負 恩叛逆處必滅之勢者

有五遺親肯主親刑永明王朱由榔乃欲復假名號是將誰欺必滅者一身居天末如坐井中自古及今無滇黔能窺內地之理形勢不便必滅者二其精兵有限聚之似多分之實少湖南四川廣西三路若欲齊發首尾難應必滅者三新收各鎮不皆甘心從賊亦有屈於勢迫者此猜彼忌內亂必生必滅者四前在水西殺戮極慘諸苗銜恨甚深離巢內入後患難防必滅者五故臣謂三桂猖獗不足患而綠旗困苦所宜籌步兵月餉不過一兩有餘馬兵月餉不過二兩有餘甲冑未必堅強弓刀未必精利登山渡水輒資之先驅若不澈底籌畫嚴行整頓恐貽誤非輕臣謂綠旗之力雖弱善用之則強綠旗之心雖渙善收之則聚供給宜足勞逸宜

均體恤宜至先登破陣無分滿漢賞賚公平斯忠勇自奮克佐勁  
旅以奏膚功今日所宜急計者也疏下部詳議鼓勵綠旗官兵敘  
給爵賞例五月遷順天府尹十二月遷左副都御史十四年正月  
疏言臣昔爲河南知縣時孫可望李定國尙據雲貴四川其勢不  
減於今之吳三桂也金聲桓叛江西姜瓖叛大同亦不異於今之  
耿精忠王輔臣也而當日人情未若今日之驚惶疑懼者由其時  
督撫有孟喬芳張存仁吳景道諸臣敦行儉樸慎守廉隅吏治肅  
清民生樂遂也宜 特頒嚴諭令督撫禁雜派覈軍實所屬官員  
有剝民敗檢者立行糾劾省民力以安民心更審酌勦禦之機守  
漢中進福建江西之饒撫等處兵使接應建昌浙江之金台等處

兵使接應衢州近見江西浙江報捷諸疏屢言殺賊累萬然必待殺盡而後入閩恐愚頑之民無盡草竊之賊亦無盡臣謂耿逆先擒則羣賊自息如昔日姜瓖乍叛山西土寇蜂起姜瓖旣滅土寇盡歸烏有其明驗也至若吳逆狡謀覲以一隅之地困我天下之全力我卽以天下之全力因此一隅之賊黨待吳逆授首則四川廣西可不煩兵力而自定矣二月疏言臣籍山西與陝西接壤黃河自邊外折入內地經保德臨汾以至蒲州南北一千餘里蒲州上至禹門係平陽府所屬對面有西安重兵以蔽其前近今設有提督總兵可謂防之有道矣自此以北永甯州臨縣則爲汾州府所屬其渡口有孟門鎮高家塔等處再北保德州爲太原府所屬

其渡口有黑田溝窮狼塢等處河西則陝西之延安府素稱荒野  
河東則山西之交城縣路險山深草竊最易潛匿請 敕撫提諸  
臣就見在之兵分撥防範綢繆於未雨之先庶不張皇於臨事之  
際十月疏言今大兵已抵平涼王輔臣迫於必死之勢雖我兵勇  
能衝鋒智能料伏然殺賊百不償失兵一當於平涼城下駐可戰  
之地以逸待勞急攻固原絕其糧道平涼地瘠非比湖南地廣米  
多可以持久糧不得通人心自散卽有斬王逆之首詣軍門乞降  
者矣若賊東出卽撤兵東應西出則撤兵西應疲我師徒分我威  
力固原圍解賊氣貫通此斷斷不可者也諸疏並下王大臣議行  
十五年二月充會試副考官十六年四月擢工部右侍郎十七年

六月疏言近以暑氣炎赫 皇上省躬引咎飭臣工滌慮洗心於  
內外情形洞若觀火臣謂條例之不善尚易更張吏治之混淆極  
難奏效今日官至督撫居莫敢誰何之勢自非大賢鮮不縱恣道  
府每年規禮若干再行搜括若干則道府所轄官民如賣之道府  
矣州縣每年規禮若干再行嚇索若干則州縣所屬士民如賣之  
州縣矣 世祖章皇帝時山東巡按程衡劾巡撫耿焯江南巡按  
秦世禎劾巡撫土國寶兩撫皆置重典一時天下肅然今巡按久  
停雖欲議復恐選擇難得多人惟 皇上欲澄清一省則選一人  
遣行兩省則選兩人或一年二年再清某省則再選不必一時俱  
遣出其不意示以不測使天下貪惡之官不敢恃督撫之熟交而



肆志卽有不肖之督撫亦莫敢自謂處莫敢誰何之勢而庇貪害民矣疏入報 聞八月調戶部右侍郎十八年二月疏言錢法之設所以通有無利民用自秦漢以及唐宋語國之富曰貫朽語家之富曰萬貫皆錢也非銀也至金元以銀兼錢與鈔而並行明之中葉乃專資於銀闔逆變亂銀或沈於江河埋於山谷貪吏又欲爲厚藏之計致民窮財盡今欲救天下之窮惟有廣開鼓鑄一法鑄錢所資銅六鉛四而可採之山所司每深諱之蓋恐其時有時無貽賠稅之累且上司一聞其地開採此挾彼制誅求甚多也臣謂宜令天下產銅產鉛之地任民採取有則以十分之二輸稅於官無卽聽之不使畱患於後日各州縣自行稽察申報道府勿旁

撓多官縱役攬擾其報採多者酌量議敘則官與民無不樂爲廣  
資鼓鑄將見錢不可勝用矣事下九卿詳定所奏爲例議上得  
旨採銅關係國計其令各督撫率屬殫力奉行務期有裨實用三  
月以老疾乞罷 慰留之五月轉左侍郎二十年二月 命以原  
品致仕三十年四月卒於家年七十有一

右 國史館本傳

公諱六善字兼山山西陽城人先世有隱君子諱眞元元末自高  
平始遷焉遞傳至寶堅早卒妻王氏撫遺孤士珍以節行旌士珍  
生世爵公父也有文名公生四歲失母燕夫人十七喪父孤苦力  
學舉順治乙酉鄉試明年成進士知河南太康縣當兵燹後勞來

安集百姓賴之在縣六年以治行第一入爲戶部廣東司主事尋  
權關臨清再監鳳倉兼權臨淮等關罷濫徵革奇羨商民稱便歷  
本部員外升廣東司郎中以選授江南道監察御史入臺數日以  
馬禁甚嚴官民咸病卽疏請弛其禁報可又疏請勸清吏以養  
百姓其略曰今貪風日甚積重難返緝逃開荒者勸是賞能也輸  
銀輸粟者勸是賞富也何如得一清吏之爲有益乎尋掌江南道  
事以江南蘇松等縣錢糧獨重考成降革法獨峻疏陳四事一請  
州縣官到任三月後其交代冊許令自行題報以悉州縣難言之  
苦一請州縣缺出吏部選擇各省紀薦甚多資格不應考選內升  
者再試以蘇松大縣一請禁士民之告訐一請多設督糧之佐貳

議格不行辛丑巡視長蘆鹺政使竣請假省墓康熙甲辰補貴州道監察御史歷掌陝西廣東道公以吏部條例日繁疏曰臣竊惟例者必斟酌乎不易之道請旨依准奉而行之然後可以服人之心近日吏部用人行政或有偶出意見者或有實係過誤者幸得奉旨率皆循之爲例是意見可以再行過誤可以再舉也例既無所不有弊故無不可爲皇上不得而詰之吏部曰有例在也科道不得而糾之吏部曰有例在也抑知其意欲如此卽有此例意欲如彼卽有彼例哉上甚是之又疏陳畱任之弊曰近來錢糧未清盜賊時發故催緝法嚴又議畱任亦磨頑厲鈍之意然奉行之閒多未便缺有美惡路有遠近儻升授邊遠地方不肖赴

任止須報劫盜一案扣錢糧數兩督撫便不得而催之吏部便不得而問之矣且督撫督緝畱任之官非能令其必完必結故又有二年議處之例應處分者翻得展限之期已被論者借爲戀位之具是欲嚴其法而實乃寬其局也又疏稱今日百姓窮困日極地方官員貪婪日甚雖愛民之 詔屢下誰肯奉行事關根本臣竊憂之爲今之計莫如懲貪宜先自上司始近奉 旨切責督撫參奏止及衰老微官請自今每歲令部院堂上官彙題某省督撫所覺發者係大貪極惡某省所糾劾者係微眚小過而黜陟隨之此治病者急則治其標之說也迫行之旣效廉恥稍明清議稍立貪風稍止當另有和平之劑矣又疏言奸民叩 關視挾官爲得意

之計倚騙人爲致富之資豈眞報效 國家總欲詐害里黨應准  
光棍律治罪庶善類可安邪謀知儆世道人心所係莫大於此公  
所條上皆鯁直無隱指摘痛癢切中冑繁雖或不行而 上常嘉  
納付所司詳議爲多公見 上宵旰求治勤學日新復上疏言  
聖學不必專待經筵請聽政之暇日讀經史反復思繹古之所是  
何以行之於今前之所非何以戒之於後疏入報 聞戊申巡視  
京通二倉先是公有倉糧積弊一疏及拜 命旬稽精覈一無敢  
干以私黠徒某倚勢恣橫前使者莫敢過問卽劾寘之法還掌山  
東道以內升歸與白尙書東谷喬宮贊白山衛侍御澹足諸公爲  
耆英會公年差少咸重之如溫公之在洛也究心經濟日讀史以

裨實用會 上念言路諸臣以選內升者顧需次間居 特諭悉  
 以應升品秩復補科道王子被 召以正四品服俸管刑科給事  
 中事時滿洲株連法嚴公疏言施仁之法莫大於省刑立國之謀  
 必先於重本況滿洲皆勞苦功高之人 國家元氣所係祈 制  
 為訓誥昭示子孫以後滿洲犯罪除反叛有實迹者罪及父母妻  
 子收其財產其餘即有重罪一准於律不得株連下部議 從之又疏急停  
 報盜之令總計緝盜之功謂緝盜之法最不一矣有縱小盜以誘  
 大盜者有用此盜以捕彼盜者有急之愈去緩之可得者有捕緝  
 於後不如摘發於先者因時設法隨事制宜今乃一切責以先報  
 則事有定名時有定限棘手之事不一便宜之計難行臣謂劫盜

原與大寇不同宜與人命事同一例先審定而後題報年終總計其數以定督撫功罪公先爲御史時陳諱盜之弊甚悉其言互相發論者皆謂不易也公又再疏 聖學宜先讀史言臣於康熙七年間具有治道關於經史一疏臣謂史者古帝王得失之林也寬仁明斷之君崇儉納諫之主其民必安其事必治其世必興而隆不寬仁而苛察不明斷而因循惡聞其過樂逞其欲其民必不安其事必不治其世必衰且亂伏祈 諭日講諸臣通鑑與經書並進仍令不許忌諱則其文易明其效易覩又疏請停磨勘清學政曰數年來各省學道貪墨成風以考爲市皆磨勘爲之端也磨勘者勘其文也以爲無疵則無疵以爲有謬則有謬督撫布按因而



勒索宦宦親舊因而請託既爲人矣豈不爲己既無名矣豈不爲利是磨勘虛文斷宜停罷尋轉戶科掌印給事中補光祿寺少卿調通政司右參議甲寅升都察院左僉都御史時吳三桂叛兵興旁午公請優恤綠旗官兵嚴禁首告叛犯楊起隆之誣累是年五月升順天府尹部議發庫銀十萬兩令城市買米價騰踊人心惶懼公抗疏停罷民戶祝之公後致政歸送者多泣下十二月升左副都御史公上平賊緩急之宜請綜覈錢糧愛養百姓審勦伐之機嚴賞罰之典又以山西爲神京右臂請嚴河防平涼賊王輔臣勢已窘蹙宜以逸待勞坐制萬全河臣王光裕請捐納生員公力爭以爲不可行者有五時方急調兵食九卿會議將可光裕奏

上以公言特命一併再議尋升工部右侍郎應 詔陳言略曰  
近見會推布按凡參政副使等官俱得拔用恐各官皆萌覬覦之  
心臨時不無夤緣之弊臣謂推布政仍宜於按察中以次求之推  
按察仍宜於參政中以次求之不可當此任也方可於副使以下  
求之此外親民之官莫如知縣今日知縣皆捐納矣又有納先用  
者又有納卽用者斷宜停止夫以白丁納千餘金便爲銅章墨綬  
之官豈不爲榮必欲早得一縣其意安在是明明以窮困之民爲  
償債之地也又請復差巡按以清吏治謂今日官至督撫則部院  
之考覈不能得其贓私科道之風聞不能得其實據居莫敢誰何  
之勢自非大賢鮮不縱放道府每年規禮若干再行搜括若干則

道府所轄之官民如賣之道府不問矣州縣每年規禮若干再行  
嚇索若干則州縣所轄之士民如賣之州縣不問矣非遣巡方此  
弊終不能解也若槩差恐難得其人伏祈 皇上欲澄清某省命  
察院堂上官於御史中慎一年或兩年再清某省則再選不必一  
選一人兩省則選兩人或時俱遣出其不意以示不測戊午調戶部右侍郎督理錢法已未  
轉左侍郎又二年以年老致仕公故恬於世榮始省墓家居者三  
年內升待次四年讀書自娛若將終身焉兩在言職皆 特恩拔  
擢公益感奮知無不言不少唯阿既在部爲大僚卽素有直聲者  
或緘默固寵公益侃侃言人所難言不肖苟同當己未地震自陳  
疏有云臣任僉都御史副都御史言官之長也天下豈無大貪極

惡之官臣無糾參之實力部中豈無朝三暮四之弊臣無駁正之  
讜言任工部侍郎戶部侍郎卿貳之官也知官員之捐納濫觴別  
無生節之術知督撫之奏銷浮冒別無體察之方實因庸劣之姿  
竟蹈因循之路報國之心雖在溺職之罪良多讀者悲其志焉  
歸後十年而卒康熙辛未四月也年七十公勇於自治嘗曰孝友  
忍讓吾父遺訓也行之者恕而已吾未嘗不一日反求於心又曰  
吾歷官四十年無一念不可對天無一事或敢欺人從弟七善公  
教之成名官至驗封郎中有聲蹟嘗曰不敢辱吾兄也與人交惟  
以道義相規勉魏敏果公在事嘗謁公贊助爲多于清端公之撫  
保定也公實舉之會公夫人之喪來弔公一無私語于退而歎曰

田公公忠愛我吾敢不自勵世兩稱其賢所著有鷓棲幔坡諸集拾瑤錄公子今存者沈淮舉人澆洵洞諸生皆好學克稱其家贊曰余讀宋史太宗稱田錫直臣朝廷每有闕失方在思慮錫之章奏已至未嘗不三歎其爲人公豈其苗裔耶何其類也公之疏皆質直無文飾而忠愛之忱溢於言表然亦可謂觸忤矣而卒不獲譴又未嘗不歎公遭逢之盛也其惓惓於 聖學屢以經史爲言此與表聖之進御覽御屏者亦何以異旨哉乎儒者之言誠有國者之明鑑也余敘次公之疏有槩有詳亦多未載者他日之史當因類以附著可參考而知焉

右傳韓棻撰

朱之弼

朱之弼順天大興人順治三年進士授禮科給事中累轉工科都給事中八年閏二月疏言 國家首重體統尊卑原有定分褻體統而紊尊卑者莫如胥吏加銜一事舊例胥吏供役三四年憐其積勞無過予以議敘選用佐貳今戶兵等部書役別繫職銜既奔走本衙門中復趨踰卿大夫之列非官非吏有玷班行且此輩原係貧乏無賴不數年間家資巨萬衣食服飾窮極奢華非舞弊作奸何以致此況戶兵堂司各官幾經遷轉而此輩歷年甚多愈久反不可去官如客而吏如主流弊何窮請嚴查斤革庶名器重而弊蠹清下部議行九年丁父憂十一年補戶科都給事中十二年

正月疏言小民納糧一也其自有漕糧白糧軍糧恤孤糧四種人皆樂軍糧恤孤糧遲緩無增耗之費有力之家往往營求撥兌派漕白於單弱之戶苦樂不均害一兌軍糧必行折色軍得銀則沿途妄費挂欠之弊由此害二兌恤孤糧半飽豪強鰥寡孤弱無所控告害三請  敕漕臣糧道親督州縣畫一編徵盡數輸納敢有撥兌者治罪又言  皇上廬念於錢糧侵欠兵食不充今侵欠之大者莫若漕欠與糧欠漕欠宜責總漕巡撫親督糧道糧欠宜責該督撫親督布政今年帶完某年之欠若干逾限不完均以溺職論嚴立考成其奸弁侵虧及有司怠緩從事者參處如此歷一年則銷一年之欠官有責成而舊欠可清  上是其言並嚴飭行二

月疏言 國家章程大備六部各有成書儻部臣實心任事利自知舉弊自知革言官不過拾遺補闕而已六部任事之人視國事如家事猶恐廢弛今則盡若事外疑事畏事之念多任勞任怨之意少事稍重大則請會議不然遷延日月行查而已不然聽督撫參奏科道指糾而已不然苟且塞責無庸再議而已臣愚謂今日之治惟在擇人而久任責成效而定賞罰以行法伏祈 皇上面召諸大臣親試才品因能授任復考其歷事後興利幾何除弊幾何視成效多少以定功罪行賞罰無少姑息則人知法之必行而事舉矣 上諭六部務整肅一新不得仍前怠忽四月遷太常寺少卿七月授右通政十月遷宗人府府丞十一月擢戶部右侍



郎十三年河西務鈔關員外郎來世德虧額踰萬事下戶部後援  
赦免議奉 旨切責部臣鑄秩有差之弼降三級調用十五年  
六月補光祿寺少卿八月遷通政使司參議十七年四月授左副  
都御史疏言巡按未得其人其要惟責成都御史嚴加考覈而已  
巡按之賢不肖卽堂官之賢不肖臣請與同堂諸臣暨諸御史約  
一曰操守潔清毋貪污不法一曰舉劾得宜毋賢否混淆一曰撫  
按互糾毋瞻徇督撫若臣等定差不公考覈不當巡按尤異而不  
特薦敗類而不特參諸御史亦得糾臣所以交相勸誡者以此至  
於巡方應行事宜御史親歷其事見聞必確應責掌河南道會同  
十四道各抒見聞孰爲興利除弊之事詳悉陳奏 敕部院諸臣

定爲畫一奏請 睿裁然後刊刻成書永遠遵行下部院議 從  
之十八年四月疏陳淮庫宜覈收支 敕漕運總督將節年出入  
挂欠並庫餘各項銀兩歲終造冊奏報以憑覈銷又楚漕宜畱協  
濟楚省接連滇蜀大兵徵調必由之地南糧一項恐不足用漕項  
銀米仍應畱濟軍需又漕折宜清完欠 敕浙江巡撫嚴查解交  
納冊其未完之銀有無侵蝕以憑覈造又錢局宜查銅本 敕錢  
法侍郎將各局未完本息限追報部得 旨嚴飭行尋遷戶部右  
侍郎康熙二年轉左三年充武會試副考官四年調吏部左侍郎  
五年七月擢左都御史十月轉工部尙書六 疏言閩省官  
兵每年所需月米除徵米十萬二千餘石外 一十餘萬石每

石價銀二兩四錢 朝廷買米養兵絕不虧損民價 恩至厚矣  
臣聞延建汀邵苦於買米之攤賠有願繳田入官者漳泉之間逐  
月按地畝均派方司餉未到日借派借派者有派竟無還也及司  
餉既到日勻補勻補者餉米不敷按畝攤派也又巧立名色曰預  
徵預徵者先事而派也各縣派米於民每石必加六斗又不令納  
米折價三四兩不等是數倍於正供也請 敕該督撫查究夙弊  
庶免朘削百姓之害 特諭飭督撫嚴察七年調刑部尙書八年  
六月 上諭部院科道陳奏民生疾苦之彌上言各省存留錢糧  
世祖章皇帝因軍需迫急曾經裁減遵行已久昨午部臣又請  
酌減夫存留各款原爲留地方公用裁一分則少一分當其事不

容已費無所出勢不得不派之民間且不肖有司又因以爲利豈宜較錙銖而不計久大請復康熙七年以前存留數目百姓可免派累又言人命至重臣見八旗僕丁於每歲報部自盡者不下二千人豈皆樂死惡生哉由其平日教不謹而養不備飢寒切於中鞭撲加於外忍恨自盡勢固然也竊思人雖有貴賤均屬赤子請敕八旗凡有僕婢之家當時其教誨足其衣食卹其勞苦減其鞭責使各得其所歲終刑部備造一年自盡人數係某旗佐領下某僕註冊呈覽俾人知儆惕而生全者眾又言貪蠹法非不嚴而貪污仍敢肆行者恃與受同罪之例與者不敢質證耳世祖定令官犯贓十兩役犯贓一兩流徙計贓滿數分別斬絞蓋專惡

貪官蠹役特爲立法如非官役不用此例今不論有祿無祿與官役同罪則一賊滿貫同絞三命一兩十兩同徙三家是通用重典非立法之初意也且貪蠹事發被證皆畏同罪刑訊不招卽有供吐十隱七八徒以箝制被誣之口而使大貪漏網揆之於律似有未合請嗣後因事賄賂者照例同罪如因偏抑出錢儻非官役仍照舊例庶過證與錢者得吐實情而國法伸矣 詔並如所請九年調兵部尙書十二年給假治本生母喪十四年丁母憂十七年補工部尙書二十一年二月充會試正考官十月以估工浮冒不嚴覈減部議革職 特旨降五級畱任二十二年十二月會推湖北按察使之弼首舉道員王垓 上以所舉非才交部察議降

三級調用尋卒於家

右 國史館本傳

光祿大夫工部尙書幼庵朱公始以諫臣事 世祖章皇帝謹直  
端亮著聲於 朝冠 世祖方嚮用公驟遷既列於九卿矣公遇  
事敢言不能爲媿阿依比中間以誑誤降秩在 朝公卿輩益重  
公 世祖亦雅知公旋由卿寺擢中丞倚任口重公感激知遇累  
月之間章數十上至其所難言雖城社狐鼠之奸苟利 國家不  
避也洎 今皇帝御極眷注尤隆 命貳司農簡任少宰遂由都  
御史洊歷三部尙書所建明爲尤多後以會推事被 旨詰責九  
卿皆知於公無與也而公難進易退之節始終不渝遂引罪去位

國朝通志卷之三十一  
家居課兒講誦經史暇或策杖逍遙郭外寄興詩酒人未見其有  
愠容余通籍時公已位正卿舍弟立齋於公有通門之誼以是數  
從公游比往來尤密又次兒炯出公門下今年秋公臥疾數往候  
公十月之朔執手榻前猶相與慰答如平生歡旣而曰身後事幸  
君畱意越三日捐賓客其孤儼屬公門人編修周金然吳苑來徵  
銘於余且告葬速余追惟公之立 朝大節載在 國史天下所  
共知至讀其疏章指陳剴切雖宋之田表正范蜀公殆無以過其  
爲給事也所言重名器以尊 朝廷革久役以清弊蠹嚴禁派糧  
積弊及糧船私債事皆施行其論破積習以圖實效謂 國家之  
事全在六部而今日六部之病惟在推諉大抵疑事畏事之念多

任勞任怨之意少一遇事至有才者不冒決無才者不能決事稍  
重大則請會議不然則遷延日月行外察報而已不然則卸擔於  
人聽督撫奏參不然則畏首畏尾聽科道指名而已苟且塞責無  
庸再議而已上下推諉以爲固然彼此相安以苟歲月如此 國  
家之事安得不廢百姓安得不困而欲望致太平必無之事也因  
歷數六部推諉之病皆 皇上不擇人不久任不責成無法柄以  
馭之之故自今宜行試詢考覈之法視其殿最以定功罪而行賞  
罰法在必行無所姑息則風紀整飭實效可觀矣其在御史臺也  
論振綱紀以收澄清之效嚴考覈以定畫一之制謂民之不安吏  
之不察由巡按之不得其人也而其要惟在責成堂官嚴考覈而



已蓋巡按之賢不肖卽堂官之賢不肖也自今巡按溺職請未治  
巡按之罪先治堂官之罪若臣等定差不公考覈不當受私請屬  
阻撓事權諸御史亦得舉奏夫自治而後可以治人正己而後可  
以率眾責成有歸則紀綱自振至於巡方事宜諸御史並有見聞  
但令會同參酌定爲畫一之制自足以興利除害不然議論益多  
端緒愈亂巡按止皇皇補救細過之不暇則亦安所措其手足哉  
是時 世祖皇帝方嚴懲貪之典凡貪官得贓十兩以上流徙塞  
北著爲令公疏論曰此令一出而天下不復有清官矣何則有司  
畏令之嚴皆攫取民財以媚其上官上官挾 朝廷之禁以恫喝  
求之於下無所不至雖欲不貪勢不能也清官由此而變爲貪官

小貪由此而變爲大貪矣且自 上諭宣傳之後撫按所糾者皆  
罷輒殘疾與夫小貪之人必無有以大貪入告者何則一經提問  
有司無不求滅贓罪圖保身命雖有盈千累百之贓而及其結讞  
期以不滿十兩而止是有司之貪者未糾以前徒層累而輸於上  
官被糾之後又層累而輸於問官而尺籍所科百不一二蓋雖起  
古龔黃之徒爲今之有司未有不犯十兩之令者而今日普天之  
下盡是不取十兩之有司豈今日之有司皆出古循吏上哉良以  
有嚴令之名無行令之實令嚴則思遁也 皇上何不更法而變  
制但擇撫按一大貪者而懲之以戒眾貪擇撫按一大廉者而獎  
之以勵眾廉於以惠百姓而格天心或有裨益也會天旱極言山

東前撫臣耿焯河南撫臣賈漢復以墾荒蒙賞而百姓以賠熟受困歲增數十萬之賦稅大約多得之於鞭笞敲剝呼天搶地之子遺而非額內樂輸之賦稅怨苦之氣積爲沴厲又部臣救荒無術賑濟濡遲公上章糾劾適中州報災戶部覆奏 皇上步禱精誠格天六月丙甘澍已降遠近霑足奈何彰德衛輝獨請蠲恤公言於 上曰此小人之言明欺君父百里不同風千里不同雨豈輦下得雨普天率土毫無差別且堯湯之世何以有九年七年之水旱也復奏云河南撫臣以被災細數報部覆請再勘旣以撫臣爲不可信矣而又倚之以踴勘藉使撫臣告災如前部臣信之不可不信將必另差人踴勘不過徒增地方煩擾耳又自夏徂冬被

災州縣豈盡停徵待至勘明已屬明春雖復蠲免徒飽吏橐而嗷  
嗷待哺者已轉爲溝中之瘠矣與尙書王宏祚力爭再三奉 旨  
令宏祚陳狀宏祚雖彊辨然終詞屈 今上親政公爲大司空極  
言閩地兵米之苦謂延建汀邵士民苦於買米之攤賠至有願輸  
田入官者而漳泉之間則直派之百姓宜 敕督撫窮治所司使  
百姓免朘削而 朝廷百萬之金錢歸於有用又言私派民夫之  
害謂閩民旣罄其食以供兵復驅枵腹之性命以供無窮之役閩  
民何罪臣實痛之 天子下詔切責督撫大吏大吏以下多得罪  
閩中積弊遂革旣爲大司寇則請旗下軫恤家人更定私嫁之條  
俾免離析請復康熙七年酌省存留錢糧以紓百姓又以懲貪過

峻請自今非係官吏因事賄賂者凡求索科斂徧抑取受及無祿人仍遵律文科斷至於鋤大猾釐積蠹俱 國家大事皆他人所不能言亦不敢言反且以爲不足言者而公獨侃侃陳奏鋒發矢激中外屏氣嗚呼若公者豈非其忠亮之節出於性成者歟公之以侍郎左官也人或勸公具疏自明公曰吾昨一歲四遷不以無功辭今甫一謫卽以無過辨可乎人服公得大臣體其再左遷也余弟立齋時爲憲長與公同罷笑謂公曰曩固聞公之義而躉之今得從公後其敢有所言公曰然哉余弟嘗言每議事與公及蔚州魏公接茵而坐三人者所見略同公論議尤以惜人才重 國體爲急在部遇事有不可輒獨爲一議同官或迫之不能奪其公

忠愛 國無事不然所傳奏牘不過什之一二而已公諱之弼字  
右君幼庵其號本徽國文公裔世爲閩延平人至四世祖鳳梧公  
來學京師因家焉曾祖雲庵公諱英祖忠齋公諱國相考裕我公  
諱世奇忠齋公生三子其次曰濟寰公諱世才公之本生父也生  
子二長卽公次侍讀學士冑齋公諱之佐裕我公無子以公爲後  
其後以公貴 贈其三世及本生父皆光祿大夫刑部尙書曾祖  
妣張氏妣左氏本生母武氏皆 贈一品夫人公生而端凝穎敏  
絕倫順治二年登賢書明年成進士選授禮科給事中歷遷工科  
都給事中己丑分校禮闈得人最盛踰一年丁外艱服闋補戶科  
都給事中未幾除太常少卿歷右通政宗人府丞擢戶部右侍郎

其明年以公事貶官十五年補光祿少卿轉通政司右參議明年  
以左參議擢都察院左副都御史 今上卽位爲戶部右侍郎居  
二年轉左甲辰充殿試讀卷官明年轉吏部左侍郎又明年七月  
拜都察院左都御史十月調工部尙書又二年爲刑部尙書癸丑  
充殿試讀卷官疏請爲本生母終喪久之丁內艱服闕補工部尙  
書壬戌充會試總裁九月充讀卷官明年冬解職家居凡四年康  
熙丁卯十月以疾卒距生天啟辛酉六月享年六十有七公事親  
以色養居喪盡禮與弟冑齋公友愛自延師受室及諸居處服御  
皆爲辦治自少至老每食未嘗不其又能推恩以及其九族嫻黨  
執友待以舉火者甚眾其有窳窳之不舉者嫁娶之不備者公皆

爲之仗助無所吝倦嘗買妾詢知其爲士人女也弗御而嫁之年  
十六讀書塾中聞鄰有哭聲以貧甚將鬻其子公爲之贖金代贖  
若此者在他人雖得其一節猶足以傳而於公之盛德固瑣屑不  
能以悉書也公嘗撰述薛文清胡文定論政之語用以自警居常  
好手輯先儒遺書刻之家塾其所精思熟復者尤在近思錄朱子  
節要上蔡語錄諸書燕寢門閤並勒箴銘蓋其淵源根柢如此故  
其立身持論無造次苟且得於學問者深矣娶劉氏先公卒 誥  
贈一品夫人子三人長儼刑部陝西清吏司郎中娶袁氏繼娶吳  
氏次伺候補內閣中書舍人娶張氏次价官監生出爲冑齋公後  
娶張氏女六人一適通政司經歷林國樑一適內黃教諭鄧雋一



適孔興濟一早卒一適興濟爲繼室一適翰林院檢討田成玉孫  
男三人好仁揚武兆昌孫女三人儼等以今年十二月奉公與劉  
夫人合葬於永定門外管村祖塋之北阡銘曰

在昔 世祖惇大明作公言於官審審諤諤洎乎 今皇熙洽化  
醇公言於 朝侃侃閭閻靡事不言靡言不殫小廉大法公在  
朝端上殿如虎當門有蘭一辭引去退易進難進則盡忠退亦希  
直 國之老成進退惟式諫草雖焚豐碑刻斯謂余之私 國史  
有辭

右墓誌銘徐乾學撰

于嗣登

于嗣登字岱仙直隸安州人少以孝聞登順治丙戌進士授御史累官刑部侍郎讞獄多所平反爰書有不當者必力爭之曰人命至重吾何惜一官時人稱爲今之于公

右述聞謚瑤錄

